





*chi l'a pi 'd fil farà pi 'd teila*

*Ex libris*

LUIGI FIRPO

27.6.7.

FIRPO

3060

BIBLIOTECA NAZIONALE  
TORINO

# HIPPARCHVS, DE RELIGIOSO NEGOTIATORE.

Disceptatio

*MEDIASTINVM inter ac TIMOTHEVM:*

QVÆ NEGOTIATIO A RELI-  
gioso statu abhorreat.

*Lucubratio RENATI A VALLE  
Magistri in Theologia.*



FRANCOPOLI  
Apud Petrum Saluianum.

*M. DC. XLII.*

*Non erit mercator ultra in domo  
Domini exercituum in die  
illo. Zachar. 14.*





# VRBANO VIII.

SANCTISSIMO AC  
BEATISSIMO

<sup>a</sup> Lotharius ad Nicol. I.

PATRI PATRVM,

<sup>b</sup> Iuo E-  
pist. 12.

EPISCOPO EPISCOPORVM,

<sup>c</sup> Arnob.  
psal 138.

UNICE SUMMO ET SINGULARITER GENERALI

<sup>f</sup> Petrus  
Bles. E-  
pisto. 27.

INSPECTORI OMNIVM,

<sup>g</sup> Pam-  
philus A

CONSILIARIO NECES-  
SARIO CRISTIANORVM,

bydoru  
ad Petru  
Fullonē.

PETRO TEMPORIS NOSTRI,

<sup>h</sup> Chry-  
sostom.

APICI SUPREMO ECCLE-  
SIARVM DEI;

hom. in  
SS. Pe-  
trum &

CINGVLO COMPREHEN-  
DENTI VNIVERSOS CHRIS-  
TIANOS, F.

Paulum.  
<sup>i</sup> Orien-  
tales in

Proless.  
fidei ver

sa à Ma-  
fio.

<sup>k</sup> Theo-  
dorus

Stud. ad  
Mich.

<sup>l</sup> Patriar-  
cha O-

rientalis  
in Pro-

f fl. fi-  
dei.

**S**TRVMAM fœdè dehonestan-  
tem lectissima membra mysti-  
ci corporis in quo secundum  
Christum caput emines, PA-  
TER BEATISSIME; quam nuperrimè  
culter Apostolicæ animaduersionis re-  
cidit, Sanctè ac iure quàm optimo dese-  
ctam; demonstrandum suscipio. Non

adhibeo suffragium hominis mortalium  
 postremissimi, firmando sensui capitis,  
 cuius iudicium præiudicata autoritas fit  
 in cælo; Non adiungo Soli cicindelam;  
 Neque Oceanum corruatis perangustis  
 tenuium stillicidiorum colliciis locu-  
 pleto. Consilium duntaxat est, quod su-  
 prema SANCTITATIS tuæ autoritate  
 cautum, pij quique gratulantur, BO-  
 NVM FACTVM adscribendo, pro te-  
 nuitate mea celebrare. Enimvero vt In-  
 stitiores, Religiosa nomina cimentes,  
 qui domum orationis facerent domum  
 negotiationis, Christi flagellum tibi  
 conceditum persentirent, iustum &  
 æquum omnia iura pronunciant. Ne in  
 ipsa propè sancta inferrentur sordes, &  
 sacra penetralia contaminaret avaritiæ  
 putor, seridè cautum; nemo nisi Giezita-  
 rum quispiam tetra nundinatoris illius  
 scabie correptus, expostulandum putet.  
 Nitorem denique, per secretionem à  
 cœno secularium negotiorum, & inde  
 afflatam fragrantiam; Deo acceptam,  
 sacris Institutoribus probatam; nidore  
 turpium mercimoniorum inquinari; fe-  
 rendum non fuit. Hoc igitur puritatis  
 institutorum sacrorum per administratos  
 tuos studiū, PATER SANCTISSIME;

Apostolicæ doctrinæ quam diuitis de-  
 positorij fidui cûstos asseruas, Concilio-  
 rum scitis, Patrum oraculis, bellissimè  
 congruere, hoc qualicunq; labore mon-  
 stratum venio. *Sed licet membranas incide-*  
*rim, (dico ex<sup>a</sup> Anastasio ad Nicolaum I.)* <sup>a Prefat.</sup>  
*schedulas preparauerim, non tamen hunc Co-* <sup>ad vitam</sup>  
*dicem conficere ausus sum, antequàm à Domi-* <sup>S. Ioan-</sup>  
*natione Vestra, ô millies beate, licentiam adi-* <sup>nis Elce-</sup>  
*pisci promerui. Neque enim fas est, ut absque* <sup>nel,</sup>  
*Vicario Dei, absque Clauigero cæli, absque*  
*curru & auriga spiritualis Israël's, absque*  
*Vniuersitatis Pontifice, absque unico Papa,*  
*absque singulari Pastore, absque speciali Pa-*  
*tre, absque te omnium arbitro, aliquid consum-*  
*metur, aut diuulgetur. Tu enim tenes cla-*  
*ues David, tu accepisti clauēs scientiæ. In arca*  
*quippè pectoris tui, tabula Testamenti, &*  
*manna cælestis saporis requiescunt. Tu enim* <sup>b Ioan-</sup>  
*quod ligas, nemo soluit; quod soluis, nemo li-* <sup>nes Sa-</sup>  
*gat: qui aperis & nemo claudit; claudis &* <sup>riſber.</sup>  
*nemo aperit. Vicem namque in terris possides* <sup>Epist. 14.</sup>  
*Dei. Quod agentem cum Romano Pon-* <sup>c Pascha-</sup>  
*tifice molibus negotiorum vniuersi orbis* <sup>linus, a-</sup>  
*grauato, breuitatis commoneat* <sup>ctio. 2.</sup>  
*nes Carnotensium Antistes, sapientis* <sup>b Ioan. Conc.</sup>  
*moniti memor, c capitis omnium bea-* <sup>Chal-</sup>  
*tissimis pedibus aduolutus, SANCTI-* <sup>d Falg. l.</sup>  
*TATI TVÆ in hoc d mundi cacumi-* <sup>de Incat,</sup>

ne , cumulum exaggeratum bonorum  
omnium , deque suis annis adiectionem  
apprecatur,

*Deditissimus*

RENATUS A VALLE.

APPRO-

# APPROBATIO.

**L**iber cui titulus est, *Hipparchus, de Religio-  
so negotiatore*, tantum abest vt aliquid  
contineat à doctrina S. R. Ecclesiæ & fide Ca-  
tholica dissentaneum, vt potius vniuersa quæ  
eo libro continentur, magnum Autoris desi-  
derium spirent, præseruationis Religiosarum  
domuum à sordibus; quas Satanas variis præ-  
textibus in eas inferre tentat, contaminata sa-  
crorum institutorum puritate. Quare liber est,  
non luce tantum, sed etiam commendatione  
dignissimus, nostro qualicunque iudicio. E  
Musæo nostro, 1642.

IOANNES A QVERCV  
S. Theologiæ Doctor.

PHILIBERTVS TATIVS  
S. Theol. Doctor.

## Synopsis Operis.

- Aditus ad disceptationem* fol. 1
- §. 1. *Negotiatio emercantium per munnara, Religiosas dignitates seponitur* fol. 2
- §. 2. *Negotiationem populariter dictam, à Religioso statu non abhorrere, qua suadere videantur, Mediasini disputatio* fol. 23
- §. 3. *Quibus confirmari videatur, negotiationem prorsus à Religioso statu dissentire, contraria Timothei Concertatoris disputatio* fol. 41
- §. 4. *Supponenda ad Controuersia dijudicationem* fol. 74
- §. 5. *Extremarum sententiarum in binis superioribus disputationibus propositas, Anacrisis uniuersè* fol. 97
- §. 6. *Sigillatim de negotiatione per venditionem opificiorum, qua religiosi labore suo & manibus operando consecerint* fol. 128
- §. 7. *Sigillatim de religiosorum Conuictoribus* fol. 142
- §. 8. *Discussa sigillatim causa Pharmacopolarum Religiosorum negotiantium* fol. 164
- §. 9. *Sigillatim de Monialium questibus, ac multiplici negotiatione* fol. 185
- §. 10. *Conclusio. De pia & prorsus irreprehensa Regularium negotiatione* fol. 207

## A D I T V S

A D

## Disceptationem.



ST apud Platonem Dialogus, cui nomen *Hipparcho*, quod in eo Socrates de lucri cupiditate, & honesto, aut inhonesto quæstu cum Hipparcho disserat. Eum titulum,

congruè aptaturus videor; disceptationi de argumento non dissimili; Num quæstus ex negotiatione, à Religioso statu abhorreat. *Mediastinus*, (id negotiatorum Religiosorum Patrono nomen,) lucri vndecunque bonum odorem ducens, etiam ex mercatura & negotiatione, augeri posse citra labem ac probrium, religiosæ domus censum, contendit. Is cui causæ à Saluiano in Prologo librorum ad Ecclesiam assignatæ, *Timothei* nomen detulere; è contrariò, illiberalitatem & sordes religiosa nobilitate indignas in negotioso quæstu putere, nec in benè constituta religiosa domo admitti ritè posse, confirmat. Argumentum id est, huius lucubrationis, quam viri pij & religiosæ perfectionis studiosi, censuerunt huic opportunam tempori, vel etiam necessariam esse; vt quæ mollitudo, veriùs profanitas nonnullorum Præfectorum in sacros cœtus inducit, cum certa Religiosi spiritus labefactione, & clade piorum institutorum, procul amo-

ueantur, & Apostoli oraculum factis comprobetur;  
*Est quæstus magnus, pietas cum sufficientia.*

2. Negare sanè non possumus, esse qui præbeant hoc tempore, occasionem iustam renouandi querelas illas Petri Blesensis Tractatu in Iobum, *sub initium* ad illud, *Nati sunt ei septem filij, &c. & fuit possessio eius ac familia multa nimis.* [ Monachi & Canonici regulares, qui viam vitæ arctioris & sanctum otium elegerunt, simplices quidè sunt vt Columbæ; sed vultu, non actu; habitu, sed non affectu. *Venient* ( inquit Dominus ) *ad vos in vestimentis ouium, intrinsecus autem sunt lupi rapaces.* Non est hodie aliquod forum iudiciale aut venale, cui se viri Religiosi non immisceant, & cui se importunissimè non importent. Mundum enim quadam simulatoria Religione fallentes, falluntur pessimè, & mundo mortui negotiantur, & venantur quæ mundi sunt. ] Addit alia in eandem sententiam, admodum flebilibus modis. Hanc igitur Scabiem de Ecclesiæ corpore extergere operæpretium est.

3. Neque verò est quod quis expostulet aduersus huiusmodi disputationem, vel ex ea scandalum infirmis ingenerandum, vel hanc fore sacrorum quorundam ordinum impetitionem, ex impudentia potius quàm ex dicendi libertate sancta & religiosa profectam. Hoc inquam iniuria expostularetur: Nam scandalum quidem, timendum hac ex parte esse domesticis, negat Cassianus l. 7. cap. 13. haud parcè referens sordes Monachorum varias, ex cæca argenti cupiditate & philargyria. Externorum verò scandalum, cui ibidem timebat Cassianus, idcirco vetans communicari cum eis librum suum, nequaquam hîc eximescendum est; quoniam nihil hîc simus produ-



producturi, quod non vltro in externorum incur-  
 rat oculos. Itaque profari intrepidè possum illud  
 Bernardi Epist. 78. ad Suggestum Abbatem S. Diony-  
 sij, cum vulgaturus esset quædam sacrorum homi-  
 num probra, offensionem mouentia. [ Nescio quid  
 profit, si quod mundus clamat, ego tacuero; om-  
 niùmque passim naribus injecto fœtore, solus dis-  
 simulo pestem, nec audeo nasum contra pessimum  
 putorem, propria munire manu. ] Quare perpe-  
 ram injicitur metus, scandali infirmis ex hac disce-  
 ptatione ingenerandi. Nec minùs falsò obtenditur  
 laceratio, vel sugillatio alicuius Religiosi ordinis.  
 Quæ enim hîc indecora Religioso statui monstra-  
 turi sumus. ] Etsi fieri videntur in ordine, absit ta-  
 men vt sint de ordine. Nullus quippe ordo quip-  
 piam recipit inordinatum. Quod verò inordinatum  
 est, ordo non est. Vnde non aduersus Ordinem, sed  
 pro ordine disputare dicendus ero, non ordinem  
 in hominibus, sed hominum vitia reprehendens.  
 Et quidem diligentibus Ordinem, in hac re mole-  
 stum me fore non timeo; quinimo gratum procul  
 dubio accepturi sunt, si persequimur quod & ipsi  
 oderunt. Si quibus verò displicuerit, ipsi se mani-  
 festant, quia Ordinem non diligunt, cuius vtique  
 corruptionem, id est vitia damnari nolunt. Iphis  
 itaque illud Gregorianum respondeo; *Melius est  
 vt scandalum oriatur, quàm vt veritas relinquatur.* ]  
 Verba sunt Sancti Bernardi in Apologia ad Guliel-  
 mum Abbatem, cum in quasdam abusiones strin-  
 geret stylum, quæ non sunt minùs huic loco & ne-  
 gotio accommodata. Imò eo ipso quòd defectus Or-  
 dinum non dissimulantur, honorificè agitur erga  
 sacros Ordines; quia viuere agnoscuntur sub defe-

Ætuum cineribus prunæ virtutum ; alioqui abstineretur callo conatu cineres per flacum excitandi, prout Petrus Dam. Opusc. 13. c. 1. reprehensionem ad quam aggrediebatur, defectum sui ordinis excusavit.

4. Imponitur denique sincero studio extirpationis corruptelarum, nomen *impudentiæ*, sed à Gnatonibus, & Guelfis, ac Crysanthiis ; ( sic enim Eupapius, hominem natum ad annuendum, & omnia quantumvis absurda probantem, ut placeat eis quorum potentia lenocinatur, non sine spe ad clavum semper sedendi, nomine Crysanthij repræsentat : ) Apud eos item pessimè audit dicendi libertas & ingenuitas, apud quos improbitas insulse & incondite choreas agit, iuxta Isidorum Pelusiotam l. 2. epist. 237. qui observat, nonnullos eorum quibus Magisterij thronus commissus est, cæterorum inquam Moderatores atque Præfectos, tametsi tales sint, ut eorum vita longè abhorreat à persona quam sustinent, tamen id vnum nulla venia dignum ducere, si quispiam liberam ullam vocem emittat. [ Metuentes enim, ( inquit, ) ne quis existat, qui ea quæ ab ipsis perpetrantur, reprehendat, cum alia omnia bona, tum maximè loquendi libertatem amoliri conantur, ut deinceps liberè ac sine ullo metu peccent. ] Ab istis loquendi libertas quantumvis sancta, & prudentiæ sale condita, ad impudentiam & procacitatem refertur, sed malignè atque perverſe. Nam, ut idemmet Isidorus hac macula dehonestatus, ob increpitos impios præfectos, Zozimum, Maronem, ac gregales rectè respondit l. 5. epist. 421. [ Neque loquendi libertas est impudentia, neque vicissim impudentia loquendi, est libertas appellanda.

landa. Sed lapsos pulchrè reprehendens, libertas est dicendi. Qui verò rectè agentes conuiciantur, eorum impudentia est nominanda. Illa quidem medicinæ est instar; hæc verò pestilenti lvi comparatur. Illa ægrotos sanos reddit, hæc verò valentes conturbat. ] Quare euanesce postrema illa criminatio, qua discussio abusionum, petulantia & impudentia insimulabatur; siue per eos quorum interest, & veritatis expressionem, ignominiam suam interpretatur: siue per eos qui gnari mutire duntaxat non eloqui, turpe silentium & ignauam abblatitionem, imis subcellis præeligunt, pecuinum planè ac mediastinum, verèque seruale cum seruitute, bipedum genus. Ioannes Sarisber. l. 6. Polycr. c. 28. ab huiusmodi Gnarthonicis veri professionem coequari crimini inaiestatis professus, addit l. 7. c. 24. omnes benè compositos, illam sanctam libertatem approbare; Tyrannicam duntaxat rabiem eam perhorrescere, & impedire: Et Tyrannidem appellat, peruersionem sacrae præfecturae; vt etiam censuit Isido. Pelus. l. 2. episto. 125. & 234. addens nominatim, expelli ab eis, qui liberè loquuntur; idque Tyrannidis patens indicium esse contestans.

5. Si remotis Disceptionis obicibus, aduersus nequam perambulans in tenebris descendamus in arenam, dextro cornu Crucis armati: sic enim faciendum admonet Sanctus Bernardus serm. 2. de S. Andraea. Larua quippe honestatis, mercimoniis Religiosorum obducitur, vt hamus mortiferi quæstus seuerius gloriatur. [Verum, (inquit ibi Bernardus,) Si quis iniquum aliquid tanquam iustum persuadere tentat, à dextris est mihi iste; Sed Iudas est; Osculo me prodit; & dextro cornu crucis, ne-

gotium perambulans, in tenebris, necesse est propulsari.] Hoc cornu armatus, nihil est quod extimescat in oppugnatione abusionum & propugnatione Iustitiæ, per negotium istud in tenebris perambulans, diuexatæ. Thomas quidem Cantipratanus l.2. Apum c.12.n.2.post abusus quosdam in Cænobia inuectos, liberi iudicij falce succisos, post interpellatam Rectorum Ecclesiæ sollicitudinem illis vocibus; [O quis veniet? O quando venturus est summus Pontifex, cuius æquitate librata, miseria ista & infania corrigatur!] subdit. [Sed dicetur forsitan mihi, nec dubito quin dicatur. Quis est iste qui posuit os in cælum, & ad arcam fœderis, etiam inclinatam, manum indignus extendit? Irascantur fortè mihi, sed non Dominus, cuius vices semper dolui & dolebo; pro cuius veritate & Iustitia, utinam dignus essem membris omnibus dissipari. Scio tamen, quicumque, quantuscunque ex his scriptis indignabitur, se debitæ reprehensioni obnoxium iudicabit.]

*§.I. Negotiatio, emercantium per munera,  
Religiosas dignitates, seponitur.*

6. **N**ON instituitur disceptatio de quocunque negotiationis modo, sed de sola communiter & populariter dicta negotiatione, cuius honestas quoad Religiosas personas videri potest ambigua. Itaque seponenda est illa apertè fœda, & multiplici ex capite perspicuè peruersa negotiatio, qua aliqui intra Religiosum ordinem exercent mercaturam præfecturarum ac dignitatum, dantes & accipientes eo intuitu munera.

Non

Non debeo videri incredibilia proferre, cum certa profero. Esse enim Religiosos, qui sædum huiusmodi merceimonium exerceant, & apud Sanctum Anselmum legimus, l.3. epist.120. itemque apud creditum Cyprianum sub finem Prologi de Oper. Card. & utinam nullis esset recentibus exemplis testatum. Nec ago de minutiis munerum, qualia S. Antonius suis benefactoribus transmittibat, ex S. Athanasio in vita c.26. aut qualia Eustochius mittebat Sancto Hieronymo epist.19. armillas, columbas, canistrum cerasis plenum: Aut qualia eidem transmittibat Marcella, cereos, sellam, saccum, calices, de quibus gratias agit Epist.20. Eiusdem generis sunt, pyxis exigua cereis agnis puris aut conuestitis referta, theca vna aut altera cum suo instructu, pileolus, calyptra lecticaria, sacerdotale Breuiarium, pius quispiam libellus, & alia eiusdem rationis, vel minutiora. Quæ vel amicitiae vel obseruantiae pignora, ab iis qui dare sine labe possunt delata, nemo intercluserit; præsertim si purus sit dantis animus, nec hamatum munus porrigat, aliis similibus, vel in eodem genere potioribus inuncandis intentus: quod qui faciunt, illiberalitatis & auaritiæ à Philone damnantur l. de Plantat. Noë, conferunturque cum piscatoribus, qui escam paruam pisci glutendam apponunt, ut totum piscemprehendant. Has munerum minutias volo dimissas, sicut etiam non daminari propter eas Ordinatorem, si absit pactum, dixit Alex.III. parte 50. Conc. Later. c.3. Ago igitur de muneribus magni momenti, cuiusmodi aliquando exhibita nouimus. V.G. de centum duplionibus aureis Hispanicis, de quinquaginta Breuiariis Sacerdotalibus exquisitio-

ris formæ, & concinnè compactis, quorum pretium aureos centum excedat. Hæc enim non sunt munerum minutalia, nec ad merum testimonium religionis charitatis aut obseruantia referri possunt; cum vni cuiquam è magnatibus dantur, penès quos est summa rerum. Dantur igitur vt mollitus accipientis animus, refundat quod habet ad manum, & tam beneuolo muneratori gratus, nolit esse sub odio, quem affectus xeniis delinitus, intellectui lenocinatus, bonum & amabilem, atque aded promotio-  
ne dignum exhibet. Ignem spinis supposui. Sed tanti est, veritatem Dei in iniustitia non detinere, quod Apostolus censuit probrosissimum.

7. Quamuis autem hæc dignitatum nundinatio, nomine mercaturæ & negotiationis venire queat, planèque possit integrari ex vera emptione & venditione, vt negotiationes aliæ propriè dictæ; tamen vix est quod in tali negotiatione exagitanda ponamus operam: quandoquidem quatenus verè est sacrarum dignitatum emptio ac venditio, non discrepat à pura & pura simonia, de cuius monstrositate fusè alio loco disputatur. Deinde aded spurca & fœda est huiusmodi negotiatio, vt nemo se ea distentum profiteri velit; sed qui illam obeunt, attentissimè inuigilent, vt lateat negotium, vel alio quopiam extraneo titulo quasi tectorio obducatur; puta erogandæ egenis eiusdem nationis elemosynæ, aut tuendæ dignitatis primario cuiquam muneri gentem spectanti consentaneæ. Qui tamen colores & prætextus, nequaquam purgant simoniam, cum munus pecuniarium, aut aliquid pecuniæ æquiualens, confertur aut accipitur tanquam pretium mercedis intentum, exhibitum aut captatum ad parandam  
vel

vel compensandam religiosam præfecturam; tamen si seclusa formali & sensibili pactio de conferendo eo pretio. Nihilominus enim pensitationem muneris, eiusve acceptioem, aut utramque, si uterque cum quem dixi animum induerit, esse simoniacam, clarum est ex notione simoniæ mentalis. Quod tamen ij, quos attigi, prætextus quærantur, & nemo aded effrons sit, ut palam & publicè profiteri ausit tale mercimonium; argumento euidenti est, eius scditatem non egere educatione, vel discussione. Quare mercaturam illam hoc loco seponamus, tanquam apertè auersandam, nec ancipitis malitiæ; præsertim si venalitate propriè dicta sordeat. Duplex quippe in hac re secerni potest venalitas: una propriè dicta per veram emptionem & venditionem, saltem mente exercitam; alia similitudinaria, quæ seclusa rigorosa ratione mercis ac pretij, in præfecturarum collatione aut acceptioe, æque tamen intuitu dignitatum sacrarum exhibet aut admittit munera. Neutram exagitare iusta tractatione est animus, ob causam propositam.

8. Tantum, quia alterutra in rectè alioquî constitutas Religiones variis prætextibus obrepit, admoneamus obiter; priorem non modo illiberalem & sordidam, sed apertè sacrilegam & impiam esse; cum contineat emptionem ac venditionem spiritualis iurisdictionis, quæ nullo humano pretio æstimari potest, cum sit perfusa Christi sanguine, & à Christi institutione trahat originem. Argumentari præterea contra eam iniquitatem licet ex crebra inhonestate, & indignitate venalitatis præfecturarum secularium, quæ purè humanæ sunt, & citra omnem comparationem despiciatior. Verum est at



tari inter politicæ doctrinæ Tractatores, an officia humana & præfecturæ seculares, possint absque labe venales exponi, & diuendi accurrentibus, vt variis locis fert vsus. Idque per se loquendo, graui, aut etiam quacunque culpa liberant non pauci Theologi; damnant autem alij, per se item rem spectando, inter quos Adrianus in 4. q. de vsura §. *ex his suboritur*, Ioannes Medina q. 4. de vsuris, & q. 26. de restit. & Torres 4. 2. in 22. disput. 23. dub. 2.

Rem videtur attigisse Caietanus in summa V. *Officiorum secularium venalitas*; docens, speculatiue loquendo, negotiationem circa illas præfecturas exigente necessitate publica, innoxiam esse; quia venalitas in ea officia & præfecturas intrudi potest ratione variorum annexorum; putà ratione eminentiæ supra ceteros, quæ est aliquid pretio æstimabile; Item ratione excessus iusti stipendij. Stipendia enim officiorum, præsertim sublimiorum, solent esse auctiora, quàm præcisè ex iustitia deberentur, quia ita spectat ad Principum dignitatem, & præfecturæ amplitudinem; vnde ratione illius excessus stipendij, præfectura venalitati subesse haud immeritò potest. Denique suppetit titulus alius eiusdem venalitatis, ex opportunitatibus licitè augendi rem domesticam, & suos promouendi, ac multos extraneorum sibi viis honestis obstringendi. Hæc sunt, quæ per se rem spectando, officia secularia negotiationi obnoxia faciunt, & subiecta venalitati, si publica necessitas ad eam venalitatem adigat. Per accidens tamen, & penès varia extrinseca capita, venalitatem publicorum Officiorum cum publico bono pugnare posse, atque adedò frequenter esse mortaliter grauem, optimè prosequitur supra Caietanus,



ietanus, & præiuerat Sanctus Thomas Opusc. 27. *ad quintum quesitum*; subscribuntque Soto l. 3. de Iust. q. 6. art. 4. Azor Tomo 3. l. 8. c. 7. de venditione. Rebellus 2. p. l. 9. q. 18. sect. 2. Less. l. de Iust. c. 32. n. 28. Auerfantur quoque eam venalitatem Petrus Gregorius l. 47. Syntag. cap. 1. & Adamus Gontzen l. 7. polit. c. 22. n. 16. ac 18. post Nouellam 8. Coll. 2. tit. 2. in præfat.

9. Ratio est, quia per huiusmodi venalitatem, viri alioqui digni, vel coguntur annumerato pretio emere quod propter virtutem debebant gratis accipere; vel (quod frequentissimum est,) coguntur carere publicis officiis seu dignitatibus, non absque aliquo dedecore, & magno publici boni detrimento. E contrario autem indigni, quia ut plurimum abundant opibus, facile ad publica officia prouehuntur, quæ grauis est deceptio Reip. contra iustitiam commutatiuam, ac proinde obligans ad restitutionem, ut Lessius rectè notauit, lib. de Iust. c. 12. n. 129. Ad hæc, per eam venalitatem obtunditur ingeniorum acies, hebescitque vigor mentium, quæ ad studia & dotes publicis officiis consentaneas conniterentur, si illhac aditus ad honores pateret. Denique qui prius emit officium (ut Basilii Imperator in commonit. ad Leonem filium c. 43. probè monuit,) cum non emerit nisi ut lucretur; eò ferè venit, ut sigillatim vendat, quod vniuersè comparauit pretio, captetque cum Iustitiæ dispendio, iterarum vacuati marsupij tumorem: quod tametsi simoniacum re vera non est, ut Petrus Blesensis epist. 95. malè existimauit, est tamen fœdum & iniquum. Hæc omnia frequentissimè, (tametsi per accidens,) præfecturarum secularium venalitatem commacu-

lant, cū non honestatur per publicam necessitatem. Quod ergo ferē vsu venit in officiorum secularium venditione & emptione, valet multo magis circa religiosam præfecturam, etiamsi eius emptio ac venditio non esset semper per se sacrilega, qualem re vera esse præmisimus.

10. Posterior venalitas, quam appellabam Similitudinariam, & cuius vsus periculosior est hoc tempore, etiam in familiis alioqui benè constitutis, sordet multipliciter. Ac primū omnes maculæ, quibus venalitas præfecturarum secularium plerumque dehonestatur, vt vidimus, habent hīc quoque locum. Nam & indigni quique hac ratione erumpunt ad dignitates, & digni arcentur ab iisdem. Item vigor mentium sopitur, & acies ingeniorum hebescit. Ac vt munera suppetant, vnde perpetuatio dignitatum, vel promotio ad altiores gradus obtingat, laxandum sæpenuerò est, vbi fuisset contendendum: & iis indulgendum est, quibuscum seuerè agi, disciplinæ ratio ferebat. Nimirum munus non tantū excæcat oculos, vt habetur Exod. 23. sed etiam vt addit Siracides c. 20. *quasi mutus in ore, auertit correptiones*. Sensus est, munera esse in ore Munuscularij, (verbum est Ioannis Sarisberien- sis, l. 1. Polycr. c. 11.) veluti frænum, aut linguarium, quod elocutione prohibeat, & hominem efficiat mutum, ne corripiat in exhibente munera, quod alioqui clamorosa & strepera obiurgatione infectaretur. Bellè (si tamen solidè) Dionysius & Lyranus, per *mutum in ore*, intelligunt ranæ speciem, quam Græci καλάμιττα appellant, cuius iniectione in os canis latrantis, prohibetur latratus. Additque Albertus l. 26. De Animal. Si huiusmodi ranæ officulus, lebeti

lebeti in quo aqua ferueat, injiciatur, fore ut illico ebullitio resideat, & aqua detumescat atque deferueat. Similiter enim quantumcunque feruens Præfectus, & paratus zelo Iustitiæ insurgere in aliquem noxium, si munus ab eo admittat, pōnet illico iras; nec ultra allatrabit reum, erga quem est emollitus acceptione muneris. Et volo Præfectum munera admittentem, sapientem alioqui & iustum esse: nam talem quoque Præfectum, prudentem inquam & iustum, subuertendum & excœcandum esse per munera, disertè monuit Spiritus sanctus, Exod. 23. [Quod si munera, Sapientum excœcant lumina, insipientum quid non faciunt?] Argumentum est Isidori Pelusiota l. 5. epist. 182. Quid inquam Ordinî commodum in munerum delatione, atque aded in tota vniuersi cœtus rectione expectandum erit, si præterea ij, penes quos est dignitatum distributio, secundum prudentiam carnis, quæ mors est, & mera apud Deum insipientia, distribuunt dignitates religiosas; fixum habentes eos duntaxat honestare, qui minùs ingenio valeant, aut ~~sunt~~ meticulosiores, ac obsistere inepti, quicquid ~~tandem~~ audeat & machinetur is cui subsunt? Sunt enim quidam Politici spirituales in Ecclesia, nec desunt in religiosis cœtibus, qui imitatione exprimunt Theophilum Alexandrinum, vaftrum Antistitem, & ex carnis spiritu ac mundi legibus, illud præter cætera indignè seruantem, ut nunquam sacras insulas ulli committeret, quem videret ingenio & prudentia exquisita pollere: sed ferè hebetes tantum, inter quos, ac supra quos, securè regnaret, promouebat, aut promouendos curabat, quâ patebat ambitus Orientalis Ecclesiæ vniuersæ. Hancque fuisse germanam cau-

sam, cur electioni S. Ioannis Chrysostomi in Antistitem Constantinopolitanum, ad rabiem vsque obstiterit; quod de viro sapientissimo, & robustissimi pectoris, circum agendo pro nutu, aut frangendo desperaret, scribit in S. Chrysostomi historia Georgius Alexandrinus. Si igitur munuscularij distributores dignitatum religiosarum, non modò munerum visco capiantur, sed etiam hoc Politicismi cancro exedantur, actum planè videri debet de distributione dignitatum, vniuersaque rectione: Nam hinc hebetes, vt cristis, politici Præfecti sit locus; inde à virtute malè constituti, exoculatis & mollitis per xenia & dona diribitoribus, occupabunt soli prima subsellia, iudicio diribitorum munusculariorum: quæ quanta sit corruptela atque peruersio, nedum labefactatio & succussio religiōsi spiritus, nemo satis explicet. Tuncque comprobari ait Cantipr. l. i. Apum. c. 2. n. 1. quod ait Sapiens: *Vidi seruos in equis, & Principes quasi seruos ambulantes in terra*, Eccl. 10. Itaque penes hæc incommoda, æquè similitudinaria ista venalitas Religiosarum dignitatum improbanda est, ac propriè dicta venalitas officiorum secularium, vt præmissi.

II. Considerandi verò præterea sunt spurci natales, similitudinariæ huius venalitatæ in religiosa familia, tum ex parte munusculariorum, tum ex parte præbentium munera. Quoad munuscularios, liquet interuenire auaritiā, siue captent munera, siue admittant non captata. Nam viri sanctissimi quos auaritia non contaminabat, æquè puri deprehensi sunt in excutiendis manibus suis ab omni munere, ac in donis non aucupandis; indèque celebrati sunt tanquam illimes ab auaritia, quod munera respue-

respuerent vltro delata. Videndus de Eugenio S. Bernardus l. 3. de Confid. c. 3. & Ioan. Sarisber l. 5. Polycrat. c. 15. Rursusque de Martino Presbytero Cardinale Sanctus Bernardus l. 4. de Confid. c. 5. Qui igitur munera vel acceptant, vel, (quod turpius est,) aucupantur, sordent ab auaritia, & turpi cupiditate. At hæc quàm tetra sit nota in homine religioso; quàm, inquam, indignum & fœdum sit, hominem qui calces sæculo illisit, regredi ad finum rerum terrenarum, quem abiicit, circum se denuò aggregandum, res ipsa loquitur. Spiritus Sanctus, nihil esse auaro scelestius, disertè pronunciauit. Quod si de quocunque auaro verum est, (vt est sanè verissimum) deficiunt verba, quibus deprehendatur virulentia & malignitas auaritiæ, in homine elongationem ab auaritia sanctè professio, & eius excisionem ritè pacto cum Deo. Nolo hoc vlcus fortius premere, quod & per se exundet eius sanies, & inferius §. 3. recursurus sit de ea virulentia sermo.

12. Iam verò Religiosos munerarios, exhibitione donorum superbiam ferè, & ambitionem suam prodere, cum summus Pontifex Clemens VIII. sua de muneribus constitutione, (quàm euiguisse dolendum est,) annotauit num. 8. hancque fuisse ferè vnicam illius constitutionis edendæ causam monuit Diana Tract. de Paupertate religiosa, Resol. 12. Tum iam olim creditus Cyprianus in Prologo libri de Oper. Christi Cardinalibus *sub finem*. Nam cum exposulasset Religiosum ad munera porrectas manus non claudere, subdit paulo post, quo hæc munerum exhibitio pertineat; nempe vt qui munera *præbent, per fas aut nefas ad loca superiora se ingerant*. Hæc verò est cæcitas detestanda. An enim tanta

est sarcinæ cupiditas, tantumque dominandi in cleris desiderium, vt etiam in domo humilitatis, aditus ad personatos honores, malis hisce artibus, aperendus videatur? [ *O curas hominum* ( exclamat in hanc rem Petrus Blesensis epist. 28. ) *ô quantum est in rebus inane !* ô inanis gloria ! ô ambitio cæca ! ô terreni honoris inexplicabilis fames ! ô tinea cordium, animarum subuersio, cupiditas dignitatum ! Vnde obrepfit hæc pestis ? vnde eualuit hæc execranda præsumptio ? ] Legeſis cætera, quibus homo diſertus æquè ac pius, concitatur, in hos ( vt vocat ) bestiis omnibus bestialiores, quærentes ducatum honoris, & currentes ad cathedras pestilentia, vt se & alios super quorum capita impositi sunt, extremo exitio inuoluant. Potenter item ac validè in huiusmodi vesaniam conclamat Sanctus Chrysostomus hom. 29. in Epist. ad Rom. *sub finem*. Auerſanda igitur est munerum exhibitio atque captatio, tam fœdæ cupiditati obstetricans.

13. Virulentiam rei munerariæ per effectus suos & causas hæcenus satis expressam, frustra viderer, aduocatis in huiusmodi corruptelam testimoniis Scripturarum, & Sanctorum Patrum exagitaturus. Scripturas bene multas in hanc rem accumulât Melissa l. 2. serm. 7. & 8. & Antiochus homil. 9. ac Petrus Damiani Opusc. 35. Sanè Iob. c. 15. contestatur, ignem deuoraturum tabernacula eorum qui munera libenter accipiunt. Quem locum aduersus suos ministros munera accipientes, allegauit Sanctus Ioannes Eleemosynarius, vt scribit Leontius vitæ eius author c. 4. Et Dauid eos in quorum manibus iniquitates sunt, à quibus longè auerti cupit, dexteram aut repletam muneribus, Psal. 25. Illud verò,

vnde

vnde acceperint Melissa & Antiochus, non inuenio. *Perdit seipsum, qui accipit munera. Qui autem odit acceptiones munerum, viuet.* Nimirum, vt ait Antiochus, [ Quisquis captat munera; aut plus quàm par sit quærit possidere; item pecuniæ auidus & fœnerator; quatuor hi, vnum etundemque trahunt currum, sed eo præduce qui superbix auriga est & princeps, &c. Non igitur æquum fuerit, vt qui sanæ sunt mentis; tam cruenti hostis fræna patiantur; ne illius aurigatione cum suo auriga in puteum abripiantur supplicij. ] En quomodo perdat seipsum qui accipit munera, iuxta Scripturam allegatam. Aperiunt plenius captationis vel acceptionis munerum malignitatem, qui de ea vitanda dissentunt: Philo de Iudicis officio Isido. Pelus. l. 5. epist. 182. S. August. c. 15. Regulæ. Blesensis epist. 10. *in fine.* Petrus Damiani dicto opusc. 31. Raymundus Iordanus; solo nomine Idiota, in opere de oculo mystico c. 6. à num. 6. Ioannes Sarisber. l. 5. Polycr. c. 15. Bernardus de modo benè viuendi; serm. 61. Basilii in c. 1. Esaiæ ad illud *diligunt munera.* Optimè creditus Ambrosius, reuera Hilar. Diaco. 1. Cor. 6. ad illud, *sed ego sub nullius redigar potestate.* notat, Apostolum noluisse munera accipere, ne authoritatem magisterij concessam sibi à Domino, inclinaret. Non enim potest constanter argui à quo accipitur, maximè cum ideo promptus ad dandum sit, vt sibi humiliet præpositum. Vnde & dicit, *sed ego sub nullius redigar potestate.* ] Et 2. Cor. 7. ad illud *Dederunt Deo, deinde nobis;* admonet esse qui datis muneribus [ Redimunt præpositos suos, vt vitia eorum patiantur, nec arguant; quia munera excæcant oculos; & vim authoritatis inclinant. ] Redolet quoque in superiore



ea agendi ratio alium animum à paterno , iuxta illud Sarisberienſis cum Adriano Papa agentis l. 6. Polycr. c. 24. [ Si pater es, quare à filiis munera & retributiones expectas? ]

14. Iurè igitur Cluniacenſes in Conſtitutionibus ſub Hugone ſ. editis tit. de muneribus , excommunicatione mulctarunt inuidentes hanc munerum peſtem in religioſum cœtum , cum de electionibus agitur. Quod fulmen in eos maximè vibrandum eſſet , quorum partes ſunt Ordinum puritati & conſervationi conſulere , ſi piceatis manibus deprehenderentur. Quo in genere , brevis ſed vehemens ac fortis de more eſt, increpatio qua Iſidorus Peluſiota Lucium Archidiaconum ferit , ex electionibus quaſtum facientem. Cum enim pro Archidiaconi munere, Præſuli aſſisteret, iſque ſive præ ſenio , ſive præ mollitudine omnia Archidiacono permitteret, homo philargyria corruptus , totus erat in marſuppiis eorum qui prehensabant dignitates eccleſiaſticas vacuandis acceptione munerum. Et, quod Andræas Sottus ad l. 5. epistolarum Iſidori benè annotauit, erat Lucius ille de cœtu Religioſorum, æquè ac Maro & Zozimus. Vnde & dignitates, quæ prehensabantur, æquè erant religioſæ, cuiuſmodi in Occidentali Eccleſia iam olim fuerunt Canonicoꝝ Regularium. Itaque Iſidori epistola huc belliffimè cadit. [ Oculi ( inquit, ) ſunt Epiſcopi, venerandi altaris Diaconi. Tu verò cum horum ſis permiſſione diuina princeps , totus oculus eſſe debes, perinde vt illa multis oculis prædita animalia, ( quæ propinquo ad Deum accèſſu imitaris ; non vita, vt audio, ſed ſola ſacri muneris functione; ) neque per improbas actiones offundere tenebras, & venerabili illi



li illi sodalities, ac cœtui, & Episcopo, qui tali absque iudicio obsequitur. Neque diuinum altare, auaritiæ iniquitate contaminare, neque electiones quæstui habere, vt ex illarum pretio opes ac reditus tibi compares. Nam eos qui columbas vendebant, Christus flagellatos è templo proturbauit. Quare ne tu quoque vnâ cum illis expellare, desine tales diuitias colligere, & materiam ac pabulum futuro igni sempiterno præparare.]

15. Non existimo operæpretium, aduocare in hanc causam, quæ profani; aduersus Præfectorum, & quorumcunque Magistratum piceatas manus, prouincias per accepta munera exhaurientes, iam olim in Ethnicismo sanxerunt. Neminem sanè later, quanta olim vigeret profusio in muneribus præsertim natalitiis ac saturnaliis. Omnino multa ex variis in eam rem congeffit Martinus à Roa lib. de die Natali sacro & profano c. 12. & 13. Bellè nominatim Hispanus Poëta lib. 8. irridet Clytum qui sæpius in anno natale suum celebrabat, vt munera ab amicis eo colore emungeret:

*Vt poscat Clyte munus, exigasque  
Vno nascereis obliues in anno;  
Et solas puto, tresue, quatuorue  
Noti natalitias habes Calendas, &c.  
Quod si ludis adhuc, semelq; nasci  
Vno iam tibi non sat est in anno,  
Natam te, Clyte, non semel putabo.*

Quamuis autem res ita haberet quoad priuatos, constat tamen Magistratibus vetitum; etiam natali suo aut Saturnalibus accipere munera. Id quod Plinius docet l. 4. epist. ad Vrsulum, agens de Iulio Basso, quem Brabius Macer Consul designatus, ob accepta

diebus illis munera, reum egit repetundarum. Nam cum Bassus, quæ alij furta ac rapinas appellabant, ipse munera vocaret, subdit Plinius; [ sed lex, munera quoque accipi vetat. ] Vtique lex Cincia de donis ac muneribus, quam denique extorsit improbitas maiorum, quibus inferiores stipendiarij ac vectigales, bello hoc prætextu esse cœperant, ut Liuius narrat. Iuliam item legem de muneribus, exhibet syllabus legum Romanarum. Quod apud Græcos, Præfecti & Iudices ferrent sententias adhibitis fabis, idcirco Pythagoras esitatione fabarum interdixit, significans necessariam esse Præfectis abstinentiam à muneribus, ut est apud Nicetam lib. 1. Thesau. c. 4. Quid Thebani Plutarcho autore? An non Iudicum & Præfectorum simulachra, ut absque oculis ne hominum personas respicerent, sic absque manibus efformabant; ut munerum abstinentes significarentur? Vbi verò ad Magistratum ut ad auream messem ascenditur, sicut ille iocabatur, Magistratus oculatas manus habent, quod habet Plautina Comædia: Iudicia quippe, prostant in manibus. Sed hæc ut externa mihi facio, nostrorum Iurisperitorum SS. inquam Patrum, quos Leontius Byzantinus, admirabiles S. Spiritus consiliarios egregiè vocauit, suffragio contentus, quibus subscribens Petrus Blesensis episto. 10. illud scripsit memorandum. [ Peremptorium est in Principe ( & æquè in quouis Superiore ) auram adorare munerum. Teste liquidem Propheta, in quorum manibus iniquitates sunt, dextera eorum repleta est muneribus. Transibunt verò iniquitates in pœnam, & munera in dolorem, quia testimonio Iob, *ignis deuorabit tabernacula eorum, qui munera libenter accipiunt.*

16. Cæterum frustra Scripturas, frustra Patrum increpationes, in hanc abusivam producimus. Nam qui talia peccant, absurdescunt ad huiusmodi tonitrua. Itaque dignissima res est, in quam supremi Ecclesiæ excubitores, ipsæque Vigilum Princeps, animadversionem suam non neget. Nobis hominis, ne tutum quidem est talia advertere; enunciare verò & vituperatione prosequi, ad exploratum crimen pertinet, nec qualecunque. Quod enim Genevæ, Caluino tyrannidem exercente, servatum scribit Hieronymus Boltec, non minus hic locum habet: Nimirum ut si quis vocem paulò liberiores emitteret, illico proscriberetur ut Libertinus, vel Atheus, aut reus violatæ maiestatis, eoque nomine confestim extruderetur. Vir zelo diuini honoris motus, cum in suorum cœtu plenario, ausus esset perpaucis hanc in sacro ordine lucem damnare, non modò muneribus omnibus quantumcunque minutis exclusus est, (quod illi leuissimum fuit,) ac locum perdidit; sed etiam factione eius qui se notatum putabat, apud viros Principes suspectus factus, festucis inanium imò falsarum suspicionum in trabes amplificatis, experimento didicit etiam in vinea rubos nasci, ut habet Nazianzeni paroemia.

17. Porro non diffiteor, inferiores, superioribus quibus in religioso ordine concredita est præfecturarum distributio, debere munera; sed qualia præscripsit Sanctus Gregorius l. 4. in 1. Reg. c. 10. ferè in fine libri circa illud, *& non attulerunt ei munera.* [Spiritualia, (inquit,) munera Rectoribus nostris tribuimus, quando debitam eis honoris reuerentiam deferimus, & ea quæ præcipiunt magna deuotione seruamus. Magna enim munera sunt reueren-

tia honoris, & humilitas subiectionis. Quia dum  
 rectoribus nostris, & intus per humilitatem subdi-  
 mur, & per exteriora obsequia foris honoris reue-  
 rentiam exhibemus, munus ei vnum præbemus à  
 corpore, aliud à corde. Vt ergo superbiorum typum  
 insinuet Propheta, non dicit, *Non attulere ei munus;*  
*sed non attulere ei munera*, quia dum electos prædi-  
 catores despiciunt, eis utique honorem à corpore  
 offerre dedignantur, & humilitatem à corde. ] Ho-  
 rum munerum superioribus deferendorum obliga-  
 tionem humilibus subditis meritò iniungit Grego-  
 rius. Et absit ut ea velimus negata, cum ista mune-  
 ra excludi volumus, quorum delatio ex Præfectorum  
 avaritia, vel inferiorum superbia proficiscitur.  
 Per huiusmodi munera ( ut est apud Ioannem Saris-  
 beriensē l.7. Polycrat. cap.17. ) bonus & proba-  
 tus religiosus, [ ad Petrum suum formidet accedere,  
 ac ne clanculo quidem, per impluvium auri, ac si  
 per tegulas Iupiter elabatur in gremium Danaës, sic  
 in sinum Ecclesiæ ( *regularis* ) prociis descendat in-  
 certus. ] Vel si talis est inferior malè sanus, sit alte-  
 rius genij eo nomine dignus Præfectus. [ Decetne  
 Pastorem, ( ait Sanctus Bernardus epist.42. incur-  
 uam ouem, vultumque gerentem deorsum, quan-  
 tumvis sursum aspiciat cum per terrena affectat pri-  
 matum, componens cum Pastore eiusdem genij; )  
 Decetne inquam Pastorem, more pecorum sensibus  
 incubare corporeis, hære infimis, inhiare terre-  
 nis, ( quæ omnia facit captator munerum, ) & non  
 potius erectum stare ut hominem, cælum mente  
 suspicere, quæ sursum sunt & quærere & sapere,  
 non quæ super terram? ] Video bellissimè & veris-  
 simè in me hæc proloquentem casura, quæ de se  
 conti-

continenter subdit S. Bernardus; [ Cæterum mihi indignatur si vel nutum facere audeam, iubetque manum ori apponere, dicens me Monachum, qui non habeam iudicare de Prælatiis. ] Repono quod ad ista S. Bernardus, vna duntaxat aut altera vocula immutata, [ Utinam & oculos mihi claudas, ut nec cernere possem quæ contradicere prohibes. Magna verò præsumptio, si ouis cum sim, in ipsum Pastorem meum lupus sæuissimus vanitatem & curiositatem (imò cupiditatem & conterminam Gieziticæ lepram) irruere cernens, infremuero, quo ad meum fortè balatum, cruentis bestiis à quopiam occurratur, & succurratur perituro? Quid facient de me qui ouicula sum, quæ & in ipsum pastorem tanta feritate infiliunt? Et quidem si non vult ut clamei pro se, nunquid non & pro me balare licebit? Sed & si ego fileo, ne ponere videar in cælum os meum; clamatur tamen in Ecclesia, *Dextera eorum repleta est muneribus, in quorum manibus iniquitates sunt.*

§. 2. *Negotiationem populariter dictam, à religioso statu non abhorreere, quæ suadere videantur. Mediastini disputatio.*

18. **S**Eposita est negotiatio dignitatum religiosi ordinis, quam vel Simonix, vel superbix & auaritiæ abortionem esse, diffiteri non licet. Et dimittenda item est illa ut S. Augustinus concio. 5. in Psal. 70. nominat *detestanda negotiatio* Pelagianorum, opera sua & negotia iactantium, excluso diuino in ipsis negotio. Nam hæc quoque negotiatio, planè aliò pertinet. Quare hærendum nobis hoc loco est, in negotiatione circa merces populariter di-

Etas distenta; quæ quomodo ad mercaturam se habeat, paucis attigit Gabriel, in 4. dist. 15. q. 10. art. 1. notab. 1. aduertens mercaturam, omnem planè mercis emptionem complecti, atque adeò esse quid vniuersalius negotiatione, quæ strictior est, & sola distractione mercium ad lucrum ex reuenditione coëmptarum, interposita mutatione continetur. Hic tamen vocum rigor passim negligitur, nec erit cur à nobis exquisitè teneatur. Aliter mercatorem à negotiatore secernit Gutierres cum aliis Iurisperitis Tract. de Gabellis q. 93. n. 42. 43. & 45. nempe quod negotiator vel ex vno solo adiudicatur, mercator autem ex sola actuum frequentatione. Quod permagni refert ad pronunciandum de sensu Canonum interdicentium sacris hominibus negotiatione, non tamen discriminat quasi substantialiter, mercaturam & negotiationem, neque negotiationis notionem extrahit à mercibus vulgaribus. Itaque populariter dictarum mercium negotiationem, à statu religioso non abhorrire; sed per Religiosos saluis & intemeratis sacrorum institutorum legibus obiri posse, suaderi videtur, his pro Mediastini placito argumentis.

19. Primò, mercatura non est aliquid ex obiecto, vllivè necessariò adiunctis malum. Imò res est generi humano commoda, & necessaria ad exigendam vitam, ac quorundam penuriam ex aliorum vbertate sarcindam. Ita Scholastici in 4. d. 15. vel 12. q. 77. art. 4. aut tractantes contractum emptionis ac venditionis, vt Mol. tract. 1. d. 339. & Abul. q. 213. in c. 25. Matth. & summistæ. V. *Negotiatio*, vel V. *Emptio*. Fateor esse quasdam negotiationes & mercaturas, ex obiecto, quasdam ex adiunctis illicitas.

V.G.

V.G. Negotiatio qua aliqui impij ( vt Victoria Re-  
lectione §. sect. 2. & Molina tract. 2. disp. 35. concl.  
4. expostulant, ) liberos homines absque vllō ido-  
neo titulo vendunt, nequissima est. Similiter nego-  
tiationem Idololatriæ seruientem, tanquam ex ob-  
iecto prauam, insectatur Tertullianus. l. de Idolol.  
c. 11. [ Negotiatio ( inquit ) seruo Dei apta est? Cæ-  
terum si cupiditas abscedat quæ est causa acquiren-  
di? Cessante causa acquirendi, non erit necessitas  
negotiandi. Sit nunc aliqua Iustitia quæstus secura  
de cupiditatis & mendacij obseruatione; in crimen  
offendere Idololatriæ eā opinor, quæ ad ipsam Ido-  
lorum animam & spiritum pertinet, quæ omne dæ-  
monium saginat, an non illa principalis idololatria,  
viderint, si eadem merces; thura dico, & cætera pe-  
regrinitatis sacrificium Idolorum. Etiam homini-  
bus ad pigmenta medicinalia, nobis quoque insu-  
per ad solatia sepulturæ vsui sunt. Certè cum pom-  
pæ, cum sacerdotia, cum sacrificia Idolorum, de pe-  
riculis, de damnis, de incommodis, de cogitationi-  
bus, de discursibus, negotiationibûsve instruuntur,  
quid aliud quàm procurator Idolorum demonstra-  
ris? ] Agere Tertullianum de ea tantùm negotiatio-  
ne quàm dixi, liquet ex his quæ subiungit. [ Nemo  
contendat posse hoc modo omnibus negotiationi-  
bus controuersiam fieri. ] Et paulò post. [ Nulla igitur  
ars, nulla professio, nulla negotiatio, quæ quid  
aut instruendis, aut formandis idolis administrat,  
carere poterit titulo Idololatriæ, nisi si aliud omni-  
nò interpretemur Idololatriam, quàm famulatum  
idolorum colendorum. ] Damnat igitur Tertullia-  
nus, eam duntaxat negotiationem, quæ Idololatriæ  
est administra, ac proinde mala est ex obiecto: quod



quamuis non semper contingat, etiam circa ea quibus Idololatra ad falsi numinis cultum abutitur, ut habetur ex iis quæ Sanches l. 1. in Decalo. c. 7. disputat, contingit tamen aliquando. Plerumque item negotiationem, per accidens, vitio negotiantium inquinari, est extra controuersiam. Idque vnum voluerunt nonnulli Patres, mercaturæ in speciem infensi, præsertim Clemens Alex. l. 3. Pædag. c. 11. Author imperfecti in Matth. homil. 38. S. August. in Psal. 70. ad illud, *quoniam non cognoui litteraturam*. S. Leo Episto. 92. c. 9. & habetur cap. *qualitas* de pœnit. Dist. 5. Verum abusus per accidens adiuncta, non inquinat actum cui adiungitur: alioqui nihil erit purum & labis expers, cum nihil sit adeò sanctum, in quod vitio nostro & voluntaria abusione non possit contaminatio cadere, ut benè monuit Nazianz. orat. 20. num. 19. & August. l. De vera Religione c. 20.

20. Cum igitur mercatura, & negotiatio de mercibus indifferentibus, pura sit ex obiecto, & per accidens possit esse illimis ac nitens, quid est quod prohibeat eius exercitio Religiosos? Imò expedire videtur ut per eos potius exerceatur, quippe qui sincerè & absque alcititiis maculis illam exercebunt. Nec est verum, quod idcirco Religiosi deiciendi sint de gradu, & exuendi nobilitate. Quin potius si incundo Religionem retinent nobilitatem pristinam, de quo certatur sententiis inter Iurisperitos, (rectè tamen affirmante Ludouico Romano singulari 37. ubi Pignolatus alios adducit, itémque Gulielmo Benedicto in c. Raynutius de Testam. V. & *Vxoræ* decis. 1. n. 212. ac etiam Tiraquell. c. 27. de Nobil. præiueratque Saluianus lib. 4. de prouid.)

pote



poterunt absque retentæ in eo statu nobilitatis detrimento exercere mercaturam, vt faciunt seculares; quorum nobilitati nihil officere mercaturæ exercitium, varij docent. Videndus Turtura l.1. De vita Hieronymi Æmiliani c.2. Poggius l. De Nobil. Straccha l. De Mercat. part.2. n.17. & 18. Adamus Gontzen l.1. Politic. c.9. Cepola & alij adducti à Tiracquello l. De Nobil. c.33. *sub finem*. Ab his tam multa mercaturæ decora congeruntur, vt non sit timendum ignobilitati & deiectioni Religiosorum, si eam sanctè & purè exercent.

21. Secundò viri sanctissimi fecere mercaturam; non modò antequam sæculo valedicerent, vt S. Franciscus, sed etiam cùm iam ad aratrum manum misissent, seque mancipassent Dei obsequio. Sic Sanctus Abraham ex Monacho Episcopus, referente Theodoreto in 9<sup>to</sup> c.17. ad proximos iuuandos negotiationi se dedit. S. item Franciscus Xauerus, vt scribit in eius rebus gestis Lucena l.10. c.26. mercatori famulum se addixit in mercaturæ exercitio, vt ea ratione penetrare posset ad Sinas. Quotidianum quoque est, vt in iis oris in quibus nomen Christianum aut Catholicum est exosum, naui ac strenui rei diuinos curatores, quantumuis religiosum statum professi, mercaturam faciant. Quod tamen ab eis ex fine rei Christianæ promouendæ fiat, potiùs quàm ex studio augendi rem domesticam, tamen inde certum argumentum ducitur, mercaturam neque inhonestè fieri, neque dissentaneè à religioso statu: alioqui viri mundo perfectè mortui, & vt Cassianus Collat.18. c.7. loquitur, *Viri Martyres*, negotiatorum personam non induissent, etiam ob finem extrinsecum optimum. Sicut nemo ob finem

quantumuis sanctum, velit agere lenonem, aut prostibularium.

22. Tertio olim Monachi sanctissimi, tametsi mercatores non appellabantur, tamen re ipsa quasdam merces suas promercales exponendo, faciebant mercaturam, & negotiationem obibant. Nam etiam in Iustiniani constitutione l. 12. C. *negotiatores ne militent*, qui præsunt ergasteriis, siue opificinis, negotiatorum nomine veniunt. At innumeros pios Religiosos opificia sua distraxisse pretio, testatissimum est. Sic enim Monachos Abbatis Aphthonij exercuisse omnes artes, & ex opificiis diuenditis victum parasse; quod verò supererat, per mulierum monasteria & carceres distribuisse, scribit Palladius in Aphthonio c. 39. laus. Eandem fuisse praxim piorum Monachorum, habetur ex Cassiano Collat. 18. cap. 7. De Palamone Monacho. Idem legitur in sancti Pachonij rebus gestis. Archebium triplicato sibi penso operis manuum, per annum dissoluisse debitum centum solidorum, quod mater contraxerat, scribit Cassianus lib. 5. De Instit. c. 38. S. Vitalis Abbas ingressus Alexandriam, confecto omnium meretricum catalogo, cepit laborare opuscula, & accipere per singulos dies siliquam vnā; vnde singulatim nunc hanc, nunc aliam meretricem, à nefario opere auocabat per noctem vnā. Sanctum Arsenium Abbatem, catenas è palmarum ramis à se contextas vendentem, describunt eius acta. Eiusdem generis est, quod non paucos Monachos legimus rei librariæ dedisse operam, & ex descriptione codicum pretio facta, victum parasse. Præstitisse id Lucianum Monachum habetur in vita S. Epiphaniij. Idem de quodam Simeone scribit Cassianus l. 5. De Instit.

Iustit. c.29. Est qui referat Theodosium iuniorem  
 æmulatum Monachos , scribendo victum parasse.  
 Sed Nicephorus quem allegat ex l.14. c.3. id non  
 habet : sed duntaxat tam concinnè & expeditè sa-  
 cros Codices descripsisse Theodosium , vt potuisset  
 inde parare victum, si libuisset, vt faciebant plerique  
 sancti Monachi. S. Hilarion, vt in eius rebus gestis  
 scribit Sanctus Hieronymus , cùm Siciliam esset in-  
 gressus , in quodam deserto agello lignorum quoti-  
 die fascem alligans, imponebat dorso discipuli, quo  
 in proxima villa venundato , & sibi alimoniam , &  
 iis qui fortè ad eos veniebant , pauxillulum panis  
 emebant. Nihil denique frequentius in historiis  
 veterum ascetarum, quàm quod labore manuum, ac  
 opificiis suis diuenditis, victum pararent, & ad ple-  
 raque sancta opera subsidium acquirerent , quæ est  
 vera negotiatio. Ac ne per simplicitatem, peccatum  
 hac in parte à piis illis , sed illiteratis Monachis  
 quis arbitretur , habemus suffragatores eiusdem v-  
 sus, Doctores Ecclesiæ eminentissimos. Nam San-  
 ctus Basilius Reg. fusior. 17. & 42. laborem in arti-  
 ficiis vendibilibus positum , vt suppetat Monacho,  
 vnde tribuat necessitatem patienti , mirè commen-  
 dat. Item S. Augustinus l. De opere Monacho. c.22.  
 & 25. valdè probat, vt qui aliquando in sæculo opi-  
 fices fuerunt , admittantur in monasterium , ad ea  
 lucrosa opera exercenda. S. quidem Basilius Reg.  
 285. breu. ambigit an inter fratres, ( id est an inter  
 duo Monasteria, ) fas sit exercere hanc negotiatio-  
 nem venditionis opificiorum : Tandem tamen, præ-  
 sertim si aliqua necessitas urgeat, annuit vt inter  
 fratres quoque, ita fiat. Honestatem verò eiusdem  
 mercimonij inter monasterium & seculares , sup-

ponit vt exploratam. Et apertè idem agnoscit S. Benedictus in Reg. c. 48. Improbatur sanè à P. Damiani l. 6. Episto. 32. quod interdum fratribus ex artificio vtilibus, quodlibet, impune licet, vt de Mauro quodam in aliquo monasterio opifice, ait. Sed hæc sunt vitia moderatorum, non opificij ex se honesti. Nonnulli item improuidi Monachi, laborem in conficiendis opificijs quæ diuenderent, vertebant in cladem pietatis, opprimentes se labore, vt memorat Cassianus l. 7. c. 10. tamen ea spiritus suffocatio per nonnullos improuidos, nihil derogat pro studio cæterorum, qui ea ratione præter lucellum ad vitam sustentandam necessarium, declinabāt otium, qua nulla est Religioso exitialis pestis, vt præter cæteros egregiè prosequitur S. Hier. Epist. ad Rusticum de Monachi Institutione. Denique nonnullis visum est, opus manuum, quâ victus parandi, quâ otij declinandi gratia, tantopetè Monachis esse necessarium, naturali ac diuino iure, vt necessariò dare illi debeant operam. In quam rem pleraque habet Cassianus l. 10. c. 8. & Isido. Pelus. l. 1. epist. 49. Quod tametsi rejiciunt Rupertus l. 3. in Regul. S. Benedicti à c. 4. & S. Bonauent. l. de Paupertate Christi contra Guillel. de S. Amore q. 1. *sub finem* & q. 2. nec reuera vt præcisè necessarium, aut in præcepto positum assignatur a Patribus opus manuum in Monacho commendantibus, vt à Hieronymo supra, & à S. Augustino l. De Opere Man. tamen certum est, opus Monachorum in finem parandi inde victus, & subsidia piorum actuum, esse laude dignum & meritorium, tametsi Religiosorum negotiationem contineat. Videtur enim hîc quoque locum habere illud Athalanci apud Cassiodorum l. 9. epist. 4. [sint sedula o-

peratione

peratione continui quæstus ; inuidiam non paues-  
tant. Quod ars dicitur, à crimine liberatur.]

23. Quartò est alia antiqua praxis Sanctorum,  
apertè inuoluens negotiationem. Plerique olim  
sancti Religiosi, habuere pueros seculares conui-  
ctores, quos intra cœnobìa & virtute & literis, etiã  
mitioribus imbuebant, ipsimet victum illis suppe-  
ditabant, & educabant corpore & animo. Ita habet  
S. Basilius non modò in Reg. Breuior. Interro. 292.  
vbi approbatur Magisterium puerorum, quod pos-  
set accipi de externis pueris non conuictoribus; sed  
etiam Regula 15. fusarum, vbi latè præscribitur for-  
ma pueros conuictores educandi, donec adolescant,  
& vel adulti facti, adscribantur Monachis, vel si  
voluerint, dimittantur. Quod imitatum S. Benedi-  
ctum, constat ex c. 59. Reg. & ex S. Gregorio, qui l.  
2. Dialo c. 3. *in fine*, nominatim inter nobilium Ro-  
manorum filios in cõuictum S. Benedicti adscriptos,  
memorat SS. Maurum & Placidum. Idque multis  
post sæculis æquè seruatum Cassini, liquet ex Actis  
S. Thomæ Aquinatis, quem puerulum in eo cœno-  
bio conuictorem Monachorum fuisse, ac cum pri-  
mis litteris lac sinceræ pietatis suxisse, disertè pro-  
dunt. Commendat plurimùm eam S. Benedicti de  
puerorum conuictorum educatione sollicitudinem,  
Turrecremata Tract. 133. in Reg. S. Bened. Scribit  
quoque Ioannes Diaconus l. 2. Vitæ S. Gregorij, c.  
46. sanctissimum illum Pontificem, puerulos An-  
glos in conuictum Monachorum tradidisse, vt à pri-  
ma ætatula, ad rectam fidem & bonos mores infor-  
marentur, adhibitis in eam curam insignibus viris:  
Quales inter Anglos Beda, eiusque deinde successor  
Albinus, præceptor Caroli magni; & qui Albinum

in eo item munere secutus est Rabanus Maurus. Videndus de hac antiqua Benedictinorum praxi Trithemius in Chron. Hirsaug. anno 854. & 890. ac 952. nec semel alibi. Itémque Acta S. Gildæ c. 3. & 11. & Aymoinus libro de Vita S. Abbonis Floriac. c. 3. Multa vniuersè de scholis puerorum in Monasteriis signauit Sauaro ad epistolam 11. libri quarti Sidonij. V. Monachus. Similiter ad Moniales, transmitti quoque solitas, etiam à remotis oris, puellas conuictrices, scribit Beda, in actis S. Eartongotæ, *initio*. Exploratum igitur est, viguisse olim vsum informandi in cœnobiis seculares pueros conuictores, quos non est verisimile impensis cœnobiorum vixisse: præsertim cum multi erant, & nobilium ac diuitum filij, quales B. Benedicto traditos, testatur S. Gregorius. Ne ergo cœnobìa planè exhaurirentur, parentes copiosi & locupletes, refundebant cœnobiis sumptus factos in puerorum alimoniam; ita vt quamuis institutio esset gratuita, iuxta decretum sextæ Synodi can. 5. tamen cibatio persoluto pretio compensaretur. At hoc quid aliud est, quàm mercimonium; ex fine quidem sancto initum; materialiter tamen planè idem cum eo quod obeunt caupones qui pascendis hospitibus quæstum faciunt? Vel quale obeunt plerique seculares, in vrbibus ad quas Scholastici confluunt disciplinæ gratia, quorum quantum possunt numerum domi alunt, constituto certo pretio? Hanc enim esse liquidissimam negotiationem, diffiteri non licet. Et tamen eam, ex diuerso licet sine quàm seculares, obiuere iam olim plerique SS. Religiosi, hodieque approbante S. Ignatio obit Societas Iesv, quæ passim habet puerorum seminaria suæ curæ cōcredita, & domos Conuictorum.

24. Quintò, quis neget pleraque apud Religiosos superflua & malè peritura, vendi posse? V.G. olera & fructus hortorum, ac agrorum; fœnum, vinum, lanitium, lac, & caseum ex ouibus, ipsasque oues & armenta, quibus religiosæ familiæ carere non possunt, nisi pascua sua velint inutilia & infructuosa relinquere. Hæc omnia, certum est à Religiosis vendi posse. Vnde enim suppeterent expensæ ad necessitates cœnobiorum quæ mendicato non viuunt, nisi liceret prædictas merces, quibus abundant, pretio distrahere? Est tamen in ea distractione, negotiatio & mercatura; æquè ac in eo vsu plerisque locis vigente, quò docti Religiosi libros quos fortè conscripserint, aliter mandare typis non possunt, nisi sumptus ad editionem suppeditent. Ne autem libros immanibus expensis custos dare siue pretio cogantur, cum certa euerfione Cœnobiorum, libros suis sumptibus prelo subiectos, distrahunt certo pretio, vt faciunt seculares Bibliopolæ, quos nemo exemerit mercatorum numero. Sunt ergo Religiosi, ea quoque in parte, veri mercatores & negotiatores citra noxam.

25. Sextò mederi ægrotis, & in eam rem parare ac conficere pharmaca, est opus sanctuin, nec Religiosos dedecens. Imò Palladius l. 14. laus. & Heraclides in Parad. c. 3. summopere celebrant Apollonium Monachum, qui à principio diei ad nonam vsque horam, vniuersa montis Nitriæ, virorum & mulierum Monasteria, in quibus ad quinque millia degebant, sedulus circumibat, non sine pharmacis & eduliis ad agrorum vsu Alexandria comparatis. Quam erga ægros Monachos & Moniales charitatem, veluti Testamento reliquit obeundam altè-

ri cuiusdam rei medicæ perito , omni eiusdem Ministerij supellectile eidem legata. Hoc verò Charitatis exercitium negotiationem inuoluisse , significat nomen eidem Apollonio inditum: dictus quippe est *ὁ ἀγοραμαστὴρ*, id est *ex negotiatoribus*, quod idem est ac *negotiator*. Non igitur absque antiquo exemplo, Religiosi periti rei medicæ, possunt pharmaca conficere, etiam in gratiam sexus mollioris ac Parthenonum. At hoc peragi non potest absque refusione expensarum , & lucro moderato , quo Pharmacopolium, & seplasiæ supellex sustineatur. Non igitur hac quoque ex parte abhorret à religioso statu negotiatio. Et videmus in Religionibus optimè constitutis , cernentibus atque adedò annuentibus Antistitibus, etiam Romæ, Pontifice non ignorante, esse in Religiosorum domibus Pharmacopolia, unde pharmaca suppeditantur, & variis secularibus, & puellarum monasteriis non absque pretij annumeratione, quæ est vera negotiatio; etiam si cura, & vt Scripturæ loquuntur, susceptio ægrarum Monialium, qualem secularis Medicus obiret (nam eam quoque obeunt Religiosi) ad negotiationem non spectet.

26. Septimò, passim Moniales, Episcopis consciis, & Directoribus Generalibus, doctis æquè ac piis viris annuentibus, negotiationem non vnā exercent. Et nonnullæ quidem cereis agni consecrati plagulis, ex arte concinnandis, quæstum non exiguum faciunt. Sericis enim vel argenteis aut aureis filamentis artificiosè in globum obductas consecratæ ceræ particulas, distrahunt certo pretio, quod valorem materiæ non consecratæ aliquantò excedit. Nam sub ea ratione vendi posse cereos agnos,



gnos, extra dubium est, vt rectè statuit Suares I. De  
 Simonia c. 14. n. 10. & Sanches l. 2. in Decalog. c. 43.  
 n. 29. malè refragante Valentia 12. d. 6. q. 16. p. 2. dub. 5.  
 Aliæ verò Moniales, linteis cuiuscunque generis op-  
 ificiis locant operam: Et audio in Emporio Lug-  
 dunensi, variorum Institutorum Moniales hanc ne-  
 gotiationem benè multis mulieribus & puellis se-  
 cularibus præreptam, ad se deuoluissè, non tantùm  
 vitandi otij gratia, sed etiam ad comparandum ho-  
 nestum lucellum, quo numerosum cœnobium su-  
 stentetur. Nihil affingo. Locupletes testes referunt,  
 mercatores quia vel paulo minore pretio rem con-  
 ficiunt, vel mercibus suis & materiæ stipenditæ  
 minùs timent, libentiùs cum Monialibus, quàm  
 cum secularibus obire hoc negotium. Adit ergo  
 vnus mercator Antiotitam, & ex pacto pretio, con-  
 ficienda assignat simul & semel, mille indusia,  
 octingentas ad lectum sternendum sindones, calceos  
 linteos mille, calanticas sexcentas. Antistita ritè dis-  
 sectam materiam, variis sororum turmis distribuit  
 notato die; earumque turmarum cuilibet y. g. De-  
 curiæ, præficit vnâ aliquam è sororibus, cuius in-  
 dustriam & diligentiam habeat compertam. Illa cœ-  
 teras ad pensum quotidianum vrget, & eò sollici-  
 tiùs aliarum diligentiam acuit, quò charius ei est  
 Monasterij bonum; & scilicet apud Antistitam gra-  
 tia, vnde gradus ad munera potiora procedente  
 tempore pateat. Vident ista Generales & Particulæ-  
 res Parthenonum Directores, & nequicquam grun-  
 nientibus secularibus puellis, ( quarum plerasque,  
 subtracto è quo victum petebant opificio, adigi ad  
 quæstum corpore faciendum, indubius rumor est, )  
 honestum lucrum ex ea negotiatione factum, soror-

ribus concedunt. Non igitur abhorret à religioso statu negotiatio, qualem seculares puellæ ante factitabant, & pergunt facere cum per Moniales licet. Quid alia, maximè quæstiosa, Monialium ex candidatarum dote, & oblationum superpondiis negotiatio?

27. Octauò, Quotidianum est, vt sexus vtriusque Cœnobiæ pecunias suas per contractum societatis collocent apud Campsores vel Mercatores totam operam impensuros, & ex pacto certam summam annumeraturos, sorte & fructibus in tuto locatis. Quamuis enim aliqui DD. circa eam lucrandi rationem & negotiationem Religiosis concedendam, tricati sint: tamen praxis vniuersalis, est in contrarium, & graues Theologi annuunt vt Ioannes Medina, q. 30. de Restit. *in secunda causa illicita negotiationis*, versic. *facit*. Tabienna V. *Emptio* n. 16. Armilla eodem n. 28. Lessius l. De Iustit c. 21. n. 6. & Rebellus 2. parte l. 9. q. vlt. num. 8. Nec qui id simpliciter improbant Molina, Tract. 2. d. 342. & Gu-tierres Tract. de Gabellis, quæst. 93. num. 30. & seqq. Audet graui nota id damnare, & plusquàm leuem culpam in ea Religiosorum negotiatione agnosce-re. Negotiationem voco, quia Campsor aut Mercator, qui operam aut etiam partem pecuniæ collaturus, à Religiosis accipit pecunias, verè negotiatur. Igitur Religiosi qui hac in parte mercatoris socij sunt & dicuntur, (vt patet ex nomine *contractus societatis*,) citra dubium negotiantur. Quamuis autem in contractu societatis, solus Campsor aut Mercator ponat totam operam, tamen cum cooperato-res habeat Religiosos; & ita quidem, vt iis se subducentibus, collapsura esset Campsoris opera; per-spicuum

uum est non minori iure dici negotiatores, quia  
 gotationis nervos conferunt, quàm mercatorem,  
 i ferè tantum confert, quod minùs præcipuum  
 operam scilicet & industriam. Sunt igitur Re-  
 iosi, hac in parte negotiatores. Quidni igitur  
 is quoque modis ex obiecto honestis, negotiari  
 è possint, si sibi commodum ducant?

28 Nonò habemus ipsiusmet Dei ac Christi ex-  
 mplum, qui & se negotiatores sunt professi, & ne-  
 gotiationem demandauere mortalibus. Deum qui-  
 em agere negotiatorem, egregiè tradit Hildeber-  
 s Epist. 5. Quid verò aliud Verbi cum humanita-  
 coniunctio, quàm negotiatio & admirabile com-  
 mercium? Insigniter id prosequitur S. Augustinus  
 34. ex 40. nouis. & in Plal. 37. conc. 1 *initio*. Breui-  
 er S. Leo s. 3. De Passio. c. 4. Diuitem hunc & mise-  
 ricordem cœli & terræ negotiatorem, commutatio-  
 ne mirabili ineuntem salutis nostræ commercium,  
 repræsentat. Totam Christi vitam fuisse negotiatio-  
 nem, indéque injici nobis negotiandi obligationem,  
 pulchrè tradit Petrus Damiani s. 59. Consilium item  
 Dei esse, vt hîc omnes negotientur, ideóque quod  
 fundamentum commerciorum est, pauperes & di-  
 uites coniunxisse, pulchrè docet S. Paulinus Epist.  
 12. Concludi ergo ex his videtur negotiationem  
 per se, & cum adiunctis suis inseparabilibus specta-  
 tam, nihil continere à piorum statu abhorrens, alio-  
 qui enim Deus ad eam non inuitaret, aut etiam pœ-  
 nis propositis compelleret mortales. Et quamuis  
 materia negotiationis ad quam Dei & Christi exem-  
 plo urgemur, alia sit quam eius negotiationis, de  
 qua hic disceptatio instituitur; formale tamen non  
 discrepat. Ac vel eo ipso quòd Deus & Christus, si-

militudinem, & proportionem negotiationum nostratum non refugerunt, videri possunt sufficienter eas purgasse, & dedecentibus religiosum statum foribus exemisse.

29. Vnum est, quod aduersus tot & tantas pro Religiosorum negotiatione argumentationes adduci posse cum aliquo colore videtur; effusio scilicet spiritus & euagatio mentis consecutura negotiationem. Verum timetur hac in parte, vbi non est timor. Nam S. Chrysostomus hom. 35. in Genes. Monachos hortatur ad collectionem animi in quantaui multitudine negotiorum: & vt monstret id non modò esse possibile, sed etiam haud adè operosum, adducit exemplum Eunuchi, qui erat super omnes gazas Reginæ Æthiopum; & tamen etiam in itinere, sacris studiis, & diuinæ lectioni vacabat. Frequens item est apud spiritualis vitæ magistros ac patres, agnoscere; posse aliquem in medio foro densis negotiorum agminibus circumseptum, degere velut in solitudine, si in Deum dirigat animi oculos, & in eum semper collineet. [ Qui corporaliter popularibus turmis premitur, & tamen nullos curarum secularium tumultus in corde non patitur, in vrbe non est; ] ait Hugo de Folieto l. 4. De claustro animæ c. 36. Pulchrè Sanctus Bernardus s. 40. in cant. *ad finem*. [Sola (inquit) indicitur tibi mentis & spiritus solitudo, solus es, si non communia cogites, si non affectes præsentia, si despicias quod multi suscipiunt, si fastidias quod omnes desiderant, si iurgia deuities, si damna non sentias, si non recorderis iniuriarum; alioquin nec si solus corpore es, solus es. Vidésne posse esse te, & solum, cum inter multos: & inter multos, cum solus es? Solus es in quanta-  
cunque

inque hominum verberis frequentia. ] Præmiserat,  
 ysticæ turturi , animæ piæ , quærendam secessio-  
 nem ac solitudinem, sed mente non corpore, eo quod  
 Christus Spiritus ante faciem nostram, solam Spiri-  
 tas solitudinem exigat. Præclarè vt omnia Nazian-  
 enus Orat. 21. agens de Magno Athanasio, Ægypti  
 monasteria visente , sepositis Eremitis , subdit de  
 Cœnobitis. [ Charitatis legem per communionem  
 & societatem colentes , solitarij simul & cœnobitæ  
 sunt, à cæteris quidem hominibus , negotiisque iis  
 omnibus , quæ in medio voluntur , versantque si-  
 mul & versantur, ac nobis per repentinas & crebras  
 mutationes imposturam faciunt, mortui & extincti;  
 sibi ipsis autem inuicem mundi loco sunt , ac per  
 comparisonem mutuo inter se virtutem acuunt &  
 extimulant. Cum his consuetudinem habens ma-  
 gnus ille vir , vt omnium aliarum rerum sequester,  
 & conciliator erat, nimirum illius exemplum se-  
 quens, qui per sanguinem suum ea, quæ inter se dis-  
 sidebant, pacificauit. Ita solitariam quoque vitam  
 cum cœnobitica in gratiam reducit , illud nimirum  
 ostendens & Episcopatum philosophiæ minimè ex-  
 pertem esse , & philosophiam sacri Antistitis insti-  
 tutione opus habere. Sic enim hæc duo, hoc est tran-  
 quillam actionem, & actuosam trāquillitatem con-  
 sociauit , & copulauit , vt persuasum omnibus red-  
 deret, monasticæ vitæ professionem morum potius  
 grauitate & constantia, quàm corporis secessione  
 exprimi, atque insigniri. In quam etiam sententiam  
 David, simul & rerum gerendarum facultate præ-  
 stabat, & maximè solus erat. Si cui tamen illud, *sin-*  
*gulariter , sum ego , donec transeam* , ad huius dicti  
 probationem, confirmationemque pondus ma-

gnum habere videtur.] Basilium fratrem inde præter cetera exornat Gregorius Nyssenus in Monodia, quodd in vrbibus quasi in solitudine versaretur, eo quodd hominum congressus illius virtutem nihil læderet. Et insigniter ipse sanctus Basilius in Const. Monast.c.6. agens de Monachis opificibus, quo modo Religiosi probati possint in medio foro degere vt in Monasterio, his verbis tradit. [ Si tempus aliquod inciderit, vt necessariò sub dio aliquid administrandum sit, haud quaquam hoc philosophiam tamen impediet. Qui enim verè philosophus est, is cum corpus suum curarum suarum domicilium, & animi sedem firmissimam habeat, licèt casus illum in forum attulerit, licèt in maxima conuentus alicuius celebritate versetur, licèt in monte aliquo, licèt in agro, licèt in media multitudinis frequentia sit, stabilis tamen in naturali suo monasterio manet: quippe qui mentem suam introrsum ad seipsum recollectam habeat, & de rebus ad officium suum pertinentibus philosophetur: siquidem fieri facilè potest, vt & qui se inter priuatos parietes contineat, is si negligenter se gerat, mentis agitatione circumuagetur foras: & vicissim qui in foro medio versetur, is si animo excubet, perinde sit ac si in magna esset solitudine constitutus; qui videlicet cogitationem suam ad seipsum tantummodò, ac ad Deum conuersam habeat, sensibúque suis perturbationes omnino nullas admittat, quæ à rebus ortæ sensibilibus, in animos solent nobis incidere.] S.Chrysostomus in Catechesi ad illuminandos, (est hom.21. ad pop.) confirmat ex Apostolo, officinam posse opifici, atque adeò etiam negotiatori, esse pro Monasterio. Idem S.Chrysostomus in Psal. 140. ad illud *singulariter*

*riter sum ego, donec transeam*, ait, hominem mediis in urbibus non secus ac in Monasterio posse esse singulariter, & ut ait, compactum, & non effusum animo. Euanesceit ergo difficultas aduersus Religiosorum negotiationes mota, ex consecutura in Religiosis per negotiationem dissipatione animi.

§.3. *Quibus confirmari videatur, Negotiationem prorsus à Religioso statu dissentire; contraria Timothei Conceptoris disputatio.*

30. **O**Mnino multa aduersus Mediastinum pro extirpanda è religiosis domibus negotiatione, producit Timotheus; demonstrans, quod supinitate quorundam Præfectorum, in nonnullis institutis, *claustra versa sunt in fora*, ut de suo tempore expostulabat Petrus Blesensis Epist. 27. non minus fœdum, vel etiam perniciosum & totius spiritus destructiuum esse, quàm quod ibidem addit Blesensis, *Claustra versa esse in Castra*, dum Religiosi, æquè aut etiam acrius quàm seculares, de bellis solliciti sunt, & assiduè de iis inquirunt & tractant; inter sunt animo præliis, configunt voluntate cum suis, nec raro cum Hæreticis aduersus Catholicos, & quod Gulielmus Parisiensis horrendum meritò censuit l. De Moribus cap. 8. cogitatione ac voluntate machæras agitant, & trucidant in quos incurrunt. Quæ monstrositas utinam tempora Gulielmi non esset transgressa. Sed de Claustrorum conuersione in Castra, per gentilissimum eorum ad quos obstare attinebat, spiritum, alio loco agendum est, cum de

truculentia bellicrepi *Edom*, quod est interpreta-  
tum *Ruffus*, iuxta S. Hieronymum, id est, sanguina-  
rius, atque cruentus, & terrenus. Nunc expenden-  
da est Claustrorum commutatio in fora; non per li-  
res; (quanquam ea quoque in parte, strenui nunc  
sunt Religiosi; vsque adeò, vt nuper hic vnus ali-  
quis è Mendicantium cœtu, redemptam abs se li-  
tem secularis hominis aduersus secularem, suscep-  
rit vrgendam in Curia Rationalium, à qua cum in-  
dignatione repulsus est, rescissa Superioris faculta-  
te scripto tradita;) sed per negotiationem; quam  
dehonestare religiosum statum, ideòque diuino &  
humano iure è cœnobiis esse repellendam, suaderi  
istis videtur.

31. In primis, Scripturæ, negotiationis per pios  
homines exercitium improbant. In quam rem vul-  
gatissimus est locus ex Psal. 70. vbi David de se pro-  
fitetur, *Quoniam non cognoui negotiationem, introibo  
in potentias Domini.* Ita eum locum legunt, Vetus  
Psalterium Romanum, Hieronymus, Augustinus,  
Arnobius, Cassiodorus, ibi; necnon Gelasius Epist.  
ad Episcopos Lucaniæ, & S. Ambrosius. Offic. c. 6.  
Neque discrepat nostra lectio quæ habet, *quoniam  
non cognoui litteraturam.* Neque item lectio Pagnini,  
& Hebraizantium, qui legunt, *quoniam non cognoui  
numerationes*, seu *numeros*. Eodem enim recidit om-  
nium illarum lectionum sensus. Et quoad vocem  
quidem *litteratura*, videri posset interuenisse men-  
dum, ob affinitatem Græcæ vocis *πραγματείας* quam  
habent pleraque Græca Biblia, cum voce *γραμματαίς*,  
quæ in aliis quibusdam Græcis codicibus exhibe-  
tur. Tamen admissa & retenta (vt par est,) ea le-  
ctione quam exhibet, vulgata editio, Tridentinæ  
Synodi



Synodi suffragio probata, saluus manet sensus, sub-  
 fectus voci *negotiationis*. Optimè quippè *litteratura*,  
 & *numerationes* cadunt in scripturas, quarum usus  
 est inter negotiandum. Dati enim & accepti tabu-  
 læ, siue libri rationum, literis constant. Item uni-  
 uersa negotiatio in rationibus subducendis & nu-  
 meris conscribendis versatur, vt rectè ad hunc Psal-  
 tis locum notarunt Titelmannus, & Genebrardus,  
 ac Busæus ad Epistolam 17. Blesensis. Bellè igitur  
 Spiritus Sanctus per Psaltem iuxta omnes illas le-  
 ctiones loci propositi, aperit lubricitatem negotia-  
 tionis, & immania pericula quibus salus æternæ ne-  
 gotiantium patet: ac proinde eo ipso satis docet,  
 talem occupationem cum statu religioso non cohæ-  
 rere.

32. Idem traditur Ecclesiastici 26. & 27. verbis  
 illis. *Dua species difficiles & periculosa mihi appa-  
 ruerunt. Difficile exiit negotians à negligentia, & non  
 iustificabitur caupo à peccatis labiorum. Propter ino-  
 piam multi deliquerunt, & qui querit locupletari, auer-  
 tit oculum suum. Sicut in medio compaginis lapidum  
 palus figitur, sic & inter medium (venditionis & em-  
 ptionis) angustabitur peccatis.* Sensus est, binas of-  
 ficiorum species plenas periculi ad salutem conse-  
 quendam videri. Nimirum eorum qui ex negotia-  
 tione, & eorum qui ex caupona quæstum faciunt.  
 Negotiator enim vix exiit à *negligentia*, id est à  
 culpa quæ per negligentiam verorum bonorum, &  
 æternæ salutis admittitur. Vel certè *negligentiæ* no-  
 mine eo loco, signatur incuria officiorum pietatis:  
 quia animus negotiorum multitudine obrutus, fa-  
 cillimè negligit functiones pietatis erga Deum. Un-  
 de videmus raros esse negotiatores, qui frequentem

sacramentorum vsurpationem, & studium orationis non negligent. Item multi negotiatores præ immoderata quæstus cupiditate, fidem datam, & alieni iuris indemnitate cum pietatis clade negligunt. Ab his aliisque huiusmodi negligentiis difficillimè exiit, qui negotiator strictè appellatur. Caupo autem (qui etiam negotiator est, & vina sua ac cibos & utensilium locationem pretio tradit, habet tamen peculiare *cauponis* nomen quo à negotiatore per genericum nomen expresso secernitur; ) laborat peculiari ter morbo peccatorum quæ per linguam admittit, ut mendacio ac pariurio. Quæ cum sint officiorum ad quæstum faciendum frequentia admodum genera, benè subnectit Sapiens, multos ( utique ex prædictis & negotiatoribus & cauponibus, ) propter vitandam inopiam, & rem familiarem augendam, fuisse in peccata, & in exitium æternum. Qui enim vult ditescere, non erit innocens, quia frequenter auertet oculos suos ne videat cælum, & iustorum iudiciorum recordetur. Sunt ergo paxillus in lapidum compagine firmiter infixus, ab iis hinc inde arctè constringitur, ita ut ægrè refigatur: ita difficile & operose è medio negotiantium ( vendentis inquam & ementis, ) auelluntur peccata.

33. Consideratione porro dignum est, Spiritum Sanctum in locis propositis non ferire negotiationem, quasi intrinsecè cum peccatis complicetur, nec possit absque Dei offensa exerceri: sed tantum docere, negotiationem esse rem periculis plenissimam, & cui magna cum difficultate desit peccatum. Hinc verò suppeditatur potentissima ratio, ad persuadendum negotiationem à religioso statu abhorere. Esto enim utile, sit vel etiam necessarium, inueniri

ueniri in Republica negotiatores : propter lubricum tamen peccandi, quod negotiationi annectitur, par est, eos qui perfectionem Christianam ex instituto capessunt, & maximè à peccatis auerti profitentur, alia suscipere studia, & aliis exercitationibus parandæ vel augendæ rei familiaris addicere operam, quod est nostrum hoc loco consilium. Nimirum non si opus aliquod per se & natura sua peccato vacat, habet tamen adiunctam magnam ad peccatum procliuitatem; consentaneum est eos qui à peccato elongatissimi esse profitentur, in illud incumbere. Sic enim non abhorreret à Religioso, esse aleatorem, quòd per se loquendo, alea peccato vacet: tametsi tantam ad peccatum illecebrofitatem habet annexam, quantam aperit S. Cyprianus, aut alius apud eum author libri De Aleatoribus, ac Ióannes Sarisber, l. i. Polycrat. c. 5. & ex variis Comitulus 3. Respons. q. 7.

34. Ex nouo Testamento. proferri in primis in hæc rem potest, illud Christi oraculum, Lucæ 9. *Nemo mittens manum suam ad aratrum, & respiciens retrò, aptus est regno Dei.* Nam quamuis varij eum locum variè exponant, vt latè refert Suares l. i. De voto c. 2. à n. 18. tamen germana expositio esse videtur ea, quam insinuat S. Basilii in Const. Monast. c. 21. traditque Desiderius Caduriensis epist. 14. Nimirum eos esse ineptos ad regnum Dei, & indignos, qui perfectionis Christianæ regiam obtineant, qui ita volunt suscepto perfectionis instituto insistere, vt simul velint curam collocare in negotiis secularibus, & huius vitæ studiis implicari, vt faciunt negotiatores. Id enim verè est, manu ad aratrum missa, retrò respicere. Sicut enim arator, si strica præ-

hensa retrorsum auertatur, non poterit sulcos rectè ducere, sed vel delirabit, vel prorsus arare non poterit, quia aratio maximè attentum, & oculis in opus arandi intentum aratorem deposcit; Ita qui animum adiecit ad perfectionem consequendam, ineptus est ad insistendum ei studio, si simul temporalibus curis se implicet. Fuisse hanc Christi Domini mentem, colligere licet ex adiunctis. Nam Christus protulit sententiam propositam, occasione eius qui ita se obtulit ad eum sequendum, vt simul vellet curam gerere rerum temporalium, & ad studia domestica applicare animum; quod Christus fieri posse inficiatur. Æquè igitur retrò respiciunt, & æquè regno Dei sunt inepti, qui negotiationem, quæ negotiis seculi, & curis temporalibus distendit animum, & oculos auertit ab inito excolendi animi instituto, sociare volunt cum vita religiosa.

35. Addi potest correptio Christi vetantis facere domum Patris sui, domum negotiationis. At, quæ veriùs domus Dei, quàm Religio? Suffragatur huic expositioni Beda homil. 7. in Quadrag. Eodem refertur illud Christi, *nemo potest duobus dominis servire*. Eum quippe locum Synodus Constantinopolitana quæ dicta est prima & secunda, c. 11. allegat aduersus factos homines secularia tractantes quos idcirco iubet è sacro cœtu exturbari, Æquè S. Paulinus Epist. 2. eo loco vtitur ad monstrandum fugienda esse personis sacris secularium negotiorum implicamenta. Benè quoque Petrus Blesensis Tract. de Institut. Episcopi, sic scribit. [Nemo potest duobus Dominis servire, Deo & mammonæ. Non excidat à te quomodò in tonsura capitis, quando electus es in sortem Domini renunciaſti ignominia Laicali.

Laicali. In die autem consecrationis tuæ, super abrenunciatione secularium, emisisti vota quæ distri-  
xerunt labia tua. Alligatus es verbis oris tui, vbi ad  
consecrantis interrogationem, sine exceptione ali-  
qua promissisti, quod de cætero à terrenis negotiis,  
& à turpibus lucris te alienatos, tuamque sollicitu-  
dinem diuinis semper negotiis mancipares. ] Di-  
cuntur ista Episcopo, sed æquè aut etiam fortius  
stringunt Religiosum qui mercimonia cum religio-  
ne nectere cogitat. Denique S. Paulinus epistola 2.  
eodem modo accipit illud Christi dictum, in quo  
versamur.

36. Apostol. 2. Timot. 2. æquè confodit ineptam  
hanc consociationem. Sic enim affatur discipulum  
amantissimum. *Labora sicut bonus miles Christi IESU.*  
*Nemo militans Deo, implicat se negotiis secularibus,*  
*ut ei placeat cui se probauit.* Sanctus Cyprianus E-  
pist. 66. paulò aliter, eodem tamen sensu legit, *Ne-*  
*mo militans Deo obligat se molestiis secularibus.* Hunc  
locum Gelasius Epist. ad Episcopos Lucaniæ, S. Au-  
gustinus serm. 19. De Verb. Dom. Conc. Carthag. 3.  
cap. 15. & Conc. Forouil. sub Adriano 1. c. 5. intor-  
quent in Clericos negotiatores. Nec minori iure  
intorqueri potest aduersùs Religiosos negotiatores,  
cum Religiosi non minùs militent Deo, quàm Cle-  
rici. Religiosos sanè specie milicum Dei, pulchrè  
exhibent S. Basiliius ad filium Spirit. Chrysostomus  
hom. 57. ad pop. Regula Carmelitanorum cap. 12.  
Delrio parte 3. Marialis lect. 3. Vt ergo liqueat, qua  
ratione Apostolus feriat Religiosos negotiatores,  
expendendum est quo modo discipulum alloquatur:  
nempe iubens vt meminerit se esse Christi militem,  
ac vt militi esse strenuè laborandum, & nauiter in-

cumbendum in victoriam. Porro nemo ex iis qui se militiae addixerunt, sollicitus est de negotiationibus & mercimoniis, quibus compareret quæ ad vitam pertinent: nec anxie attendit quid manducaturus vel bibiturus sit, aut vnde esculenta & poculenta sit paraturus: ( id enim Imperatoris est prospicere; ) sed tantum cogitat quomodo ei cui se sacramento militari interposito addixit, *σπατολογήσαντι*, gratam operam nauet. Similiter igitur iuxta Apostolum, necesse est, militem Dei omnibus mundanis sollicitudinibus abiectis totum versari in ea cura, quomodo placeat Deo, cuius militiae se adscripsit. Hunc Apostoli sensum ferunt aperte Græca verba *τὸ εἰς πρᾶγμα*, id est *vita* seu *victus negotiis*, atque addeò mercimoniis, quibus quæ ad vitam pertinent, suppeditantur, ut benè attigit Bellarminus l. 5. De Rom. Pont. c. 10. ad 5. Negat Apostolus militem vllum talibus dare operam, & his fidei spinis horrescere ( sic enim S. Hieronymus Epist. ad Eustoch. De custod. virginis. cogitationes de victu nominat. ) Quamvis autem Latinus interpres, eam militiam restrinxerit ad militiam quæ sub Deo duce obitur, tamen Græci codices omittunt illud *Deo*, & simpliciter dicunt, *nemo militans*. Sed hoc perinde est. Nam additamentum à Latino interprete appositum eo pertinet, ut intelligatur, mentem Apostoli collimare ad spiritualem militiam quæ exercetur sub summo Imperatore Deo; ac proinde velle, ut quemadmodum seculi milites Imperatori suo permittunt curam prospiciendi victui ipsorum, sic milites Dei, abiecto negociandi, & per negotiationem necessaria ad victum parandi fastidio, prorsus à Deo pendean, procul à se ablegatis prædictis vitæ negotiis  
& cu-

& curis huius vitæ, quas noster interpres, vertit *negotia secularia*. Egregiè omnino hanc loci Apostolici interpretationem & ad Religiosos accommoda-  
 tionem prosequitur S. Basilius in proœmio Asceti-  
 corum. Et æquè eò quadrant, quæ de illo Apostoli  
 loco habet S. Chrysostomus ser. de militia spiritua-  
 li. Eodem sensu S. Epiphanius hæc. 59. n. 4. ait, ex  
 usu Ecclesiæ Catholicæ, *ἑοῦρτα* non admitti ad sa-  
 cros ordines; quia nemo coniugio implicatus, nisi  
 uxori maritus esse desinat, admittitur ad sacros or-  
 dines. Vbi *viuere*, idem est quod matrimonio impli-  
 citum secularia tractare, & obire negotia familia-  
 ria mundanis hominibus, ut uxori ac liberis pro-  
 spiciant, & rem domesticam augeant. Sic cum Epi-  
 phanij locum à Casaubono & Salmasio Sectariis  
 malè detortum ad extraneum sensum rectè restituit  
 Petavius c. 5. Miscellan. Exercit. Est igitur negotia-  
 tio quippiam dedecens Religiosos, quippe Deo mi-  
 litantes, & Imperatori providentissimo autoratos,  
 nec ultra viuentes sed mortuos, ac proinde viutorum  
 sollicitudinibus ac spinositatibus minimè implican-  
 dos. [ Et nos milites sumus, eò maioris disciplinæ,  
 quò & tanti Imperatoris, ] aiebat Tertullianus l. De  
 Exhort. ad Cast. c. 12. & latè idem confirmat Chry-  
 sosto. serm. 22. in ad Ephes. in *Morali*. Id si de om-  
 nibus promiscuè Christianis verè ab illis asseritur,  
 quantò magis de Religiosis?

37. Quadrat item in hanc rem, locus Apostoli  
 verantis Antistitem, & scilicet quemcumque præ-  
 terea addictum diuinæ militiæ, esse turpis lucrì cu-  
 pidum; ad Titum 2. Quanquam enim turpe lucrum,  
 potest accipi pro lucro iniusto, quale esset si Anti-  
 stes circumueniret subditos, eosque litibus inuol-

neret, vt haberet quomodo eos exfugeret, quod Paulo Samosateno exprobratum est à patribus Concilij Antiocheni apud Eusebium l. 7. histor. c. 26. Tamen propriè, lucrum turpe à lucro iniusto est discernendum, vt benè notauit Abul. in c. 25. Matth. q. 223. & 225. existimans lucrum illud dici iniustum, quo læditur ius alienum; V. G. quia res venditur vltra iustum pretium: illud verò lucrum dici turpe, quod quamuis non pugnet cum Iustitia, quia caret inmoderatione, tamen caret honestate: non quòd propterea sit malum in se & absolutè, ita vt respectu cuiuscunque sit inhonestum, sed quod ex se sit quid indifferens, & vacuum honestatis ac laudis. Hæc tamen *turpis lucri* interpretatio non placet, quia tale lucrum, iuxta Abulensem, non est malum, sed est indifferens; quorsum ergo dicitur turpe? Non enim quòd pulchritudine & deformitate æquè caret, dici potest deforme ac turpe, præcisè quia non est pulchrum. Quare dicendum est, idcirco lucrum aliquod denominari *turpe* respectu certi cuiusdam status, aut certæ personæ, quia est ei dissentaneum: etiamsi in alio aliquo à cuius statu non abhorreat, minimè dicatur *turpe*; & ex bono fine captatum, possit iustum & honestum esse. Tale ergo est respectu personarum sacrarum, lucrum quod ex negotiatione paratur; cum negotiatio lucri causa initur, vt faciunt vulgares negotiatores. Id quippè lucrum, respectu sacrarum personarum, dicitur lucrum turpe, quia quamuis supponatur non esse lucrum iniustum, tamen dedecet nobilem statum Clericorum & Religiosorum; sicut etiam passim (saltem in plerisque oris,) censetur dedecere statum nobilium, qua de re inferiùs plura.



38. Secundum Scripturas, virgenda sunt Pontificum & Conciliorum oracula, non modo quibus Religiosos à negotiatione arcent, sed etiam quibus interdiciunt Clericis ea occupatione. Nam ut notauit Diuus Thomas 2.2. q.187. art.2. quoad hoc, eadem vel etiam potior ratio est Religiosorum, etiam si Laicorum, quam Clericorum, cum omnes eidem sacrae militiae sint adscripti; & Religiosorum scopus multò magis eos auertat à strepitu negotiationis; quam seculares Clericos.

39. Inter Pontifices adducere in primis possumus S. Syluestrum, de quo in hunc modum Metaphrastes. [Curam gessit boni in Ecclesia ordinis; & cum inuenisset Clericos mundanis & secularibus vacantes administrationibus, intentosque mercaturis, emptionibusque & venditionibus, ille primus legem tulit, ut qui sacriati erant ab iis abstinerent, vacarent autem precibus, dictitans id quod dictum fuerat à vase electionis, *Nemo militans, implicatur negotiis quæ ad victum pertinent, ut Duci placeat exercitus.* Et quod dixit Dauid, *Vacate & cognoscite.*] Gelasius 1. Epist.9. quæ est ad Episcopos Lucaniæ c.17. Descriptus in Concilio Aquilgran. sub Ludo. c.91. &c. consequens dist.88. sic dixit [Ad nos missa relatio; nuntiavit plurimos Clericorum negotiationibus inhonestis & lucris turpibus imminere, nullo pudore cernentes Euangelicam lectionem, qua ipse Dominus negotiatores è templo verberatos flagellis asseritur expulisse, nec Apostoli verba recolentes, quibus ait *Nemo militans Deo, implicat se negotiis secularibus.* Psalmistam quoque Dauid surda dissimulantes aure, cantantem: *quoniam non cognoui negotiationes, introibo in potentias Domini:* Proinde hu-

iustmodi, aut ab indignis post hæc quæstibus nouerint abstinendum, & ab omni cuiuslibet negotiationis ingenio vel cupiditate cessandum: aut in quocunque gradu sint positi, mox à Clericalibus officiis abstinere cogantur: quoniam Domus Dei, domus orationis & esse debet, & dici, ne officina negotiationis, & spelunca potiùs sit latronum. ] Quas Gelasius *inhonestas negotiationes, & turpia lucra*, ac *indignos quæstus* nominat, perperam quis de negotiationibus ex obiecto suo illicitis accipiat: has quippè negotiationes non esset necesse verbis Psal- tis & Apostoli, & allato factò Christi negotiatores expellentis coarguere, quandoquidem ex obiecto sordent. Id ipsum ergo intelligit Gelasius per inhonestas negotiationes & quæstus indignos, quod Apostolus per turpe lucrum, cùm negat Episcopum debere esse turpis lucri cupidum; id est quod pareatur ex opere Episcopum dedecente: cuiusmodi sanè est negotiatio respectu Clericorum & Religiosorum, de mente Gelasij. Ex Pontificibus, satis. Pergo ad Concilia.

40. Concilium Chalcedonense c. 3. interdicat Clericis & Monachis, ne se negotiis secularibus immisceant; quod ad mercaturam & negotiationem pertinere, notat Glossa ad distinct. 88. *initio*.

Appendix ad Concilium Oecumenicum Lateranense 3. sub Alexandro III. celebratum parte 27. c. 3. ex rescripto eiusdem Alexandri III. ad Londoniensem Antistitem, sic habet. [ Secundùm instituta Prædecessorum nostrorum, sub interminatione Anathematis prohibemus, ne Monachi vel Clerici causa lucri negotientur. Et ne Monachi à Clericis vel à Laicis firmas habeant. ] Id est, ne sub annuo censu

cenſu prædia ruſtica, vel fodinas, aut ſalinas, aliquídve ſimiliter frugiferum conducant. Ea quip-  
pè redemptiõ rei frugiferæ Gallis hodièque *ſirma*  
dicitur. Vnde *fermier* pro mancipè vel redemptore.  
Meminit Religioſorum redemptorum Theodorus  
Studita Catech.9. vt videas, Concilium non verbe-  
raſſe aërem, cùm redemptores Monachos eſſe vetuit.

Concilium Colonienſe tertium, celebratum ſub  
Hermannò poſtea lapſo p.2. c.11. [*Nemo militans  
Deo, implicat ſe negotiis ſecularibus, vt ei placeat cui  
ſe probauit.* Quare multa prouidentia olim vetitum  
eſt, ne Clerici vel Monachi, mercatores, ( taceamus  
fœneratores ) ſint lucri cauſa. ] Reſpicit decretum  
Lateranenſe, proximè adductum.

Concilium Treuerenſe anno 1549. ſub Ioanne  
Archiepiſcopo, tit. De Religioſis *ſub finem* [ Statui-  
mus, imò antiquorum Patrum Canones renouan-  
do mandamus, quod nullus Monachorum, pro lu-  
cro terreno de monaſterio ſuo exire, nefandiſſimo  
auſu, aut ſecularibus negotiis ſeſe immiſcere præſu-  
mat. Itaque Religioſos à curtibus Monaſteriorum  
ſuorum, ad Monaſteria reuocari, & Curtes per fi-  
deles Laicos ſeu præbendarios adminiſtrari, iube-  
mus. ]

41. Suffragantur SS. Patres, quorum paucos ap-  
pendere operæpretium videtur. S. Dionyſius c.6.  
Eules, Hierar. ait multa quæ ſecularibus permittunt-  
tur, vetari Religioſis ſeu Monachis, quæ iuxta  
Georgium Pachimerem in Paraphraſi ſunt γὰρ καὶ ἐν  
τῷ ζῆλεϊ, καὶ ἐν πορείᾳ οὐκ ὁμολογῶν : καὶ ἐν τοῖς ἐν οἷς ὁ λαϊκὸς  
καταχείνεται. *Nuptiæ, in bello aut negotiatione ver-*  
*fari, & n aliis eſſe, ob qua Laicus non condemnatur.*

Hilarius Diaconus Autor qq. Veteris ac Noui

Testam. c. 127. *sub finem*. [ Quis nesciat vnumquodque suam legem habere? Est enim quod omnino generaliter omnibus non liceat: est item quod aliis licet; & aliis non licet: & est quod aliquando licet, & aliquando non licet: fornicari omnibus non licet: negotiari verò aliquando licet, aliquando non licet: Antequam enim Ecclesiasticus quis sit, licet ei negotiari: facto iam, non licet. ]

S. Ambrosius 2. offic. c. 21. *in fine* informans Sacerdotem, id est Antistitem, admonet eum, [ Impensas misericordiae conuenientes frequentare, quantum oporteat, largiri peregrinis non superflua, sed competentia: non redundantia sed congrua humanitati; ne sumptu pauperum alienam quærat sibi gratiam, nec restrictiorem erga Clericos, aut indulgentiorem se præbeat. Alterum enim inhumanum, alterum prodigum: si aut sumptus desit necessitati eorum quos à sordidis negotiationis aucupiis retrahere debeas, aut voluptati superfluat. ] Vult Antistitem parcè in externos effundere bona ecclesiastica: ne Clerici, quorum prima illi habenda fuerat cura, in sordida negotiationis aucupia, à quibus retrahendi per Antistitem essent, adjicere animum adigantur. Idem l. 3. De Virgin. ad illud *Per vicos & Plateas queram*, multa habet in nequitias fori rerum venalium & negotiationis; quo ipso id genus occupationis, à Clericis & personis quibusvis sacris longè ablegat.

42. S. Chrysostomus hom. 20. ex variis in Matth. sic loquitur de negotiatoribus [ Iustorum operationi laborum ex emptione & venditione iniquitatem immiscent, & iuramenta frequenter, & periuria simul, atque mendacia Auaritiæ conjungunt: sola cu-  
rant

rant secularia , & terræ permanent affixi , & modò  
lucrentur , omnia faciunt : vt autem pauperibus  
communicent , nullam gerunt curam , sua semper  
volentes augere. Quis referat super his conuitia,  
contumelias, fœnora, vsuras, contractus multæ fal-  
sitatis plenos, turpia commercia? ] Vide an huius-  
modi opus Clerico aut Religioso concederet S.  
Chrysostomus. Autor imperfecti operis in Matth.  
hom. 38. [ *Christus de templo eiecit negotiatores*, signi-  
ficans, quia homo mercator vix aut nunquam potest  
Deo placere ; & ided nullus Christianus debet esse  
mercator : aut si voluerit esse, projiciatur de Eccle-  
sia Dei , dicente Propheta , *Quia non cognoui nego-  
tiationes, introibo in potentias Domini*. Quemadmo-  
dum enim qui ambulat inter duos inimicos, ambo-  
bus placere volens & se condemnare , sine malilo-  
quio non potest esse: ( necesse est enim vt & isti ma-  
lè loquatur de illo , & isti malè loquatur de isto: )  
sic qui emit & vendit , sine mendacio & periurio  
esse non potest. Necesse est enim vt negotiatoribus  
hic iuret, quia non tantum valet res quantum com-  
parat eam ; & ille iuret quia plus valet res quàm  
vendit. Sed nec est stabilis substantia eorum. Talium  
enim substantia , aut ipsis viuentibus peritura est,  
aut à malis hæredibus dissipanda est , aut ad extra-  
neos & inimicos hæreditas eorum ventura est. Non  
potest ad bonum proficere , quod congregatur de  
malo. Quemadmodum si triticum, aut aliquam bla-  
di speciem cernas in cribro , dum huc illucque ia-  
ctas eam , grana omnia paulatim deorsum cadunt,  
& in fine in cribro nihil remanet , nisi stercus so-  
lum. Sic & substantia negotiatorum , dum vadunt  
& veniunt inter emptionem & venditionem, minui-

tur, & in nouissimo nihil illis remanet, nisi solum peccatum.]

S. Epiphanius hæc. vltima, describens mores Ecclesiæ Catholicæ, sic habet de Negotiatoribus. [Negotiatores (Ecclesia) non recipit, sed inferiores omnibus ducit. Non est sensus, Ecclesiam interdicare omnibus Christianis negotiatione, sed quod eam tantum concedat contemptibilibus qui sunt in ea, vt Apostolus de Iudicibus dixit. Cum ergo Ecclesiastici teneant in Ecclesia primum locum, liquet ex mente S. Epiphaniij, eos à negotiatione arceri.]

43. S. Hieronymus Epist. ad Nepotianum, Clericum negotiatorem tanquam pestem quandam fugiendum decernit. Idem Epist. ad Rusticum de Monachi instit. [Vidi ego quosdam, qui postquam renunciauere sæculo, vestimentis duntaxat, & vocis professione non rebus, nihil de pristina conuersatione mutarunt: res familiaris magis aucta, quàm imminuta.] Et mox [Plerique artibus & negotiationibus pristinis carere non possunt, mutatisque nominibus institutorum, eadem exercent commercia, non victum & vestitum, quod Apostolus præcipit, sed maiora quàm seculi homines emolumenta sectantes. Et prius quidem ab ædilibus, quos ἀγοράνομοι Græci appellant, vendentium coerceretur rabies, nec erat impune peccatum. Nunc autem sub religionis titulo exercentur iniusta compendia: & honor nominis Christiani fraudem magis facit, quàm patitur: quodque pudet dicere, (sed necesse est, vt talem sic ad nostrum erubescamus dedecus,) publicè extendentes manus, pannis aurum tegimus, & contra omnium opinionem plenis sacculis morimur diuites, qui quasi pauperes viximus.]

S. Augu-

S. Augustinus in Psal. 70. ad illud, *quoniam non cognoui negotiationes*. [ Idèd (inquit) tota die laudem tuam, quoniam non cognoui negotiationes. Quæ sunt istæ negotiationes? Audiant negotiatores & ducant vitam, & si fuerunt non sint, non cognoscant quod fuerunt, obliuiscantur: postremò non approbent, non laudent, improbent, damnent, mutantur, si peccatum est negotiatio. Hinc enim auditate nescio qua acquirendi, ô negotiator, quando damnum passus fueris, blasphemias, & non erit in te quod dictum est, *tota die laudem tuam*. Quando autem pro pretiis rerum quas vendis, non solum mentiris, verum etiam falsum iuras, quomodò in ore tuo tota die laus Dei? vel quando, si Christianus es, etiam ex ore tuo blasphematur nomen Dei, ut dicatur, Ecce quales sunt Christiani? Ergo si propterea iste tota die Dei laudem dicit, quia non cognouit negotiationes, corrigant se Christiani, non negotientur. ] Quamvis autem postea S. Augustinus approbat iudicium eius qui opponit hæc esse vitia negotiatoris non negotiationis, ideòque non negat Christianum secularem posse licitè dare operam negotiationi, tamen ex tanta multipliciter peccandi facilitate, quæ indiuidua comes est negotiationis, perspicuum est, quàm S. Augustinus auersus esset à negotiatione Clericis & Religiosis concedenda. Qua ratione huc quoque trahi potest Saluianus sub finem libri tertij de Prouid. cum ait, [ Quid aliud est cunctorum negotiantium vita, quàm fraus atque periurium? ]

44. S. Gregorius Religiosorum, & quarumvis sacrarum personarum effusionem ad seculi negotia, (atque adeò maximè ad negotiationem, quia maxi-

mè diffundit & dissipat animum) tragicis modis deplorat, aduocatis etiam in eam rem Hieremiæ lachrymis. Et imitatus Apostolum, transfigurans in se hæc omnia, vt informis aptius inderetur, ait; [Dei causam relinquimus ad terrena negotia vacamus, locum sanctitatis accepimus, & terrenis actibus implicamur. Impletum est in nobis profectò quod scriptum est; *Et erit sicut populus, sic Sacerdos.* Sacerdos enim non distat à populo, quando nullo merito vitæ suæ, vulgi transcendit actionem. Imploremus Hieremiæ lachrymas, consideret mortem nostram & deplorans dicat; *Quomodo obscuratum est aurum, mutatus est color optimus, dispersi sunt lapides sanctuarij in capite omnium platearum?* Aurum quippe obscuratum est: quia Sacerdotum vita quondam per gloriam virtutum clara, nunc per actiones infimas ostenditur reprobata. Color optimus est mutatus: Quia ille sanctitatis habitus, per terrena & abiecta opera ad ignominiam despectionis venit. Lapidēs verò Sanctuarij intrinsecus habebantur, nec sumebantur in summi Sacerdotis corpore, nisi cum sancta sanctorum ingrediens in secreto sui conditoris apparebat. Nos ergo fratres charissimi, nos sumus lapides Sanctuarij, qui apparere semper debemus in secreto Dei, quos nunquam necesse est foris conspici, id est nunquam in extraneis operibus videri. Sed dispersi sunt lapides Sanctuarij in capite omnium platearum: quia hi qui per vitam religiosam, & orationem semper intus esse debuerant, per vitam reprobam foris vacant: Ecce iam penè nulla est seculi actio, quam non Sacerdotes administrent, dum ergo in sancto habitu constituti, exteriora sunt quæ exhibent, quasi Sanctuarij lapides foris iacent; quia



quia enim Græca voce, *Platea*, à latitudine vocatur; Sanctuarij lapides in Plateis sunt, cum Religiosi quique lata mundi itinera sectantur. Non solum in Plateis, sed & in capite Platearum dispersi sunt, quia & per desiderium huius mundi opera peragunt, & tamen de Religioso habitu culmen honoris quaerunt: In capite ergo Platearum dispersi sunt, quia & iacent per ministerium operis, & honorari volunt de imagine Sanctitatis.] Sic S. Pontifex hom. 17. in Euang. Et expressit dum locum Philippus Abbas l. de dignit. Clerico. c. 14. aduocans ipse quoque, Ieremiæ luctum ad deplorandam dispersionem Religiosorum in latitudinem secularium actionum, siue negotiationum.

45. Petrus Blesensis Epist. 17. in Clericum negotiatorem validissimè conclamat: Adscribo partem. [Si tuæ professionis ordinem, & gratiam diuinæ vocationis attenderes, te potius lectione, quàm negotiatione, artibus quàm mercibus occupares. Periculosum siquidem est in Laico, sed perniciosum in Clerico, negotiationibus augere peculium, atque rerum ambitiosa venalitate seipsum Diabolo venalem exponere; Clericus qui leuiore comparat pretio, vt vendat cariùs, filius est auaritiæ, idololatra pecuniæ, seruus mammonæ, & venundatus sub peccato. Cum enim species vsuræ sit, minus proximo dare, & plus ab eo accipere, non video Clericum ab vsurarum crimine & à nomine criminoso immunem, qui sibi cum alieno dispendio lucrum quaerit. Sanè scelerator, dum proximum manifestè spoliatur, fure deterior est & prædone, dans pro frumento vinum, & pro vino equum. Et sic sub colore permutationis, aut dilationis obtentu, recipis incremen-

tum in bursa, detrimentum in anima, longè deterior Iudæis, dum illi tantum alieno, tu verò alieno & proximo fœneraris. Congregabis diuitias, & in nouissimo non gaudebis, & eueniet tibi quod Dominus per Hieremiam figuraliter dicit: *Perdix fouit quæ non peperit; fecit diuitias, & non in iudicio, in medio dierum derelinquent eum, & in nouissimis suis reperiatur insipiens.* Fœnerator enim tristissimos habebit huius vitæ exitus, cuius finis interitus, cuius mors detestabilis, cuius damnatio sine fine. Porro negotiationis crinen attenuas, & ad excusandas excusationes in peccatis proponis tui laboris & prouidentię fructum esse, quod plus recipis, qui rem dum vilius vendebatur, emisti: Dicis, omnino non esse absurdum, si laborem in quæstum, si in lucrum, periculum conuertisti. Quicquid proponas, vnum denuncio tibi, quia negotiationem in tuæ salutis periculum conuertisti. Negotiatorem Clericum sacri Canones execrantur. Cum enim beatus sit homo, qui miseretur & commodat, & qui pecuniam suam non dedit ad vsuram, cum possumus iudicare ab æterna beatitudine alienum, qui quod accipit sicut accepit, non præstat, qui iuxta sacræ Scripturæ consilium dati & accepti gratiam, non porro tibi adscribis ad gloriam, quod ad cumulum tuæ damnationis accedit, quia in negotiationibus publicè iactitas te circumspectum, qui vtinam damnabile tibi non nouisses officium. Propheta dicit, *Quia non cognoui negotiationem, introibo in potentias Domini.* Sciebat in negotiatione quantum esset periculum. Nam & Iob qui in potentias Domini certum expectabat introitum, dicebat; *Due species difficiles, & periculose mihi apparuerunt: Difficile eruitur ne-*  
gotians

*gotians à negligentia Dei, & caupo non iustificabitur à peccato labij.* *μνηκονηδὸν ἀμαρτία* Blesensi obrepfit, alleganti Iobum pro Siracide. Apud istum quippe habetur is locus c.26.Ecclesl. sed facillè deprecabitur Blesensis, lapsum, quem S.Augustinus & alij quidam, non verentur S.Matthæo adscribere, vnum Prophetam ab eo allegatum pro alio concedentes.

46. Petrus Cluniacensis l.1. Epist.10. ad Giselmartum, describens religiosum irreligiosum, improbat in eo præter cætera negotiationem. [ De cura Pauperum ( inquit ) ad culmina transfertur ædificiorum. Inde subiecta omnia curiosè perlustrat: fundamenta iacit, perpendiculum extendit, structuræ suæ longitudinem, altitudinem & latitudinem studiosus Geometer dimetitur: Ecclesias ædificat, vrbes mœnibus ambit, flumina pontibus obnubit, & se solum destruens, vniuersa construit. Ita solitudinis professor in medio seculi conuersatur, cellula clausus inter frequentias populorum discurret: nundinas & angiportus sollicitus mercator oberrat, fit ei requies tormentum, sessio labor, silentium pœna, clausura infernus. Sic sic cæcatus lumine mentis, claususque tenebroso carcere, rursus ad molam inquietudinis redit: utque Samson Allophilis, fit quondam fortis dæmonibus Eremita ludibrium. ]

Theodorus Studita serm.9. Catech. negotiationes Religiosorum, emptiones seruorum, venditiones ac redemptiones, & agitatum per eos cauponarium quæstum, grauissimè exagitat. Et serm.13. in eandem abusionem, tanquam certum apostasiæ adiunctum, grauissimè conclamat.

Ex his Patrum testimoniis, præter innumera quæ

corrogare aliunde liceret, si res ferret, quis non videt, quàm illi indecoram, imò perniciosam Religiosis, & sacris quibuscumque personis negotiationem duxerint? Omnia sanè seculi negotia ab eis recisa volunt. Esse autem negotiationem, negotium seculi, & pertinens ad curas huius vitæ grauantes corda, nemo negare possit. Monstrant præterea quantam ad peccata procliuuitatem inuehat negotiatio; ac proinde eo ipso contestantur, negotiationem esse Religiosis auersandam, cum idcirco valedixerint seculo, ut à peccati illicibus & occasionibus longiùs remouerentur.

47. Veniendum consequenter est ad rationes, quarum quæ fortissima videtur, inde ducenda est, quod sacræ personæ & maximè Religiosi, vi sui status obstringantur ad conuersationem cum Deo, & cultum ei studiosè ac perfectè deferendum. Quæ vitæ ratio, vix ac ne vix quidem cohærere potest cum negotiatione, qua miser animus in partes infinitas distrahitur, & mergitur in desideriorum inutilium & curarum profundum. Idcirco enim ut rectè notauit Sotus l.6. De Iust. q.2. art.2. negotiatio, generale nomen sibi fecit proprium, dictaque est à negatione otij omnibus artibus communi, quia antonomasticè & eminenti quodam modo otium negat; vique eò, ut ni caueatur, suffocet & opprimat animum. Qua animi opprèssione, nihil Religioso calamitosius potest accidere, cum inde præcludatur conuersatio cum Deo, qui est præcipuus scopus instituti Religiosi, & secessionis à strepitu seculi, & vitæ communis. Propterea quæ S. Basilius in Psal. 45. obseruat dictum esse à Deo per Psalterem, *Vacate & videte quoniam ego sum Deus.* [Quatenus enim

enim iis rebus vacamus quæ alienæ sunt à Deo, Dei  
 nōtitiā recipere nequaquam valemus. Quis enim  
 eorum quæ mundi sunt sollicitus, seque immergens  
 multimodæ distractioni carnis, attendere possit ver-  
 bis Dei, satiusve facere tot tantarūque contempla-  
 tionum exactæ comprehensioni? Nōne vides quod  
 in spinas delapsū verbum, à spinis suffocatur? Spi-  
 næ namque carnis voluptates & diuitiæ, & curæ  
 sunt huius seculi. Extra hæc omnia constitutum es-  
 se opus sit eum qui cognitionem Dei desiderat, de-  
 betque ab omnibus perturbationibus, atque affe-  
 ctibus vitiosis vacare, sic demum Dei scientiam ap-  
 prehendere. Quo modo enim animam tot aded quæ  
 ipsam præoccuparint distractionibus cogitationum  
 oppressam, Dei cognitio, cogitatioque penetrabit?]  
 Benè spinis suffocantibus tementem Patrisfamilias  
 negotiationem composuit S. Basilii. Pia verò ani-  
 ma, supra has negotiorum ac sollicitudinum spinas,  
 sicut lilium quod non laborat neque net, exurgit  
 candens & speciosa coram Deo: Comparatio est  
 Theotini apud Damascenum l. 3. Parall. c. 74. Alia  
 egregia comparatione, effectum illum suffocati per  
 secularia negotia spiritus, expressit Petrus Damiani  
 l. 6. Epist. 5. quæ est ad Cluniacenses, monstrans Re-  
 ligiosum per tractationem negotiorum secularium,  
 exoculari quoad ea quæ Dei sunt, ita ut impleatur  
 in eo quod truculentus Ammonitarum Princeps.  
 Naas, poposcit ab habitatoribus Iabes Galaad; nem-  
 pe ut dextrum eis oculum erueret. Neque enim v-  
 trumque oculum impius hostis, sed alterum dunta-  
 xat voluit eruere, quia Satan contentus internam  
 sanctitatem effodisse, externam homini permittit;  
 nec obstat quo minus benè oculatus sit circa terre-

na, quem erga diuina lumine orbat. Alterius inquam oculi effossione contentus est, quia externam Sanctitatem, laruam & imaginem Religiosæ virtutis saluam esse homini finit, dummodò per negotiorum secularium sudes eruat dextrum oculum, siue internam sanctitatem & religionem, quæ illi potior, & longè charior esse debuerat. Libro item 2. Episto. 5. in huius veritatis adumbrationem, obseruat idem Autor, Sedechiam exoculatum esse in *Reblatha*, quod Latinè sonat, *multa hec*. Agnoscat ergo Religiosus negotiosus, vbi sit internis luminibus priuatus. Huiusmodi Religiosos negotiosos; & secularibus curis implicitos, sicque ad diuina cæcos idem Petrus Damiani lib. 5. Epist. 8. scitè vocat *Urbicos Eremitas, forenses solitarios, Monachos uniuersales*.

48. Igitur cùm negotiatio indissociabiliter nexa sit cum effusione ad externa, & animi distractione à primario Religiosi negotio, quod est intendere Deo, manifestum esse debet, negotiationem inconciliabiliter à statu religioso dissidere. Idque significasse Iobum c. 39. verbis illis, *Quis dimisit onagrum liberum in solitudinem?* Benè tradit S. Gregorius l. 30. Moral. c. 23. qui onagri libertatem, & commorationem in solitudine, interpretatur quietem Religiosi à negotiis secularibus: concinitque Olympiodorus Monachus in catena Comitoli, eodem aptans quod mox additur de Onagro, cum non audire clamorem exactoris; quod dictum putat de negotiatoribus quibus pendenda sunt vectigalia, & subiaccendum clamoribus Publicanorum. Hoc autem est grande impedimentum quietis, qua adeundus est Deus ab iis qui consecretantur Euangelicam perfectionem,

etionem , vt propterea S. Gregorius homil. 38. in Euang. obseruet, vnum ex obicibus nuptiarum Christi, esse, ire ad negotiationes suas. Abhorret igitur à religioso statu negotiatio, quia ( vt dixi, ) per solam communem gratiam negotiator non potest declinare distractionem animi cum spiritu Religioso impossibilem. Dico, *per solam communem gratiam*, quia inuentus quandoque est in decursu multorum seculorum, vnus aut alter negotiator Deo vnitissimus. Vt is cum quo Paphnutius per reuelationem compositus est apud Palladium s. 58. laus. Sed hæc rara avis fuit, quæ cum sit vna, non facit ver. Auxiliis quippè extraordinariis, quæ rarissimè conceduntur, ad tantam cū Deo vnionem qua Paphnurius sanctissimum Monachum æquaret, subuectus est ille negotiator. Quod si quis ex ea negotiatoris cum Paphnutio comparatione velit colligere, bellè negotiationi & religioso statui conuenire; fatendum quoque & colligendum eidem erit, functiones à Religiosis admodum extraneas, rectè iisdem congruere. Ibidem quippè Palladius, memorat diuinitus esse reuelatum, cuiusdam Oppidi Protocomitem cum Paphnutio esse conferendum. Id quod æquè de Coriario Alexandrino collato cū S. Antonio, & de Cornelio Mimo, collato cum S. Theodulo refert Raderus in Virid. 3. Decemb. Nemo tamen Protocomitis, aut Coriaris, vel Mimi negotium, Religioso statui velit appingere. Sed nimirum, etiamsi quandoque pij terrena & Babylonica tractant, vt D. Augustinus in Psal. 51. *initio* fuscè persequitur: tamen quod vni cuipiam ex singulari priuilegio interdum conceditur, non est ad omnes promiscuè extendendum. Ac proinde si rarissimi

quidam per extraordinaria auxilia ad vim cœlestis gratiæ demonstrandam, coniungere cum negotiatione collectionem animi, & vnionem cum Deo, inferendum non est idem quibusvis negotiationem exercentibus contingere, etiamsi religiosa professione se efferant.

49. Resumo illustrationem argumenti aduersus Religiosorum negotiationes petitam ex sancti otij & tranquillitatis animi exterminatione per mercimonia & negotiationes. Nilus, vt ex eo habetur in Catena ad c.1. Iobi, statuens Iobum vt exemplar hominis qui seculo nuncium remisit; Iobum rursus confert cum Athleta. Nam etiam idcirco nudatum Iobum in fimeto stetisse obseruat, vt Athletas exprimeret qui nudantur ad colluctationem. Siquidem qui nudus est, vix, ac ne vix quidem, comprehendi potest. Ideoque Iosephus pallio nudatus aufugit, & deuicit in certamine castitatis. Et Adam quamdiu generosum Athletam egit, nudus fuit; Ex quo autem ab Aduersariis ad diuinæ legis violationem adducere laborantibus, superatus est, atque à certamine repulsus, meritò indutus est, nuditate cum certandi virtute, reiecta. Hæc præfatus Nilus, subdit. [Nudum vel potius vnctum, certamen inire oportet. Nam nudatum esse hoc certanti præstat, vt ab aduersario comprehendi non possit; oleum verò vt si fortè comprehensus fuerit aliquando, è manibus facile elabatur. Quamobrem qui luctantur, luctantes aduersarios puluere perspergere nituntur, vt olei læuitate à pulueris asperitate superata, eosdem comprehendere facilius possint. Quod igitur illhic est puluis, hoc item in nostro certamine res sunt terrenæ; & quod illhic est oleum, hoc est in  
nostra



nostra lucta, anxiarum curarum varietas. Et sicut illhic, qui est delibutus, vincla, & qui ab iis vocantur nexi, perfacile dissoluit; quod si puluerem admiserit, aduersarij manus nisi ægrè euadere non possit: sic in nostra contentione qui est animo à curis vacuo, is haud facile à Diabolo captatur. Qui verò curis & sollicitudinibus angitur, mentis suauitate & tranquillitate, quasi olei læuitate ob pulueris asperitatem amissa, ægrè Diaboli vitat manus: Iobus autem qui rebus humanis nuncium remiserat, ipsam etiam vestem conscindit. ] Non ponit tantum & abjicit ad temptis, sed ne deinceps vsui esse posset, conscindit, vt faciebant, teste in Iobum Origene, qui pretiosas vestes quibus obuoluta suorum cadauera inferebant sepulchro, conscindebant vt inutiles reddita, minus paterent furum cupiditati. Liquet igitur quanto discrimini, Religiosum in arena certantem, exponat puluis curarum, negotiationi inseparabiliter adiunctarum; exterminans & exsugens oleum gratiæ, quibus mysticus Athleta, aduersus concertatores, est delibutus diuinitus.

Alia similitudine idipsum illustrat Philippus Abbas l. de Obed. Clerico. c. 4. monstrans, Claustralem luteis mundanorum & secularium operum studiis implicitum, sicut auem auolare, vt dicitur Osee 9. Et multa quidem suscipere ac agitare animo, & præquietis impatientia exequi; Apud Deum tamen causa cadere, & Satanæ subjici, quia abit post sordes, nec cellam vinariam, sed nidum luteum sibi fabricat operationibus illis lutosiis, cum claustri nitore ac quiete non coherentibus, in quam rem fuso omnino ac pulchrè differit idem Philippus. Et videtur

dus quoque eius æqualis Petrus Cluniac. l.7. Epist.  
 20. vbi agens cum Giselberto, dolet, plerisque in  
 speciem mundo mortuis, quod debuerat esse quie-  
 tissimum otium, fieri turbulentissimum negotium,  
 cernique mundum in solitudine, ac Religioso iam  
 mercatori, requiem fieri tormentum, sessionem la-  
 borem, silentium pœnam, clausuram infernum, nec  
 aliter cœcatum & lumine Orbem Samsonem ad mo-  
 lam inquietudinis & mundi vertiginis reuenire.

50. Volo argumenti hæcenus propositi robur,  
 ex proportionali materia demonstrare. Ecclesiã e-  
 nim ob hanc ipsam causam seruandæ illibatæ vnita-  
 tis spiritus Religiosarum personarum, vetuit eas  
 addici tutelis. Quod S.Cyprianus Epist.66. conue-  
 nientissimè factum docet, prolata hac ipsa ratione,  
 æquè contra munus negotiatoris, ac contra munus  
 Tutoris vrgente, vt proinde inuet, potentissimam  
 S.Cypriani disputationem adscribere, mutatis non-  
 nullis vocibus, æquè in hac materia, ac in tutela  
 negotio valituram. [Grauiter (inquit S.Cyprianus,)   
 commoti sumus ego & collegæ mei, qui præsentem  
 aderant, & compresbyteri nostri, qui nobis affide-  
 bant, fratres charissimi, cum cognouissemus quod  
 Geminus Victor, frater noster de seculo excedens,  
 Geminum Faustinum Presbyterum tutorem testa-  
 mento suo nominauerit, cum iampridem in consi-  
 lio Episcoporum statutum sit, ne quis de Clericis  
 & Dei ministris, tutorem & curatorem testamento  
 suo constituat, quando singuli diuino sacerdotio  
 honorati, & in clerico ministerio constituti, non  
 nisi altari & sacrificiis deseruire, & precibus atque  
 orationibus vacare debeant. Scriptum est enim, *Ne-  
 mo militans Deo, obligat se molestiis secularibus, vt pos-  
 sit*

*fit placere ei cui se probauit.* Quod cum de omnibus dictum sit; quanto magis molestiis, & laqueis secularibus obligari non debent, qui diuinis rebus & spiritalibus occupati, ab Ecclesia recedere, & ad terrenos & seculares actus vacare non possunt? Cuius ordinationis & Religionis formam Leuitę prius in Lege tenuerunt, ut cum terram diuiderent, & possessiones partirentur undecim tribus, Leuitica tribus, quę templō & altari, & ministeriis diuinis vacabat, nihil de illa diuisionis portione perciperet; sed aliis terram colentibus, illa tantum Deum coleret, & ad victum atque alimentum suum ab undecim tribubus de fructibus qui nascebantur, decimas reciperet. Quod totum fiebat de autoritate, & dispositione diuina; ut qui operationibus diuinis insistebant, in nulla re auocarentur, nec cogitare nec agere secularia cogerentur. Quę nunc ratio & forma in Clero tenetur, ut qui in Ecclesia Domini, ordinatione Clerica promouentur, in nullo ab administratione diuina auocentur, nec molestiis & negotiis secularibus alligentur, sed in honore sportulantium fratrum tanquam Decimas ex fructibus accipientes, ab altari & sacrificiis non recedant, sed die ac nocte cœlestibus rebus & spiritalibus seruiant. Quod Episcopi antecessores nostri religioſe considerantes, & salubriter prouidentes, censuerunt, ne quis frater excedens, ad tutelam vel curam clericum nominaret; ac si quis hoc fecisset, non offerretur pro eo, nec sacrificium pro dormitione eius celebraretur. Neque enim apud altare Dei meretur nominari in Sacerdotum prece, qui ab altari sacerdotes & ministros voluit auocare.]

51. Quare ut hanc primam aduersus Religioso-

rum negotiationes rationem obſignemus, qui ita mundo valedixit, vt ſimul per negotiationem ad illud regrediatur, alloquendus eſt iisdem verbis quibus Iſid. Peluſ. l. 9. Epist. 25. Cyrillum quendam pseudoſimonachum affatus eſt. [ Quid tibi vtilitatis affert Ioannis in locū deſertum ſeceſſio, quam olim ſtudioſe imitatus es, cum nunc eum minimè imiteris; verū ad priuatas curas te referas, atque in ſolitudine tumultueris, & ab hominum cœtu remotus perturberis? Etenim externo habitu ac ſpecie quieſcere, mentis autem mutationibus & perturbationibus inquinari, tum ſenſum caligine perfundit, tum ſuſceptos iam labores exſtinguit, atque perturbationibus animi pronam ac facilem victoriam reddit, efficitque vt miles abiecto ſcuto fugiat. Porro nemo militans implicat ſe negotiis ſecularibus, vt ei placeat, à quo in militiam aſcitus eſt: Verū arma omni ex parte geſtat: ad id certamen, quod tribuno militari placuerit, ſe comparans. ]

52. Ratio alia qua Religioſorum negotiationes conuelluntur, ex eo ducitur, quod auaritia ſummoperè dedecet Religioſos, qui paupertatem profitentur. Atqui negotiatio acuit Auaritiæ famem, & incendit fortiùs eam flammam miſerè depaſcentem auari pectus. Eſt igitur à Religioſis aliena negotiatio. Quod dico, auaritiā dedecere perſonas ſacras, maximè religioſas, eſt principium per ſe notum, ſi perſpecta habeatur notio ſtatus Eccleſiaſticorum, nominatimque Religioſorum. Sanè Iſido. Peluſ. l. 9. Epist. 27. Pharismauium aulicum in Scripturis euoluendis aſſiduū, demiratur quod auaritiæ ſtudere diceretur: quod abſurdiſſimum putet, eum qui in ſacris libris aſſiduus eſſet, inhiare caducis opibus, quarum

quarum effusio & abiectio, passim in Scripturis celebratur. At quantum absurdius est, quamque manifestius præposterum, ut qui professi sunt nuditatem externorum bonorum, congregent circum se densum lutum? Egregiè in absurdam hanc monstrositatem, avaritiæ servorum Christi, sub duce paupere & paupertatis labaro militantium, Hildebertus Epist. 47. sic concludens post plurima. [Quanta ergo sit pestis cupiditas, quæ virtutis abiuratio, quam præceptum ad infernum descensus; nec etiam tardiores credimus ignorare. Turpe nimis, Christum Dei hoc inquinari attramento quo prophetia in generationem degenerat, exinanescit interior spiritus unctio, mysticus legis obscuratur intellectus, aufertur Evangelicæ sapor doctrinæ, & qui se iactitant regnum Christi, regnum fiunt Antichristi. Turpe inquam nimis, animam Domino similem, huic Idolo substerni, curvare genua ante Baal: his hominem amittere maleficiis, quibus etiam sapientum oculi fascinantur, ut non videant cælum, neque recordentur iudiciorum iustorum.]

Itaque quod avaritia, (ut assumebam,) personas sacras dedeceat, extra dubium ponitur. Iam quod negotiatio, (ut addebam,) avaritiam acuat, & eius acrimoniam efficiat in dies vegetiorem, rectè attingit Soto l. 6. De Iustitia, quæst. 2. art. 2. significatumque est ab Anacharside, qui apud Laërtium aiebat, forum mercatui & negotiationi serviens, esse locum mendaciorum & avaritiæ. Optimè verò suffragatur experientia & ratio. Ea quippè est omnis quidem prava cupiditatis, ut dixerit S. Chrysostomus homil. 43. ad pop. sed non in aciem avaritiæ rati ra, iuxta Cassianum lib. 7. cap. item 7. ut cum pabu i incre-

mento, auctior fiat apperentia eius & fames : Et ut  
idem addit c. 10. hæc flamma quò plura absumit, eò  
euadit inexplebilior, quod Iudæ proditoris exem-  
plo confirmat ibidem Cassianus c. 14. Propterea que  
constans Patrum doctrina fert, longè faciliùs esse,  
profsus abjicere à se augendæ rei cupiditatem, om-  
nibus sibi interdicens, quàm illam temperare,  
dando operam ut res domestica mediocriter auge-  
scat. Igitur quàm turpe est, & ab eius statu dissen-  
taneum, personam sacram auaritiæ morbo labora-  
re; tam turpè & ab eius statu dissentaneum est, ne-  
gotiari : Præsertim cùm cupiditas, cuius ignitabu-  
lum est negotiatio, radix sit omnium malorum. Om-  
nia enim mala in negotiationem concurrunt, ita ut  
vacauerit Maiori in 4. d. 40. concl. 4. vagari per  
omnia prædicamenta, & monstrare, peccata nego-  
tiantium diffundi per omnes categorias. Radix ergo  
malorum adèd ramosa, maximè abhorret à personis  
virtutum studia, & malorum verorum declinatio-  
nem professis, quales sunt Religiosi.

53. Ad extremum, mercaturam sordidum quid  
esse & illiberale, sin minùs absolutè, at per compa-  
rationem ad Religiosum, multi demonstrarunt, non  
modò si agatur de mercatura tenui, quam Tullius  
l. 1. officiorum, vltro dat sordere, & illiberalem esse,  
sed etiam agendo de quantacunque & qualicunque  
mercatura. Ita latissimè Tiraquellus l. De Nobilit.  
c. 33. Breuiter Stracha l. De Mercatura p. 2. num. 17.  
& habetur disertè l. *Nobiliorez*, c. De commer. &  
mercat. & l. *Ne quis*, c. de dignit. & l. *si color talis*,  
c. de cohort. Quæ iura à nobilibus seiungunt, & de  
gradu impetratæ nobilitatis dejiciunt mercatores,  
& negotiatores, tanquam sordidos, si post exoritam  
nobilita-

nobilitatem reueniant ad mercimonium. Eo igitur nobilitas contaminatur & inficitur. Suffragatus perspicuè est Aristoteles 7. Polit. c. 9. statuens vt manifestum, in ciuitate rectè constituta, mercatores & negotiatores arcendos esse à dignitatibus. [Propterea quod, (inquit,) ignobilis & abiecta, ac virtuti contraria est huiusmodi vita.] Nempe propter densas peccandi illecebras, & continua labendi pericula, etiamsi per se, possit non aduersari virtuti. Apollonius quoque Tyanæus, referente Philostrato, l. 4. c. 9. negauit gentem vllam deiectionem & miseriorem esse, quàm negotiatorum: & Spartiatam quendam qui se negotiationi addixerat, tanquam generis sui dehonestatorem, valdè increpauit, & ad abjiciendam eam vitæ rationem potenter est adhortatus. Denique l. 8. c. 3. agens de quodam Euphrate, securè pronunciat, mercaturam & negotiationem esse Philosopho & nobili quocumque pectore indignam. Intellexit hoc Theophilus Imperator, qui vxorem mercaturæ addictam, tanquam nobilitate se exuentem, acriter corripuit, & nauem cum mercibus iussit flammis tradi, vt memorat Constantinus Manasses in Annalibus nu. 188. Nec satis appositè Adamus Gontzen l. 8. Polit. c. 9. Theophilum fugillans, vxori patrocinator. Nimirum, [dignitatis homini (inquit creditus Augustinus q. 102. ex vtroque mixtim,) negotiari deformis est.] Functionem ergo cum seculari & mundana nobilitate non cohærentem, quis velit consociare cum Religioso statu, quem supra Regum quoque & Imperatorum conditionem, extulit iusta lucubratione S. Chrysostomus?

54. Concluditur ergo ex prædictis, nulla ratio:

ne ferendum videri, vt Religiosi fiant negotiatores; Et sanè vt alia occasione, sed tamen æquè appositè ad hanc rem dixit Petrus Cluniac. Epist. ad Sanctum Bernardum apologetica pro 20. articulis. [An non videtur indecens, imò indecentissimum, vt fratres qui assiduè in claustro morari, silentio, orationi, lectioni ac meditationi, ac cæteris Regulæ præceptis, & ecclesiasticis ministeriis intentissimè operam dare præcipiuntur, his omnibus dimissis, vulgaribus operibus intendant; & qui, vt Byssus, tabernaculi interiora sua pretiositate & subtilitate, hoc est cœlestium subtili contemplatione ornare debuerant, vt cilicium extrinsecus positum, ventorum impulsiones, imbrium inundationes, & vniuersas aëris perturbationes, hoc est mundanorum operum, nificas occupationes, eos ab intimis extrahentes, sustineant.]

#### §. 4. *Supponenda ad Controuersia Dijudicationem.*

**H**Actenus in vtramque partem agitata per Concertatores controuersia, iis vniuersè adductis, quæ & negotiationem cum Religioso statu fœderari posse videntur astruere, iuxta Mediastini saporem; & quæ inconciliabile eorum dissidium confirmant, iuxta Timotheum. Nunc vt solidam controuersia dijudicationem subjiciamus, præmittenda sunt aliqua in eam rem vel necessaria, vel opportuna.

§§. Verùm priusquàm manum tabulæ admoueo, anteoccupandam video Religiosi Lectoris prudentiam, ne desiderium tollendi nauos Sanctorum corporum



porum vitio vertatur, arguárque maleuolentiæ in sanctos Ordines, qui eorum, imò nonnullorum in eis præter ordinem viuentium probra retegam. Hæc ego criminationem non aliter amoliar, quàm fecerit Philippus Abbas l. De contin. cler. c. 89. [ si quis ( inquit ) proteruum me dixerit, quòd audeam vel mutire de moribus Monachorum, ( videtur enim præsumptio vitam arguere meliorum, ) viros sanctos ducam ad medium, qui non liuoris toxico, sed zelo Iustitiæ ferbuerunt, feruentésque spiritu, nequaquam Monachos reprehendere timuerunt. Gregorius & Hieronymus, quos constat vita & scientia floruisse, & quos tam re quàm nomine scimus Monachos extitisse; & ordinem Monachicum prout decuit dilexerunt, & Monachorum vitia, nec timore nimis, nec amore noxio tacuerunt. ] Subdit Philippus, varia sanctorum illorum Patrum loca, quibus quàm illi Religiosorum vlceribus non sint immisericorditer abblanditi; sed eis scalpellum & cauterium in tempore adhibuerint, testatum facit. Mihi non tam expressi imitatione, SS. Patres, quàm repræsentati & exscripti, præsidio erunt. Ferè enim illa duntaxat Religiosorum probra referam, quæ apud Patres deprehendi: Et referam ipsorummet Patrum verbis, vt nemo me, absque Patrum violatione, velle notatum possit. Quamquam est & illa ad manum parma ex Cantipratano l. i. Apum. c. 20. n. 9. [ Si quis culpabilis de duritia verborum dictorum conqueritur, corrigat se, & contra se prolata non audiet. Si quis verò legentium, se à reprehensis mordaciter vitiis, inuenierit innocentem, non irascatur, nec indignetur mihi; Sed gaudeat vitia, de quibus conscius non est, in consciis reprehendi.

Si quis verò indignè dicta verba tulerit, notabilem se reddet in dictis, & veritatis planissimæ detractorem.] Sic præfatus, ad rem aggredior.

50. Illud itaque in primis statuendum est, Religiosos tametsi avaritiam bello indefesso exagitare, vi voti Paupertatis ac status sui profitentur, tamen præstigiis communis boni à Satana fascinosos, avaritiæ scabie interdum corripi, & in paranda vel augenda re domestica, urgente avaritia, consectari interdum lucrandi rationes indecoras, & à statu suo dissentaneas, ne exceptis quidem Anachoretis, quos nesciuisse quid esset avaritia, scribit Isido. Pelus. l. 3. Epist. 234. Pudet dicere, & videri possem Paradoxum incredibile proferre, nisi & experientia quotidiana, & Patrum increpationes attestarentur, ac etiam externorum sibili; Ethnicorum dico.

Sanè Iulianus Apostata Orat. 7. in Cynicorum exagitatione, notam avaritiæ Religiosis Christianis inussit. [ Equidem ( inquit, ) iamdudum hoc nomen vobis imposui, quod nunc mihi videor esse scripturus. Genus est quoddam hominum, quos infœlices Galilæi, *Renunciatores* vulgò nominant. Horum plerique, postquam exiguis sese bonis abdicauerint, admodum multa, vel omnia potiùs vndique corradunt. Adèò ut ingenti aliorum honore, stipatu, atque officio celebrentur. Eiusmodi ferè est quod à vobis geritur, præter pecuniarum quæstum, qui quod minùs vobis suppetat; non vobis, sed nobis ipsi tribuendum est, qui fatuis illis paulò plus sapimus: ac fortassè pro eo quod nullus corrogandæ pecuniæ, quem illi habent vobis est color, quam nescio quomodò, eleemosynam appellant. Cætera vobis & illis sunt simillima. Patriam, ut illi, reliquistis,

quistis, vagi vbique discarritis, & comitatu Principis magis quàm illi, & procaciùs importuni estis. Illi enim vocati; vos etiam repulsi, molestiam exhibetis.]

57. Patrum dicta, tanquam elongatiora à calumnia, validiùs rem conficiunt. Cassianus, insignis planè rei Asceticæ magister, totum librum 7. huic vitio in Monachis extirpando addixit, supponens vt indubitatum, eos esse huic morbo obnoxios. Et colat. 4. c. 20. refert prætextus Monachorum avaritia corruptorum, nempe ædificationem noui Monasterij cui præfiantur, fratrum aut famulorum nutum, & his similia charitatis speciem præferentia.

S Hieronymus, creber ac multus est in sugillanda Monachorum avaritia, & fœdis planèque indignis rationibus faciendi diuitias, non in iudicio. Locum ea Epistola ad Rusticum, de Institut. Monachi, supra protuli. Idem S. P. Epist. ad Nepotianum, tribuit avaritiæ Monachorum, & Clericorum, leges ciuiles quibus excluderentur aditione hæreditatum. [Pudet dicere, (inquit,) Sacerdotes Idolorum, mimi, & aurigæ, & scorta, hæreditates capiunt: solis Clericis & Monachis hoc lege prohibetur, & prohibetur non à persecutoribus, sed à Principibus Christianis, nec de lege conqueror, sed doleo, cur memimus hanc legem. Cauterium bonum est, sed quò mihi vulnus, vt indigeam cauterio! Prouida seueraque legis cautio, & tamen nec sic refrænatur avaritia. Per fideicommissa legibus illudimus, & quasi maiora sint Imperatorum scita, quàm Christi, leges timemus, Euangelica contemnimus.]

58. Autor libri de Operibus Christi Cardin. in Prologo *sub finem*, præfatus, etiam in iis qui san-

Etimoniam profitentur, Religionem manum non claudere porrectis muneribus, solitudinem aures non obferare oblati fauoribus, gulam communibus non esse contentam saporibus, humilitatem infestante superbia quasi canem applicari contumeliis à mente desiderij sui veneno ebria; hæc inquam præfatus Autor ille, subiungit in his omnibus, serò pœnitentiam adducere confusionem; [ Sed auaritiæ solius & quæstus ardor, nec satiat cupidum, nec pœnitet eum cumulasse quod crescere optat non minui; & discola obstinatus, semper quid Idolo suo immolet, sedulus coaceruat. Vnde hæc sitis diuitiarum miseris pectoribus affidet, & ambitionis Salfugo bibulam animam occupat, vt per fas & nefas ad loca superiora, etiam de latebris eremi nonnulli se ingerant: & de omni gradu vbi aliquis aditus patet, anhelii prodeant, discurrant ad Iudices, blandiantur mediatoribus, conducant auxilios, & modis omnibus elaborent, vt sedeant cum Principibus; eo quæstu, vt maledicat Deus, quod ipsi benedixerint, & benedicat quod maledixerint. ]

Ioannes Sarisber 7. Polycrat. c. 17. præclare id ipsum prosequitur, his præter cætera. [ Declinare nituntur aliqui, & si non maculam, odibilem tamen auaritiæ notam; Nam & ab alienis videntur abstinere, & suis, cum res exposcit, liberè vti parati sunt. Eis tamen de fonte malorum oritur alicuius vitij vena, quæ semitas eorum à tramite veræ felicitatis deflectat. Sicut enim in horto deliciarum, de vno fonte oriuntur flumina, quæ fecundant suauissimi odoris agrum, cui Dominus benedixit: Sic in loco horroris, & vastæ solitudinis in terra scilicet obliuionis, quam illi inhabitant, qui sui obliuiscuntur

scuntur in mundo, velut stupidus ludorum vanitate captus in theatro, quasi de fonte vno, omnium capita pullulant vitiorum. Hic autem puteus iniquitatis est. ]

59. Insigniter in hanc rem differit, & optimam rationem summæ prouidentis Religiosorum vtriusque sexus ad auaritiam subministrat S. Augustinus l. De Bono Viduit. c. 11. qui liber ad viduas continentiam professas dirigitur, vt ex libri fronte liquet. Ait ergo ibi S. Augustinus. [ Absit à vobis, vt Diuitiarum cupiditate capiamini pro cupiditate nuptiarum, & in cordibus vestris nummus pro viri amore succedat : Intuentes enim hominum conuersationem, sæpè experti sumus, in quibusdam lasciuia compressa, creuisse auaritiam. Nam sicut in ipsis sensibus corporis, acutiùs audiunt qui non vident, & tangendo multa discernunt, nec tanta viuacitate tangunt qui oculis vtuntur ; Vbi intelligitur ex vno aditu, id est luminum, repressa intentione, sentiendi viam in alios sensus promptiorem dignoscendi acumine exercere, tanquam ex altero conetur implere quod negatur in altero : Ita etiam sæpè carnalis cupiditas à concumbendi voluptate cohibita, maioribus viribus in pecuniæ se porrigit appetitum, & illinc auersa, huc se impetu ardentiore conuertit. ]

Creditus item Augustinus, re vera S. Anselmus l. De vita Eremit. ad sororem c. 5. scabiem auaritiæ Nonnarum, siue Monialium, siue Inclusarum, sic exponit. [ Aliæ non multùm ista curantes ( quod ferè vitium per omnes huius temporis serpit Inclusas, ) pecuniæ congregandæ, vel multiplicandis pecoribus inhiant : tantaque cum hac sollicitudine in

his extenduntur, vt eas matres vel Dominas familiarum existimes, non anachoretas. Quærunt aliquibus pascua pastores, qui procurent, qui custodiant greges; fructus, vel pretium, vel pondus, vel numerum à custodibus expetunt. Sequitur emptio & venditio, vt nummus nummo cumulum exigat, & auaritiæ sitim accendat. Fallit enim tales, spiritus nequam pro impertiendis eleemosynis aut orphanis alendis; pro aduenientium parentum vel amicorum charitate, & religiosarum fœminarum susceptione, hoc vtile esse ac necessarium suadentes. ]

60. Singularia huius morbi Religiosorum exempla, signari possent innumera; nisi vbiuis obuia prostant. Illustre est illud, quod S. Hieronymus in S. Hilarionis actis recitat de Monacho auaro, cuius primitiarum putorem, ne boues quidem ferre potuerunt. Idem S. Hieronymus Epist. ad Rusticum de Monachi Institut. auaritiæ cum sacrilega inhumanitate in Monacho coniunctæ, exemplum his verbis refert. [ Vidimus nuper & planximus, Cræsi opes vnius morte deprehensas, vrbisque stipes, quasi in vsus pauperum congregatas, stirpi & posteris derelictas. Tunc ferrum, quod latebat in profundo, supernatauit aquæ: & inter palmarum arbores, myrrhæ amaritudo monstrata est, nec mirum. Talem & socium & magistrum habuit, qui egenium famem suas fecit esse diuitias, & miseris derelicta, in suam reseruauit miseriam: quorum clamor tandem peruenit ad cœlum, & patientissimas Dei vicit aures, & missus Angelus pessimus Nabal Carmelo diceret: Stulte, hac nocte auferent animam tuam à te, quæ autem præparasti, cuius erunt? ]

Itaque

Itaque non modò inuita paupertas malum est infatiabile, vt disserit S. Chrylostomus l. 3. De Sacerd. *sub finem*, sed paupertas quoque voluntaria, nisi prospiciatur, eadem inexplebilitate corripitur, variis prætexitibus, quos partim S. Anselmus paulò antè adluctus attigit, partim Cassianus superiùs item allegatus ex Collat. 4. c. 20. Videndus item l. 7. c. 7. & 16. Et quamuis sæpè auaritià Regularium videatur non impetere paupertatem, quia persona non sibi, sed cœnobio & communitati quærit diuitias; (qui morbus improvidis præsertim præfectis, & ministris cœnobiorum infestus esse potest,) tamen per eam prætensam charitatem, non excluditur auaritiæ turpitudine, quia salua est cupiditas opes opibus accumulandi, & insatiabilis ingluuies terrenorum bonorum, quæ est flos auaritiæ, qua, quò quis ditior est, eò re vera est pauperior, tam non habens quæ tenet, quàm quæ procul sunt, vt diuinè disserit Barlaam apud Damascenum in Hist. c. 18. Pulchrè in eam Ecclesiasticorum, & Regularium maximè, labem, cum congruo illis otio sancto pugnantem, disserit creditus Prosper l. 2. De Vita contempl. c. 13. & 15.

§1. Iam quando liquet, Religiosos etiamsi paupertatem profitentes, posse de auaritia periclitari, & ferri desiderio augendi modis dedecentibus ac indebitis rem domesticam, præmittendum secundo est, eas indebitas ac dedecentes vias, posse esse diuersorum generum. Nam aliquæ quidem sunt apertè reprobæ & impiæ, aliæ verò minus tetræ sunt, & aliqua boni specie obductæ. Ad priorem ordinem pertinet, primò furtum sacrilegum, quale est eorum qui per auaritiàm, Iudæ imitatione expilant Christi

loculos sibi concreditos. Abiit in æternum exitium hac ratione, Euprepianus ille Monachus sub Theodoro Studita, cuius vir sanctus his verbis meminit serm. 9. Catechetico; post celebratam verbis amplissimis primam eius sanctitatem & fidei cōfessionem. [ Tum quid autem? Habens, vt œconomus, marsupium monasterij, & quæ injicerentur; auro illectus, atque auaritia confixus, heu ! Christum Iudæ instar prodidit, & virginitatis deposito voto, & Giezi cæ agris, vineis, bobus, ouibus cōemptis. Quare non eius lepram modò contraxit, sed vti reor, & tristius quiddam. En quid perfecit auaritia fratres. Fugiamus hoc vitium quæso, vt proditionis officinam. ]

62. Sacrilegi item furti, notatos à Patribus alia ratione reperio plerosque Religiosos, in quorum piceatis manibus adhærescere contigit eleemosynas illis concreditas, vt erogarentur in pauperes. Hoc fœtidissimo auaritiæ cancro exesum Ioannem, Monachum S. Macharij Ægyptij, scribit Palladius sect. 19. laus. [ Obediens enim ei qui Iudæ alligauit laqueum, cum bona pauperum sibi vsurpasset, ita laborauit elephantia, vt non inueniretur integer locus in eius corpore, in quo quis posset figere digitum; Hæc est Prophetia S. Macarij. ] Prædixerat enim ei vir sanctus, si spiritui auaritiæ succomberet, fore vt veniret in eum lepra Giezi. Tales fuisse sūto tempore nonnullos, gemit creditus Prosper l. 2. De vita contempl. c. 4. post multa reprehensa in conuersis, hoc est Religiosis, [ mutatis ( vt ait ) veste non mente, habitu, non actu, qui sermone tantum non opere seculo renunciassent contenti, seculariter viuunt, & vitia sua inani professione vitæ melioris abscondunt; ac religionis imaginariæ nomine palliati,



liati, opinionem virtutis pro virtute suscipiunt. ] Inter hos aliquos esse subdit, fures sacrilegos, ob subductas sacras stipes. [ Illos quis ferat, qui adumbratæ prætendentes honestatis imaginem, ad hoc pupillorum, ac viduarum causas velut tuendas simulata pietate suscipiunt, ut earum facultates suis adjiciant, & diuites ex pauperibus facti, vel ex diuitibus ditiores, tenuem censum per nefas accumularent, ut cum fuerint, exundante patrimonio sumptuosiores effecti, nunquam materia voluptatis gula suæ deficiat. ]

Isidorus Pelus. l.3. Epist. 277. sic de iisdem sacrilegiis scribit. [ Eos qui cum à virtute incipiant, tandem in vitium desinunt, omni zelo vacuos, ac miseros existimare oportet. Huiusmodi autem sunt, qui à pauperum præsidio ac patrocinio inchoantes, in priuatum quæstum postremo recidunt: quos quidem diuinum oraculum reprimens, *iuste* ( inquit ) *quod iustum est persequeris*. Neque enim conuenit, ut qui pauperum iusta instructi sint cura, eamque præ se ferant, & eos quorum causa inaniti sunt, fraudent ac spolient, atque ea quæ ad ipsos attinent, ad se auertant. ] Scitè idem reprehendit l.5. Epist. 283. & vehementissimè, ipsùmque ( ut ait ) atramentum lachrymis diluens Epist. 210. ad Zozimum Presbyterum, quem huius sacrilegij coarguit, cuius etiam Eusebium quendam notat Epist. 301. Spectat huc illud Hieronymi monitum, ad Paulinum de Institut. Monachi [ Pauperibus & fratribus, refrigeria sumptuum manu propria distribue. Rara est in hominibus fides. Non credis verum esse quod dico? cogita Iudæ oculos. ] In aliis id grauiter damnat Ioannes Sarisber. l.7. Polycrat. c.17. Videtis etiam

apud S. Augustinum Episto. 199. exemplum duorum ambiguum Monachorum, de quibus Ecdiciæ maritus exposulabat ob hanc causam.

63. Hæc præter cæteras ratio fuit, cur sancti & prudentes Religiosi, veriti ne subrepente auaritia minuerent quæ Deo offerebantur, respuerint prouinciam distribuendi in pauperes, quæ diuites in eorum commodum propter Deum eroganda destinabant; idque ne in se susciperent, à Patribus sæpè sunt dissuasi. Causasse hoc S. Hilarionem scribit S. Hieronymus, idem commendans Nepotiano. De S. Stephano iuniore, idipsum habent eius Acta. S. Basilii, Chilonem sic informabat. [ Aurum maxime, ut animæ tuæ blandissimum insidiatorem, ut parentem peccati, ut denique diaboli administrum, modis omnibus fugito. Prætextu subleuandæ pauperum inopiæ prouideto, ne quâ fias studio inexplibili cogendæ pecuniæ obnoxius: adeò ut si quis pecunias adferat in inopum usum adrogandas, ipse item certò cognoris aliquot fulciendæ vitæ præfidiis destitutos, atque indigos, is in cuius ære sunt pecuniæ, fac consilio tuo secum eas, ut auferat egenis fratribus erogaturus, ne quâ contingat, ut cum dispertiendas ipse acceperis, earum astrictu, conscientia tuæ nitor situm ducat auaritiæ, & inquinetur. ] Giselberto Monacho, idipsum grauiter commendat Petrus Cluniac. l. i. Episto. 20. & ita quidem, ut neget, vel adigente Superioris præcepto, necessitatem fore parendi.

Ad eundem primum ordinem apertè reprobarum viarum faciendi quæstum, pertinet impietas quorundam Monachorum, qui eam ob causam finxere miracula. Utinam fingerentur, quæcumque produn-

tur.

tur in hoc genere. Certum tamen est, strophas ple-  
rasque interuenisse hac in parte, per homines Reli-  
gionis nomen eimentes, ac æstimantes quæstum  
esse pietatem. Illachrymans in templis ebur, (vt est  
apud Poëtam 1. Georg. & apud D. Augustinum 3. de  
Ciuit. c. 11.) æmulatos quosdam ex eo hominum ge-  
nere, ad statuæ cuiusdam oculos, per stipitem inci-  
sum distillantem melliginem exhibuisse, vnde statua  
lachrymari credita, scribit Nancelius ad finem libri  
De risu; & exemplo sui temporis prolato, idem con-  
firmat Polydorus Virgilius l. 3. De Prodigis *sub fi-  
nem*. Nolo hoc vlcus fortiùs premere, tametsi non  
me latet, præter varia quæ peruersè & ad inuidiam  
conflandam excogitata flagitiosè sunt ab Hæreticis  
& semi-Christianis, nominatimque ab Henrico  
Stephano in Camarina mendaciorum aduersus sa-  
cros homines, cui titulum fecit, *Preparatio ad Apo-  
logiam pro Herodoto*; alia nonnulla proferri verè pos-  
se digna plagis & fustuario, imò patibulo, aut viui-  
comburio, quæ præstat silentio damnare. Non pu-  
duit tamen Prosperum in dimidio temp. c. 6. duo in  
hanc rem exempla, alterum Carthagine, alterum in  
Asia attentatum à Pseudomonachis, scripto com-  
mittere.

64. Sunt in eodem ordine venditores sacrarum  
reliquiarum, quales quosdam Græcos Monachos  
exhibet S. Gregorius, l. 3. Epist. 30. vt habet epistolæ  
præfixus breuiculus. Circelliones, impium ac dete-  
stabile genus Monachorum, idem fecisse; hoc est  
pro Martyrum reliquiis, ossa vulgarium cadauerum  
vendidisse, scribit S. Isidorus l. 2. De Offic. Eccles.  
c. 15. qui profecit ex S. Augustino. l. de Opere Mo-  
nach. cap. 28. satis insinuante, has & alias auaritiæ

abortiones, non fuisse Monachorum, sed vagorum quorundam, eumentium nomen Monachorum. Sic enim scribit, [ O Serui Dei, milites Christi, itane dissimulatis callidissimi hostis insidias, qui bonam famam vestram, tam bonum Christi odorem, ne dicant animæ bonæ, post odorem vnguentorum tuorum curremus, & sic laqueos eius euadant, omnimodo cupiens obseruare; putoribus suis tam multos hypocritas sub habitu Monachorum vsquequaque disperdit, circumeuntes prouincias, nusquam missos, nusquam fixos, nusquam stantes, nusquam sedentes. Alij membra martyrum, si tamen martyrum, venditant: alij fimbrias & phylacteria sua magnificant: alij parentes vel consanguineos suos in illa vel in illa regione se audisse viuere, & ad eos pergere mentiuntur, & omnes petunt, & omnes exigunt, aut sumptus lucrosæ egestatis, aut simulatæ pretium sanctitatis, cum interea ubicunque in factis suis malis deprehensi fuerint, vel quoquo modo innotuerint, sub generali nomine Monachorum vestrum propositum blasphematur. ] Hæc à Diuo Augustino de eumentis Monachos grassatoribus recitata, commodare æquè possunt, ad subducendos calumniæ multiplici variis occasionibus veros religiosos: tametsi non eo inficias, auaritiam in quibusdam religionem professis hucusque esse progressam, præter exempla aliorum, quæ collegit Stephanus Durantius l. i. De Ritibus c. 25. num. 9. Vnde dectetur Concilij Lateran. sub Innocentio III. c. 6. De comprobandis Romani Pontificis auctoritate nouis reliquiis, quod Episcoporum acridisquisitioni permisit Tridentina Synodus sess. 25.

65. Fuerunt etiam Religiosi, qui pecunia numerata

rata venderent admiſſionem in vitam Monasticam, contra quos conclamat Conc. Nicænum 2. can. 19. Vbi idem à Monialibus factum refertur. Idem ſeuere vetat Alex. 3. in Conc. Later. parte 2. c. 10. & Concilium Oxon. ſub Innoc. 3. c. 32. & Concilium Treuerenſe 2. c. 12. Nominatimque quod attinet ad Moniales, tantoperè inualuerat ſacrilega iſta profanitas tempore Innocentij 3. vt in Concilio Later. c. 64. habeat hæc verba. [ Simoniaca labes adedè ple-  
rasque Moniales infecit, vt vix aliquas ſine pretio recipiant in ſorores, paupertatis prætextu volentes huiusmodi vitium palliare. ] Habemus igitur hîc quoque, ſacrilegum auaritiæ genimen, in vtriuſque ſexus cœnobiis peruerſè enatum.

Excedamus è tanto auaritiæ pseudoreligioſorum fœtore. Minùs tetri, ſed qui tamen illiberales quoque, & ſordidi ſint modi quæſtum faciendi ex pietate per Monachos, ſugillantur non rarò à Patribus. Sic S. Hieronymus Epist. ad Nepotianum, Hæredipetas quosdam Monachos, ſordidiſſimè ſe habentes, his verbis deſcribit. [ Audio præterea in ſenes & anus abſque liberis, quorundam turpe ſeruitium: ipſi apponunt matulam, obſident lectum, purulentiam ſtomachi, & phlegmata pûlmonis, manu propria ſuſcipiunt: pauent ad introitum Medici: frementibùſque labiis, an commodiùs habeant, ſciſcitantur: & ſi paululum ſenex vegetior fuerit, periclitantur; ſimulataque lætitiâ, mens intrinſecus auara torquetur. Timent enim ne perdant miniſterium, & viuacem ſenem, Mathuſalem annis comparant. O quanta apud Deum merces, ſi in præſenti, pretium non ſperarent! Quantis ſudoribus hæreditas caſſa expetitur? minori labore margaritum

Christi emi poterat.] Videndus circa hoc idem Hieronymus, Episto. 22. ubi duos nominatim Monachos refert, qui hac infamia flagrant, Anthymum & Sophronium. Et tantopere excrevit fœtor avaritiæ istorum pecuniæ discolorum, ut coactus sit Damasus Papa, interuentu Valentiniani Imperatoris, frænare hos hæredipetas lata lege, qua non Ecclesia, vel cæterus quispiam sacer, sed priuatæ personæ Ecclesiasticæ, & nominatim Monachi, excluderentur aditione hæreditatum vi Testamenti confecti à mulieribus, quæ præ iudicij imbecillitate facilius patebant inelcationi. Male autem Valentiniani legem & eius scopum perspexerunt, qui censuerunt, eam fuisse latam ex odio in sacros homines, moxque abrogatam. Ita visum Molano lib. de piis Testam. c. 34. Veram autem quam dixi legis causam, frænationem scilicet avaritiæ sacrorum hominum hæredipetarum, nominatim Monachorum, optimè vidit Baronius anno 370. num. 120. & nuperrimè Nicolaus le Maître lib. 2. de bonis Eccles. c. 1.

66. Aliam Monachorum quorundam in hoc genere corruptelam, ex eodem S. Hieronymo describit Sarisber l. 7. Polycrat. c. 23. notans hanc ob causam S. Hieronymum apud Monachos nonnullos fuisse exosum tanquam mordacem & amarulentum, id quod æquè de eo propterea iactatum, meminit Seuerus Dialo. 1. Hieronymum ergo referens Sarisberienfis, ait, irregularem quandam sui temporis regulam, tantò ante ab eo fuisse notatam, cum diceret. [Ridicûlum & plenum dedecoris est, referto marsupio, quod sudarium & orarium non habeas gloriari. Sunt qui pauperibus parum tribuunt, ut amplius accipiant, & sub prætextu eleemosynæ quærunt

quærent diuitias; quæ magis venatio appellanda est, quàm eleemosyna. Sic bestiæ, sic aues, sic capiuntur & pisces. Modica esca in hamo ponitur vt in eo matronarum sacculi protrahantur. Et vtrique melius non habere quod tribuas, quàm vt tribuas petere impudenter.]

Est hic fœtus auaritiæ genuinus, iuxta eundem Sarisberiensem l.8.c.13. [Nam fœnerator, ( inquit,) vt plus recipiat, aliquid prælargitur.] Vnde Coquus:

*Munera quòd senibus viduisq, ingentia mittis,*

*Vis te munificum, Gargiliane vocem?*

*Sordidius nihil est, nihil est te spurcius vno,*

*Qui potes insidias, dona vocare, tuas.*

*Sic audis fallax indulget piscibus hamus,*

*Callida sic stultas decipit esca feras.*

*Quid sit largiri, quid sit donare, docebo,*

*Si nescis; dona Gargiliane, mihi.*

Nolo plus turpitudinis agnoscere in illis verbis Petri Cluniacensis l.1. Epist.20. ad Gilbertum. Tametsi enim aliqua quæ habet, sonare videntur furtum sacrilegum, de quo suprâ, tamen haud grauatè feram, eius orationem restringi ad sordes minores; tribuentium scilicet aliqua pauperibus, vt ad se corriuent alienæ liberalitatis fluentia. [ Per superbiam, ( inquit de religioso malè morato, ) quæ initium est omnis peccati ad auaritiæ idololatriam dolosè inducitur. Nam qui penuriam professus fuerat, paulatim opes congregat: Nec priùs desistit, quàm alienis reatibus proprium penu farciat. Simulat ea colligens, indigentiae supplementum; vel si quid suæ necessitati superfuert, indigentium adiuumentum. Vult dispensator fieri alienorum bonorum, qui

possessionem abiurauerat propriorum. Hac occasione Dei seruus, mammonæ efficitur famulus; vt cum se fingit egenorum vtilitati prospicere, cupiditati suæ valeat inferuire. Ea de causa, omnes ad subueniendum pauperibus exhortatur, vt dum Paulus ministrans sanctis esse creditur, Ananias fraudator nullatenus æstimeretur. Hoc astu, tugurium pauperis fit Regum gazophylacium; solitarij inopia, Salomonis opibus antefertur; & de spelunca egestatis, Indorum thesauri largissimè profunduntur. ]

67. Et aliud ad hunc ordinem pertinens sordium genus, quo Religiosi, candidatos ordinum suorum iusto acrius exsugunt, contra quàm faciebant Monachi Ægyptij apud Cassianum l. 4. c. 4. & 5. qui ne vestes quidem candidati, cedere in cœnobij bonum sinebant, & nihil planè ab eo inferri permittebant. Aliter tamen Serapion in Regula §. 1. Nec ego item nego, quin iustum sit ac conueniens Religionum candidatos inter pauperes, in quos de Christi consilio sua erogant cùm ingrediuntur; numerare cœnobium in quod cooptantur: idque facient ex vsu antiquo Ecclesiæ, de quo Bellarm. l. De Monach. c. 43. Sub disinctione S. Bened. c. 65. Reg. Nouitium, bona sua, aut pauperibus, aut solenni donatione Monasterio dare, mandat; Id igitur innoxium est. Nec ferendi sunt seculares, qui suos petentes cœnobium, non secus ac extraneos, vel nothos, nulla hæreditatis portione in bonum cœnobij vertenda, frui volunt; quos acerrimè & plenissimè in Opere ad Catholicam Ecclesiam exagitat Saluianus, vbi Machærentinus l. 3. à c. 2. nihil cognatis relinquendum latè confirmat. Quod igitur dico, illud duntaxat est, dedecere religiosos nimium studium exsugendi  
Candi-



Candidatos; sed ita debere quod commodè, & vltro conferunt, ab ingredientibus accipere, vt non (quod improuidi sponsi faciunt,) censum potius, quàm personam quærere videantur. Benè S. Bernardus Epist. 107. alloquens Thomam de Beuerla Cisteriensis cœtus candidatum. [ Nos te, non tua diligimus. ] Et Epist. 1. agens de adscripto ( vt ferebatur ) à pueritia Cluniacensibus, Roberto. [ Ostenditur terra, quæ cum illo, & pro illo, dicitur data fuisse; Sed si cum terra eum receperunt, cur non & cum terra eum retinuerunt? An fortè requirebant magis datum, quàm fructum, & pluris æstimata est terra, quàm anima? ] Conati tamen sunt hanc maculam à se remouere Cluniacenses insigni statuto, quod edidit sub Henrico Abbate. Habetur in Bibliotheca Cluniacensi pag. 1570. vbi excommunicatio decernitur in quoscunque Cluniacenses, sordibus auaritiæ inquinatos in receptione ad Ordinem. Itaque sicut seculares decet in liberos humanitas, quam in Sancta Iulianæ ac Probæ, auia matrisque Synoride, ( id est pari & concorde binario, ) laudat S. Hieronymus Epist. ad Demetr. testatus eas quicquid fuerat nuptiis præparatum, ad Virginitatem secedenti Demetriadi, reliquisse; ita Religiosi moderationem suam testari debent.

68. Ab his sordidis & illiberalibus, tametsi aliquo colore obductis augendæ rei domesticæ rationibus, longè absuit Abbas ille Villariensis, quem Cantiprat. l. 2. Apum. c. 26. n. 5. refert noluisse vlla ratione admittere magnas opes, suò Monasterio per vsurarium legatas, etiam si non referatur defuisse vsurario vnde sarciret damna per vsuras illata. Quanquam enim rebus ita constitutis, posse ad-

mitti vsurarij legatum, rectè agnoscit S. Bonau. in determinat. circa Regulam S. Francisci, q. 26. tamen S. Abbas eam fœneratoris largitatem obfirmatè repudiavit, nolens contaminari per sordidum hominem, tametsi de suo, non de rapina, præbentem diuitias. Nec Deus pium ac generosum Abbatis petus dimisit irremuneratum, vt ibidem recitat Cautipratanus.

69. Quia inter has sordidas ditescendi, & quæstum faciendi rationes, tametsi iniustitiæ vacuas, numeratur negotiatio, præmittendum tertio est, quid ea sit, & quotuplex. Quid sit negotiatio, inquit Author Imperfecti operis in Matth. Homil. 38. ad illud, *ejiciebat ementes & vendentes è templo*. Cum enim multis verborum telis appetiisset negotiatores, inducit sic interrogantes auditores. [Ergo ostende nobis quis est negotiator? Omnes enim homines videntur negotiatores. Ecce qui arat, comparat boues, vt spicas vendat; Et qui operatur lignum, comparat lignum, vt vtenilia vendat: & linteonarius comparat linteamina, vt vendat & ostendat, & fœnerator mutuat pecuniam, vt tollat vsuras. Et quo modo antiqui Iudæi & Apostoli artificia laudauerunt? quia magis sunt sine peccato. Sicut & Paulus fuit sutor tabernaculorum, & ipse mandat dicens: Curent & nostris bonis operibus præesse. Et Apostoli quidem sicut legimus piscatores.] Ad hanc difficultatem sic respondet autor ille. [Ego ostendam qui non est negotiator, vt qui secundum istam regulam non fuerint, intelligas omnes negotiatores esse: id est, quicumque rem comparat, non vt ipsam rem integram, & inmutatam vendat, sed vt opus faciat ex ea, ille non est negotiator; quia  
qui

qui materiam operandi si comparat, unde faciat opus, ille non rem ipsam vendit, sed magis artificium suum, id est qui rem vendit, cuius æstimatio non est in ea ipsa re, sed in artificio operis, illa non est mercatio. Vt puta Faber comparat ferrum, & facit ferramentum: sed ferramentum illud, non tantum habet ferri quantum valet, sed secundum opus ferramenti appretiatum. Qui autem comparat rem, ut illam ipsam integram, & immutatam dando lucretur, ille est mercator, qui de templo Dei ejicitur.]

Hæc est strictissimè dicta negotiatio, qua merx emitur, ut eadem nullatenus immutata reuendatur ad lucrum faciendum. Est autem alia negotiatio, qua res coëmpta & mutata, venditur alteri. Ut cum ferrum formatur in securim, vel cum è ligno conficitur scamnum, idque postea venditur. Idem est de pullo equino, qui emitur ut nutriatur donec crescat, & pro equo vendi possit. Vtraque hæc emptio & venditio dicitur negotiatio lucratiua, quia fit ut res postea carius vendatur: potestque vel immediate ac per seipsum, vel mediatè ac per alium exerceri.

70. Addit Ioannes Medina Cod. De Restit. q. 31. duas alias negotiationis formas, quas vocat negotiationem æconomicam, & politicam. Priorem dicit esse negotiationem quæ exercetur ad sustentandum se, ac domum suam, prout necessitas exegerit. Exemplum assignat, eius qui comparat pretio, quæ domui suæ sunt necessaria: vel eius qui de redditibus bonis ac superfluis, vendit quantum necesse est, ut compareret magis necessaria. Politicam verò negotiationem, aliter sumit Medina, quam alij, apud quos ea vox designat negotiationem naturalem, qua

emuntur quæ ad vitam sunt necessaria, aut res mutata reuenditur. Refert eam vocis prædictæ nationem Rebellus 2.p. l.9. q.18. s.1. n.2. At apud Medinam, Negotiatio politica ea est, qua publicis populi necessitatibus succurritur. Cæterum hæc negotiationis membra, sunt merè materialia, nec pertinent ad formalem negotiationis diuisionem. Quodd enim hic aut ille exerceat negotiationem in familiæ aut ciuitatis commodum, est discrimen merè materiale, nec pertinens ad diuersam formam negotiationis, sicut pertinebant alia anteriora membra, quæ proposuimus. Præterquàm quodd, si hæc membra conuenienter assignarentur, æquè addendum esset aliud membrum, nempe negotiationis monasticæ, quo quilibet mercatur sibi necessaria. Inde tamen colligi potest tertia negotiationis species vtrique illi membro communis iuxta Medinam, nempe eumentium sibi ac suis necessaria, vel vendentium quæ sibi ac suis sunt superflua.

71. Atque ita habemus triplicem posse statui negotiationem. Nempe primò simplicem, qua emuntur necessaria, aut venduntur superflua, quæ dici potest latissimè sumpta negotiatio, contradistincta lucratiuæ, vt notat Maior. in 4.d.15.q.40. *initio*. Secundò lucratiuam strictè acceptam, qua res non mutata, nec in aliam formam redacta venditur, siue per seipsum, siue per tertium ad id adhibitum, vt adhibenti lucrum fiat, quæ est propriissimè & strictissimè dicta negotiatio. Tertiò lucratiuam, qua res emptæ in eum finem, mutatur in aliam formam, vel statum meliorem, & per se aut per alium venditur carius ad quæstum faciendum, quæ est medio quodam modo usurpata negotiatio, pressior quàm prima

ma, & laxior quàm secunda. Ad has negotiandi rationes, aptanda est resolutio controuersiae propositae, definiendo quænam earum absque auaritiæ labe, & status Religiosi dedecore possit à Religiosis exerceri. Qua in re est difficultas non modica; ita vt Maior. in 4. d. 13. q. 41. in *dubio annexo*, fateatur, non posse assignari hac in parte vnā certam regulam, penes quam statuatur qua negotiatione sit sacris hominibus interdictum, qua secus. Consentiunt quidem omnes, vetari Clericis & Religiosis negotia secularia, & turpe lucrum, ac sordidos quæstus. Sed quæ sint ij sordidi quæstus, & quæ sint turpia lucra, non est definitu adeò facile. Similiterque non est adeò facile exponere, quæ sint *negotia secularia* dedecentia sacras personas. Concilium quidem 1. Moguntinum sub Leone 3. Tempore Caroli Magni, c. 14. Id tentauit exponere; non videtur tamen eius resolutio explere animum. Ait enim [Ministri altaris Domini vel Monachi, nobis placuit vt à negotiis secularibus omnino abstineant. Multa sunt ergo negotia secularia; de his tamen pauca perstringimus, ad quæ pertinet omnis libido, non solum in immunditia carnis, sed etiam in omni concupiscentia carnali, quicquid plus iusto appetit homo; turpe lucrum, munera iniusta accipere, vel etiam dare, pro aliquo seculari quæstu pretio aliquem conducere, contentiones & lites, rixas amare, in placitis secularibus disputare, excepta defensione orphanorum, aut viduarum. Conductores aut procuratores esse secularium rerum, turpis verbi vel facti ioculatorem esse, vel iocum secularem diligere, aleas amare, ornamentum inconueniens proposito suo quærere, in deliciis viuere velle, gulam

& ebrietatem sequi , pondera iniusta vel mensuras habere, negotium iniustum exercere. ] Interjicitur parenthesis de iusto negotio, tum subditur. [Canes & aues sequi ad venandum, in omnibus quibuslibet sit causis , superfluum esse. Ecce talia , & his similia ministris altaris Domini, necnon & Monachis omninò interdicimus , de quibus dicit Apostolus, *nemo militans Deo , implicat se negotiis secularibus.* ]

72. Hæc notio *negotiorum secularium* , non videtur satisfacere quoad rem præsentem. Quia quamvis quæ à Concilio recensentur inter negotia secularia , verè sint deuitanda sacris hominibus , tamen non iis duntaxat , sed omnibus etiam piis Christianis declinanda sunt, maxima saltem ex parte. Maxima item pars eorum quæ recensita sunt, procul abest à negotiatione , qua sacris hominibus interdicitur, etiamsi non sit iniusta, nec secularibus vetetur. Nec aliter statuerim de ea negotiorum secularium notione quæ traditur in adscripta Melchiadi Papæ Epistola, cùm tamen alleget Nicænam Synodum quæ post Melchiam sub Syluestro est habita. Baronius anno 312. n. 80. tribuit eam Isidoro Mercatori. Sic porro in ea epistola habetur. [ Quæ sint negotia secularia , Sancti Canones manifestant, & inhihent, dum perspicuè docent , quod quidam qui in Clero videntur electi , propter lucra turpia , conductores alienarum possessionum fiant , & secularia negotia sub cura sua accipiant , Domini quidem ministerium paruipendentes ; per secularium verò domos, discurrentes, & propter auaritiam , patrimoniorum sollicitudinem sumentes. Decreuit namque supradicta S. Synodus , nullum deinceps Clericum aut possesse

possessiones conducere , aut negotiis secularibus se miscere , nisi propter curam pupillorum , & orphanorum , ac viduarum. ] Hæc notio negotiorum secularium de quibus per Ecclesiasticos abjiciendis agebat hic PseudoMelchiades , admodum imperfecta est. Quare aliquid in eam rem aptius , restat inquirendum.

*§.5. Extremarum sententiarum in binis superioribus disputationibus propositarum , Anacrisis uniuersæ.*

73. **I**N vtraque disceptatione superius adducta, est quod approbari , & quod rejici debeat. Quare excerpemus ex vtraque primum vniuersè hoc loco , tum in particulari quoad aliquas materias , quod circa proximè assignatas negotiationis formas , statuendum videtur.

Prima Propositio. Negotiatio non vetatur Religiosis, tanquam per se , & ex objecto , vel etiam ratione adiunctorum necessariorum , inexpurgabiliter mala.

Hoc sufficienter monstratum est §. 2. ratione 1. Nec est cur in eam sententiam , vel Patrum , vel Scholasticorum suffragia conquirantur , quæ ibi quantum necesse est, tacta fuerunt. Vnicus S. Augustini locus ex concio. 1. in Psalmum 70. erit instar omnium. Ibi tractans illud iuxta 70. *Quoniam non cognoui negotiationem*, inducit mercatorem Christianum pro negotiatione differentem , & suboffensum; eo quod negasse videretur S. Augustinus , posse ne-

gotiatores saluos esse : Ex eius igitur persona, sic re-  
tundit S. Augustinus omnia , quæ possunt objici ad-  
uersus negotiationis honestatem , vnde cūque asper-  
gere quis velit dedecore negotiationem : [ Sed, ait  
mihi negotiator ; Ecce ego afferro quidem ex lon-  
ginquo merces , ad ea loca in quibus non sunt ea  
quæ attulero ; vnde viuam , tanquam mercedem la-  
boris mei , peto , vt carius vendam quàm emerim.  
Vnde enim viuam , cū scriptum sit , *dignus est ope-  
rarius mercede sua* ? Sed agitur de mendacio , de per-  
iurio. Hoc vitium meum est , non negotiationis : Ne-  
que enim , non si vellem , possem agere sine isto vi-  
tio. Non ergo culpam autor ad negotium transfe-  
ro , sed si mentior , ego mentior , non negotium. Pos-  
sem enim dicere ; tantò emi , tantò vendam , si placet ,  
eme ? Non enim istam veritatem audiens emptor re-  
pelleretur , vt omnes potius accurrerent , quia plus  
fidem quàm mercedē diligerent. Hoc ergo , ( inquit , )  
me mone ne mentiar , ne periurem , non vt abjiciam  
negotium vnde me transigo. Quo enim vocas , quan-  
do hinc reuocas ? Fortè ad artem aliquam ? Ero su-  
tor , calceamenta faciam hominibus , mendaces enim  
& ipsi non sunt ? periuri & ipsi non sunt ? nōne lo-  
catis ab alio calceamentis , cum acceperint ab alio  
pretium , dimittunt quod faciebant , & suscipiunt  
alteri facere , & fallunt eum cui promiserant citò se  
facturos ? Nōne sæpè dicunt hodiè facio , hodie  
impleo ? deinde iam ipsa futura , tantas fraudes non  
faciunt ? Faciunt ista , & dicunt ista : sed ipsi mali  
sunt , non ars quam profitentur. Omnes ergo artifi-  
ces mali Deum non timentes , vel pro lucro , vel pro  
timore damni , aut egestatis mentiuntur , periurant ,  
non est continua Dei laus in eis. Quomodo ergo me  
reuocas



reuocas à negotiatione? An vt agricola sim, & aduersus tonantem murmurẽ vt grandinem timens, sortilegum consulam, & quæram quid faciam contra cælum? vt optem pauperibus famem, quo possim vendere quæ seruauĩ? ad hoc me adducis? sed non ea faciunt, (inquis,) agricolæ boni: nec illa, negotiatores boni. Quid enim & filios etiam habere malum est, quia quando eis caput dolet, malæ & infideles matres ligaturas sacrilegas quærunt. Ista hominum peccata sunt; potest hoc mihi dicere negotiator. Quære ergo Episcopo quemadmodum intelligas negotiationes quas legisti in Psalterio, ne forè tu non intelligas, & me à negotiatione prohibeas. Mone ergo quemadmodum viuam. Si benè, benè mihi erit: Vnum tamen scio, quia si malus fuero, non negotiatio mihi facit, sed iniquitas mea.] Subiungit his ex mercatore auditis, S. Augustinus. [Quando verum dicitur, non est quod contradicatur.] Hoc est, rectè negotiator egit causam suam, negans illicitam per se esse negotiationem: quod si aliquæ abusiones ei adiungantur, dimittendas & abjiciendas esse, salua negotiatione cui extrinsecus, & solo negotiatoris vitio comitantur. Nec aliter de omni ferè arte & scientia est statuendum: Nulla enim est tam illimis, & pura ex suo obiecto, & intrinsecis circumstantiis, quin possit vitio artificis aut scientis dehonestari. Nemo tamen idcirco vitium personarum abutentium transfert ad improbationem scientiæ vel artis. Sicut Apostolus, negauit legem esse culpandam tanquam malam, tametsi homo pro sua fragilitate & malitia abutatur legis notitia in suam perniciem. Generatim ergo indubitarum esto, negotiationem non vetari sacris homi-

nibus, vt ex obiecto aut per se malam.

II. Propositio. Negotiario simplex seu latissimè dicta, quæ in trimembri negotiationis diuisione primum locum occupabat, non vetatur sacris hominibus; hoc est Religiosis, aut Clericis.

74. Hoc est extra dubium: quia mercari pro se, aut vendere sua superflua, non vetatur sacris personis: At hæc est notio simplicis illius ac latissimè dictæ negotiationis, qualiscunque tandem sit negotiatio. Pleraque in hanc rem prolata sunt §. 2. ratione 3. & 5. & manifesta ratio suffragatur. Quomoddò enim exigere vitam possent sacræ personæ, nisi emerent quæ sunt ad vitam necessaria? Aut quomoddò plerumque suppeteret vnde necessaria emerent, nisi venderentur aliqua vel superflua, vel minùs necessaria, quàm quæ iis diuenditis comparanda proponuntur? Inconsultè item sinenda essent perire aliqua, aliis vtiliter cessura: vel certè eroganda essent planè liberaliter, non sine cœnobij damno, si vendi & huic qualicunque negotiationi subijci per Religiosos non possent, quod statim apparet absurdum; nisi sicubi specialia statuta vel indecentia obstitent tali venditioni.

75. Primum addo, quia nonnulla instituta Religiosa, amore arctioris paupertatis, etiamsi concedunt suis habere prædiola, vel hortos ad fouendam valetudinem, fasque sit Religiosis inde sibi quæ ad sustentationem commodant sublegere, iubent tamen vt quicquid ex fundis illis vltra immediatum vsum colligitur, absque venditione distrahatur. Sic Suares To. 4. De Relig. Tract. vlt. l. 4. c. 9. n. 12. & Sanchez l. 7. in Decalogum, c. 27. n. 4. Monstrât, domibus professis Societatis Iesu, ex peculiari instituti illius iure,

iure, vetari venditionem fructuum collectorum è possessiunculis quas habere sinuntur. Interdici enim ea venditione necesse fuit, vt excluderentur certi redditus. Qui verò Religiosi, nullo suo priuato iure vetantur fructus fundorum suorum vendere, non tenentur illos liberaliter erogare, sed possunt tanquam sibi superfluos, aut minùs necessarios, accepto conuenienti pretio distrahere, sicut alia quæcunque superflua.

Addebam secundò, indecentiam quandoque obstare venditioni superfluatorum. Exemplum succurrit nuperrimè suggestum, cœnobij cuiusdam Monialium, & quarum domestico horto, lecti per Moniales, & in ferta contexti flores, venduntur ad ædificandum stuporem secularium Domicellarum. Videtur hæc venditio dedecere personas Religiosas. Hæc enim superflua, quorum quantitas vsui altarium, & valetudinarij admetienda fuisset, si præterea abundent, nullum cœnobium me autore ad vsum secularis vanitatis diuendet. Et suffragabitur, quisquis Patrum in huiusmodi florea ferta conclamationes recoluerit. Videtis Tertullianum de Coro. Mil. c. 15. & Clementem Alexandrinum 2. Pædag. c. 8. & quæ de viro Apostolico F. Ioanne Ord. Præd. scribit Cantipr. l. 2. Apum. c. 1. num. 8. Tametsi enim omnia quæ apud istos leguntur, spectant ad coronas è floribus morituris, quas negant capitibus membrorum capitis spinis coronati congruere; tamen propè omnia accommodari possunt ad quæuis florea ferta, quæ proinde ad fœmineæ vanitatis vsum suppeditari pretio à Parthenonibus, indecentissimum videtur. Cum igitur nec ius speciale instituti, nec vlla extrinseca dedecentia vetat, fas est Religiosis superflua vendere.

76. Nec tantum fas est Religiosis vendere sua superflua, aut minùs necessaria è fundis suis lecta, sed etiam quæ iam in vsum suum absque animo reuendendi comparauerint, possunt vendere, si contingat agnosci eorum inutilitatem, vel alia vendendi causa interueniat. Talia quippè eo ipso sunt superflua; vnde sine noxa vendi à Religiosis possunt, & quidem non modò eodem pretio quo fuerant coëmpta, sed etiam carius, & cum aliqua lucri accessione, etiamsi res sint planè eadem, nec vllatenus artificio vendentium sint immutata. Ita Abul. in c. 25. Matth. q. 224. Sa V. *Clericus* num. 20. Rebellus 2. p. lib. 9. quæst. vlt. n. 2. & Molina Tract. 2. de Iustit. d. 342. concl. 2. consequenter inferens, astipulante Gu-tierre Tract. de Gabellis q. 93. n. 16. & 17. cum Syluestro, Nauarro & Lassarte, ex ea venditione nullum deberi tributum, vbi venditiones tributo grauantur, Cum enim hæc non sit negotiatio Religiosis vetita, salua manet, cum exercentibus sacris personis, sua immunitas. Poterit autem in hoc euentu, abesse iniustitia ab augmento pretij, ob mutationem aliquam circumstantiarum, de qua rectè Abul. in c. 25. Matth. q. 223. ad 2. Est quæ etiam causa germana, cur Mercatores possint carius vendere. Quod enim rectè monstrat Soto l. 6. De Iust. q. 2. art. 2. concl. 4. Iustus titulus vendendi carius, non est fundandus in persona vendente præcisè spectata; quasi mercator, quia mercaturam agit, possit carius vendere, quàm alij qui mercatores non sunt, si contingat vt idem vendant: sed titulus vendendi carius, quicumque demum sit venditor, fundandus est in mutatione circumstantiarum, penes quas iustum pretium variari & crescere potest.

77. Sed quid si Religiosi, aliqua ipsis non superflua, & quæ alioqui retinerent, statuunt vendere, quia offertur lucrum, seque dat occasio merces vili pretio absque reuendendi animo comparatas, iterum vendendi longè carius, ob circumstantiarum mutationem? Admitto cum Syluestro V. *excommunicatio* 9.n. 46. & Ioanne Gutierrez Tract. de Gabel-  
lis q. 93. n. 23. hanc quoque negotiationem posse per Religiosos exerceri, absque noxa, quia cum merces sunt coemptæ, aberat animus eas iteratò vendendi, qui animus est veluti forma negotiationis sacris personis illicitæ; eo quòd sit illi indissociabiliter annexa cupiditatis irritatio, & effusio in res externas, aduehâtque varia incommoda, ob quæ talis negotiatio dedecet statum huiusmodi personarum. At venditio, quæ sit occasione lucri animo non præconcepti, cum facta est emptio, vel vacat iis incommodis, vel saltem multò minus illis grauatur. Nec censeo abhorreere ab hac doctrina, benè multos recentiores, quos adducit & sequitur Diana parte 1. Tract. 1. resol. 27. affirmantes negotiationem illam vetari sacris personis, & habere annexum tributum (si à secularibus ea ex causa pendatur,) in qua lucrum intenditur ex emptione prius facta. Id enim, vt verum sit, accipiendum est de emptione prius facta animo reuendendi, quem animum à Religiosis exclusimus. Quo eodem sensu accipiendus est Canon 2. Concilij Tarraconensis sub Hormisdâ anno 517. celebrati, qui sic habet. [Sicut Canonum statutis firmatum est, quicumque in Clero esse voluerit, emendi vilius, vel vendendi carius studio non vtatur. Certè si voluerit hæc exercere, cohibeatur à Clero.]

III. Propositio. Negotiatio pressè dicta, cui in trimembri negotiationis diuisione, secunda sedes est data, (qua scilicet, merces coemptæ animo eas reuendendi, eadem & nullatenus mutata reuenduntur lucri causa,) abhorret à statu Religioso est-que Religiosis planè illicita, nisi si aliquando, ob grauem necessitatem, vel certè per alium, vt principalem causam exerceatur.

78. Notionem pressè dictæ negotiationis sacris personis vetitæ, quam proposui, ex plerisque Iurisperitis confirmat Straccha in opere de mercat. parte 1. n. 23. Vetari autem Religiosis hanc negotiationem, agnoscunt sine controuersia DD. omnes. Ita enim ex Theologis S. Thomas 2. 2. q. 77. art. 4. Molina Tract. 2. de iust. disp. 339. Rebellus 2. p. q. vltima, sect. 1. Toletus l. De Peccat. mort. c. 53. Salas Tract. De empt. & vend. dub. 2. Roder. Tomo 3. qq. Regul. q. 74. art. 8. Consentunt Iurisperiti ad dist. 88. c. *fornicari*, & Panormit. ac Imola ad cap. vlt. de vita & honest. Cler. Prosper ab Augustino. V. *Vestigal §. tertio quatenus*. Comitulus l. 1. Resp. q. 53. n. 1. Gutierrez Tract. de Gabellis q. 93. n. 16. & 47.

Huc pertinent propè omnia quæ §. 3. ex Patribus & ex ratione multiplici sunt adducta contra negotiationes. In nullam enim negotiationem cadere aptius possunt, quàm in istam quæ est pressissimè dicta negotiatio. Expressissimè verò hanc negotiationem fecit Autor Imperfecti, in Matth. hom. 38. Est-que eius disputatio admittenda, si ad sacras personas restringatur, nec extendatur ad omnes Christianos, vt videri posset extensa ab illo Autore; qui cærenus non esset audiendus, cum negotiatio nullo iure secularibus vetetur, vt monstratum est §. 2. ratio-  
ne 1.

ne 1. At restringendo eius orationem ad personas sacras, verissimè dicit, ejiciendum esse ex Ecclesia, id est ex Ecclesiastico gradu ac cœtu, qui negotiationem, de qua agimus, exercere in animum induxerit, cum planè abhorreat ab instituto vitæ, cui propter Deum se illigavit. Demonstrare id possumus, cum ratione, è signis ac tesseriis huius status petita, tum ratione fundata in eius natura. Signa & tesseras Religiosi status appello, rasuram capitis & habitum religiosum, quibus à secularibus discriminantur Religiosi

79. Et rasuræ quidem ritus, antiquissimus est, ut Bellarminus l. De Monach. c. 40. ostendit: nisi quod olim tam Clerici quàm Monachi radebant capita in coronam, per totum ferè caput protensam, qualis nunc est puerorum vocalium symphonicorum, ut notat Valdensis Tomo De sacram. Tit. 9. c. 89. & Simondus ad l. 6. Sidonij. Epist. 3. Ex quinque porrò illius Rasuræ causis, quas Renatus la Barre ad calcem libri Tertulliani de corona militis, & Prosper Stellartius, in opere de coronis & rasuris, ex variis colligunt; (nonnulli enim ad memoriam spineæ Christi coronæ, ut Ceolfredus Abbas apud Bedam, l. 5. hist. Anglo. c. 22. alij ad Beati Petri Apostolorum principis, quem ea ratione ab Ethnicis in odium fidei dehonestatum dicunt, imitationem; alij ad regiam dignitatem Deo dicatorum hominum; alij ad circularem figuram, quæ est symbolum perfectionis hunc ritum referunt:) quinta, & optima est, quæ huc pertinet: Nimirum eam rasuram, ut habetur ex D. Hieronymo cap. *duo sunt* 12. q. 1. docere personas sacras, sed maxime Religiosos, omnem negotiorum secularium curam desecare, ut soli Deo ani-



num applicent. Potestque huc facile reuocari alia elegans ratio huius rasuræ tradita à Petro Nannio in notis ad epistolam 35. S. Ambrosij; nempe quòd Monachi rasa habeant capita, vt se agnoscant libertos Christi; Nam olim manumissorum capita radebantur, vnde illud Plauti, [ Quid superest nisi vt raso capite accipiam pileum? ] Et apud eundem in Amphitr. act. 1. sce. 1. [ Quod ille faciat Iupiter, vt ego hodie rasus capite, caluus capiam pileum? ] Ex Plutarcho in Flaminio, & Agellio l. 7. c. 4. Id illustrat Bisciola Tomo sub seciu. l. 5. c. 6. Multa in eam rem Erasmus Chil. 2. Centur. 1. n. 27. Et è contratio qui seruire quiddam in moribus habent, dicebantur à Romanis, seruales pilos retinere. Apud Iudæos quoque Deuter. 21. captiua exuta vestimentis captiuitatis, radebatur vt libera fieret. Ex hoc ergo more factum conset Nannius, vt homines Deo consecrati radant capita, quò se à Deo manumissos in libertatem filiorum Dei, nec vltra distinendos seruilibus seculi occupationibus agnoscerent. Sic vides, rationem quintam huius rasuræ ex S. Hieronymo propositam, recidere in istam, & commendare sacris personis, vt abiectis seculi curis vacent soli Deo, idque sit solum & vnicum eorum negotium: quod de negotiatore dici non potest.

80. Præclarè hanc rasuræ sacræ causam aperuit his verbis Iuo sermone De sacrorum Ordinum Excellentia, postquam præmisit sacros homines [ huius vitæ necessaria accipere debere, de oblationibus, vel de opere manuum, vel de aliis innocentibus artibus, non autem de vsuris, vel de turpibus lucris, vel de negotiationibus, aut aliis illicitis artibus; ] nempe non absolutè illicitis, sed respectu talium personarum,



rum, pro quibus æquiparat illas alias artes & negotiationem, vt monstrat vox illa *aliis*. Sic igitur ibi Iuo de rasura. [ Si paupertatem & humilitatem, quam præfert habitus corporis & figura capitis, in corde non habetis, timeo ne cum hypocritis sit pars vestra, & spes vestra ab æterna mercede sit vacua, qui non vt Clerici, sed vt Acephali, in clericali militia, sola quæritis lucra temporalia. Ad hoc enim capillos in modum coronæ in summitate capitis raditis, vt & regnum spirituale, quo cæteris præminetis, tali figura ostendatis, & curæ mortalis illecebras frequenter redeunt, sic amputetis de corde, sicut crines frequenter resurgentes abraditis de capite. Residuos autem capillos eo ordine præcidere debetis, vt aures, oculos, & alios sensus capitis liberos reddant, & curam exteriorum non in superfluis desideriis carnis, sed in necessariis tantum exercendam agnoscant. ] Atque aded non in negotiationibus, quas non pertinere ad necessaria sacris hominibus concessa præmiserat. Quo facillè accommodari potest illa huius rasuræ ratio, quæ ex refectione capillorum, olim in mari per tempus procellæ fieri solita, peti potest. Videtis de eo prisco vsu, Fernandium à Corduba in multiplici Didascalia c. 22. Similiter enim Religiosi, fugientes à Pusillanimitate spiritus, & tempestate, elongarunt fugientes, & in solitudinem tanquam in portum se receperunt, dimissis in seculi mari procellis negotiorum, turbinibus curarum secularium. Videbor transiisse à rasura, de qua agere cœperam ad tonsuram, qualis re vera erat hæc capillorum resectio in procella. Sed hoc ad rem præsentem perinde est, passimque veteres, Monachos *tonsos* nominant. Quod

enim ex Clemente Alexandrino 3. Pædag. c. 11. & ex Optato l. 2. contra Parmenianum mōstrat Bellarminus lib. 6. De Monach. c. 40. Clerici & Monachi olim, tametsi radi dicebantur, quia demissè tondebantur, tamē re vera tondebantur tantūm: vndē *deronsus* ἀποτεξάμενος, pro Monacho, crebrum est apud Veteres, vt notauit Alemannius ad historiam arcanam Procopij: beneque confirmatur, ex eo quod S. Augustinus, Monachos comatos atque crinitos, non attonfos cæterorum more, habet pro monstribus, quales illi Apostatæ apud S. Nicephorum Constantinopolitanum in historia De Monachis naufragis, quos genuit Religioso cultu deposito, ex attonsis in comatos fuisse mutatos, & ad Laicorum speciem tractatos.

81. Quod si placeat, illam huius siue rasuræ siue tonsuræ causam probare, quæ petitur ex more antiquo asciscendi aliquem in seruum aut filium, æquē habebimus intentum. Nam filium specialem Dei, in iis quæ tanti Patris sunt, non in extraneis negotiis par est esse. Seruum item Dei, seruire Deo, non curis seculi addici, & negotiationibus implicari, est omnino consentaneum. Capillorum porrò dissectione, fieri aliquem alterius filium, monstrat Pithœus l. 1. Aduers. c. 1. ex Paulo Diacono l. 6. De gestis Longobard. c. 53. qui testatur, Carolum Francum misisse filium suum ad Regem Longobardorum, vt ei pater fieret incisione comæ, quod & præstitit. Sed & Anastasius in Benedicto. 2. scribit eum accepisse mallones, siue cirros capillorum Iustiniani & Heraclij filiorum Constantini Pogonati Imperatoris, qui vt à se genitos, Romani Pontificis peculiare filios faceret, eorum capillitium, siue quod nomen

*mallonum*

*mallonum* propriè sonat, *vellus* capitis, obtulit Christi Vicario, successori B. Petri. Ex qua item fide, Rex Bulgarorum, vt scribit Anastasius in præfatione ad oëtauam Synodum, vt suum erga Romanum Pontificem seruitium testaretur, coram omnibus capillos suos apprehendens, abscissos tradidit legatis Romanis, hæc verba præfatus. [ Omnes Primates, & cuncti populi terræ Bulgarorum, cognoscant, ab hodierno die me seruum fore post Deum B. Petri, & eius Vicarij. ] Ex tam multis tonsuræ siue rasuræ Monasticæ causis hætenus expensis, constat mercaturam & negotiationem procul esse debere à Monachis, & quibusuis Religiosis, qui hæc superflua à se propter Deum amouerunt.

82. Occurrit porrò eiusdem sacri ritus alia ratio minùs vulgaris quam nolo prætermissem, quia & ipsa optimè euincit debitam Religiosi abiunctionem à negotiatione de qua agimus. Nimirum olim à morituris, non modò omnia ornamenta & honoris insignia remouebantur, ne illo habitu excederent, sed etiam honor capitis siue capillitium tollebatur. Sic enim apud Statium l. 7. Amphiaræus mori absorbendus, capitis comam, coronamque & alia ornamenta deponit, dicens,

*Accipe commissum capiti decus, accipe laurus,  
Quas Erebo deferre nefas.*

Phædra item, iam iam occubitura suamet manu apud Senecam act. 5. Hyppoliti

*Placemus umbras, capitis exuias cape,  
Laceraque frontis accipe abscissam comam.*

Plura in eam rem Pineda in c. 1. Iobi versu 20. n. 14. Possit ergo quis haud immeritò resectum Religiosis capillum, ad eorum mortem referre, præsertim ubi

tonsura fiebat *σαυρωσις*, id est in crucis modum, quam fuisse Græcorum tondendi rationem habetur ex eorum Euctologio cū proponitur ratio vestiendi Monachum. Quamquam apud S. Dionysium c. 6. Eccles. Hierar. tantū habetur, Monachum forma crucis signatum, tonderi, quæ verba insinuant præmissa impressione signi crucis, subsecutam fuisse capillitij remotionem siue tonsuram. Vt ut sit, si tonsura vel rasura Monachi ad eius mortem referatur, facile est in rem nostram argumentari ex eo ritu: Neque enim mortui est negotiari, aut agitare vlla secularia negotia vel mercimonia; sed eius omnia studia & cogitationes consecrari Deo debent. Quo haud inuitus retulerim alium affinem ritum antiquum, quo capilli Monacho resecti, consecrabantur. Ita habetur ex Regula S. Aureliani c. 4. verbis illis. [Si quis Laicus tonsurandus est, de capillis illius in confessione mittatur, ut ei in testimonium sit.] Hoc est, ut id sit monumentum ac symbolum consecrationis qua se Deo addixit. Confessionem porro in eo textu S. Aureliani, accipere necesse est pro loco in quo conditum iacebat alicuius Martyris corpus; quod intelligo non tantū de communi loco siue sacello in quo sancti corpus iacet, sed etiam de loco proprio, putā capsella qua reliquiæ concludebantur; Nam eam quoque aliquando *Confessionis* nomine donatam legimus, ut apud Anastasium in Hilario, cū ait eum Pontificem construxisse ex argento Confessionem S. Ioannis Baptistæ, pensantem libras centum; quod nemo de templo vel de sacello accipiat, sed de capsella tantū seu tabernaculo. In tali ergo Confessione, includebatur coma & barba resecta. Quod præter contextum

ex S. Aureliano prolatum, confirmatur ex Actis S. Gulielmi Gellonensis, ubi de eo sacra veste religiosa amictio, dicitur, comam nobilem & barbaram venerabilem depositam esse, & Deo consecratam ad modum prædictum. Itaque curas in Dei gratiam depositas, & quasi sanctificatas illatione in tabernaculum, profanare, & in mercimonia ac quæstus seculares educere, probrosum ac indignum videri debet.

83. Simile nec minus efficax in rem nostram argumentum, duci potest ex habitu antiquo Religiosorum, qui præter cætera colobio continebatur. Est autem colobium, tunica absque manicis. Nam quamvis postea colobium transferit in Dalmaticam iubente S. Sylvestro, ut Onuphinus libello de Explicatione vocum Ecclesiasticarum annotavit: Tamen initio colobium illis quoque manicarum inchoamentis carebat, ut liquet ex multis veterum Scriptorum locis quæ addensat Bulengerus l. de Veste sacra c. 22. sic enim Ammianus l. 14. colobium vocat, tunicam pectoralem sine manicis. Photius tunicam mutilam *μικτὸν χεῖρ* appellavit, pag. 561. Nostri quoque eiusmodi tunicarum non manuleatarum descriptioni assipulantur, nominatim Dorotheus ac Caspianus mox adducendi. Itemque Honorius in Gemma animæ l. 1. cap. 211. Eam itaque Monachorum vestem truncam, & absque manicis, haud absurdè quis retulerit ad similitudinarium Religiosæ vitæ martyrium. Nam etiam ex usu antiquissimo, firmato per Eutychianum Papam apud Anastasium in Eutychiano, graviter cautum erat, ne quis martyrem absque colobio purpura prætexto sepeliret. Cum ergo Religiosorum vita, sit iuge martyrium, de quo

scitè Damasc. 4. fid. c. 16. Pet. Bles. serm. de S. Lucia, & serm. de S. Vincentio, & Photius apud Anonymum Cluniaci Scholiasten gradu 4. scholio 1. meritò Religiosi *viui Martyres*, vt loquitur Abbas Piamon- Collat. 18. c. 7. etiam in vita, veste martyrum defunctorum propria induuntur, nec absque prætexta purpura, vt S. Dorotheus Doctrina 1. obseruat: id tamen referens, ad designandum quod Religiosi sint Domestici Imperatoris, ad quem per se primò spectat purpura. Non refugio ego quidem has colobij Religiosorum interpretationes; adiungendam tamen censeo aliam, (si tamen aliam,) quæ est Cassiani l. 1. c. 5. affirmantis abscissionem illam manicarum, referri ad significandum amputari debere à Religioso omnem operum ac negotiorum seculi sollicitudinem, cum Religiosus sit seculo mortuus ac Christo confixus vi instituti sui: proindèque non debeat cogitare nisi quæ sunt Domini, cuius domesticus est effectus, & cui se per crucem voluntariam mancipauit. Hoc, negotiatorem seculi curis immersum præstare non posse, nemo non videt. Alienissima est igitur à Religioso instituto negotiatio, vt monstrat rasura & habitus Religiosi; quibus inspectis non minùs possit rubore suffundi Religiosus negotians, quàm olim Tertullianus, Christianum pallij contuitu commoueri, & ad officium reuocari muta adhortatione censuerit. Subjicienda, vel potiùs euoluenda & distinctiùs exprimenda sequitur, iam tacta in prædictis ratio eiusdem veritatis, petita ex natura status religiosi, qui totus eò colliniat, vt hominem à peccati occasionibus auersum, aptet ad vnionem familiaritatèque cum Deo, per remotionem turbarum ac tumultuum animi à quibus

quibus Deus refugit, quia non in commotione Dominus. Cum utroque autem illo religioso status officio pugnat aperte negotiatio. Nam evidentissimum est, beneque §. 3. monstratum, Negotiatorem facillimè declinare in obligationes, & pedicis peccatorum irretiri. Vix enim plus potest se à peccatis nitentem præstare, quàm is qui reptans manibus ac pedibus, cœnosam viam premit, ut ait Theotimus apud Damascenum 1. Parall. c. 74. Et ut est apud S. Augustinum homil. 50. c. 6. secularibus distenti negotiis, [ tam multa peccant, ut non tam de istius mundi pulvere aspergi, quàm luto obliniri videantur. ] Et præmiserat, id contingere, propter ipsum pulverem mundi huius, qui per itinera consulendi, consulentium pedibus adhærescit, & propter damna quæ in ipsa negotiosissima dispensationis actione contingunt. ] De fœdatione per negotia secularia, videndus Pet. Damiani l. 1. episto. 15.

84. Quod verò attinet ad tumultum, quem dicebam inferri animo per hanc negotiationem, res est perspicua, si agatur de illatione tumultus, & mentis distractione ac exterminio sancti illius otij, quod magnum habet negotium, ut dixit S. August. Epist. 110. Id est, quo vacatur Deo. Pro qualitate enim occupationum, finis idonei ut cum Deo agamus, vel inepti ad sanctam cum eo familiaritatem, ut cum otium omnimodum, in tam irrequieta animi nostri mobilitate, sit prorsus impossibile, semperque aliquid ex necessitate sit animo reuoluendum, tamen à nostro studio per Dei gratiam adiuto, & à nostris occupationibus penderet, ut cum ad orandum & agendum cum Deo accingimur, Eas vel illas cogitationes habeamus. Diuine id expressit his verbis Abbas



Isaaco Collat. 9. c. 3. [ vt qualitas animæ , non ineptè subtilissimæ plumæ seu pennæ leuissimæ comparatur, quæ si humoris cuiuspiam accidentis extrinsecus corruptione vitata non fuerit, vel infusa , mobilitate substantiæ suæ tenuissimi spiritus adjumento, velut naturaliter ad sublimia cœlestiaque sustollitur; sin verò humoris cuiuspiam aspergine, vel infusione fuerit prægrauata , non modò in nullos æreos volatus naturali mobilitate raptabitur , sed etiam ad ima terræ concepti humoris pondere deprimetur : ita mens quoque nostra, si accedentibus vitiiis curisq̃e mundanis aggrauata non fuerit , noxiæve libidinis humore corrupta , vel naturali puritatis suæ beneficio subleuata , leuissimo spiritualis meditationis afflatu sublimabitur ad superna, & humilia deserens, atque terrena , ad cœlestia & inuisibilia transferetur. Vnde propriè satis præceptis dominicis admonemur ; *videte ne quando grauentur corda vestra in crapula & ebrietate , & curis secularibus.* ]

Abbas item Moses Collat. 1. c. 18. sic habet. [Exercitium cordis non incongruè molarum similitudini comparatur, quas meatus aquarum præceps, impetu torante prouoluit. Quæ nullatenus quidem cessare possunt ab opere suo aquarum impulsibus circumactæ; in eius verò qui præest situm est potestate, vtrum an triticum malit , an hordeum , loliūve comminui. Illud quippè est procul dubio commolendum , quod ingestum ab illo fuerit , cui operis illius cura commissa est. Ita igitur etiam mens, per vitæ præsentis incursum, vndique ingruentibus tentationum torrentibus circumacta , vacua quidem cogitationum æstibus esse non poterit ; quales verò  
vel



vel admittere, vel parare sibi debeat studij ac diligentiae suae prouidebit industria. Si enim (vt diximus) ad sanctarum scripturarum meditationem iugiter recurramus, ac memoriam nostram ad recordationem spiritualium rerum, & desiderium perfectionis, spemque futurae beatitudinis erigamus, necesse est, vt ortae cogitationes exinde spirituales in his quae meditati sumus mentem faciant immorari: sin verò desidia seu negligentia superati, vitiis & otiosis confabulationibus occupemur, seu curis mundanis, & superfluis sollicitudinibus implicemur, consequenter exinde quaedam zizaniorum species generata, operationem quoque nostro cordi noxiam ministrabit: & secundum sententiam Domini Saluatoris, *ubi fuerit thesaurus operum seu contentionis nostrae, ibi & cor nostrum* necessariò *permanebit.*] Affinia sunt quae ex S. Anselmo adducit Edinerus l. 2. § *Venit.*

85. Otium ergo sanctum & adipale, quod discussio fursure terrenorum negotiorum, animam sanctis cogitationibus tanquam probata farina inferciat, adamandum est sacris personis, tanquam illis congruentissimum, & planè necessarium ad functiones status ipsorum. Quod vel nomen, quo ritu Ecclesiastico dies denominantur, satis docet. Denominantur enim *feriae*; quem usum apud seculares quoque, atque adeò vniuersaliter induci, optabat S. Augustinus ad titulum Psalmi 93. abolito nefario usu (si radicem spectemus,) quo lucres nominibus tenebrarum appellantur, vt scitè dixit Eucher homil. 11. de Pasch. notans inuectum usum à falsis nominibus denominandi dies, vt nunquam falsorum Deorum nomina, ab ore mortalium exularent. Ec

olim quidem simpliciter denominabantur *dies primus, secundus, tertius*, & ita consequenter, vt significat S. Chrysostomus l. 7. De Compunct. cordis *sub medium*; postea tamen subiit corruptela, quam Ecclesia quoad vsum suum abolitam voluit; denominans *ferias*, vt significaret sacris hominibus, esse quotidie feriandum, & indulgendum sancto otio, dummodò non marceat. In quam rem est elegans S. Augustini Epistola ad Eudoxium Abbatem & Monachos Insulæ Caprariæ. Est 81. Nec ratio est obscura. Nullis autem sacris hominibus pretiosius esse debet hoc otium, quàm Religiosis. [ Est enim, (inquit Synesius Epist. 99.) maximum bonum quod opimi instar & vberis soli, omnia bonorum genera in Philosophi animo producere, dici non immeritò potest. ] Synesio alibi, & passim Nazianzeno, atque Chrysostomo, *Philosophus* idem est ac *Religiosus*, quod Ioannes Sarisberiensis l. 7. Polycrat. c. 21. *sub finem*, pulchrè confirmat. Christiani ergo Philosophi seu Religiosi, sanctum otium, quod Guillelmus Abbas ad fratres de Monte Dei vocat *negotium negotiorum*, exterminatur per curas seculares Christo ipso Iudice, Lucæ 21. Vnde Cassianus Collat. 9. c. 4. veluti monstrosus ducit, quod aliqui Religiosi, curis illis velut innoxii nec se dedecentibus, implicari sustineant.

86. Non ita boni & pij Religiosi, quorum aliqui à negotiis secularibus ob sancti otij per ea profligationem, aded abhorruisse leguntur; vt etiam graui imperio adigendi essent ad curam bonorum temporalium cœnobij: eò quod ei curæ adiungantur plerumque lites & alia, quibuscum pax animi, & sancta tranquillitas Religiosæ vitæ optabilissima ægrè cohæret.

cohæret. Vnum quendam in seculari vita talibus olim distentum curis pro bonis suis, postea verò in Monasterio iussu Abbatis eisdem implicitum, admodum ea ex causa anxium ne in portu naufragaret, solatus est S. Anselmus longa & egregia allocutione, quam descripsit Edinerus l. 2. Vitæ S. Antistitis §. *venit ad eum*. Summa est, nihil ea ex causa timendum fuisse homini ad eas Ecclesiasticas curas adacto, & propter Deum & cœnobij bonum, dispositione & tuitione villarum monasterij implicito. Deus enim, quod videtur sancto otio decedere per eas curas non vltro susceptas, nec clam suppositis, & per munera ad suffragandum inescatis adiutoribus extortas; (vt facere aliquos Monachorum proposito, & finibus excedentes ibidem dicitur,) compensabit internis afflatibus, quibus boni Religiosi animum tranquillabit, facto flustro in media agitatione, & otio mentis in quantavis agitatione externa seruato. Vel ipsa tamen trepidatio proborum Religiosorum, ne prorsus necessaria in Dei res Cœnobio adscriptas cura, animos eorum à sancto otio auerteret, monstrat quanti apud illos esset sanctum hoc otium, & quàm refugerent superuacaneis, ac alienis ab instituto negotiis implicari cum sancti illius otij dispendio. Idem inultò magis monstrant, qui etiam quotidianam cum fratribus conuersationem, & communem vitam cœnobij cum aliqua spiritus dissipatione semper coniunctam, statis temporibus refugiunt, [ se per multos dies (inquit S. Augustinus l. De opere Monacho. c. 23.) à conspectu hominum separatos, & nulli ad se præbentes accessum includunt, viuentes in magna intentione orationum, qui facillima atque vilissima secum alimenta includere

censuerunt, quæ in illos dies, quibus à nullo videri  
 statuerunt, sufficiant.] De horum consilio, & incen-  
 so amore reparandæ indiuisiōis spiritus, si quo  
 modo per conuersationem cum aliis, tametsi piis ac  
 religiosis, ( tamen hominibus, ) immutata esset, sic  
 sentum suum subjicit S. Augustinus. [ Horum exer-  
 citationem in tam mirabili continentia, quando qui-  
 dem habent otium quo hæc agant, seque incitandos  
 non superba elatione, sed misericordi sanctitate  
 proponunt; non solum non reprehendo, sed quan-  
 tum dignum est, laudare non possum. ] Hi igitur &  
 alij, qui à domestica sub Abbate præpositura siue  
 œconomata Monasterij, metu effusionis animi ab-  
 horrere, vt Rodolphus ille apud S. Anselmum l. 1.  
 Epist. 2. Exemplo suo abundè firmant, quantum  
 sit dum in hoc corpore sumus, dissipationis & effu-  
 sionis animi periculum, quàmque pro ea cõtenda  
 sit satagendum; nec sapere eos qui à Satana impla-  
 nati, extraneas & secularium proprias negotiatio-  
 nes capessunt. Nam quantum per eas negotiationes  
 effunduntur ad externa, tantum à Deo elongantur,  
 quod perpulchrè monstrari potest exemplo S. Do-  
 rothei doct. 6. n. 16. Vult enim statui circulum quem  
 mundo vniuerso confert, eius verò centrum com-  
 ponit cum Deo, sicut ergo quo intimiùs peruadi-  
 tur à circulo ad centrum relictis externis, eò pro-  
 pinquiùs ad centrum acceditur; quò autem magis  
 ab interioribus receditur, & ad externa fit diffusio,  
 eò magis fit elongatio à centro: Ita quò magis viri  
 Religiosi ab externis negotiis, & curis secularibus  
 secedunt, eo magis accedunt ad Deum: recedunt  
 autem tantò magis à Deo, quantò magis diffundun-  
 tur ad externa, quod maximè faciunt, qui nego-  
 tiatio-

ziationibus se implicant.

87. Et miramur, tantum Religiosæ vitæ impedimentum, sacris Canonibus grauitè feriri? Gelatus sanè capite *consequens*, dist. 88. suspensione mulctat Clericos negotiationibus implicitis. At caput *secundum instituta* 2. Extra de Cler. vel Mon. intorquet anathema in Clericos & Monachos lucri causa negotiantes. Idem Clement. 1. De vita & hon. Cleric. c. fin. spoliatur priuilegio clericali, si præmissa triplici monitione per dies aliquot interplate adhibita, (vna enim pro tribus non sufficeret, vt cum aliis ait Diana 3. p. tract. 1. resol. 4.) non abstinuerint à negotiatione. Multos & Summistas & Iurisperitos in eam rem laudat Comitulus 1. respons. q. 53. n. 3. & Suares t. 5. 3. p. d. 21. sect. 1. num. 16. addens num. 17. contra Nauarrum in summa c. 27. n. 80, & multos Iurisperitos apud Straccham in opere De Mercat. p. 3. n. 8. & 9. eam priuilegij clericalis remotionem non esse priuilegij Canonis aut fori, sed solius immunitatis à tributis & exactionibus, quia non plus fert textus allegatus, nec plus à Pontifice postulatum fuerat. Subscribunt Mol. Tract. 2. De Iust. disp. 342. Rebel. 2. p. l. 9. quæst. ult. sect. 2. Comit. l. 1. resp. quæst. 53. n. 4. & Salas Tract. De Empt. & vend. dub. 3. num. 4. Ad amissionem tamen illius immunitatis per Clericum negotiatorem, nullam requiri monitionem, latè cum multis asserit Gu-tierres, Tract. de Gabellis, q. 93. à n. 7. Religiosos porro negotiantes, adhuc grauiùs quàm Clericos esse puniendos, (comprehensis inter Religiosos, etiam iis qui *conuersi* dicuntur, vt notat Syluester V. *Clericus* 3. q. 3. & Reginal. l. 25. n. 325.) habetur cap. *sed nec*. Extra, *Ne Cler. vel Monach.* Hæ pœnæ quod

longo situ quasi emarcuisse, & euiguisse viderentur, innouatæ sunt in Tridentino sess. 12. c.2. De Re-  
form.

- 88. Et non sunt quidem sententiæ latæ, sed tantum ferendæ, nisi post monitiones desistatur. Item non feriunt quidem Clericos in minoribus constitutos, si careant beneficio; neque constitutos in sacris vel beneficiarios, si semel aut iterum sic impingant, quæ omnia habentur ex textibus allegatis, suntque ferè recepta apud DD. Tamen in omnes Religiosos cadunt, & tam quoad illos quàm quoad alios quoscunque, in quos vibrantur, suppeditant manifestum argumentum peccati mortalis incurrendi per frequentem violationem post præmissam monitionem. Negat tam grauem obligationem Caietanus in summa, V. *Clericus*. Sed eam merito agnoscunt, Molina Tractatu secundo de Iust. d. 42. Less. libro De Iust. c. 21. numero 4. Gutierrez Tract. de Gabellis, quæstione 93. numero 29. Fumus V. *Clericus* n. 16. Layman lib. 3. Tract. 4. c. 17. §. 17. n. 39. Comitulus l. 5. q. 53. & multi quos recenset & sequitur Diana Tract. De Contract. Resol. 72. & videtur liquere ex grauitate pænæ constitutæ in delinquentes. Idque est anathema illud quocunque purè humano antèrius & fortius, quod Origenes obseruauit homil. 13. in Exod. expendens illud: *Custodite vos ab anathemate, ne forte concupiscatis, & tollatis ab anathemate, & faciatis castra filiorum Israël anathema, & coneratis vos, & omnem synagogam Domini.* [Tale est, (inquit,) quod indicatur in his verbis: Videte ne quid in vobis seculare habeatis, ne seculares mores, ne vitia, ne tergiuersationem de seculo vobiscum ad Ecclesiam deferatis: sed anathema vobis sit

fit omnis conuersatio secularis. Nolite diuinis mundana miscere: nolite negotia seculi, Ecclesiæ secretis inserere. Hoc est quod & Ioannes epistolæ suæ personat tuba, dicens: *Nolite diligere mundum, neque ea quæ in mundo sunt.* Et Paulus similiter: *Nolite, (inquit,) conformari huic mundo.* Qui enim hæc faciunt, accipiunt de anathemate: ] Et vt mox addit Origenes, polluunt castra Domini, & vinci faciunt populum Dei; quæ est nota grauis culpæ, grauibz pœnis meritò obnoxia.

89. Subduxi tamen, & ab hac culpa, & à pœnis quibus est obnoxia, primùm eos qui ex graui necessitate negotiarentur. Quo nomine intelligendi in primis sunt, pij illi Patrisfamilias administri, qui vt cum terrenis mercibus cœlestes ingerant, omnibus omnia facti, personam induunt Mercatorum, quia alioqui excludentur aditu orarum illarum, in quibus per eam speciem admissi, collaborant Euangelio, & fidem ac pietatem promouent; summa digni laude, quam illis meritò quis panxerit verbis S. Bernardi Epist. 42. statuentis, vt summa laude dignum, quod ad lucrificiendas animas, post benè constitutam conscientiam propriam, vir pius [ seipsum deferat, & quodammodò perdat, vt aliquos lucrificiat. Cum infirmantibus infirmetur, vratur cum scandalizatis, fiat etiam ( si oportet, ) Iudæis Iudæus, nihilque formidet, cum tali conscientia, exemplo Hieremiæ, & Ezechielis, in Ægyptum vel in Chaldaeam cum transgressoribus captiuari, & cum sancto Iob frater fieri Draconum, & socius Scruthionum; cum Moysè quoque ( quod grauius est ) deleri de libro Dei, & cum Paulo anathema esse à Christo pro fratribus. Ipsam denique, si necesse est, intrare

gehennam, securus medias penetrans flammās læta decantet conscientia; *Etsi ambulauero in medio umbra mortis, non timebo mala, quoniam tu mecum es.*]

Qui igitur ex necessitate pereuntium animarum fiunt negotiatores, & socij Struthionum, fratresque Draconum, & quodammodo in ipsam seculi gehennam propter Deum amantem animas, ex charitate regrediuntur, laude dignissimi sunt; tantum abest ut culpæ eam ob causam, vel censuris sint obnoxij.

90. Censerentur præterea ex graui necessitate, negotiationem à culpa & censuris liberam præstante negotiari; quibus aliunde non suppeteret, nec suppetitura decetius speraretur sustentatio; & quotquot pij & prudentis viri iudicio, ad negotiationem adigerentur ex vrgenti, & planè graui causa. Vbi cauendi sunt prætextus, quos cupiditas sæpè in hoc genere nomine necessitatis obducit, ut monuit Concilium Parisiense sub Ludouico l.i.c.12. Si tamen re vera interueniat prædicta necessitas, labis pura & censuris libera erit sacrorum hominum negotiatio, ut habetur ex Concilio Eliberit. c.19. recteque statuunt Nauar. in summa c.25. n.110. Mol. tract.2. de Iust. d.342. Zerola in Praxi Episc.V. *Clericus* §.15. Salas Tract. De Empt.& venditione, d.2.n.7. Ex Iurisperitis Straccha p.3. De Mercat.n.6. adducens Salicetum, Trotius De perfecto Clerico c.52. & 53. adducens Panormitanum ad c. *secundum Instituta*, Tit. *Ne Cler. vel Mon.* In prædicto igitur euentu, necessitate graui excusante, negotiatio non est sacris hominibus illicita. Vnde rectè infert Molina, supra §. *terciò obseruandum*, & Gutierrez Tract. de Gabel-  
lis, quæst. 93. n.6. ex tali negotiatione non deberi ve-  
tigal aut tributum, si quod pendatur à secularibus;  
sed



sed etiam immunitatem sacro homini saluam esse, quod non rectè in hoc euentu negat Salas supra dub.3.n.6.

91. Subducebam præterea culpæ & pœnis sacrorum hominum negotiantium, eos qui non per se, sed per tertium negotiarentur, si modò tertius ille haberet se vt causa principalis, non autem vt merus administer. Quæ videtur legitima ratio conciliandi dissidentes in hoc puncto sententias. Nam negotiationem per tertium, non esse sacris personis illicitam, etiam extra necessitatem, de qua proximè, censent Sa. V. *Clericus*, num. 2. Medina q.30. de rest. in 2. causa illicitæ negotiationis, versic. *hæc tamen*. Valentia 2.2.d.5.q.20. puncto 5. Lessius, Molina, Rebelus, Aragon, Salon, & alij quos profert Salas, Tract. De Empt. & Vend. dub.2.n.8. & Diana Tract. de contract. resolut.72. qui pro contrario placito Religiosis interdicente, negotiatione per alium, adducit Megalam, Genuensem, Ricium, Hugolinum, Salcedum, & Prosperum ab Augustino. Idem habet Gutierrez tract. de Gabellis, q.93. à num.30. adducens alios.

Mihi distinctio adhibenda videtur. Nam si ille alius, per quem negotiatio exercetur, non sit nisi administer, nec habeat rationem concausæ principalis, puto negotiationem illam per alium, esse Clericis & Religiosis illicitam; quia is qui ita negotiatur per tertium, est verè & propriè negotiator; & sic accipio quæ habet Straccha parte 1. Operis De Merc. n.26. monstrans, negotiationem per alium, constituere verum negotiatorem. Ad hæc, talis negotiator, etiam si tertium adhibeat, ferè tamen obnoxius est omnibus illis inquietudinibus & fluctibus

curarum, ob quas negotiatio per seipfos, vetatur sacris hominibus. Videmus sanè maximos quosque negotiatores, etiamsi pluribus ministris non destituantur, agitari animo, & irrequietos semper esse, ac procul ab illo sancto otio, quod in sacris hominibus, Ecclesia, & ipsum eorum vitæ institutum deposcit. Itaque talem negotiationem per alium, illicitam esse sacris hominibus, pono extra dubium. Sicque accipio Rodericum c. 3. qq. Regul. q. 74. art. 8. At si agatur de negotiatione per alium qui sit causa principalis, & curas omnes ac sollicitudines negotiationis exorbeat, admitto negotiationem per tertium, posse per sacras personas, & Deo dicatas exerceri. Sic enim supra §. 2. ratione 8. rectè positum est, fas esse Religiosis inire contractum Societatis cum Campfore, aut Mercatore conferente totam operam: Religiosis ex parte sua, non nisi nervos negotiationis, siue pecuniam conferentibus: in quo ne venialiter quidem peccant, quicquid dicant Mol. Tract. 2. disp. 342. versic. *utrum autem* & Gutierrez Tract. de Gabellis q. 93. n. 30. sanè huiusmodi negotiatio caret admistione defectuum illorum, ob quos negotiatio malè audire solet; nimirum obnoxietate mentiendi, vel etiam peierandi & rixandi; nec habet adiunctam eam mentis dissipationem, quæ auertit negotiatorem ab otio ministeriis ecclesiasticis, & vitæ Religiosæ consentaneo. Fateor iuxta receptum pronunciatum, quæ per amicum facimus, videri per nos ipsos facta. Verùm qui per alium facit, purus manet, cùm ille alius solus contrahit sordes, si quæ contrahendæ sunt ex opere quod exequendum suscipitur: Et ita contingit in hoc negotio.

IV. Propositio. Negotiatio aliqua lucratiua ex mercibus immutatis per negotiatorem, sacris personis illicita est, aliqua verò non est illicita.

92. Hæc est negotiatio quæ in trimembri diuisione superiùs posita, locum tertium tenuit, contineturque venditione mercium per negotiantem immutarum. Aio igitur, quasdam huius generis negotiationes dedecere Religiosos, ob adiuncta cum eorum statu pugnantia. Atque adedò nego fas esse Religiosis, lucri causa vendere quasunque materias ab ipsis immutatas. Latè hoc prosequitur Molina Tract. 2. De Iust. d. 342. concl. 1. §. *secundum est*. Ratio breuiter est, quia aliquæ huiusmodi negotiationes, inferunt negotiantibus nimiam in externa effusionem. Aliquæ verò sunt obnoxie variis peccatis, quæ faciliùs adiunguntur negotiationi ex certis mercibus. Denique aliæ secundum prudentem æstimationem, respectu sacrorum hominum sunt sordidæ, & lucrum ex eis captatum, etiamsi in se & absolute sit honestum, tamen attento statu hominum Deo dicatorum, existimatur turpe lucrum, & quæ ei se addicerent Religiosi, valde vilescerent. Huiusmodi est negotium tabernarij, & macellarij seu lanij, vt benè notauit Speculator lib. 4. tit. de Cleric. coniug. nu. 6. Vnde quamuis Religiosi haberent ex suis fundis vnde exciperent accedentes ad tabernam, appositis cibis sua opera mutatis, tamen indecentissimum esset Clericos aut Religiosos fieri caupones aut tabernarios: idque illis expresse vetatur Clementina De Vita & honest. Cleric. c. 1. & Can. 9. Trullano. Recteque mortalis culpæ id damnat Rebellus 2. p. l. 9. q. ult. n. 9. Quem tamen non audio; si ( vt subindicat ) *taberna* nomine intelligat etiam

locum in quo Clericus minutatim vinum suum vendat per matrem, aut sororem, aut famulum quempiam subscribit Layman l.3. Tract.4. cap.17. n.40. Sed perperam sic statuunt. Id enim longè aliud est, quàm taberna in qua vina per cauponem coempta bibantur, & cibi apparentur hospitibus; nec prudentum iudicio sordet aut venditorem Clericum deprecia, sicut faceret taberna. Et ita Gutierrez Tract. de Gabellis, q.9; n.7. & Girona de Gabellis 7. parte, in princ. n.15. Adiunxi tabernario macellarium seu lanium, ob eandem rationem vilis ministerij. Itaque tale negotium dedeceret homines sacros, etiamsi carnes vendendæ, essent ex animalibus Religiosorum, vel per eos in hunc finem saginatis, ut postea auctius venderentur, iugulata. Esto enim emptio iumentorum, ut vel adulta, vel facta meliora, aut saginata carius vendantur, non sit Religiosis illicita, præsertim si abundant pascuis, aut pabulum eis de suo suppetat; rectèque eam negotiationem Religiosis concedant Med. q.30. de *Rest. in causa secunda illicitæ negotiationis*. Salas Tract. de Empt. & venditione d.2. n.9. Ac Rodericus t.3. qq. Regul. q.74. art.8. Mol. tract.2. de Iust. disp.342. Gutierrez Tract. de Gabellis, q.9; n.51. malè n.52. id limitans ad animalia opere Religiosorum conductafacta, exclusis suis qui tantum pinguescunt, nec ullo artificio adhibito expoliuntur. Sint inquam ista probabilia. Tamen venditio carniū ex illis animalibus iugulatis, aded sordet, ut planè abhorreat à statu sacrorum hominum. Idem iudicium fert Molina Tract.2. De Iust. disp.341. concl.4. de officio Coriarij, & eorum qui aleas, taxillos, folia lusoria, & arma bellicia conficiunt, aut diuendunt. His quippe

quippe & similibus negotiationibus, Religiosi valde vilescerent apud homines, secundum prudentem æstimationem. Vnde supposito tali statu, ius naturæ eos obligat ad abstinendum talibus negotiationibus. Nec Ecclesia hac in parte siluit; nam præter decreta iam allegata, constat vetari iure positius humano, ne homines Deo dicati implicentur tutelis, ac prædiorum locatione. Quanto ergo magis censendum est, velle Ecclesiam, ne sacri homines prædictis sordidioribus negotiationibus distineantur, per quas Religio vilipenderetur? Quod autem Gratianus cap. *Ejiciens*, dist. 88. ex credito Chrysostomo, solius negotiationis pressè dictæ meminisse videatur, parum refert: quandoquidem Gratiani autoritas non plus vrget, quàm eius ex quo profecit. Videsis opus de *Æquiuc.* cap. 23. n. 8. & Sanchez l. 9. de *Matrim.* d. 12. n. 5. Autor autem ille Operis Imperfecti, quem Gratianus ibi descripsit, non est apud Catholicos magni momenti; nec re vera solam negotiationem pressè dictam ablegat ab Ecclesiasticis personis; (sic enim eum supra limitauimus;) quamuis eius solius negotiationis mentionem fecerit. Ex his abundè confirmatum & illustratum manet, quod primò dixi, aliquas ex negotiationibus tertij generis, dedecere Religiosos.

93. Quod verò aliquæ ex eiusdem generis negotiationibus sint Religiosis licitæ, generatim & indistinctè loquendo, est extra dubium, agnosciturque à multis Iurisperitis, quos refert & sequitur Stracha Operis de *Merc.* parte 3. num. 5. Et Rodericus Tomo 3. qq. *Regul.* q. 74. art. 8. concl. 1. Et ratio est, quia hoc genus negotiationis, potest plerumque absque dissipatione spiritus, & vlla indecentia à Re-

ligiosis obiri. Quare generatim loquendo, non potest censeri prohibitum; siue iure naturali; (Cur enim?) siue iure positivo. Imò pleraque iura humana, ratam habent huiusmodi Religiosorum negotiationem in singularibus quibusdam materiis: ac nominatim Concilium Moguntinum l.c. 14. De quo mox in discussione particularium materialium, circa quas hæc negotiatio potest esse vel non esse illicita; Quò descendendum est, quia ibi est seges copiosa difficultatum huius negotij.

*§.6. Sigillatim de negotiatione per venditionem opificiorum, quæ Religiosi labore suo & manibus operando confecerint.*

**L**abor siue opus manuum, cui Religiosi dare possunt operam, potest duobus modis spectari. Nempe primò per se & absque nexu cum negotiatione. Secundò cum eo nexu, ob venditionem opificiorum ex materia mutata.

94. Priore modo spectatus labor manuum, extraneus est huic disputationi, quæ ad negotiationem arctatur: Dubitare verò non licet, quin opus manuum possit à negotiatione seiungi, quia pleraque opera manuum sibi solis suscipiuntur à Religiosis, non quærentibus ea vendere, vel ex suo labore quæstum facere: sed vel sibi prospicere, quoad corporis necessitates, vel animæ consulere, per otij deuitationem. Habemus exemplum luculentum in Cisterciensibus, qui agros suos ac fundos sua manu operabantur: non ad fruges, quas ipsi quoque metebant.

tebant sua manu, exportandas in mercatum, sed ut victus inde suppeteret, & pauperibus de sua tenuitate non deessent. Quod Stephanus Tornacensis Epist. 1. his verbis tollaudat. [Beata paupertas eorum (*Cisterciensium*,) quæ licet eos fame premeat aut frigore, non tamen aut mendicare compellit, aut diuitibus adulari, suis ac suorum manibus victum exquirunt & vestitum, non veriti sequi Paulum, qui cum licite posset de Euangelio viuere, ac spiritualia seminans, carnalia metere, maluit tamen manibus operari, ne quod offendiculum daret Euangelio Christi. Honorant Dominum de sua, non de aliena substantia; & de primitiis frugum, non alterius, sed suarum, dant Pauperibus. Quanquam rectius non sua, sed omnium dixerim, quæ vniuersis secundum gradus ordinatæ charitatis, quasi in commune deseruiunt. Nec enim buccellam suam comedunt soli, & non comedit cum eis pupillus ex ea, &c. In sudore vultus sui vescuntur pane suo, nec eos lasciuire & rixari faciunt, otium, & alienus cibus. Tanta in cibo parsimonia, ut duobus tantum pulmentis vtantur, quæ aut ager ex leguminibus, aut ex oleribus hortus affert. Ipsis tantò rariùs vtuntur, quantum frequentius apud eos audiri solet, quàm videri. Terram disrumpunt voluntarij, & violenti diripiunt cælum.] Inuenio quidem Petrum Cluniacensem, Epistola Apologetica ad S. Bernardum (est 28. libri primi) tanquam impossibile & damnosum, sugillantem hoc opus agriculturæ in Cisterciensibus; Tamen iudicium S. Bernardi, quoad messem diuinis quandoque suffragiis ut eius acta referunt, communitum, & à sancto Benedicto approbatum c. 55. Reg. antefendum est.

Quamquam neque S. Bernardus approbavit vnquam  
nimium laborem in eo opere externo qui spiritum  
suffocaret, & corpus plus iusto maceraret: quod v-  
num reprehendit Petrus Cluniacensis, & S. Basilius  
ad q. 38. fusætum, qui recisis turbis & suffocatione  
spiritus per corporis laborem; maxime hanc agri  
colendi disciplinam approbat in Monachis, non ita  
multo post. Nec video cur id esse opus Monachi, in-  
ficiatur sit Abbas Pastor l. 5. De Vitis Patrum libel-  
lo 10. n. 46. nisi si exclusionem culturæ externi ho-  
minis, per eam externam culturam nimium adama-  
tam improbavit. Vt & S. Isidorus c. 5. Reg. qui id  
dixit esse opus seruorum; sola horti olerum cultu-  
ra, Monachis assignata. Habemus ergo ex eo Cister-  
ciensium labore, exemplum operis manuum, ad ne-  
gotiationem non spectantis.

95. Testatur præterea S. Hieronymus Epistola  
ad Rusticum De Monachi Institut. veteres Mona-  
chos, præcipuè ob otij deuitationem, & animæ sa-  
lutem laborasse manibus, atque adeò non ad nego-  
tiationem. Quare sic Rusticum commonet. [Ne va-  
cet mens tua variis perturbationibus quæ si pecto-  
ri insiderint, dominabuntur tui, & te deducunt ad  
delictum maximum. Facito aliquid operis, vt te sem-  
per Diabolus inueniat occupatum. Si Apostoli ha-  
bentes potestatem de Euangelio viuere, laborabant  
manibus suis, ne quem grauarent, & aliis tribue-  
bant refrigeria, quorum pro spiritualibus debebant  
metere carnalia: cur tu in vsus tuos cessura non  
properes? Vel fiscellam textæ iunco, vel canistrum  
lentis plecte viminibus, sarcatur humus, areolæ  
æquo limite diuidantur; in quibus cum olerum ia-  
cta fuerint semina, vel plantæ per ordinem positæ,  
ducantur



ducantur aquæ per ordinem irriguæ , vt pulcherri-  
 morum verſuum ſpectator aſſiſtas. Ecce ſupercilio  
 cliuoſi tramitis vndam, elicit ; illa cadens raucum  
 per læuia murmur ſaxa ciet, ſcatebrisque arentiâ  
 temperet arua. Et Monasteriorum ordinem , ac re-  
 giam diſciplinam , in paruis diſce corporibus. Te-  
 xantur & lina capiendis piſcibus , ſcribantur libri,  
 vt & manus operetur cibum , & animus lectione  
 ſaturetur. In deſideriis eſt omnis otioſus. Ægyptio-  
 rum monaſteria hunc morem tenent , vt nullum  
 abſque operis labore ſuſcipiant , non tam propter  
 victus neceſſitatem , quàm propter animæ ſalutem,  
 ne vagetur pernicioſis cogitationibus mens , & in-  
 ſtar fornicantis Hieruſalem , omni tranſeunti diua-  
 ricet pedes ſuos. ]

Quid Paulus Monachus , referente Caſſiano l. 10.  
 c. 24? [ Cùm in eremo vaſtiore conſiſtens, quæ Por-  
 phyrio nuncupatur, palmarum fructibus & modico  
 horto ſecurus haberet ſufficientem alimoniam ſuam  
 victusque ſubſtantiam , nec poſſet aliquid aliud vn-  
 de ſuſtentaretur, operis exercere , eo quod ab oppi-  
 dis & habitabili terra ſeptem manſionibus , vel eo  
 ampliùs deſerti illius ſeparetur habitatio, plùsque  
 expeteretur pro mercede vecturæ, quàm valere poſ-  
 ſet pretium operis deſudati : collectis palmarum  
 foliis , quotidianum penſum velut exinde ſuſten-  
 tandus à ſemetipſo iugiter exigebat. Cùmque ope-  
 re totius anni antrum eius fuiſſet impletum, id quod  
 ſolicita cura laborauerat ſingulis annis igne ſuppo-  
 ſito concremabat , in tantum probans ſine opere  
 manuum, nec in loco poſſe Monachum perdurare,  
 nec ad perfectionis culmen aliquando conſcendere,  
 vt cum hoc fieri nequaquam neceſſitas victus exi-

geret, pro sola purgatione cordis, & cogitationum soliditate ac perseverantia cellæ, vel Acediæ ipsius victoria & expurgatione perficeret. ]

96. Ex his ergo exemplis testatissimum efficitur, laborem manuum priscorum Monachorum non semper spectasse negotiationem, sed interdum ad victum citra negotiationem parandum; aliàs (& quidem frequentissimè,) ad solam otij declinationem fuisse ordinatum. Est enim otium omnibus mortalibus exitiale, Religiosis verò pestilentissimum. Conclamant passim in otij nocumenta Patres. S. Chrysostomus hom. 7. in 2. Cor. *sub finem* ita loquitur de otioso. [ Qui talis est, instar erronis cuiuspiam quovis malo transfigitur: atque huiusmodi animam, non secus ac puerum licenter vagantem, quisquis vult in servitutem trahit. Quoniam enim ipsa hoc in more positum habet, ut aliquid operetur, si quidem ipsius in rebus honestis actionem comprimas, quandoquidem nihil agere non potest, alia pariat necesse est. Quemadmodum enim terra, cum nec seritur nec plantatur, herbam duntaxat profert: eodem quoque modo anima, cum necessariorum rerum nihil habet quod agat, atque animo aliquid agere cupiat, pravis se rebus tradit. Et quemadmodum oculus, quando cernere non cessat, prava cernat necesse est, cum bonis obiectis caret, sic etiam animus, cum se à necessariis abduxerit, iam circa inutilia versatur. ] Idem pulchrè homil. 35. in Acta *in fine*. [ Quid fœdus homine qui non habet quod operetur, quid laboriosius, quid miserius? Nonne hoc plurimis vinculis deterius, toto die in foro quotidie oscitare, & spectare homines prætereuntes? Animæ enim natura est, ut semper moueatur, & quie-

& quiescere nequeat. Deus hoc animal condidit operationibus deditum, & ex natura eius est, operari, & præter naturam eius, esse otiosum. Ne ab ægrotantibus causam probemus. sed à re ipsa experimentum capiamus; nihil vacatione molestius, nihil otio. Idèd necessitatem operandi indidit nobis Deus: Omnia enim ab otio damnum accipiunt. Etenim oculus, & os, & venter, & vnumquodque membrorum nisi quod suum est operetur, in extremum incidit morbum. Hoc autem maximè in anima est.] Hæc Chrysostomus prædictis locis, in quoscunque otiositati deditos: quæ multò magis in Religiosos valent; ac proinde qui cum Religiosis agunt Patres ac DD. summoperè eis commendant, vt ab otio caueant. Præstat hoc omnino præclare S. Basiliius Reg. 37. safarum, commendans inde opus manuum, quod otium arceat. Idem traditur à S. Benedicto c. 39. aliàs 48. Regulæ. vbi plenissimè Turrecrem. Tract. 113. Videnda item Regula Carmelit. 13. & creditus August. serm. 17. ad fratres in eremo. & Cassianus l. 10. c. 14. Constat ergo opus manuum quod Religiosi suscipiunt, non semper esse nexum cum negotiatione; sed plerumque ad otij fugam, vel ad vsum operantis, citra commercium cum aliis, posse referri.

97. Eatenus tamen labor externus Religiosorum, & opus manuum, quo distinentur, necitur cum negotiatione, quatenus opificia plerumque exponuntur ab eis venalia: & hac ratione, honestatem huius negotiationis & venditionis opificiorum per Religiosos nunc inuestigamus. Debet verò vt certum statui, hanc negotiandi formam, posse esse sanctam, & Religiosos minimè dedecentem, quod superius §. 2. ratione 3. ex doctrina & exemplis san-

etorum monstratum est. Valde enim à Patribus celebratum reperitur opus manuum ad vendenda opificia, vt inde victus operantibus, & conueniens subuentio pauperibus suppetat. Præclarè in hanc rem præter cæteros S. Basilius ad Reg. 37. fusarum, & Cassianus l. 10. c. 22. Facit ad hunc locum caput 14. Concilij primi Moguntini sub Leone 3. tempore Caroli Magni. Ibi enim post mandatam Clericis & Monachis abstinentioniam à negotiis secularibus; itémque post declaratam variis exemplis notionem secularium negotiorum à quibus cauendum sit dictis personis; subditur postremo loco prohibitio exercendi iniusti negotij. Addit verò Concilium. [ Non tamen iustum negotium, est contradicendum, propter necessitates diuersas: quia legimus Sanctos Apostolos negotiasse: & in Regula S. Benedicti, præcipitur præuidere per quorum manus negotium Monasterij transeat. ] Locus est ex cap. 57. aliàs 64. vbi post constitutam fratrum opificum disciplinam, additur. [ Si quid verò ex operibus artificum venundandum est, videant ipsi per quorum manus transigenda sunt, ne aliquam fraudem præsumant inferre. ] Quæ verba ( vt rectè perspexit Concilium ) aperte supponunt, negotiationem illam, qua res per artificium mutatæ reuenduntur, licitam esse Religiosis, exemplo Apostolorum, qui exercentes opificium aliquod ( v.g. Scenofactoriæ artis, vt ex Actorum. 18. habetur ) vendebant artefacta sua, vt esset vnde sine grauamine cuiuspiam, vitam ducerent, & egenis de sua tenuitate beneficerent. Confirmatur ex variis iuribus. Nam cap. Clerici 11. q. 4. & cap. Clericus dist. 91. & cap. nunquam de Consecr. dist. 5. Conceditur sacris hominibus,

bus, ut de honesto artificio sibi suisque pauperibus victum & necessaria comparent. Potest ergo hæc negotiatio per propriorum opificiorum venditionem sancta esse, nec dedecens Religiosos. Et ita latè præter cæteros Gutierres Tract. de Gabellis, q. 93. à n. 47. adducens quàm plurimos. Et esse sententiam communem, affirmat Nauarr. in Man. c. 27. num. 128.

98. Sed nunquid omnis huiusmodi negotiatio per opificiorum venditionem, honesta censenda est respectu Religiosorum, eosque non dedecens? Conradus Summehart attendi vult, an materia artificio subiecta vilior sit pretio, quàm artificium à Religioso adhibitum. Nam si materia subiecta, sit pretiosior, censet tale opificium venale, dedecere Religiosum; sin minus, ei congruere. Sed meritò hoc refellit Medina q. 30. De Restitut. in 2. Causa illicitæ negotiationis. Qualiscunque enim sit materia subiecta, tamen semper verum est, interuenire artificium. Vnde si aliud inquinans negotiationem non interueniat, poterit à Religioso artificij autore distrahi, saluis legibus Ecclesiasticis, & honestate status sui. Quare recurrendum est ad optimam, & pietatis & prudentiæ refertissimam distinctionem, quam circa hoc adhibet S. Basilius c. 6. Constit. Monast. verbis illis. [Cæterum in his se operibus exercere Monachus debet, quæ ordinis ipsius decoro conueniant, cuiusmodi videlicet ea sunt omnia, à quibus cauponariæ artis, & imposturæ omnis absit suspicio, quæque nullæ longiores animi distractiones, aut improbi quæstus sequantur, sintque eiusmodi, ut manentibus intra tectum nobis magna ex parte confici possint, ne operum laboribus conten-

tiùs quàm par sit consecrandis , animi in virtutis  
commentatione , neruos , industriamque elidamus;  
in quo illud spectandum, vt & opus absoluator , &  
à quiete tamen non discedatur. ]

Pleniùs etiam ac distinctiùs ad Reg. 38. fusarum.  
[ Omnino, ( inquit, ) etsi artes quasdam præcisè sta-  
tuere , in quibus mos versari conueniat , haud facile  
est, quod aliæ aliis magis sunt opportunæ : quem-  
admodum videlicet cùm locorum , tum negotiatio-  
num , quæ in singulis regionibus tractantur , & na-  
tura & commoditas desiderat : In vniuersum tamen  
horum describi , & consignari delectus quidam po-  
test. Ac nimirum eæ videntur esse quæcunque vitæ  
nostræ , & quietem & tranquillitatem conferuent,  
quorum scilicet neque materia magno labore quæ-  
ratur, neque opera magna sollicitudine diuidantur:  
similiterque illæ omnes, quæ neque virorum neque  
mulierum indecoros congressus nobis conciliant.  
Siquidem omnibus in rebus illud peculiariter debe-  
mus spectare , vt simplicitatem & frugalitatem te-  
neamus , & illud summopetè fugiamus , ne inser-  
uiamus stultis , ac planè noxiis hominum cupidita-  
tibus , iis efficiendis , quæ in studio apud ipsos esse  
animaduuerterimus. Quocirca & in telis texendis, in  
ea modo opera , nostra à nobis opera conferetur,  
quæ in quotidiano communiq; vitæ vfu apud  
omnes sint : iis penitus reiectis quæ à libidinosis  
mulierculis inuenta sunt , ad captandos , ac laqueis  
irretiendos miseros adolescentulos. Similis quoque  
in consuendorum calceamentorum artificio tenen-  
da ratio à nobis erit, vt videlicet earum rerum in il-  
la arte ministri simus, quæ ad necessarium modò ho-  
minum vitæ vsum requiruntur. Cæterum & ædifi-  
candi

ST 12' 0 'ST 12' 0 'S, 12'

0, 21 15, 0, 21 15, 0, 21 15,

2' 0 'ST 12' 0 'ST 12' 0 'ST 12'

candi ars, item fabrilis lignaria, & æris cudendi, & agri colendi disciplina, etsi suapte natura ad vitam necessaria sunt, & magnam vtilitatem afferunt, ac ne suapte quidem genio sunt à nobis repudiandæ: tamen quodcumque aut quietem nostram perturbare, aut fratrum vitæ coniunctionem videbuntur distrahere, non necessariò à nobis semper declinari debent. Maioræque in pretio habendæ sunt illæ artes, quarum exercitatio eiusmodi sit, quæ non distrahat, neque impedimento sit, quo minus Deo assiduè cohæreamus, & quæ neque à temporibus psalmodiæ, orationisve, aut reliquæ disciplinæ constantia eos auocent, qui studio pietatis operam dant. Si quando autem eiusmodi in iis nihil inesse animaduersum sit, quod præcipuum vitæ nostræ propositum impedire videatur, aut hinc nihil noxæ contrahere, multis sine dubio hæc aliis anteponi debent, & maximè agricultura, quando ex ea facillimè res ad vitæ vsum necessariæ haberi possunt; & qui in ea versantur, nullas hi sursum ac deorsum cursitationes coguntur subire, modò (vt diximus,) ea nobis, neque à vicinis, neque ab accolis tumultus afferat, aut turbas. ]

99. Vides S.Basilium agnoscere, quasdam huius generis negotiationes dedecere Religiosos, non item alias. Et in eas ipsas, quæ per se spectatæ non dedeceren, agnoscere posse vitium obrepere à consuetudine cum secularibus, præsertim mulieribus, si ad emendum Religiosorum opificia admittantur. Monstratum id perspicuè est in casu S.Honophrij, prout apud Metaphrastem refertur initio Iuni, ex ea S.viri vita, quam Paphnutius Anachoreta conscripsit, habeturque etiam in vitis Patrum lib.1. sed

mutila hoc insigni exemplo. Interrogatus ergo per Paphnutium Honophrius, de causa secessionis suæ in eremum, his verbis respondit. [ Ego fui nuper Monachus, degens in cœnobio Thebaidis, magnoque & fidenti animo operans. Statui autem egredi ex illo cœnobio, & solus quietè habitare in monasterio, studens maiorem inuenire mercedem. Hanc cogitationem cum lubenter suscepissem, ædificaui paruam cellulam, & solus in ea habitavi, artem exercens meis manibus. Quo factum est, ut multi quoque ad me accederent, iubentes mihi opus, quod meis facerem manibus. Neque verò mihi parui fructus ex iis redibant, ex quibus pauperibus & egen-  
tibus, & hospitibus suppeditabam. Inimicus autem, qui est omnino bonis infestus, illo mihi tempore inuidens, & meum erga Deum vehementem scopum, & institutum impedire cupiens, cum subiisset mentem cuiusdam Monachæ, quæ apud me fuerat, iubens paruum aliquod opus; effecit ut ea ad me rediret; quo factum est, ut liberè inter nos locuti, simul quoque habitauerimus, & postremò ( quod est grauissimum, ) iniquitatem pepererimus, & sex menses in peccato manserimus. ]

100. Liqueat, non immeritò S. Basilium timuisse Monachis, in hac negotiatione à conuersatione cum mulieribus, per occasionem venditionis mercium. S. Benedictus insuper timuit Anaritiam, quæ incenditur per lucrum ex venditionibus. Ideoque c. 57. Regulæ voluit artefactum, ex quo suis permittit negotiationem, vendi aliquanto vilius, quam venderetur à secularibus; Id quod etiam habet alius Magister Monachorum apud Rabanum ad idem caput; & his verbis ex eius Regula c. 85. refertur in  
concor-



concordia Regul. S. Benedicti Anian. c. 64. [ Cùm vnaquæque ars aliquid perfectum superuacaneum vsibus Monasterij habuerit, vel mittendarum Eulogiarum abundauerit: Interrogata qualitate pretij quantum à secularibus distrahi potest, tantum infra nummorum minori semper distrahatur pretio, vt agnoscantur in hac parte spiritales à secularibus actorum distantia separari; cùm non negotij causa, quæ est inimica animæ, lucrum supra iustitiam querant; sed etiam ab ipsa Iustitia minùs accipiendi pretij humanitate consentiant; vt non propter cupiditatem & auaritiam artes operari credantur; sed ne otio possit pascenda dignis sumptibus manus vacare, & horas operosi diei gratis transire. Pretium verò acceptum, Abbati ab ipsis artificibus debet constitui: vt sciant item quanta ementibus summa respondeat, & accepti pretij fraudem non possint facere, de ipsa quantitate iam scienti Abbati. ] Vides ergo hos Sanctos timuisse inflammationi auaritiæ, & violationi paupertatis per huiusmodi venditiones. Auaritiam autem amolientes statuisse, vt artefacta aliquanto viliùs quàm à secularibus venderentur; contra quam faciebant Renuitæ Pseudomachus, ex S. Hieronymo apud Isidorum l. 2. de offic. Eccles. c. 15. Sic enim de eis S. Hieronymus. [ Quasi ars sit sancta, non vita, quicquid vendiderint, carioris est pretij. ]

S. Martinus, vt auaritiam & pericula ex ementium consuetudine, & si quæ alia incommoda venalitati adiunguntur, declinaret: omni huiusmodi negotiatione interdixit suis Monachis, quod his verbis prodidit Seuerus Sulpitius in S. Martini vita c. 7. agens de eius Monasterio. [ Non emere aut ven-

dore, ut plerisque Monachis moris est, quicquam licebat: Ars ibi, exceptis scriptoribus, nulla habebatur; cui tamen operi, minor ætas deputabatur; maiores orationi vacabant. ] Non negat Sulpitius aliquid emptum fuisse ac venditum in Monasterio S. Martini: pleraque enim saltem emptum fuisse, dubitare non licet, ut vita posset à Monachis exigi. Sensus ergo est, nihil fuisse emptum à secularibus, siue externis, quod per Monachos interposita mutatione venderetur, ut plerisque tunc Monachis sua artefacta vendentibus ex usu erat. Hanc verò venalitem, S. Martinus ad maiorem perfectionem, & ad præcludendas plerasque abusiones, à suo monasterio arcuit, solo artis scriptorum vau relicto, non ad venalitem, sed ad usum Monasterij. Tametsi neque scriptionis, neque artificiorum Monachis congruentium venalitem improbauit, ut inhonestam & malam, simpliciter loquendo.

101. Hinc verò inferre licet, ex duplici genere operis manuum, quorum vnum à negotiatione abiunctum, alterum cum ea nexum est; tametsi neutrum vel malum est, vel in præcepto, sed utrumque est liberum; tamen prius esse securius, quia magis recedit à peccandi periculis. Hoc secundum patet ex proximè disputatis ex mente Sanctorum, variis incommodis timentium ex venalitate artefactorum & opificiorum. Quod verò neuter operandi modus sit vitiosus, est extra dubium. Insaniebant enim Messaliani siue Euchitæ apud Epiphanium hæc. 80. & vnus quidam apud S. Augustinum 5. Retract. c. 21. qui negabant fas esse Monachis laborare manibus, contententes, Monachorum opus perpetuum & nunquam dimittendum, orationem esse. Quod ex  
Apostolo

Apostolo refellit S. Augustinus. l. De opere Monacho. Nec magis sobriè è Diametro Wicleffus apud Waldensem l. 4. doctr. art. 2. c. 22. & Caluinus 4. Institut. c. 13. §. 20. ac quoad non habentes bona immobilia, è quibus census ad victum suppetat, Guilel. De S. Amore, Giraldus De Abbatis Villa, Desiderius Longobardus, Richardus Armachanus, hostes antiqui mendicantium, (quibus Lutherus ac Brennius; ille art. vltim. iste in Confess. Vitemb. cap. De Votis Monast. adscripti sunt;) effutiuerunt opus manuum esse Religiosis in præcepto. Sed hoc tanquam erroneum, & mendicitati ab Ecclesia approbatæ aduersans, meritiò conuellunt S. Thomas Opusc. 17. cap. vltim. & Opusc. 19. cap. 5. & quodl. 7. art. 17. & 18. necnon 2. 2. q. 187. artic. 3. & 4. & S. Bonauentura in Apol. Pauper. q. 1. *sub finem*. & in Expositione Regulæ S. Francisci cap. 5. Cantipratanus l. 2. Apum. cap. 10. num. 7. Castro. V. *Labor* hæc. 2. Sixtus lib. 6. Biblioth. annot. 317. ac Bellarmin. l. De Monach. cap. 45. Qui benè ostendunt, fas esse Religiosis viuere mendicato, nec teneri ad opus manuum, vt victum parent. Quin etiam neque ex isto capite, neque ex alio vitandi otij pro quo opus manuum Monachis ex necessitate suscipiendum esse, significant Cassianus lib. 10. à cap. 8. & Isidor. Pelus. lib. 1. Epistol. 49. & varij asceticæ vitæ Magistri, qui adunantur in Concordia Regul. S. Benedicti. Anian. cap. 55. Ex nullo inquam prædictorum capitum, alterutrum modum operandi manibus esse Religiosis in præcepto, benè prosequuntur Rupertus lib. 3. in Regul. S. Benedictus à cap. 4. & Sanches libro 7. in Decalog. cap. 24. quandoquidem victus, siue ex mendicatione reli-

giosa, siue ex nidificatione passerum super Cedros Libani, ( vt S. August. in Psal. 103. & Rupertus in vita S. Heriberti c. 12. piè exposuerunt locum Psalmi 103. ) id est ex foundationibus per diuites seculi factis, potest suppetere. Occupatio autem, amantibus studia sacra nunquam deerit, quantumuis ab externo opere, & labore manuum ferientur.

*§. 7. Sigillatim de Religiosorum Con-  
uictoribus.*

102. **H**Oc est aliud singulare exemplum, inuolvens, ( saltem ex parte, ) negotiationem tertiam, cuius honestatem, atque decentiam quoad Religiosos, excutimus. Conuictoribus enim quos quis excipit, cibos coemptos & artificio suo ac opera mutatos exhibet, & inde quæstum facit, quod est tertio illo modo negotiari. Fuisse autem veterum Religiosorum praxim, certo pretio excipere & alere conuictores, monstratum est §. 2. Ratione 4.<sup>a</sup> Quis verò aduersus probatum Sanctis vsum, mutire audeat?

Ex alio tamen capite, non desunt quæ ei negotiationi facessant negotium. Est enim formaliter eadem negotiatio cum ea quam exercent caupones & tabernarij, nec minorem animi dissipationem infert, ob necessarium ad innumeras minutias descensum, & ob operositatem nutritionis & educationis puerilis intra domesticos parietes. Exempla verò Sanctorum, quæ adducebantur, non videntur ad rem facere. Nam pueri, quos S. Basilii & S. Benedictus domi suæ excipi volebant, ij duntaxat fuisse videntur, quos parentes addicebant cœnobiiis: itaque

que in eum finem excipiebantur, vt à pueritia com-  
 biberent monasticam disciplinam, & assuescerent  
 portare iugum Domini à prima ætatula, vltro ei-  
 dem colla submissuri, cum per tempus sui potentes  
 forent. Apud S. Anselmum cap. 78. simil. vocantur  
*Monachi nutriti*. Cæteros autem pueros non fuisse  
 intra Monasteria admissos, vel si id aliquando ten-  
 tatum est, correctum postea fuisse tanquam abusum,  
 constat ex Concilio Aquisgran. in causa Regulæ S.  
 Benedicti cap. 45. habetúrque etiam in Appendice  
 ad l. 7. Capital. Franco. Ibi enim decernitur [ vt  
 schola in Monasterio non habeatur, nisi eorum qui  
 oblatis sunt. ] Similitérque in Regula S. Cæsarii c. 5.  
 conceditur admissio infantulorum septennium, qui  
 imbui literis, & ad obedientiam fingi maturè pos-  
 sint; vnde significatur agi de infantulis Deo oblatis  
 per parentes. Subditur verò de aliis. [ Nobilium fi-  
 lij siue ignobilium, ad nutriendum, aut ad docen-  
 dum, penitus non accipiantur. ] Concinitque quod  
 Petrus Damiani Opusc. 36. cap. 16. gratulatur, quod  
 Cassini, scholas puerorum non reperisset. Quod ve-  
 rò attinet ad eos qui à parentibus oblatis admitte-  
 bantur, cum essent veluti plantationes cœnobij, &  
 in spem posteritatis Monasterij exciperentur, non  
 alebantur constituto certo pretio, aut pensione. Id  
 quod etiam perspicuum est de pueris illis Anglis  
 quos Sanctus Gregorius, multo studio conquisitos  
 in suis cœnobiis ali, & erudiri mandabat. Esto, no-  
 biles quorum filij ad S. Benedictum destinabantur,  
 antidoro fortassis aliquo, citra omnem pactionem,  
 compensarent expensas factas in liberorum suorum  
 nutritione: Idque S. Benedictus, non vt pretium,  
 sed vt antidorum ac eleemosynam bono conferen-

tium cessuram admittendum decreuerit, ut ferunt illa verba Regulæ c. 59. [ Si parentes aliquid offerre voluerint in eleemosynam monasterio pro mercede sua &c. ] Quomodo in eleemosynam, si pro mercede? Itaque illud pro mercede, iuxta Turrecremaram ibi Tract. 133. idem est quod pro Redemptione animarum suarum, vel pro remedio animarum suarum. Quare nulli fuerunt in S. Benedicti cœnobiis conuictores, ex constituto mensurno pretio.

103. Minus urgent exempla puerorum per Bedam & alios Monachos institutorum, de quibus §. illo 2. ratione 4. Vtrò quidem do, præter oblatos Monasterio paruulos, scholas aliis patuisse, in quibus Monachi minutam ætatem docerent; Tamen enim id S. Cæsario, & Abbatibus ordinem S. Benedicti reformatibus, ut ex Capitularibus retuli, tollendum visum est. Tamen in S. Galli Monasterio id fuisse in usu, constat ex Actis 5. Notkeri. De eadem Monasterij Fuldensis antiqua praxi, testatur Bro-  
 Werus l. 1. Antiq. Fuldens. c. 9. Presbyterorum suorum Nepotes & consanguineos, ad scholam mitti intra monasteria sibi subiecta, indulgit Theodulphus Episcopus Aurelianensis in Synodica Epistola n. 19. Hoc igitur vtrò concedo. Dato tamen quod Scholæ quæ Monachi præerant, non solis pueris Monasterio oblatis, sed indiscriminatim aliis quoque pueris paterent; non sequitur, pueros seculares, qui Magistris illis dabant operam, fuisse conuictores cœnobiõrum in quibus erant scholæ, aut quas Magistri inhabitabant. An enim hodiè Adolescentes, qui ad Religiosorum scholas doctrinæ gratia confluunt, omnes eorundem sunt conuictores? Similitérque nihil est necesse, puellas quas in

Monas-

Monalium disciplinam datas ex Beda narratum est §. illo 2. ratione 4. fuisse Monalium contubernales. Nam hodiéque cernimus, Parthenones in quibus puellæ seculares erudiuntur, plerasque ad disciplinam admittere citra conuictum. Et in actis S. Euphraxiæ c. 7. disertè habetur, nullam puellam nisi se Christo deuouisset, admissam esse, vt in Monasterio maneret. Quanquam quod de docendis pueris non oblati Deo circa Monachos à S. Cæsario, & Abbatibus Germanis improbatum vidimus, æquè circa Moniales improbat S. Anselmus l. De Vita Eremit. ad Soror. c. 6. *in fine* verbis illis: [ Pueris & Puellis, nullum ad te concedas accessum. Sunt quædam inclusæ quæ in docendis puellis occupantur, & cellam suam vertunt in scholam. Illa sedet ad fenestram, istæ in porticu resident. Illa intuetur singulas, & inter puellares motus nunc irascitur, nunc ridet, nunc minatur, nunc percutit, nunc blanditur, nunc osculatur; nunc flentem vocat pro verberare propius, palpat faciem; stringit collum; & in amplexum ruens, nunc filiam vocat; nunc amicam. Qualiter inter hæc inemòria Dei? Secularia & carnalia, & si non perficiantur; mouentur tamen, & quasi sub oculis depinguntur. ]

Vt vt verò statuendum sit de vsu illo, puellas præsertim non contubernales, cum tam frequenti septorum claustralium resecratione intrò admittendi ad disciplinam, tamen ex vsu hodierno, liquere potest de antiquo; & efficaciter colligi inde videtur, non si quæ puellæ iam olim ad Moniales mittebantur doctrinæ gratia, oportuisse eas admitti in Monialium conuictum, vt de pueris quoad Monachos dictum est: Atque ita antiquus vsus non suffragatur


nouo vsui pueros ex certo pretio in conuictum Religiosorum aut Monialium admittendi ; quæ ratio conuictores habendi , sola pertinet ad negotiationem tertiam , de qua inquirimus an Religiosos deceat.

104. Videtur posse maior vis fieri in postremo exemplo , nempe conuictorum Societatis I E S V , approbante S. Ignatio. Nam 4. parte Constit. cap. 3. *lit. B.* permittitur , vt cum in Collegiis non est iustus numerus Scholasticorum Deo per Vota illigatorum , vel habentium propositum seruiendi Deo in Societate , admittantur alij Pauperes Scholastici ex licentia Præpositi Generalis , & ad tempus , quoad eidem Præposito videbitur. Mandatur tamen vt hi ascititij Scholastici seorsim degant , nec commisceantur cum iis qui institutum Societatis sequuntur , sed tantum cum eis versentur , quatenus maius Dei obsequium iuxta superioris arbitrium tulerit. Subditurque [ Et aliquando honestas ob causas , quamuis illi diuitum ac nobilium hominum filij sint , modò suis viuant sumptibus , nihil esse videtur , cur admitteri non possint. Ætas conueniens fore à 14. ad 23. annum videtur , si in litteris progressum aliquem non fecissent. ] Declaratur quoque ibidem , cum pacta foundationis id ferunt , non repugnare instituto , tales conuictores ac commensales in Collegio admittere , seorsim habituros , nec versaturos nisi cum personis à Superiore designatis. Id verò institutum esse occasione Collegij Conimbricensis , quod Rex Lusitaniæ de Societate benè meritissimus onere aliquorum conuictorum grauauerat , intelligitur ex prima Congregatione Generali , can. 122. En igitur praxim conuictorum , suis sumptibus cum Religiosis



giosis degentium, S. Ignatio probatam, atque aded  
piam & sanctam.

105. Verum S. Ignatius, vel potius autor Decla-  
rationis Constitutionibus apponitur, Iacobus Lay-  
nes; (ex Declaratione enim, ex Constitution-  
num contextu, petita sunt quæ retulimus;) aliud de  
Conuictoribus tradit, quàm ferat multorum sensus,  
& praxis hodierna. Vult enim Conuictores, ferè non  
esse nisi pauperes Scholasticos, ad quos alendos, vel  
ex charitate de superfluis Collegij non satis nume-  
rosi, vel ex conuentis cum Fundatore, astringantur  
Collegia: pèrque horum pauperum Scholasticorum  
occasionem, permittit, vt aliquando alij ætate simi-  
les, qui scilicet annum. 14. attigerint, nec 23. exce-  
dant, cum eis educantur suis victuri sumptibus, cum  
honestæ causæ id tulerint. Nam non nisi *aliquando,*  
& *honestas ob causas,* & *ætatis annorum 14. & 23. &*  
*admixti pauperibus titulo misericordiæ, & fundatio-*  
*nis alendis;* non autem passim, & ex causa quæstuo-  
sa, & pueri decennes, & quicumque accesserint, aut  
ad id induci potuerint, admittendi sunt conuictor-  
es, suis sumptibus viuentes, de sententia authoris  
propositæ declarationis; qui addit, magnum esse ha-  
bendum hac in parte delectum. [Animaduertatur,  
(inquit,) vt cum huiusmodi, restrictiores quàm  
largiores simus, habeaturque diligenter delectus  
eorum qui sunt admittendi, examine aliquo parti-  
culari, cum iisdem antequàm recipiantur, vtendo.]  
Hæc quàm consentiant cum hodierna praxi, permit-  
to considerandum. Sed quod ab eadem praxi abhor-  
ret quàm longissimè, ex mente antiquæ Societatis,  
quæ nondum ad seculum, (quod nunc tanta exulta-  
tione recolitur,) propinquauerat, res nummaria

quoad Conuictores suis sumptibus viuentes, nullo modo à Societatis Religiosis attingebatur. Ita perspicuè habetur ex Decretis quartæ generalis Congregationis c. 10. vbi sic legitur. [ Propter ingentem fructum, & per  fidelium Pædagogorum, & alias vtilitates quæ ex hac occupatione videntur sequi, flagitatum est, vt in partibus Septentrionalibus, nostri habeant Conuictores, & eorum curam gerant; Ea tamen lege, vt res nummaria æconomò tradatur, & non sollicitentur Adolescentes ad Institutum nostrum, nec admittantur inuitis parentibus. Et iudicatum à congregatione fuit, valdè optandum esse, vt Societas quoad fieri poterit, eiusmodi oneribus liberaretur. Atque ideo Patris Generalis prudentiæ commisit, vt pro ratione regionum ac personarum, expendat quid in hac re ad maius Dei obsequium, & commune Societatis bonum maximè expediat. ] Ingens fructus ex quo Patres Septentrionales moti sunt vt à Congregatione poscerent facultatem habendi Conuictores, quorum vsum priùs ignorauerant, (habita est autem quarta Congregatio post annum 1572.) ille inquam ingens fructus speratus, non compertus adhuc experimento, non fuit fructus marsupij amplificandi, sed fructus spiritualis, qui tunc plurimus sperari poterat, præsertim in humili ætate rectæ fidei institutionibus imbuenda, cui alioqui ob corruptam plerumque Pædagogorum fidem, timendum erat in oris illis. Nunc Pædagogorum sincerissimè Catholicorum vbertas est vbique maxima; & de spiritali fructu sperato responderitne optatis variantes sunt sententiæ. Societas certè anterior, quæ sæpè postea professæ est se sub eo onere gemere, tantos illos quæstus spirituales

les non videtur agnouisse. Et Congregatio Generalis 3. quæ decreto suo 14. admisionem nonnullorum conuictorum suis sumptibus viuentium cum Alumnis Germanicis, prouidentia Præpositi Generalis permisit, ne vsus iam inductus, cum multorum Magnatum offensione aboleretur; satis significauit sibi multò magis cordi fore, si vsus ille non retineretur Romæ: & ne alibi serperet, vetuit decretum illud suæ quoad Romanos indulgentiæ, transmitti aliò, nec nisi Romæ in actis Congregationis habendum edixit. Tandem conditio sub qua propositum est & concessum, vt in oris Septentrionalibus fas esset habere Conuictores, si Generalis Præpositus id iudicaret expedire, nunc exoleuit. Neque enim in vllis Conuictorum Collegiis Gallicanis res nummaria per seculares curatores administratur, nullatenus in ea se immiscentibus Societatis Patribus, tametsi ita aliàs seruatum memini Auenione, Patre Ambrosio Morello cætum Conuictorum quoad litteras & spiritualia regente, nec vllò modo attingente rem nummariam; quæ per Congregationis (sic enim vocabant) temporales administratos, & curatores colligebatur; quæstu si quis erat, ipsis cedente. Hæc conditio nunc exoleuit; nec si vigeret, celebrarentur tantoperè à quibusdam fructus spirituales cætum illorum: vt sanè non celebrabantur, cum ea conditio locum habebat.

106. Effici ex his liquidò videtur, præxim Sanctorum nec veterum, nec posteriorum, suffragari negotiationi illi ad Cauponariam & tabernariam accedenti, qua adolescentes certo mensurno pretio domi aluntur. Cernitur enim in hac agendi ratione duplex negotiatio: Vna propriè ac pressè dicta, sa-

eris personis vetita per Canones, qua pleræque merces emptæ in eum finem vt vendantur, reuenduntur, nullatenus mutata, nec absque quæstu; puta varij cibi, vina, charta, atramentum, gossipium, & alia pleraque minutalia. Altera quam mediam diximus, pertinetque ad tertium negotiationis membrum suprâ propositum, qua pleræque aliæ merces esculentæ, coemptæ vt reuenderentur, præuia mutatione reuenduntur, sicut faciunt secularium plerique, victum sibi ac familiæ, parantes ex tali negotiatione & nutritione Conuictorum ex certo pretio. Hoc ipsum etiam faciunt Caupones, & qui è meritoria taberna lucrum faciunt. Cibos enim ac vina vendunt hospitibus, & pro utensilium locatione accipiunt certum pretium. Discrimen duntaxat inter Caupones & eos, de quibus agimus Conuictorum Curatores interuenit, quod Caupones & tabernarij ferè suam hanc negotiationem exercent cum prætereuntibus, & dietim aduentantibus, moxque abscedentibus: quod hi de quibus agimus, faciunt ad longiorem moram. Nemo tamen non videt, discrimen illud penes longiorem & breuiorem moram esse merè materiale, nec inducere formalem negotiationis diuersitatem. Cùm igitur Cauponum & Tabernariorum negotium, Clement. De Vita & honest. Cleric. cap. 1. à sacris hominibus remoueatur, æquè ac munus carnificum, eo quod vtrumque sit Religiosis indecentissimum, considerandum est iis qui Religiosos homines hac negotiatione implicitos volunt, quò demittant sublimissimum statum suum; & an non hoc sit de sanctis egredi, (quod vetatur sacris hominibus Leuit. 21.) ne polluant Sanctuarium Dei, id est cor suum, vt

Cassia-

Cassianus exponit Collat. 14. capite decimo.

107. Sed præterquàm quod negotiatio de qua agimus Sanctorum vsui consentanea non est, vt hætenus euicimus, suppetunt graues rationes ob quas ea negotiatione abstinendum Religiosis videatur. In primis nimium quantum vulgantur res Ordinis Religiosi, quibus obscuritas & remotio ab oculis secularium magnam conciliat dignitatem; vulgatio autem despectionem inuehit ac depretiationem. Sane insignis moderator Religiosi Ordinis S. Bonauentura, ne accessum quidem ad interiora Religiosæ domus facilem esse secularibus voluit, quod ea ratione plurimum decedat de maiestate cœnobij apud nemiũ facile admissos. Quæ ipsa ratio erat, cur Ethnicici suorum delubrorum penetralia solis epoptis referarent, stuporem occultatione & abstrusione ædificantes, vt habet Tertullianus initio libri ad Valentinianos. Dixerit quispiam Domum in quam Conuictores admittuntur, non esse domum Religiosam, sed secularem, quandoquidem à maiori parte sit denominatio; ac proinde incommodum propositum, quod solas Religiosas domos spectat, huc non pertinere. Id si quis dicat, inde in primis impugnabitur, quod domus illæ potiantur immunitate Ecclesiastica, qua tamen alio titulo non gaudent, quàm quod domus Religiosæ censeantur. Deinde vt argumentum retorqueam, à potiori parte facienda est denominatio. Cum ergo qui præstant sint Religiosi, necesse est domum censerì Religiosam, præsertim cum non exiguus est in ea numerus Religiosorum moderatorum. Nam licet vt plurimum, multitudo moderatorum non excedat denarium, alicubi tamen numerantur viceni & triceni,

quem Religiosorum numerum, quis neget sufficere ad hoc ut domus quam inhabitant, Religiosa dicatur? Tametsi autem numerus Conuictorum est longè auctior, tamen neque domus, in qua tota, solus plerumque herus est nobilis, denominatur ignobilis à conditione famulorum & ancillarum ingenti numero herum stipantium. Igitur domus quam Religiosi aliquot stabiliter hærentes incolunt, est domus Religiosa; & talis est domus Conuictorum, etiamsi septis primariæ domus Religiosæ non contineatur, eive continens non sit, sed ab ea abiungatur. Ac proinde cum Conuictores seculares, & turba famulorum item secularium, ad intimos recessus domus illius admittatur, incurritur in propositum incommodum vulgatæ, & vilipendio expositæ Religiosæ domus per hanc negotiationem. Non debet hoc incommodum videri tenue aut leue, quod Primariis Religionum moderatoribus visum semper est magnum. Sicut è contrario S. Bernardus Epist. 78. inter insignia commoda reformationem cœnobij Sambyonitiani consecuta, de quibus suggestio Abbati gratulatur, numerat, quod seculares non essent deinceps admittendi in domus illius penetralia, & eius aditum ægrè essent exoraturi.

108. Qualiscunque porrò sit Conuictorum domus, ac vel si secularis & laica, ob conuictores numerosiores moderatoribus statuatur, idem semper incommodum consequitur. Nam vilitas & depreciatio, quam ex adolescentum secularium conuictu inferri Religioni contendimus, non consequitur aditionem intimæ domus materialiter sumptæ, siue parietum, & quocunque ædis recessuum, sed consequitur domum sumptam formaliter, hoc est habitan-

bitantes in ea, quibuscum familiariter cōuersari seculares necesse est, si sint cōtubernales; ita vt à conspiciendis ac lustrandis omnibus quę ad Religiosos attinēt prohiberi vix ac ne vix quidem possint, cū simul viuant, simul comedant, simul bibant; quod ipsum ad minuendam Religiosam dignitatem non parum facit. Admitto despuendam & esibilandam esse illam planē deliram secularium exerrationem, qui Religiosos vellent Angelorum more absque cibo & potu vitam exigere. Verus est ea de re S. Basilij querela in Const. Monast. c.7. sic expositantis aduersus eam insulsiatē. [Atque aliud etiam præterea animaduerto, quod iis solitum est non venire, qui communem ac vulgarem vitam sequuntur, quodocunque in pietatis cultorum vitam inquirent. Simul ac enim pietatis cultor cum animo suo secum statuerit, rectum esse, post longinquam esuriem esca corpus fulcite suum, ne ruat: veluti si omnino corporis ac materiæ expers esset, aut nullum prorsus, aut quā minimum cibum assumere illum volunt. Et si ex huiusmodi disciplina quempiam animaduernerint, qui non vsquequāque inclementer corpus tractet, ac vel tantillum illius necessitati subueniat, hunc conuitiis calumniisque proscindunt, deriuatāque ab vno in cunctos proteruia petulantiaque, vniuersos pariter lurcones quosdam, & helluones appellant: neque illud reputant, se cū bis & ex ipsis nonnulli ter etiam quotidie epulentur, crassissimis, pinguisque suffarcinati vescantur cibis, & infinitam carniū molem deuorent, ingentēque supra modum vini ingurgitent vim, mensis tamen nihilominus se ita inhiare, vt exemptis ē vinculis post diuturnam esuriem catulis assi-

miles videantur. Porro qui veræ pietatis sectatores sunt, ij quàm fieri potest, aridissimo vtuntur cibatu, & in quo præter imbecillitatem tenues admodum ad alendum vires sint: idque in totum diem semel, quibus modò perpetuæ disciplinæ ordinem seruare in animo est, & hunc ipsam quod modicè, & vt ratio iubet, assumunt, cum cibi eius sumendi tempus aduenit, fidenter nulla impediti religione, necessarium corpori auxilium tribuunt. Quo fit vt nequam conuenire iudicandum sit, libertatem nostram ab alia conscientia iudicari. Si enim nos cum gratia participamus, quid blasphemamur pro iis, de quibus gratias agimus? Cum exiguam admodum & vilissimi pretij ciborum portionem, tanta nos cum voluptate amplectamur, cum quanta ne ipsi quidem, splendidissimos & copiosissimos cuiusque modi ferculis instructissimos mensarum apparatus.]

109. Laborauit aliquando eadem fatua imaginatione Abbas Ioannes, cognomento *Paruus*, vt est apud Ruffinum l. 3. Vit. Pat. n. 56. & quod Religiosus esset, viuendum sibi & Religiosis aliis absque cibo & potu, non secus ac Angelis existimabat: quem denique fames potentiùs quàm frater natus maior errorem dedocuit, & cõditionis suæ admonuit, vt hoc rythmo bellè expressit Fulbertus Carnotensis.

*In vitis Patrum veterum, quiddam legi iucundum  
Exemplo tamen habile, quod vobis dico rythmicè:  
Ioannes Abba, paruulus statura, non virtutibus  
Ita maiori socio, qui cum erat in eremo,  
Volo, dicebat, viuere secure, sicut Angelus,  
Nec veste nec cibo frui, qui laboretur manibus:  
Respondit frater, Moneo, ne sis incæpti properus,  
Quod tibi postmodum sit non cæpisse satius;*

*At ille:*



*At ille : qui non dimicat, non cadit neque superat.*

*Et nudus eremum interiorem penetrat*

*Septem dies gramineo nix ubi durat pabulo*

*Oſtanâ fames imperat, ut ad ſodalem redeat:*

*Qui ferro clauſa ianua, tutus ſedet in cellula:*

*Cum Minor voce debili appellat, frater apcri:*

*Ioannes opis indigus notis aſſiſtit foribus*

*Ne ſpernat tua pietas, quem redigit neceſſitas.*

*Reſpondet ille deintus : Ioannes factus eſt Angelus,*

*Miratur cœli cardines, ultra non curat homines.*

*Foris Ioannes excubat, malâmque noctem tolerat,*

*Et præter voluntariam, hanc agit pœnitentiam.*

*Facto mane recipitur, ſatisque verbis vritur,*

*Sic intentus ad cruſtula, fert patienter omnia.*

*Reſocillatus, Domino grates agit ac ſocio:*

*Dehinc caſtellum brachiis tentat mouere languidis.*

*Caſtigatus anguſtiâ de leuitate nimia,*

*Cùm Angelus non potuit, vir bonus eſſe didicit.*

110. Hæc meritiffimè intorqueri in propoſitâ inſulſitatem, nemo non videt. Nihilominus diffiteri nõ licet, quin Religioſi ex eadẽ cum ſecularibus menſa, præſertim aſſidua & diuturna obſoleſcât apud rudes æſtimatores. Ut propterea S. Baſil. c. illo 6. Conſtit. Monaſt. ad communẽ cū Monachis menſam, non niſi probatæ pietatis ſeculares, & quidẽ perrarè admitti velit, ne ſcilicet ea in animali vita, & beatis quoque comuni, paſtus ſocietate, deteratur religioſæ vitæ dignitas, apud improuidos & parũ æquos æſtimatores. Hanc ob cauſam S. Martinus, nunquã ſe exorari paſſus eſt, ut Præſectò Galliarum prædium præberet in ſuo cœnobio, ut ſcribit Sulpit. Dial. 1. c. 17. Affine eſt quod in Conc. Aquisgran. in cauſa Benedic-tinorum cap. 25. (habetur in Appendice ad Capitularia,) ſtatuitur, [ ut Laicus, cauſa manducandi

& bibendi, in refectorium non ducatur.] Eadem ratio præter cæteras permouit S. Benedictum, vt c. 51. *alias* 58. sub excommunicationis interminatione vetaret, ne Monachus eadem die rediturus, quantumlibet à quocunque rogatus, cibum sumeret extra cœnobium, nisi fortè Abbas contrarium mandasset. Et quanquam sunt aliæ quoque illius interdicti causæ idoneæ, quas ibi profert Turrecremata Tract. 117. tamen hæc in qua versamur, S. Benedictum non latuit, nec à Cardinali interprete præterita est. Et æquè cadit in simile præceptum, quod extat apud S. Augustinum c. 3. Regulæ, & in Regula Tarnatensium c. 9.

111. Aliam Religiosæ domus detritiorem ex conuictu cum secularibus, annotauit S. Bonauentura q. 21. in Regulam S. Francisci; quam præstat proponere verbis S. Basilij in Constit. Monast. c. 7. vbi agit de paritate congressionis cum extraneis hominibus. [Si quidem (inquit) homini in eo, quod ex Deo est, vitæ genere versanti, multi parati esse insidiatore solent, atque ipsi aded coniunctissimi quique, in eum studiose quid agat, inquirunt. Quocirca danda omnino nobis opera est, vt non nisi magna adhibita diligentia, circumspectioneque in congressum extraneis hominibus veniamus.] Confirmat hoc, exemplo Christi, qui cum esset sanctus, innocens, impollutus, tamen non credebat semetipsum Iudæis, vt habetur Ioan. 12. hoc est perparce & magna cum attentione versabatur cum Iudæis familiariter. Tum subdit S. Basilius: [Sed qui hoc poterit impetrari vt si curiosis hominibus vitam nostram inspiciendam exposuerimus, non & prauas in nos calumnias conficemus, & ipsi nobismetipsis scandala

dala statuamus? Siquidem plerumque etiam quæ rectè fiunt, ea maleuoli in crimen vocare non dubitant, neque vel leuissimas quidem præterire offensionculas sinunt, quas non maledictis infectentur: quamobrem in admittendis extrariorum hominum congressionibus magna adhiberi à nobis cautio debet. Etenim præter ea quæ diximus, temeritatis vitio, aliud etiam peccatum incurrunt; cum scilicet cogitant eos, qui à communi cum cæteris viuendi ritu recesserunt, eo quod viuendi institutum mutarunt, non consilium mutasse, sed diuersam planè ab humana induisse naturam; neque de pietatis cultoribus iudicant tanquam de iis qui cum iisdem affectionibus versentur, eas tamen animi virtute, & à voluptatibus à se segregandis, rationis imperio subjiciant; sed illud existimant, naturales ex illorum corporibus omnes funditus affectus sublatos esse. Quò fit vt si vel transuersum vnguem spiritalis vir ab recto declinarit, confestim vniuersi, vel ij ipsi, qui vehementissimè ipsum antea laudibus efferebant, admirabanturque, eius accusatores existant acerbissimi; palàmque seipsum reprehendant, vt qui ne priores quidem illi laudes veras tribuerint. Vt enim cum in certamine pugil aliquis concidit, illico in eum aduersarius insurgit, ipsumque ferit, & humo magis etiam affligit: Ita hi quoque, simul atque aliquem de iis qui assidui in virtutis cultura sunt, paululum aliquid de virtutis curriculo deflexisse animaduernerint, extemplò in eum inuadunt, maledictisque & criminationibus, perinde vt iaculis petunt; neque secum reputant ipsi sexcentis se quotidie vitiosarum affectionum telis transigi: Cum pietatis propugnatores, quamuis similibus

ipsi quoque affectibus sint circumfessi, aut leuissimum inde, aut nullum plerumque incommodum accipiant; & quod magis eos mouere deberet, qui acriorem quàm illi aduersarium excipiant, quando hi apertissimè, ei se aduersarios professi sunt, & magnum quid adeptum se ille arbitratur, si de his victoriam reportet. ]

112. Non est quod S. Basilij orationem minutiùs concidam, vel subiecta non necessaria declaratione illustrandam suscipiam, cùm nihil contineat non perspicuum, & quotidiano experimento testatissimum. Festucas enim & atomos imperfectionum, quibus necesse est quandiu hîc viuimus, etiam religiosa corda sordescere, amplificari à secularibus intrabes, & iam olim questi sæpè sunt asceticæ vitæ Magistri, & nos ipsi conspicamur. Ruperti disputatio l. 1. In Reg. S. Bened. c. 14. huc perbellè cadit. Profert Rupertus eo loco, tentationem qua pulsantur iuuenes recens è seculo in Monasterium appulsi. Ait verò: [ Per nostram conuersationem, sæpè aliqui scandalisati sunt pusilli. Quinam pusilli? Nimirum inexperti, illi maximè qui nouiter de conuersatione seculari venientes ad professionem Monachicam, putare videntur de Monachis quod homines non sint, qui hoc potiùs scire deberent, quia nulla professio siue conuersatio magis, quàm ista, caminus ille est, de quo sapientia dicit, *Vasa figula probat fornax, & homines receptibiles caminus tentationis.* Item, *fili accedens ad seruitutem Dei, sta in Iustitia & timore, & prepara animam tuam ad tentationem.* Cùm ergo videriint vasa quælibet crepitasse in fornace huiusmodi; siue illud quod aurum putabatur, vel argentum, cecidisse in imaturam vel vitium plumbi,

plumbi, contententibus interdum Monachis, quis eorum maior sit; siue quod peius est, aliquo luda detecto inter illos fuere loculorū Domini. Cū inquam viderint eos vbicunque pro re leuissima rixari, alterūque aduersus alterum inflari, scandalisantur, tanquam crepitus omnis non testæ sed fornicis culpa sit, vel caminus de argento plumbum fecerit, & non potius quid fuisset, quod argentum putabatur, ostenderit; & volunt illic viuere, vbi soli sint boni, (quod nusquam est nisi in cælo; sicut reuera nusquam soli sunt mali, nisi in inferno.) Hoc si sentiunt qui pedem è mundo iam extulerunt, quid sentire in similibus adiunctis censendum est, illos qui etiamnum seculo adhærescunt? Itaque non potest apud seculares, (tamen si per improvidum eorum iudicium,) non vilescere Religio, cuius Alumni viuunt, & degunt assiduè cum secularibus.

113. Nec paruum etiam vulnus infertur Religio-  
sæ dignitati apud seculares, ex hac negotiatione ad-  
modum quæstiosa; vt ipsi quidem arbitrantur, ad-  
mercentes eam vsui quorundam secularium, qui fa-  
miliam vniuersam sustentant è quæstu, quem illis  
subministrat Conuictorum tantillus numerus. Ex  
longè ergo numerosiore Conuictorum multitudine,  
quæ Religiosis cum contubernales admittunt  
facile suppetit, imaginantur corradi aureos montes.  
Vnde præter inuidiam, existit depretiatio; quia si-  
cut pauperies in personis Deo dicatis gloriosa est,  
vt de Sacerdotibus dixit Concilium Aquilejense E-  
pistola ad Augustos apud S. Ambrosium; ita diuitiæ  
amplæ, etiam si tantum existimatæ, præsertim verò  
captatæ ex ratione agendi communi cum seculari-  
bus, effundunt contemtionem super Religiosos,

earum vel captatores, vel possessores, tametsi duntaxat existimatos. Avaritiæ acuendæ periculum in iis qui curant rem nummariam, dissimulatum in præsentia volo, ne agere sæuerius videar.

114. Est & aliud longè grauissimum incommodum, ex eo Religiosorum cum Adolescentibus secularibus conuictu, etiamsi nihil de Religiosorum dignitate inde decederet per cuiusquam improvidentiam. Certum quippe est, Religiosos iuniores qui iis muneribus solent addici, ex quotidiano cum secularibus conuictu, mores seculares faciliùs combibere, quàm seculares cum eis degentes, hauriant mores religiosos. Et quia pro munere Præfecturæ quam obeunt, excubare debent in mores adolescentum plerumque deprauatos, non rarò ex conspectu & auditu talium, refricatur in eis recordatio multorum, quæ satius fuerat dedidicisse, & contriuisse æterna obliuione. Affectus verò necdum rectè subacti, luculenter se exerunt ad momenta singula, & cùm potuissent desuetudine atteri, & exolescere, quotidiano vsu firmanentur & conualescunt: quod propè attrectatur manibus circa quosdam affectus, iræ præsertim ac superbiæ, quæ muneri Pædagogico (quale re vera istud est,) planè concarnatæ, & conuisceratæ semper fuerunt. Interim subducuntur oculis primarij superioris, cuius vigilantia atque prudentia conferre plurimùm potuisset continendis in omni Religioso officio, & promouendis ad pietatem hypodidascalis hisce tenerioribus; quos proinde mirum non est, lædi velut in flore botros, vt Iob dixit, iuxta S. Gregorij interpretationem 12. Moral. c. 25. Abjunctio item à conuictu seniorum, & plenæ Congregationis quàm multitudo piorum  
exem-

exemplorum semper affectatur ad omnem virtutem inflammans, facit ut de pristino calore remittant plurimum. Quo pertinet laxatio disciplinæ, in cellis, id est domunculis, in quibus V.G. senis habitarent Monachi, (pauciores enim senis ibi degere vetuit Additio 1. ad Capitularia Tit. 44.) Experientia inquam docuit, ex paucitate Cellitarum consecutam esse disciplinæ laxationem in Monachis, de qua expostulat Hugo de Follieto l. 2. De Claus. Animæ c. 2. aliasque in Synodo Abbatum cōacta Aquisgranini ad reformationem tit. 44. cautum legimus, ut cellæ illæ, & quorquot domus habere duodecim Monachos non poterant; defererentur, ne disciplinā Monastica in minore simul degentium Monachorum numero dissiparetur. Eam ob causam, S. Bernardus, episto. 25; huiusmodi cellas in quibus pauci simul debebant Monachi, nominat *Synagogas Satanae*, quia videbat in eis euertere disciplinam. Idem ergo in hac re valet, proportionē seruata. Imò eo fortius hic urget istud incommodum, quod non modò pauci simul, ferè iuniores, degunt Religiosi, sed etiam permixti cum adolescentibus secularibus. At in medio populi polluta labia habentis habitare, quàm sit damnosum, attingit Glossa Isaïæ 6. & ex variis Ioannes Nider l. 2. De Ref. Relig. c. 17. §. *Septima radix*. Nam ut cætera mala deessent, [ ipsum solum commercium alienæ inquietudinis, perturbatio est nostræ quietis. ] Verba sunt Saluiani l. 2. ad Eccles.

115. Hæc est alia optima ratio aduersus huiusmodi Religiosorum conuictum; obiter quidem tacta superius, nunc autem roboranda & illustranda ex sensu SS. Basilij & Anselmi insignium planè Religiosæ vitæ magistrorum. Basiliius ergo ad q. 6. fu-

farum, diuinè in hanc rem differit, his præter cætera. [Ad continendam in officio mentis agitationem, ne ad futes videlicet ac minimè necessarias cogitationes aberraret, illud adiuuat, si quis seorsum à cæteris communem vitam sectantibus viuat: quandoquidem promiscuè vitam agere, cum iis qui securi perfectam illam Domini præceptorum obseruationem contemnunt, perniciosum esse, etiam Salomon ipse docet. Sic enim est apud ipsum, *Noli amicus esse homini iracundo, neque habitaueris cum viro furioso, ne forte discas vias eius, & sumas laqueos animo tuo.* Et item illud: *Exite de medio illorum, & separamini*; nimirum eodem pertinet. Quocirca ad illud euitandum, ne oculis auribusve instigationes ad peccatum admittamus, ei que imprudentes assuescamus, neve earum rerum, quas vel viderimus vel audierimus, impressæ pestilentes capitalésque in animis nostris formæ, ac veluti notæ quædam insideant: contraque vt animum in officio suo attentum tenere possimus, principio quod ad habitationem attinet, separata ea à cæteris nobis quærenda est. Ita enim & superioris temporis consuetudinem poterimus euincere, in qua alienam à Christi præceptis vitam egerimus. (non mediocri autem hoc eget contentione, vt consuetudinem suam aliquis peruincat. Consuetudo enim vetustate firmata, naturæ vim solet hancisci,) & contractas ex superioribus peccatis labes, oratione assidua, & perpetua Dei decretorum obseruatione abstergere poterimus. Eam autem in nullo licebit euincere, si multa hinc inde habeamus, quibus temerè huc illucque animus noster distrahatur, & vitæ huius negotiis amplificetur.]



Sancti Anselmi de hac re iudicium repræsentatur c. 187. Similitud. vbi sic legitur: [Sicut Bubo, dum in cauerna cum pullis suis est, lætatur, & suo modo benè sibi est; dum verò inter coruos & corniculas, seu alias aues est, incuratur ac dilaniatur, & omnino sibi malè est, utpotè quem hic rostro percutit, ille aliis in eum irruit, alter verò vnguibus discindit; ita & mihi. Quando enim cum Monachis, meis scilicet filiis conuersari queo, mihi benè est, & grata hæc singularis vitæ meæ consolatio. Quando verò remotus ab illis inter seculares conuersor, hinc inde me variarum causarum incurtus dilacerant, & quæ non amo, secularia negotia vexant. Malè itaque mihi est, quando sic sum, ac tremens per timefco animæ meæ dispendium.]

116. Has aliasque ob causas, amantes Religiosæ accurationis moderatores, cum per circumstantias licuit, huiusmodi domos conuictorum studiosè aboleuerunt, hasque habere onus graue [lucrum verò quod putatur, maximum damnum ac noxam,] ut rectè in simili dixit Isid. Pelus. l. 5. Epist. 142. semper censuerunt. Nunquam sanè res in disceptationem adducta est, quin paucis demptis, apud quos Iucris bonus odor vndecunque, pars longè maxima prouidendum omni studio existimauerit, ut illud religiosæ vitæ impedimentum excuteretur. Et quod in quibusdam actis anni 1639. scriptum est, cum mota esset dubitatio, an domus quædam Conuictorum, præ penuria grauans non exonerans domum primariam cui adiungebatur, abjicienda esset, omnes vno excepto, censuisse, retinendam non abjiciendam videri, per licentiam poëticam scriptum est, cum strangulatione veritatis.

§.8. *Discussa sigillatim causa Pharmacopolarum  
Religiosorum negotiantium.*

**H**Oc est aliud exemplum tertiæ negotiationis; cuius per Religiosos exercitæ decentiam & honestatem excutimus. Adductum pro ea est §.2. ratione 6. Exemplum Apollonij, qui dictus est *ex negotiatoribus*. Contra eam verò, sunt qui decretum quoddam Pontificium nuper editum allegent. Sed quod id decretum, trans Alpes hæserit, nec nobis de eo constet, aliter in hanc negotiationem agendum erit, seposito nouo illo iure nobis inexplorato.

¶ 117. Sanè si alij non essent hoc tempore Religiosi pharmacopolæ, quàm fuerit olim ille Apollonius, non esset ambigendum de honestate, imò sanctitate huius negotij: habentque in eo homine, Religiosi Pharmacopolæ, luculentum exemplum Christianæ perfectionis, quod piè æmulentur, & imitatione exprimant. Fateor Apollonium non fuisse Monachum. Quippè qui bonorum suorum dominium liberum retinebat, vt patet ex coemptione pharmacorum, & aliorum ad releuandos ægros conuenientium, de suo facta. At cum libero rerum suarum dominio, ne summum quidem Christi Vicarium posse Religiosum statum conciliare, dixit Innoc. 3. c. *Cum ad monasterium* De statu Monacho. Dictus ergo est Apollonius seculo renunciasse, quia non sollicitus de augendo censu domestico, omnia quæ habebat, effundebat in sanctos vsus. Statuo itaque eum veluti exemplar Pharmacopolarum religiosorum, quia pharmacorum & dulciariorum emptionem, aut ex coempta materia confectionem, non referebat

referebat ad lucrum; (nam gratis suppeditabat omnia,) nec apparabat aliis quàm Religiosis vtriusque sexus, quos supra ter mille in loco deserto, & ab omnium Pharmacopolarum subsidiis procul posito, tolerare varias corporis ægritudines, nec raro in vitæ discrimen venire necesse fuisset, nisi ipse ex charitate accurrisset opitulatoꝝ, quod omni commendatione dignum fuit. Possunt quidem Religiosi ægri cum laude respuere vsum pharmacorum, vt factum esse à priscis Monachis scribit S. Chrysostomus homil. 14. in 1. ad Timoth. seruatumque esse in quodam Monialium cœnobio, habetur in Actis S. Enphraxiæ c. 6. Idem narrat de S. Fulgentio vitæ Autor c. 30. & de S. Macrinâ sorore sua, Gregorius Nissenus orat. de ea, cum de sancto eius cadauere. Approbant eam praxim S. Macarius homil. 48. Diadoch. l. De Perfect. spirit. cap. 53. S. Bernardus Epist. 321. S. Ephrem. To. 1. tract. De fide, vbi Vossius multa accumulât. Hoc quamuis nunc absque alio examine placeat admittere, tamen certum est, Religiosos ægros, si necessitas ferat, posse laudabiliter vti pharmacis, vt optimè disputat S. Basilii ad q. vltimam fusiùs explicatarum. Vnde qui ea ægris Religiosis suppeditant, præsertim gratis, & ex mera charitate, vt faciebat Apollonius, omni commendatione sunt digni.

118. Pharmacopolarum negotiatorum sub religiosa veste, quorum causam excutimus, alia ferè est ratio. Ferè dico, quia quatenus domesticis subsidio sunt, probandus est eorum labor, præsertim si magna cum charitate obeatur, & cum omni diligentia. Sic enim agi vult cum Religiosis ægrotis creditus August. serm. 1. ad fratres in Eremito. Idemque

fert quod S. Basilius Reg. 160. breu. vult eis ministrari sicut Domino. Quod ex illis Christi verbis Matth. 25. *Infirmus eram &c.* Confirmat S. Benedictus Reg. c. 36. aliàs 45. inde inferens, ante omnia & super omnia, habendam esse infirmorum Monachorum curam. Ad eum locum Turrecremata tract. 29. pulchrè prosequitur, cur ante omnia subueniendum sit infirmis, & rationem præcipuè petit, ex multo maiore miseria ægrorum, quàm valentium, cum aliquo incommodo conflantium. Ad hæc Religiosi infirmi; minore facultate pollent ad opitulandum sibi, ob abdicatam cū omnibus facultatibus, sui ipsorum potestatem. Omnium sanctorum Fundatorum summa semper fuit sollicitudo hæc in parte, tum ad Charitatis exercitationem, & debitum paternæ prouidentię explendum, tum ad præcludendam paupertatis cladem, per proprietatem, quæ hoc maximè ex fonte solet profluere, vt Cassianus notauit l. 7. c. 7. Insignia in hanc rem de S. Ignatio scribit Ribad. l. 5. cap. 8. Itaque infirmitas non modò est ægro officina virtutis, vt dixit S. Ambrosius in Psalm. 36. sed etiam iis qui subsidio, & opera adsunt ægrotantibus, cuiusmodi præsertim sunt Pharmacopolæ; qui si Charitatem, quantam per institutum licet, erga omnes debent expromere, maximè tamen erga domesticos fidei. Huncque fuisse primum scopum eorum qui Pharmacopolas Religiosos intulerunt in cœnobia, est extra dubium: Nam sic Religiosi ægri, facilius, & citra magnas impensas, habent ad manum vnde in ea necessitate subleuentur; præsertim si Pharmacopola Religiosus magna Charitate in tam sanctum, tamque laudabile subleuandorum seruorum Dei opus feratur, quod

quod Apollonium fecisse vidimus. Quoad ista igitur, par esse potest ratio Apollonij, & eorum de quibus nunc est sermo.

119. Quatenus tamen Religiosi Pharmacopolæ, præter primum illum scopum, ex quo cœnobii illati sunt, effunduntur ad alia, eatenus dicebam, aliam esse eorum quàm Apollonij rationem. Nam & ad externos transferunt operam, & quibuscunque possunt eam impendunt, unde ingens vis Pharmacorum est eis necessaria; quorum confectio & apparatus animum in varia distrahit, non sine spiritalis profectus, & sacrarum exercitationum interturbatione atque dispendio; nominatim, quia ut materia suppetat ad copiam illam pharmacorum, adeunt emporia, etiam admodum remota, v.g. ad leucas quinquaginta, cum expensis non modicis, quæ auctiore pharmacorum pretio sunt postea refundendæ. Per illas autem discursationes multa incurri, cum in via, tum in hospitiiis, à quibus tutius fuisset procul fieri, admonuit Gregorius Nyllenus, improbens Religiosorum peregrinationes Epist. De Peregrinat. Hierosol. Hoc incommodum non urgebat Apollonium, qui secularis erat, nec nisi Religiosis dabat operam; & quidem in desertis locis, ubi deerat ab aliis Pharmacopolis subsidium. E contrariò, hodierni Pharmacopolæ Religiosi, in populosis urbibus, quæ seplasiis & pharmacopolis abundant, & in quibus suppetunt operarij ad ægrorum quemcunque nutum paratissimi negotiationem hanc suam obeunt. Extra omnem quoque necessitatem, non viros modò, sed etiam fœminas curandas suscipiunt, à quibus multa sexui illi secundùm consuetudinem euenientia, inquirere coguntur, nisi inu-

aliter, vel etiam cum damno ægrarum, ponere operam velint; quæ inquirere Religiosum dedecet, nec fœminæ absque rubore, Religioso homini aperiant. Contrectatio verò fœmineorum corporum necessaria medicinam facientibus, siue ad explorandum pulsus, siue ad pertentandam vlcis non satis maturi qualitatem, siue ad incidendam venam; (nam & hoc quoque passim moliantur, hi supra pharmaceuticam, veriùs quam pharmatiam, Chirurgiæ ferè periti; quàm consentaneè ad canones Ecclesiasticos, incisione inter medicandum interdicientes Religiosis, nunc non moror:). Omnis inquam huiusmodi contrectatio fœmineorum corporum per Religiosos, quàm sit illecebrosa & periculi plena, norunt qui inde flammam in subiecto fomite concepisse dicuntur. Continuo in volutabrum fœtidissimum lapsantem calavum, & malo pressâ quàm expressâ, quæ utinam contigerint nunquam. Multò minùs fas erit Pharmacopolæ, de suo capite pleraque ægris mulieribus præscribenti, oculos auertere à facie mulieris, quod tamen Scriptura faciendum monet, extra necessitatem, in quam iste se inducit, tantum quia placet. Quin potiùs ad pronunciandum de interno corporis habitu, satiandus erit oculus visu; cuius tactum S. Basilus l. De S. Virginit. *ferè initio*, pronubum esse tactus manuum scitè dixit. Graviissimè item ab eo muliebris corporis contuitu, auocat Isid. Pelus. l. 2. epist. 278 & 284.

120. Hæc qui vel perfunctoriè perspexerit, ridebit nobiscum prouidentiam vnius alicuius de gente Marsorum atque Phillorum, qui venenata omnia impunè tractant. Is audita proborum & puritatis instituti sitientissimorum expostulatione, de hac

hac Religiosi Pharmacopolæ ad externos (etiam fœminas,) effusione; edixit, vt domesticus Pharmacopola, nullis deinceps externis subsidio esset, aut pharmaca venderet, nisi Monialibus, etiamsi Parthenones intra urbem essent, multique suppeterent idonei Pharmacopolæ seculares, qui eis medicari possent, & maximè vellent. Risimus planè hanc providentiam, quæ omnibus antedictis, posteaque proferendis incommodis æquè scatet; & cum Monialibus quas extra gravem necessitatem necessarium maximè fuerat vitare, commerciorum potestatem facit. Sanè præstantissimi rei asceticæ Magistri, nullarum magis fœminarum alloquia Religioso deuitanda esse docuerunt, quàm Monialium. Videsis præter ceteros S. Macarium Epist. ad Monachos, S. Basilium in Constit. Monast. c. 4. Nilum in Opere de octo vitiosis cogitationibus cap. De fornicatione, & rursus cap. De Superbia in fine opusculi, Isaacum Presbyterum l. De mundi contemptu c. 46. Bern. f. 68. De modo benè viuendi. S. Bonauenturam De Instit. Nouitior. p. 1. c. 39. & Cautipratanum l. 2. Apum. c. 30. n. 46. Cæterùm Apollonius Monialibus ægris medicinam faciens, non tegit Pharmacopolas Religiosos, de quibus egimus, quia & secularis erat, (vt dixi,) non Monachus; & ibi ægris Monialibus aderat, vt deerant qui possent illis medicinam facere, cum essent in secessu remotissimo, & longè à quouis alio medicantium subsidio.

121. Iam Apollonij, gratis pharmaca & operam suppeditantis, charitas non quærens quæ sua sunt, hîc non comparet. Nam quamuis aliquantò minoris Pharmacopolæ de quibus agimus, interdum vendant, quàm faciant Pharmacopolæ seculares, ven-



dunt tamen. Sæpè item, aut etiam quoties possunt, factis monstrant, se non astringi ea S. Benedicti Regula, quæ vilius vendendorum artefactorum pretium, quàm à secularibus statueretur, indicit; Sæpè inquam isti, notati sunt cariùs vendere. Estque id non infirmum indicium inualeſcentis avaritiæ; præter illud aliud, quod domesticis, quia gratuita est pharmacorum erogatio, & operæ exhibitio, lentiùs plerumque ac morosiùs nauatur opera, quàm secularibus aut externis, quibus in manu est quod refundant. Hoc est bibulæ falsuginis præcordia Pharmacopolæ occupantis, apertum signum. Neque hoc dico, Pharmacopolam religiosum satagere de infarcienda sibi crumena, cum clade voti paupertatis. Quamvis enim paupertatem in tuto esse velim; tamen per huiusmodi occasionem, datur Religioso occasio induendi sese in avaritiæ pedicas, dum studet apparere multum utilis cœnobio, indeque ad strenuè laborandum & multa vendenda se vrget. Incidit item ea ratione in abruptum superbiæ, & inanis gloriæ, quæ inde facillimè exurgit, cum certo periculo Religiosi operarij. Vt propterea S. Benedictus c. 57. Regulæ, aliàs 64. fratres artifices, si ob utilitatem quam Monasterio aduehant, turgere vento inanis gloriæ, auocari voluerit ab opere: pluris faciens fratris salutem seruata humilitate, quàm commodum temporale, ex eius opere accedens Monasterio. Longè ergo à S. Benedicti spiritu, & religiosa providentia absunt, qui ob lucellum, fratri improuido, vel superbiæ vel avaritiæ occasiones subministrant, vel aliunde ingestas non remouent. Non video sanè, quid indignius magisve præposterum possit accidere, quàm Religioso homini, in

Reli-



Religione quæ auulsionem à seculo proficitur, sup-  
 peditari auaritiæ incentiua, vel superbiæ stimulos,  
 quibus ad supergrediendum Religionis vallum,  
 (elegans comparatio est Gulielmi Parisiensis l. De  
 Moribus c. 9.) sublicas extendant, & pontem ster-  
 nant. De dissipatione spiritus, & negotiosæ mentis  
 Pharmacopolæ, diuulsione in multa, frustra dice-  
 rem, cum omnis negotiatio hoc habeat, & facilli-  
 mum perspectu sit, sollicitudinem illam conquiren-  
 di tam varia, è quibus conficiuntur diuersissima  
 pharmaca, complendæ & instruendæ seplasiæ neces-  
 saria, ipsum deinde confectionis omnino multipli-  
 cis laborem; & in distrahendis confectis Pharma-  
 cis curam; non cohærere cum ea indiuisi spiritus v-  
 nitate, quæ Religiosum decet, nec cum aptare ad ex-  
 peditè agendum cum Deo, quod est *vnam* illud, ex  
 Christi præculo necessarium.

122. Virget ferè in hanc rem hæc argumenta S.  
 Bernar. Epist. 67. agens de quodam Monacho, qui à  
 Flauiacensibus recesserat. Nam rogatus cur recessis-  
 set, [ Abbas, (inquit,) meus habebat me non Mo-  
 nachum, sed Medicum. Cogebat seruire, imò ipse  
 seruiebat per me, non Deo sed seculo; quando ne se-  
 cularium maleuolentiam incurreret Principum, me-  
 deri me compellabat; etiam Tyrannis, raptoribus,  
 excommunicatis. quod animæ meæ periculum, cum  
 ei nunc priuatim, nunc palam suggessissem, nec pro-  
 fecissem; quorundam tandem sapientium vitorum  
 consilio fretus, fugio meam damnationem, non con-  
 gregationem; perditionem, non Religionem. Con-  
 sultue salutem quærenti, aperite pulsanti. ] Addit S.  
 Bernardus. Cuius nos videntes constantiam, audien-  
 tes causam, & nullam contra eum calumniam, an-

nuimus introitum, probauimus susceptum, astringimus probatum, tenemus professum, ] Rursus idem S. Bernardus Epistol. 68. [ Negatis deinde quod de vobis audieramus, vestro scilicet iussu vel assensu fratrem quandiu fuit apud vos, in medicinali arte, secularibus deseruisse, ipsumque qui hoc dixit, falsitatis arguitis. Si mentitus sit, nescimus, ipse viderit. Sed hæc scimus, quia siue per se, vt vos fateamini, siue per vos, vt ipse testatur, hæc fecerit, in magno interim periculo fuit. Quis verò tam inhumanus qui sic periclitanti non succurreret si posset, non consuleret si nosset? ] En quid censeat S. Bernardus de Religiosis medicinæ operam dantibus; & agit præcisè de ipsa Negotiatione medica: quamuis alia postea subdat spectantia finem extrinsecum, ex quo Monachus ille, operatus dicebatur à Flauiacensibus.

123. Suppetit aliud in hanc rem argumentum, quod ita proponam, vt de eius vi pronunciare nolim, sed dimissam velim considerationi aduersariorum. Argumentari ergo præterea licet, ex scandalo Pharmacopolarum secularium, qui hunc introitum in labores suos, ferunt ægerrimè, & aliquando mota apud Iudices lite, indemnitati suæ prospexere pro viribus. Mirantes verò interdum, nec sine stomacho audire contigit, quorsum intactis tot aliis negotiationibus quæ non minùs sunt Religiosis ad manum, hæc vna apud eos ferè ferueat, conficiendorum & diuendendorum Pharmacorum. Non enim pannos aut telas conficiunt ad negotiandum, tametli sunt apud eos qui textrinae pollent incumbere. Habent fabros ferrarios, habent lignarios; nec tamen ferri fabricfacti propolas agunt, aut cir-

cæ ar-

ca arcas vel menſas , aliãvẽ ligneam ſupellectilem negotiantur. Num Pharmacopœa delecta eſt præ cæteris , tanquã multæ mortificationis ob amarulentiam phar macorum , & chyſmatum oliditatem? Num quia magè neceſſaria? An quia quæſtuofiſſima?

Ad hoc argumentum, video à quæſtuofis & negotioſis occurrendum , dicendo ; id eſſe ſcandalum acceptum atque paſſium , proindèque minimè curandum, iuxta doctrinam D. Thomæ 2.2. q. 43. art. 7. Nam Religioſus Pharmacopola vel cœnobium vtitur iure ſuo , quod Pharmacopolæ ſeculares præter ius tentant præcludere. Vnde tametſi docendi ſunt, quàm nulla eorum iniuria Religioſus Pharmacopola rationibus cœnobij conſulens, negotietur: tamen cùm primùm obſirmanſur in voluntate intercludendi iura cœnobij , indèque ſcandalum patiuntur quod eis non abſiſtatur , ſcandalum eſt Pharifæicum, & ex malitia prodiens, idcôque negligendum, exemplo Chriſti, qui ſcandalum Pharifæorum nihili faciendum pronunciauit.

Audio ego quidem quod dicitur. Sed peruelim ſcire num ij quos Apoſtolus Rom. 14. refert carnes communes comediſſe, nullo diuino præcepto vetante, atque adedò ſuppõtente comedendi idoneo iure, docti ſint ab Apoſtolo dedocere puſillos ſiue infirmos , qui ſcandalum inde patiebantur : iisquẽ patientem aurem doctrinæ non commodantibus , vel præ ingenij hebetudine non ſatis peruadentibus quæ audiebant de iure comedendi omnes cibos, quippe per Chriſtum emundatos & ſanctificatos, monuerit illos , negligere ſcandalum à puſillis iniuria & ſine fundamento acceptum. Non ita

sanè. Quin potius eo loco Apostolus, potenti oratione vrget Christianum à Gentilismo conuersum, vt compatiens infirmitati fratris ex Hebraismo conuersi, cui ea comestio communium carniū scandalo erat, abstineat carnibus, si velit secundùm charitatem ambulare; hoc est nisi velit charitatem exscindere. Sensit ergo Apostolus, carnem communem pro vice cuius competente, manducare, esse contra charitatem; cum occasione illius manducationis perdendus est frater, pro quo Christus mortuus est. Vnde vltèrius consequi docuit blasphemationem libertatis Christianæ, eam certorum ciborum contra legales ceremonias abstinentiam negligentis: cùm tamen æquum non esset, propter rem tantulam, quæ ad regni cœlorum adeptionem non refert, (cibationem inquam ex carnibus communibus,) abjicere fratris salutem, & sollicitudinem boni nominis Christianæ Ecclesiæ, ac declinationem offensionis per pusillos inde conceptæ. Concludit Apostolus. Itaque quæ pacis sunt, sectemur, & quæ ædificationis sunt, inuicem custodiamus. *Noli propter escam destruere opus Dei. Omnia quidem sunt munda, sed malum est homini, qui per offendiculum manducat*; hoc est qui cibo optimo & nullatenus prohibito vescitur cum offensione proximi imbecillis, & profligatione boni nominis Christiani.

124. Hoc Apostoli argumentum, videtur æquè vrgeri in re nostra. Nam quamuis velimus suppere Pharmacopolæ Religioso, ius omni Ecclesiastico & naturali interdicto solutum, negotiandi circa pharmaca extra domesticos: tamen negare non licet, quin Pharmacopolæ seculares, æquè idonei sint.

fuit ad penetrandum ius Religioſi Pharmacopolæ,  
 quàm eſſent imbecilles illi ex Hebraiſmo Neophi-  
 ti, ad penetrandum ius Neophitorum è Gentiliſ-  
 mo, comedentium carnes communes. Vt enim illos  
 obſcæcabat amor molitorum vſuum, & affectus in  
 legem Moyſi, cui à pueris aſſueuerant; Ita externos  
 Pharmacopolas, exoculat ſui & familiæ amor, cui  
 vident ea Pharmacopolæ. Religioſi negotiatione  
 ſubduci lucrum, & ſperatos laborum fructus inter-  
 cipi. Iuuatque eorum obſcæcationem, legum Eccle-  
 ſiaſticarum Religioſis negotiatione indicentium,  
 ( ſi ita placet, ) non ſatis perſpecta ratio. Item inde  
 illis incrāſſantur corda, quod Religioſi aliis plerif-  
 que opificiis ad alios negotiatores pertinentibus  
 abſtinent, in quæ æquè inuolare poſſent, ac in iſtud  
 medicamentorum conficiendorum, ac diuenden-  
 dorum. Tandem illud quoque oculos eorum offun-  
 dit, quod videant paucos admodum Religioſos huic  
 mercimonio dare operam. Cæterorum namque tam  
 multorum abſtinentiam, interpretantur iudicium  
 de culpa aut indecentia talis negotiationis per Re-  
 ligioſos obitæ. Itaque in paucos illos quos vident  
 huic ſuo mercimonio addictos, uſurpant illa Sene-  
 cæ l.3. De Benef.c.17. [ Indixiſtis pecuniæ odium,  
 hoc profeſſi eſtis, hanc perſonam induiſtis; Agenda  
 eſt. Iniquiſſimum enim eſt, vos pecuniam ſub glo-  
 ria egeſtatis acquirere. ] Hæc ſunt quæ externis  
 Pharmacopolis, ſpiritu infirmis ac puſillis, offen-  
 ſioni ſunt & ſcandalo; quæ an videri debeant mi-  
 noris momenti, quàm ea ob quæ Apoſtolus aduer-  
 ſus ſcandalum imbecillibus ex Hebraiſmo Neophi-  
 tis propter carnes datum, tantoperè concitatur, no-  
 lum certò definire. Videntur tamen non diſparia aut

inæqualia. Et vix proferetur euentus, aptius respondens ei pro quo declinando tantoperè laborauit Apostolus, & æquè ex charitate declinandus: Quod si ita est, concluditur manifestè & validè, Pharmacopolæ Religiosi negotiationem, esse contra proximi charitatem, & eo nomine esse auersandam. Nam id Apostolus, de carnum comestione ad auertendum infirmī fratris offendiculum, planè concludit. Adhibuit hanc argumentationem contra negotiationes Cisterciensium, Iustus Abbas serm. ad Abbates de sui Ordinis Cisterciensis colapsione, cum per alia, tum nominatim per negotiationes, quarum disertè meminit, semel, iterum, ac tertio.

125. Ea item proportionē admissa, vrgebit argumentum alterum de laceratione Religiosi nominis per hos quæstus, & spiritui dispendiosa compendia, cui bono nomini super omnia fuerat consulendum. Eius tamen neglectus, non est contra Charitatem, cuius violationem hactenus pressimus, sed est contra Iustitiam; quia impetit famam Religiosi Ordinis; cuius iuri non potest renunciari à Religioso, vel etiam à toto cœnobio, aut à toto ordine, quia ius illud non est vnius particularis aut Religiosi, aut cœnobij, aut Ordinis, sed nequitur cum iure omnium aliarum Religionum. Sicut ius quod per adulterium alterutrius coniugum violatur, eiusmodi est, vt nequeat ei renunciari à coniuge læso v. g. à viro, quantumuis vellet vxori lenocinari: quia complicatur cum iure omnium maritorum, quorum status, & ius in eo statu fundatum, violatur inabdicabiliter per adulterium. Porro ius illud aliorum Religiosorum Ordinum, nexum cum iure  
parti-

particularis Religiosi, vel Ordinis cui adscribitur,  
 violari per negotiationem Pharmacopolæ Religio-  
 si; inde videtur monstrari, quod murmurantes, ferè  
 extendere solent lacerationem famæ, de qua agi-  
 mus, ad vniuersum corpus Religiosorum Ordinum.  
 Sicut S. Augustinus coric. 2. in Psal. 20. *ad v. 14.* no-  
 tat, hostes Christianorum, cùm ex eis quempiam  
 lapsum vidissent, solitos linguarum tela vibrare non  
 in vnum illum lapsum, vel in homines professio-  
 nis, cui addictus erat inter Christianos, sed in vni-  
 uersum planè Christianum nomen: [ Quanta mala  
 (inquit,) dicunt in malos Christianos, quæ male-  
 dicta perueniunt ad omnes Christianos? Numquid  
 enim dicit, qui maledicit, aut qui reprehendit Chri-  
 stianos, *Ecce quid faciunt non boni Christiani*; Sed, *Ec-  
 ce que faciunt Christiani*; non separat, non discernit. ]  
 Similiter S. Chrysostomus hom. 7. in Genes. *ferè ini-  
 tio.* [ Nihil ita offendit & nocet Religioni nostræ,  
 vt scandali ansam præbere infidelibus. Nam quan-  
 do vident aliquos è nostris virtute conspicuos huius  
 vitæ negotia & curas è sublimi contemnere; multos  
 ex ipsis malè habet, plerique admirantur, & obstu-  
 pescunt, quòd cùm eiusdem naturæ nobiscum sint,  
 non concedantur ipsis eadem. Denique quando vi-  
 dent paruum aliquod delictum nostrorum, statim  
 linguam exacuunt simul contra nos omnes, & ex  
 vnius delicto, totam Christianorum gentem iudi-  
 cant. Neque hoc contenti sunt, sed statim aduersus  
 caput suum loquentes, ob seruorum delicta, etiam  
 communem Dominum blasphemare audent, & pu-  
 rant velamenta errorum suorum, esse aliorum desi-  
 diam. ] Non dissimiliter hom. 3. ad pop. & hom. 3. in  
 1. Corinth. in *Morali*, ac pulchrè Nyssenus orat. 3.

in Orat. Domin. ad petitionem primam. Eadem ex causa Sanctus Gregorius homil. 17. in Euangel. Clericum malè se gerentem admonitum voluit, ex eius vitio ipsam Religionis Christianæ æstimationem grauari, quod meritò ducit longè grauissimum.

126. Adhibuit quoque in rem præsentem hoc argumentum Iustus Abbas serm. de Collapsione Ordinis sui Cisterciensis ad Abbates, cum per alia, tum nominatim per negotiationes, quas tertium discretè carpit in suis Monachis. Sic igitur habet sub sermonis initium. [ Quamuis gloria nostra hæc sit, testimonium conscientiæ nostræ, tamen lucere debet hominibus lux nostra, ut ipsi videant opera nostra bona, & glorificent Patrem suum qui in cœlis est: ipsa verò opera nostra, tam mera, & sine fuce vanitatis esse debent, ut etiam is qui ex aduerso est, obmutescat, nihil habens mali dicere de nobis. Conuersatio nostra, quantum ad conscientiam, ita ponenda est in cœlis, ut etiam in terris quantum ad opera obmutescere faciamus impiorum hominum ignorantiam. Nam propter ipsas exteriores nostras actiones, quas vident & boni & mali, aliis sumus odor vitæ in vitam, aliis odor mortis in mortem. ] Rursus ad sermonis finem. [ Prouideamus famæ nostræ propter nimiam libertatem nostram, iam valdè periclitanti. Caueamus ne nomen I. ei per nos blasphemetur inter gentes. Diuitias aggregare, dignitates ambire, negotiationes exercere, urbana fora frequentare, sine præuaricatione nostri ordinis non possumus. ] Et mox. [ Ponamus de bona conscientia nihil minui per talia & talia, quod tamen impossibile est. Quid de fama dicemus? Nōne causa  
folius



folius famæ, illa omnia aut omittere, aut intermittere debemus, ut noster ordo per nos non blasphemetur inter gentes? Nam toti mundo patemur nos, apud Christianos, Iudæos, Ethnicos, Agarenos, nominati sumus. Quid igitur decet nos facere ut scandalum tollamus, ut de bona fama bonum præbeamus exemplum? Habemus exemplum de Paulo Apostolo, & de ipso Domino Iesu Christo; non faciendum aliquando, quod non licet fieri, & faciendum aliquando, quod non licet fieri, & hoc totum propter scandalum vitandum. Paulus habebat potestatem sororem mulierem circumducendi, quemadmodum alij Apostoli, & fratres Domini, & Cephas; sed noluit, ne quem scandalizaret. Habebat potestatem, ut Euangelium annuncians de Euangelio viueret: sed noluit, ne quem grauaret. Dominus autem interrogauit *Petrum dicens: Simon, Reges terre à quibus accipiunt tributum, à filiis suis, an ab alienis? Respondit Petrus, ab alienis. Dixit ei Iesus, Ergo liberi sunt filij; Ut autem non scandalizemus eos, vade ad mare, & eum piscem, qui primus ascenderit, tolle, & aperto ore eius, inuenies stateram, illum sumens, da eis pro me & te.* Sed his auctoritatibus, exemplis, rationibus facile resistunt, qui ex leui occasione largiores vias appetunt. Quapropter moneo & rogo fratres charissimi, ut mundum quem reliquimus, sub prætextu quarumlibet vtilitatum non resumamus. Non possumus dissimulare, quia nihil operum quod non reuelatur, & iuxta vulgare prouerbium; *si est qui faciat, est & qui dicat. Aures saltem habet, planities oculos.* Itaque arctum & gloriosum iter, quod singulari præ cæteris voto, & habitu ingressi sumus, singulari præ cæteris studio teneamus,

non redeuntes retrò, nec declinantes ad dexteram vel ad sinistram.]

127. Hæc duo argumenta in scandalo proximi fundata, etiamſi Metaphyſicè loquendo poſſent infirmari, tamen non poſſunt aut debent leuia videri iis Religioſis, qui ex ſui inſtituti peculiari ratione, ad nihil frequentiùs & fortiùs impelluntur à Sanctis fundatoribus, quàm vt ædificationi ſeruiant & cum proximorum ædificatione omnia præſtent. Illa quippe ædificatio, non tantùm ſita eſt in executione ſanctorum operum, ſed etiam in remotione offendiculorum, in quæ alieni non incurrant ex mera malitia, quæ nulla tergiverſatione celari poſſit, cuiuſmodi non videtur eſſe cauſa ex qua Pharmacopolæ ſeculares impingunt in re de qua agimus, præſertim ſi admittatio quæ ex eîs ſuperiùs referebatur, cur ſcilicet delecta potiùs ſit à Religioſis ad negotiandum Pharmacopœa, cauſam habeat quæ præter cæteras prætexebatur, copioſiorem videlicet quæſtus materiam: Tunc enim locus eſſet illis gemitibus Nili Abbatis in Aſcetico, cùm præmiſiſſet gemitum non negotioſum, veterum ſui inſtituti Religioſorum. [ Ad eiufmodi cupiditates erant velut mortui, atque omni ſenſu carentes, adeò vt ne in ſomnis quidem eas viderent. Cùm enim ab initio memoriâ eorum abieciſſent, ex quotidiana exercitatione propoſitique conſtantia, talem animi habitum ſibi comparauerunt. Lucernæ profeſſo erant in tenebris fulgentes, & ſtellæ minime errantes quæ vitæ ſplendore noctem illuſtrabant, ac veluti portus quidam tuti, qui perſugium facile omnibus à cupiditatum tempeſtatibus oſtendebant. Verùm accurata ac cœleſtis illa viuendi ratio, non aliter quàm

imago

imago præ describentium negligentia, paulatim in dies deterior effecta ad summam dissimilitudinem peruenit, & omnino defecit ab exemplari. Etenim qui mundo erant crucifixi, quiq; huic vitæ renunciauerant, atque homines esse desierant, & denictis cupiditatibus ad cœlestium illarum mentium naturam aspirare contendebant, rursus ad terrena negotia reuersi, turpibus occupationibus, rectè viuentium diligentiam inquinant; & qui virtute celebres esse poterant, propria segnitie infames euaserunt; & qui aratri stiuæ manum admonerant, habitum grauem seruantes, propterea quod retrò conuersi sunt, & studiose complexi quæ obliuisci debuerant, apti regno Dei non extiterunt. Neque enim ampliùs apud nos frugalitas ac vitæ simplicitas colitur, neque silentium & quies quæ utilis est, vt ab antiquis inquinamentis abstrahamur, sed negotiorum multitudo quæ sollicitudinem à recto viuendi proposito alienam affert, in pretio est, & honoris rerumque terrenarum cupiditati, salutaria cesserunt instituta. Cùm enim omni ratione nos Dominus à terrena sollicitudine dehortetur, iubeatq; vt solum cœlorum regnum inquiramus, nos quasi dedita opera per contrariam viam incedentes, Domini præcepta negleximus, & reiecta illa cura, spem in manibus nostris collocamus. Nam cùm ipse dicat, *Respicite volatilia cœli, quæ non serunt, neque metunt, neque congregant in horrea, & Pater vester cœlestis pascit illa; Et rursus, respicite lilia campi quæ non laborant, neque nent;* Præterea cùm iubeat, vt neque sacculum, neque peram sumamus, sed solo iubentis minimè mendacis promisso confidamus, quod Discipulis fecit, cùm eos ad benè me-

rendum de reliquis hominibus mitteret, *dignus est* (inquiens) *operarius cibo suo*, quod quidem ad ea quæ necessaria sunt, subministranda firmitus est omni nostra sollicitudine; Nos autem nobis minimè temperauimus, quominus, quàm maxima potuimus, agrorum spatia possideremus, ouiumque greges, & boues aratores, tum pulchritudine tum magnitudine insignes, & pingues asinos coëmeremus: ut agri quidem nobis abundè fruges sufficerent, boues autem tum agriculturæ labores sustinerent, tum cibum nobis ac pabulum sibi ipsis ac reliquis animalibus subministrarent; iumenta verò, ut quæ regioni nostræ aliena conuherent, & victui non solum necessaria, verùm etiam iucunda comportarent. Quid quod, ex artibus eas delegimus quæ lucri plus allaturæ; quæque cùm omne temporis spatium in se consumerent, ad cogitandum de Deo, otij nihil omnino relinquerent? ] Hæc pij quique Religiosi, transfigurantes in se B.Nili sensum & affectum, de inductis in Religiosum statum terrenis negotiis ac mercimoniis ex artefactis lucrosioribus, gementes iterarint, consideratis secularium querelis, & concepto per eos scandalo, de quo ibi non silet B.Nilus.

128. Vtut verò habeant hæ binæ & aliæ anteriores rationes, Deus iusto iudicio comprobare visus est, quàm non gratum haberet, domum suam fieri domum negotiationis. Vnus quidam qui primus lucri esca illectus, conuiuentibus iis quorum erat prohibere, in religiosum cœtum has negotiationes Pharmaceuticas induxit; per hos quæstus & ægiarum visitationes, ac tactus pulsuum, prolusit ad alia; & comprobatum in eo est quod à Petro Damiani

Damiani Opusculo 12. c. 23. De Religiosis negotiantibus dicitur, dum ex Propheta exhibet, quo tandem deducantur abjiciente Deo. Locus est longiusculus, sed prolixitatis damnum pensabit utilitas. [Menti reprobatae (inquit,) negotiisque secularibus inhianti, sub Babylonis specie per Prophetam dicitur: *Descende, sede in pulvere Virgo filia Babylonis, sede in terra; non est solum filia Chaldaeorum.* Hoc enim loco humana mens, *virgo*, non corrupta, ut arbitror, dicitur, sed infœcunda. Et quia *Babylon* confusio interpretatur, rectè infœcunda mens, Babylonis filia vocatur, quæ in eo quod nequaquam bona opera germinat; dum nullo ordine rectæ vitæ componitur, quasi confusione matre generatur. Sin autem virgo non infœcunda dicitur, sed incorrupta, post quàm statum salutis perdidit, ad confusionis suæ cumulum appellatur quod fuit: Cui aptè per increpationem dicitur diuina voce: *Descende;* in alto quippè animus stat, quando supernis retributionibus inhiat. Sed ab hoc statu descendit cum turpiter victus, sese defluentibus mundi desideriis subjicit. Cui benè mox additur. *Sede in pulvere.* Descendens enim in pulvere residet, quia cœlestia deferens, terrenis cogitationibus aspersus in infimis vilescit. Vbi adhuc ingeminando subiungitur; *sede in terra;* ac si apertè exprobrans dicat: quia cœlesti conuersatione noluisti te tegere, sub temetipso prostratus in terrenis actibus humiliare. Vnde & necessariò protinùs additur, *Non est solum filia Chaldaeorum.* Chaldæi namque feroces interpretantur. Valdè autem feroces sunt, quia voluntates proprias sequentes, nec suis parcere moribus sciunt. Ferocia sunt terrena desideria, quæ non solum con-

tra præcepta Conditoris , sed sæpè etiam contra percussionum verbera , duram atque insensibilem mentem reddunt. Sed filia ferocium , solum non habet , quia mens quæ ad amorem mundi ex prauis desideriis nascitur , atque eisdem desideriis obdurator , in eo quòd se terrenis concupiscentiis subjicit , sedem iudicij amittit , nullique apud se solio præsidet , quia examine discrepationis caret ; quasi à iudicij sui sessione repellitur , quia per exterioris desiderij concupiscentiam vagatur. Liquet enim quod mens , quæ intus consilij sedem perdiderit , foras se per desideria innumerabiliter spargit , & quia agere intellecta dissimulat , cæcatur etiam , vt nesciat quid agat. Et sæpè iusto Dei Iudicio , in sua voluntate relinquitur , & sub ea quæ anxie appetit laboriosa mundi ministeria relaxatur. Vnde & aptè illic subditur : *Quia ultra non vocaberis mollis & tenera , tolle molam , & mole farinam.* Constat nimirum , quod terrenæ suæ filia parentes parcut , nec duris atque seruilibus hanc operibus affligunt. Omnipotens ergo Deus , teneram filiam vocat , quando dilectam vniuscuiusque animam à laboriosis huius mundi seruitiis auocat , ne dum exterioribus actibus afficitur ab internis desideriis induretur. Sed Chaldaeorum filia mollis & tenera non vocatur , quia mens prauis desideriis dedita , in eo quem anxie appetit huius seculi labore relinquitur , vt foris mundo velut ancilla seruiat , quæ intus Deum , vt filia nequaquam amat. Vnde & molam tollere , & farinam molere iubetur. Mola in gyro ducitur , & farina profertur. Vnaquæque autem mundi huius actio mola est , quæ dum multas curas congerit , humanas mentes quasi per gyrum vertit , atque ex se quasi

farinas

farinas projicit, quia seducto cordi semper minutissimas cogitationes gignit.

129. Habet itaque hic locum illud à S. Gregorio 7. Moral. c. 17. in hanc rem expositum: *Considerate semitas Theman, itinera Saba, & expectate paulisper.* Negotiatores Theman, apud Baruch, negotiatores verò Saba, apud Isaiam c. 45. & alibi celebrantur. Itaque considerandi sunt negotiatores illi, de quibus agimus, & expectandum paulisper, donec in re se induant, ut S. Gregorius admonet, perque terrenas sollicitudines, quibus improvidè se implicent, Dei à se memoriam expellant; ita ut non tantùm sub Religiosa veste sint aliquandiu seculares, sed denique excusso iugo reuertantur ad propria; quod illi contigit quem primùm in quadam Religiosa domo huius generis institorem fuisse referebam, [ Ignavus nimis est, qui post exemplum invenitur incautus. ] Sapiens monitum est Petri Chrysologi serm. 79.

*§. 9. Sigillatim De Monialium quæstibus, ac multiplici negotiatione.*

**D**Vplex Monialium negotiatio tacta est §. 2. *in fine.* Una quæ exercetur interuentu operis manuum, cui incumbunt: Altera quæ perficitur in admissione seu ingressu in Cœnobium. Prior communis est cum plerisque secularibus fœminis, quæ item certo pretio diuendunt varia opificia sua, & ex eis negotiantur. Posterior diuersimodè initur, Nam præter numerationem dotis, sine qua vix vsquam puellis patent Monasteria, præmissa vel ante ingressum, vel ante professionem, (quod eodem recidit,) pactione de certa summa, quæ quod doti connubiali

respondeat, & cum ea affinitatem habeat, *dos* appellatur; præter hanc inquam ferè ubiuis adhibitam pactiōem, variis locis adiungitur pactio de facto quopiam corollario pro sacrario, puta de candelabris argenteis tanti pretij; quale corollarium in profanis venditionibus, vltra mercis pretium, concedi ex pacto solet, *strenarum*, nomine. Nec rarò adiungitur etiam pactio de annua pensitatione, pro totius negotiationis coronide, exhibenda ad vitam Monialis.

130. Prioris ordinis exempla quædam, ad mediam negotiationem in qua versamur, alia ad locationem operæ pertinent. Mediæ quippè negotiationis actus est, ex materia in eum finem coempta, per artificiosam transmutationem conficere inuolucra agnorum cereorum quæ deinde diuendantur, non ratione ceræ consecratæ inibi inuolutæ, sed ratione artificij & materiæ attextæ. Et in hoc negotiationis genere quandiu in artefactis ad Dei cultum immediatè spectantibus sistitur, nihil per se loquendo occurrit, quod reprehensioni meritò pateat. v.g. Nihil apparet incommodi, si Moniales corporalia, aut vestes lineas, quatum vsus est ad sacrum ministerium, coempta ad id necessaria materia, conficiant, & conuenienti pretio distrahant. Et idem erit si opere plumario aut phrygio, ad altarium ornatum, vel sacrificij ministerium conficiant & vendant aliqua. Item si peristromata ad Ecclesiam sternendam sacris effigiebus (yti assolet,) variegata, aliterve concinnata, ad templi decorem contexant atque diuendant. In his enim ac similibus conficiendis, vitatur otium, & cùm referantur ad cultum diuinum, non auerunt operantium animum



num extra orbitam, sed quasi figunt in Deo, cum cuius cultu nectuntur hæc opera. Eorum item venditio, nulli rationabili oblocutioni patet, cum valdè deceat quæ ad Dei cultum pertinent à personis diuino cultui mancipatis confici atque diuendi, ne grauentur expensis, & irremunerata operæ collo- catione, nisi refunderetur pretium. Hæc igitur ra- ta sunt.

III. At quoad similem negotiationem è profanis mercibus Monialium opera transmutatis, idem di- cendum est, quod de simili Religiosorum negotia- tione cum S. Basilio supra est constitutum: ( Esse enim militiam sacram à negotiis secularibus scin- ctam, Monialibus & Monachis communem, rectè statuit idem S. Basilius in Prologo Asceticorum: ) Nempe quod aliquæ tales negotiationes, citra in- decentiam, & iustam externorum offensionem, sal- uaque spiritus indiuisione, exerceri à Monialibus possint, aliæ non item. Cum ergo negotiatio talis est, vt neque iure communi, neque speciali & insti- tuti proprio vetetur, estque etiam talis, vt absque vicinia ad peccati periculum obiri queat, nec ani- mus per eam magna cura & sollicitudine rerum ex- ternarum implicetur; nihil vetat, talem negotia- tionem à Monialibus suscipi. Cum verò aliquid prædictorum negotiationem contaminat, abhorre- bit ea negotiatio, vt à Religiosis ita & à Moniali- bus; imò ab istis multò magis, quia ob molliem sexus, & maiorem iudicij imbecillitatem, multò magis præcidendæ eis sunt occasiones & causæ dis- sipationis spiritus, & auulsionis à Deo. Qua in re locum habere debet prudens arbitrium, & directio prouidi Antistitis, & cautio immediati Præpositi;

quorum præcipuè erit pensare, quid communis proborum ac rectè sentientium æstimatio ferat circa negotij decentiam vel indecentiam. Magna item ratio habenda erit ædificationis, cui Religiosi vtriusque sexus seruire per omnia debent, vt sint Christi bonus odor in omni loco, præcludaturque nominis Domini blasphematio & laceratio Religiosi status per seculares.

132. In eodem priore ordine negotiationum per Moniales susceptarum, aiebam esse aliqua exempla, quæ non ad negotiationem, ( sicut ea de quibus egimus, ) sed ad operæ locationem pertineant. Et eiusmodi planè est quod §. 2. Ratione 7. adducebatur de consutis per Moniales linteaminibus multiplicis formæ. Quæ in re cùm Moniales non suppedient materiam, & sectio quoque artificiosa materiæ, ab eo fiat aut curetur qui materiam subministrat, clarum est ex parte Monialium nihil interuenire, nisi nudam operæ locationem ad consuendum. Quoties ergo locatio operæ, neque Ecclesiasticis communibus neque peculiaribus instituti legibus vetabitur, aberitque à periculo peccandi vel dissipandi spiritum, innoxia erit, etiamsi capteretur ex ea lucellum conueniens. Sic enim & otium cuitari, & consuli cœnobij rationibus poterit. Illicita verò & indecora erit Monialibus operæ locatio, si labes aliqua interueniat ex prædictis capitibus, vel eorum quopiam. Sanè pleraque Concilia interdixere Religiosis locatione prædiorum, & nominatim Lateran. sub Alexandro 3. parte 27. c. 1. & 3. & vt loquuntur *firmiter*, siue *redemptionibus*. extra grauem necessitatem, vt notant Molina Tract. 2. de iust. Disp. 342. concl. 5. & Reginaldus l. 25. n. 325. tantum quia

quia huiusmodi locationes non benè cohærent cum indiuisione spiritus Religiosis congruente. Igitur omnis similis locatio operæ, æquè debet vetari Religiosis, & multò magis Monialibus, quarum præcipuè est Deo seruire in otio sancto; & vnitati spiritus maximè ac super omnia consulere. Hæc generatim.

133. An verò in particulari illo exemplo locationis operæ ad confectionem linteorum vsualium per Moniales, feruetur an violetur decorum, viderint quorum interest. Duo tamen adiuncta ex iis quæ §. 2. ratione. 7. referebantur, hanc operæ locationem adducunt in discrimen. Primum est, quod per eam nimio labore suffocetur spiritus, in quibusdam industriæ ac diligentia laudem captantibus ex celeri executione pensæ concrediti. Hæc verò est mediis finem subiungere, & leuiora principalioribus anteferre. Esseque à Satana eam indefessam sollicitudinem expediendi quàm citissimè externi operis, præclare docet Cassianus Collat. 9. c. 6. subiecto cœlesti in eam rem viso. Idem l. 7. c. 10. ex phylargiriæ morbo hunc affectum deriuat. Nec deest superbiæ ignitabulum, vt ratione illa septima notabatur. Vndecunque verò proficiscatur irrequieta illa & iusto auctior operositas, suffocatrix diuini in nobis spiritus, S. Benedictus c. 39. *alias* 55. Regulæ, eam damnablem pronunciat, annuitque S. Franciscus in Regula c. 5. Adiunctum alterum eiusdem locationis operæ, (tamen si fortassis vni illi loco de quo agebatur peculiare) æquè vel etiam iustiùs reprehensioni patens, erat multarum puellarum ac sceminarum quibus aliunde ad paranda victui necessaria non suppetit oportunitas, coniectio in necessitatem moria-

lem faciendi corpore quæstum. Ea enim subductis  
 vnici medijs ad sibi prouidendum, quamuis non sit  
 contra Iustitiam, seclusa tamen non leui cœnobij  
 necessitate, videtur esse contra charitatem proximo  
 debitam, vt argument abamur §.superiore. Vnde  
 etiam aptandum est huc argumentum peti-  
 tum ex obligatione præstandi indemnem famam Religiosi  
 nominis, cui apud seculares per huiusmodi locatio-  
 nem operæ cum secularium puellarum tanto dis-  
 pendio magna plaga infertur ad omnium Religio-  
 num corpora ferè peruadens, vt ex eodem loco est  
 recolendum. Nec licet opponere, quod Moniales  
 velint vitare otium. Quàm multæ enim aliæ viæ  
 suppetunt declinandi otium, etiam per aliquod ex-  
 ternum opificium, pertinens ad diuinum cultum, ea  
 intacta, quam talia adiuncta grauent, & merito in-  
 uidiæ atque odio obijciunt?

134. Claudat hunc locum Origenes hom. 2 in  
 Num. tractans illud *homo secundum ordinem suum  
 incedat*: quod cum in eos intorqueat ex Episcopo-  
 rum & Sacerdotum ac Diaconorum ordine, qui non  
 iuxta gradum & ordinem suum incedentes, faciunt  
 [ blasphemare homines; & dicere, *Ecce qualis Epi-  
 scopus, aut, qualis Presbyter, aut qualis Diaconus*: ].  
 Subdit; [ Quid autem & de Virginibus dicam, aut  
 de continentibus, vel omnibus qui in professione  
 Religionis videntur? Nonne si quid inuerecundum  
 aut petulans, si quid proteruum, ( *adde aut quomo-  
 dolibet à suis instructis extraneum* ) gesserint; arguit  
 eos continuò Moyse & dicit, *homo secundum ordi-  
 nem suum incedat*? Agnoscat igitur vnusquisque or-  
 dinem suum, & quid dignum sit eo ordine quem  
 suscepit, intelligat, & ita libret actus suos, ita  
 etiam

etiam sermonem, incessum quoque ipsam, & habitum moderetur, ut cum ordinis sui professione conveniat, ne audiat dici ad se à Deo, quia propter vos nomen meum blasphematur inter gentes. ]

135. Venio ad negotiationem ex admissione Monialium. Contra hanc negotiationem fuerunt qui seuerius pronunciarent. Nam Dionysius Richelius altero librorum de simonia latissimè contendit, & multorum appositis adscriptionibus firmat, vniuersam hanc negotiationem, esse puram putam simoniam. Et cum pactum interuenit, consentit Archidiao. 1. q. 2. *in principio*. Et Vgolinus Tabula 1. De Simon. c. 4. §. 1. n. 16. Et videtur ita haberi ex 1. Extraua. De Simon. vbi Urbanus 4. pactiorem de hac Monialium dote percellit excommunicatione tanquam Simoniacam. Testes quidem auriti apud S. Antoninum 3. p. tit. 24. c. 67. referunt Martinum V. exemisse Moniales tali censura: Idemque de aliis quibusdam Pontificibus refert Nauar. in Summa c. 27. n. 106. Tamen satis superque malignitatis superest, si manet fundamentum censuræ, nempe simonia quæ est peccatum lethalissimum, quod huic pacti subesse pronunciauit Urbanus. Et idem visum esse S. Edmundo, postea Antistiti Cantuariensi, referunt eius Acta, quibus narratur, virum Sanctum cum pro collocandis in Monasterio duabus sororibus suis satageret, nunquam adduci potuisse, ut vel obolum ea ex causa numeraret, quod simoniæ virulentiam in ea pecuniæ annumeratione, & pacti de ea agnosceret. Idem adscribitur S. Hieronymo in Regula Monacharum c. 5. vbi sic habetur. [Detestabilem simoniæ hæresim, quam communi prauitate Diaboli, Moniales assuetæ committunt, etiam

in auditu horreat vestra Societas. Giezi pœna, & Simonis vos terreat prauitas. Vox Petri Christi Vicarij ad Simonem, nunquam de vestris exeat auribus, *Pecunia tua tecum sit in perditionem. Existimasti enim donum Dei haberi pecunia?* Donum Dei est Spiritus Sanctus. Communis mercatorum habet vsus, vt venditio commutetur in melius. Afferit quippe Simoniacus, pecuniam esse præstantiorem dono Dei, cum id in ipsam commutat. Ad vos venientes sorores, ad sanctas Christi suscipite nuptias gratis: præponatur sanctitas pecuniæ, exquiratur bonitas vitæ, non generositas carnis, non utilitas mundi. Nulla omnino pæctio, nulla opinio mentis puritatem perturbet, aut præueniat. Beatum sapientia clamat, qui excutit manum ab omni munere, & qui post aurum non abiit, nec sperat in pecunia, quos subuertit iudicium.]

136. Non videtur prætermittenda narratio quæ eodem Tomo 9. Hieronymi refertur, sub mediūm prolixissimę Epistolæ Cyrillo Hierosolymitano adscriptæ de miraculis S. Hieronymi. Tametsi enim eius Epistolæ titulus Cyrillum scriptorem cmentitur, aliaque habet suffixione digna, vt videre est apud Bellarminum l. De scriptor. in Hieronymo, & apud Baronium 30. Septembris, ac Louanienses in censura Tomi 2. Dni Augustini. Tamen quoad rem de qua agimus, nulla vnquam suspicione laborauit; & quicquid sit, sensum saltem Autoris habebimus, in re de qua agimus. Sic igitur eo loco Autor Epistolæ, agens de Monasterio Ducentarum Dominarum apud superiorem Thebardem. [Multis pollens prædictum Monasterium virtutibus, vnum pessimum quod ruit Simonix vitium retinebat. Nam insti-

instigante Diabolo in eisdem Dominabus hæc ob-  
 seruabatur abusio, vt si quam vellent in Monialem  
 recipere, non tantum intuitu charitatis & miseri-  
 cordiæ, recipiendæque Monialis bonitate, quan-  
 tum recipiebant respectu pecuniæ. Nulla enim Mo-  
 nasterium intrare mansura poterat, nisi certa pecu-  
 niæ quantitas secum iret. In hoc siquidem erat Mo-  
 nasterio sanctimonialis quædam Domina, ætate  
 grandæua, quæ ab infantia sua ieiuniis & orationi-  
 bus, omni terreno resoluta cœno, Deo vixerat, quæ  
 vitium illud quamplurimum abhorrebat. Cui nocte  
 quadam, vt erat solita, in oratione positæ, gloriosus  
 Hieronymus apparens, locum illum immenso illu-  
 strans lumine, eidem præcepit, vt ad Abbatißam,  
 cæterasque cœnobij Moniales manè pergeret, nun-  
 tians quod nisi à peccato iam inueterato manum  
 extraherent, ultionem subito expectarent. His di-  
 ctis disparuit. Perterrita visione insueta Sanctimo-  
 nialis Domina, quis hic fuërit, iubens talia nun-  
 tiari, in seipsa auidè pertractans, totam illam no-  
 ctem peregit insomnem. Crepusculo diei aduenien-  
 te, omnes in capitulo Moniales pulsato tintinna-  
 bulo congregauit, quibus admirantibus ad quæ fo-  
 rent tanta festinatione in capitulo conuocatæ, san-  
 ctimonialis Domina ex earum assurgens medio, quæ  
 viderat & audierat, omnibus patefecit. Fit illico ex  
 hoc Monialibus cunctis irrisio: hanc exclamant  
 fatuam, multisque garriunt derisionibus, hanc for-  
 tē illa nimia ebrietate somniasse. Illa verò accepta  
 contumelia, patientiæ se scuto muniens, de earum  
 pertinacia nimium, sed de sua despectione gaudens,  
 ad solitas rediit orationes, supplicans continuo, ne  
 suis Monialibus quod audierat eueniret. Transactis

igitur diebus decem, nocte media prædictæ sanctimoniali Dominæ hac de re deuotis orationibus incumbenti, gloriosus iterum apparuit Hieronymus, eidem vt quæ prius nuntiauerat Monialibus, denuò intrepidè nuntiaret, allocutione mandauit benigna. Ad quem illa. Quis, ( inquit, ) es Domine talia mihi mandans? Hieronymus ( inquit ) sum. Et ab eisdem euauit oculis. Illa verò sciens illarum durtiem, quid ageret, quidve diceret, nesciebat. Tamen malens à Monialibus insana & ebria reputari, quàm diuinis contraire præceptis, congregatis iterum Monialibus, quæ viderat & audierat, voluit intimare. Ast vt eam assurgere Moniales pestiferæ conspexerunt, diuini nesciæ iudicij sibi de proximo futuri, antequàm verba inciperet, è capitulo cum magnis cachinnationibus exierunt. Quin transactis insuper diebus tribus dormienti prædictæ sanctimoniali Dominæ, gloriosus Hieronymus ineffabili quadam societate vallatus Angelorum, nocte apparens media, eam excitauit, eique iussit protinus, vt de illo exiret Monasterio, nec subitò futuram sententiam expectaret. Cùm illa verò multis lachrymis supplicaret ne hoc fieret; gloriosus ( inquit Hieronymus; ) ad Abbâtissam & cæteras pergito, omni mora postposita, eisdem nuntians, quod nisi pœniteant, hac nocte diuinam sentient ultionem. Si autem in sua permanebunt durtia, statim exiens, amplius in Monasterio ne moreris. His finitis abscessit. Hæc igitur sanctimonialis anxia, plenâque tristitiis, Capitulum adiit, & campanam cœpit vehementer, vt ad capitulum accederent Moniales, resonare. Quo Abbâtissa de somno cuiuslibet, cognoscensque ab hac fuisse campanam pullatam, cum iracundis



cundia properauit. At ubi illam vidit, diris eam minis increpans, nullum voluit audire verbum, promittens quod nisi cessaret hoc agere, secum amplius in Monasterio non maneret. Cui sanctimonialis Domina, ne tardes quæso agere quæ promittis. Profectò me noscas hoc in loco amplius non mansuram. Gloriosus equidem Hieronymus apparens mihi tantummodo, de hoc statim monasterio futurum iudicium patefecit. Hæc audiens Abbatissa deridere cœpit, hanc existimans vesano capite ista fari. Et Ostiariam conuocans iussit, ut hanc de Monasterio protinus effugaret, mandans eidem, ut aliqua hora sic extra dimissam, postmodum faceret introire, ut sic ab incœptis operibus iam cessaret. Hæc de re læta sanctimonialis Domina, quàm citiùs potuit è Monasterio est egressa, lachrymis transfusa doloribusque repleta, pro his quæ Monasterio nouerat euenire. Terribilis siquidem Deus fortis ac potens, & quis resisteret ei? heu cur homines eum non formidant, scientes se nullatenus posse ab eius effugere manibus, ut eius eos magnum & inenarrabile iudicium non comprehendat? Saltem his miseri terreamur exemplis. Audiant qui in suis confidunt diuitiis, quique in iram excitant excelsum Dominum suæ auaritiæ siccitate, quale huic Monasterio à Deo propter pecunias faciem auertenti, de cœlo est iudicium iaculatum. Penè limen ostij, sanctimonialis excesserat Domina, & subitò totum corruit Monasterium, omnes opprimens Moniales, ita ut ex eis viua aliqua non remanserit. Sanctimonialis verò illa, in quodam venerabili Dominarum Monasterio, quod est apud inferiorem Thebaidem, hætenus sanctitate præcipua, viua manet.

En ultionem diuinam, quæ conuincit interuenisse graue peccatum in proposita pactione & numeratione pecuniæ. Quid autem nisi Simonia? Nec sanè aliter perageretur negotiatio, si apertè & clarè esset Simoniacæ, quàm nunc peragatur, quantumcumque pallietur, & tituli colorati obtendantur, quibus honesta, & labis experts appareat. Præcedit enim pactio de pecunia in ea quantitate annumeranda, quæ posset esse iustum pretium; subsequiturque numeratio pecuniæ; & tandem perficitur admissio Monialis sub ea conditione. Quid verò aliud interueniret, si admitteretur liquida & patens simonia? Nec minùs primogeniti Satanæ, veteris Simonis mangoniam redolet corollarium, & superpondium pretij, nomine præmij ac strenarum obductum: cum re vera sit pretij complementum: quod in simili, hoc est in propinis, damnatum videtur vt simoniacum cap. *audiuimus* de Simon.

137. Resolutio huius difficultatis, bipartita est adhibenda. Ac primùm non est dubium, quin si animus vel recipientium, vel promittentium aliquid pro admissione Monialis, collimet in dotem ( vt vocant, ) tanquam in pretium admissioni veluti merci æquiualeas, germanissima simonia talem negotiationem contaminet. Nam solus ille animus, etiamsi verba aliud præferrent, satis esset ad mentalem simoniam contrahendam. Nec est inueneri simile, impingi hac in parte aliquàdo, etiam hoc tempore, quo videmus passim per abusionem non ferendam, de beneficiis Ecclesiasticis iniri conuentiones & pactiones, non secus ac fieret de officio seculari venali, aut de prato, aut vinea. Quinetiam quamuis subtilitate & industria Theologiæ accommodatitiæ, non desint

sint viæ quibus idipsum absque simonia per ambas perferri posset, tamen non pauci fastidientes anfractus & tortuosas vias, rectà in simoniæ barathrum volentes ruunt, euentes constituto pretio, beneficia Ecclesiastica Christi sanguine perfusa, atque adeò quouis humano pretio superiora. Quidam ergo similiter inueniri etiamnum possunt qui talia cogitent, præsertim ex parte parentum puellæ inter Moniales cooptandæ? De illis intelligo quos Hieronymus Epistola 8. *miseros parentes; & non plenæ fidei Christianos* nominat, quibus sunt deformes filiæ & aliquo membro debiles, quas quia dignos generos non inueniunt, aut ad leuandam familiam, virginitati tradunt, pacti de paruo sumptu, & qui vix ad alimenta sit satis. His quod secundum conuenta exhibent Monasterio, perinde est, siue pretium dicatur, siue quomodocunque aliter nominatur. Iplis certè, æstimatione pretium est: ac proinde indubiè simonia inquinatur. Vtinam præterea ex parte accipientium, semper pura & nitentia sint omnia.

138. Posse nihilominus lucrum de quo agimus accedere cœnobio absque simonia, etiamsi pactio de eo intercedat, nimirum si cœnobium verè sit egenum, & quod datur non sit pretium, sed conferratur ad puellæ sustentationem, recepta & vera doctrina est, quam tradit D. Thomas 2.2. q.100. art.3. ad 4. Et ibi Caietanus, ac in summa V. *Simonia* & V. *Excommunicatio* c.73. S. Bonau. in Reg. S. Francisci q.18. Angelus V. *Simonia* 4. Syluester eodem q.15. Tabienna à n.63. Nauarrus q.1. De Redd. Eccles. monit vltima n.2. Soto l.9. De Iustit. q.7.art.1. Roder. 4. 2. De Regul. q.49. art.1. Suares l. De Simon.

e. 17. à n. 6. & 4. 5. 3. p. d. 22. f. 5. Philiarcus 2. p. de offic. Sacerd. l. 6. c. 7. Reginal. l. 23. n. 193. Estque nunc communissima sententia generali usu firmata, quam à Clemente 7. innoxiam & labis puram esse declaratam, refertur in compendio Priuileg. Mend. V. *Moniales*. §. ultimo. Ratio est, quia neque iure positiuo ea pecuniæ receptio in admissione puellæ ad Monasterium & simoniaca, quasi Ecclesia intuitu Religionis interdixerit ea receptione: Nulla quippe talis prohibitio lata reperitur, vt Suares c. illo 17. à n. 13. latè prosequitur; vel si aliquando est lata, exoleuit per contrariam consuetudinem silentibus aut annuentibus Pontificibus inductam. Neque etiam ea receptio simoniaca est iure naturali. Aliud siquidem est, in ingressu Monasterij dare aliquid tanquam pretium, quod sine dubio sorderet simonia: aliud verò conferre per eam occasionem aliquid in eleemosynam, vel ad testandam beneuolentiam erga puellam, vel titulo sustentationis. Sicut Sacerdos cui ob sacri celebrationem numeratur stipendium, non accipit illud in pretium sacri, quâ ratione immanem simoniam admitteret: sed accipit titulo sustentationis, vt viuat de altari qui altari deseruit, quod dignum & iustum est. Item maritus qui ducendo vxorem accipit dotem, non accipit dotem in pretium sacramenti matrimonij quod cum ea muliere init; sed accipit ad ferenda matrimonij onera, & ad sustentationem vxoris & familiæ quam conuehit. Idem igitur cernitur in re præsentî. Nec pactum quod superadditur, vitiat receptionem nullo iure vetitam: quia vt benè ratiocinatur Caietanus. 2. 2. q. 100. art. 3. cum pactio illa præcisè cadat in rem, vt est subsidium necessariæ sustentationis, non cadit in ma-

in materiam simoniæ. Vnde ergo hauriret labem simoniæ? Nec malè pactum illud in ingressu ad probationem, vel saltem ante professionem initur, quia alioqui parentes & cognati, puella iam exonerati, eam facillimè obliuiscerentur. Nam vt obseruat Philiarcus supra §. *est autem*, seculares, ex quo puellas cœnobio intruserunt, vix solent de eis iuuandis esse solliciti, nisi si agatur de confusione aut seditione excitanda in Monasterio, cum ob procacitatem aut irreligiositatem sunt castigandæ; vel si earum ambitus sit confirmandus. Itaque negotiatio hodierna Monasteriorum in Monialium admissione, liberatur graui illa accusatione, quæ ei initio impingebatur à Cartuliano, & aliis allegatis.

139. Quin etiam contra D. Bonauenturam in Apologetico pro Regula S. Francisci q. 18. ea negotiatio pronuncianda est pura labis simoniacæ, qua interdum puellæ ob cœnobij paupertatem recipiuntur ob dotem. Hoc D. Bonauentura damnat simoniæ. Distinguit enim quadruplicem modum quo persona cooptari potest in Religiosum cœtum. Primum valdè sanctum, quo persona nihil prorsus afferens, admittitur pro Deo. Secundum bonū, quo persona admittitur cum pecunia, sed non pro ea, quia æquè reciperetur. Tertium item bonum, quo persona ob domus egestatem non reciperetur sine pecunia, sed tamen non recipitur pro pecunia: quia si eius sustentatio aliunde domui suppeteret, æquè reciperetur. Quartum quem ait esse simoniacum, & à plerisque egenis Monasteriis contrahi dicit, iuxta illud Siracidæ cap. 27. *propter inopiam multi deliquerunt*; quo persona recipitur pro pecunia, quia absque ea non reciperetur vlllo modo, etiamsi aliunde sup-

peterent cœnobio necessaria ad puellæ sustentationem. Hanc S. Bonaventura, ait esse apertam venditionem consortij spiritualis societatis pro pecunia, quod est simoniacum. [ Et hoc plerique (ait S. Doctor) faciunt etiam ex mera inopia, optantes aliquem venire cum pecunia, quem reciperent ut eorum inopia repareretur, vel debita contracta solverentur, vel bona concupita emerentur, vel ædificia construerentur. ] Idem censuit Innocentius 8. in quodam responso dato Monialibus S. Claræ, quod refert Rodericus Tomo 2. qq. Regula q. 49. art. 1. Sed fuit responsum eius, ut Doctoris priuati. Nam si ei standum esset, mirum quantum simonia, non per Parthenones modò, sed etiam per virorum cœnobia grassaretur hoc tempore. Quotidianum quippe est, ut personæ alioqui inidoneæ, & quæ nullo modo admitterentur si venirent absque pecunia, admittantur tamen, si pinguem aliquam summam deferant. In quo tamen potest aliter peccari, nihil tamen necesse est cerni simoniam, si ea summa nec detur, nec petatur ut pretium, sed tantum interueniat ut motiuum superandi difficultates ex admissione talis personæ inferendas. Sicut Maritus qui mulierem deformem, quam alioqui nullo modo duceret, constituta dote pinguissima lubens ducit, non est simoniacus vendendo sacramentum matrimonij, licet ineat coniugium ob pecuniam, sine qua non iniret illud; quia illud *ob pecuniam*, non designat pretium contractus sacramentalis, sed motiuum superandi difficultates, ab eo ineundo retracturas. De notione illius modi loquendi, *propter pecuniam*, vel *ob pecuniam*; nunc sonante pretium simoniacum, nunc indicante duntaxat finem absque simonia,

plc.

pleniùs agunt qui simoniæ crimen excutiunt. Itaque quamvis Monasterium locuples, recipiendo puellam ob pecuniam, possit turpitudine simoniaca contaminari; iuxta ea quæ mox subijciam; tamen præcisè quia ob pecuniam recipit, non contaminatur ea labe: quandoquidem Monasterium egenum, etiam si ob pecuniam recipiat, purum manet. Potest igitur (vt dicebam,) admitti puella, constituta ei certa dote ex pacto absque simonia. Et ita iam olim fuisse non receptum habetur in vita S. Ioannis Eleemosynarij c. 23. cum de Monacho colligente eleemosynas, vt posset puellam collocare in Monasterio.

140. Attendendæ tamen & exactè seruandæ sunt conditiones quas proponebam. Nempe vt Monasterium sit egenum, nec plus accipiatur, quàm præcisè ferat sustentatio vnius puellæ, alioqui acceptio erit simoniaca, sin minus nudo iure diuino & naturali, at saltem supposito iure Ecclesiastico ex cap. *quoniam*, De simonia. Scio Sotum l. 9. de Iustit. q. 6, art. 2. & Philarcum 2. p. l. 6. c. 7. *sub finem*, contrarium sentire, existimantes Monasterium locuples posse accipere quod necessarium est ad puellæ sustentationem. Sicut Sacerdos aliunde copiosus, potest ex altaris ministerio accipere sustentationem suam, absque simonia. Sed quod dixi multis confirmatur à Suare tit. 5. 3. p. d. 22. s. 5. à num. 10. & lib. de Simon. cap. 17. num. 9. Et ratio est, quia Ecclesia intuitu Religionis, & ne consortium spirituale, ac status perfectionis acquirēdæ videretur subijci pretio, edixit, vt bona Monasterij gratis conferrentur in sustentationem personæ, quæ in illud cooptatur. Si igitur collocatio talium bonorum vendatur; (vt sanè fit, si persona non admittatur ad fruendum

bonis illis absque pecunia) non modò admittetur iniustitia, (quod vnum concedit Reginal. l. 23. num. 193. estque ex natura rei perspicuum;) Sed etiam admittetur simonia, saltem supposita Ecclesiæ prohibitionē, quæ ius adimit Monasterio percipiendi quicquam ob admissionem ad participationem bonorum communium, siue ad sustentationem ex eis habendam. Igitur si monasterium locuples, dicatur pro admissione aliquid accipere titulo sustentationis, titulus est vanus atque confictus: reuera autem titulus accipiendi non potest esse, nisi admissio ad sustentationem ex bonis Monasterij accipienda, quæ est aperta simonia, qualis esset eius qui diceret se gratis conferre beneficium, sed accipere pretium pro fructibus. Affine exemplum est, eius qui diceret se à mutatorio accipere ultra sortem titulo sustentationis, non titulo mutui, quod nemo negauerit continere veram vsuram. Vt igitur pro puellæ cooptatione in Monasterium, siue in ingressu primo, siue in professionis emissionē, aliquid accipi possit; necesse est, vt Monasterium aucto numero puellarum iam admissarum, vel quas admittere consilium est, non possit præ egestate istam de qua agitur sustentare absque hoc subsidio, quæ erat prima conditio, quam dicebam obseruandam.

141. Non posse autem plus accipi, quàm exigatur ad commodam vnius puellæ in tali statu sustentationem, quæ erat conditio altera; rectè asseritur à Nauarro suprâ & à Suare c. illo 17. num. 14. & disp. illa 22. num. 12. nec non à Roderico Tom. 2. qq. Reg. q. 49. art. 1. Et ratio est, quia ea sustentatio est solus titulus iustè paciscendi aut accipiendi occasione ingressus



ingressus vel professionis, (quod in hoc negotio eodem recidit.) Si ergo plus aliquid accipiat, non accipietur titulo sustentationis sed ob admissionem in Religionem, quæ esset vera simonia. Vnde simoniacum est plus petere pro aliqua puella, quia est obscuris natalibus, ut Rodericus suprâ rectè notavit. Item quia ædificatio novi Monasterij non comprehenditur ambitu sustentationis puellarum primi Monasterij, simoniacum est, à puella admit-tenda in illud primum Monasterium aliquid exigere ut suppetant sumptus ad novum Monasterium in eadem vrbe aut in alia ædificandum, etiamsi ipsa non sit in illud novum Monasterium cooptanda. Ad hæc quia corollarium illud dotis de quo suprâ V. G. munus pro sacristia, ægrè potest reuocari ad sustentationem, periculum est ne pactio de eo munere sit simoniaca. Suares sanè lib. De Simon. cap. 17. nu. 16. existimat talia dotis superpondia, Estrau. 1. De Simon. percelli excommunicatione ipso facto incurrenda, & summo Pontifici reservata. Nam ibi Urbanus 4. præter cætera vetat intuitu ingressus puellæ, *quoscunque pastus, seu prandia, pecunias, (nempe ad modum distributionum) iocalia, aut res alias, etiam ad usum Ecclesiasticum, seu quemvis pium usum deputata, seu deputanda.* Quibus verbis excindi videntur munera, veriùs extorsiones pro sacristia, aut valetudinario, supra dotem exacta ex pacto. Quod tamen ad *prandia* attinet, non excluditur moderata Collatio pro solennitate iuxta consuetudinem. Talis enim collatio facile potest ad sustentationem reuocari, nec sublata est à Tridentina Synodo sess. 25. cap. 16. De Reform. cum sub anathemate vetuit dari quicquam Monasterio præ-

ter Nouitiæ victum. Quod ergo Urbano displicuit, fuit sordidus modus extorquendi ea prandia, qui valdè improbatur, cap. *audiuimus*, & cap. *Tua nos*, & cap. *quoniam*, de *Simon*. Facile sanè est, vt ex his dotis superpondiis, cum non dantur ex pura & plena beneuolentia, putor aliquis simoniacus inhaletur.

14<sup>a</sup>. Hic conueniri velim conscientias Præfectarum Monasteriis, & eorum qui Præfectas & Monasteria dirigunt; vere ne ob egestatem Monasterij, ad vnius puellæ candidatæ sustentationem impotentis, petantur, (verius extorqueantur) præter pinguem dotem, varia præmia, etiam si numerus Monialium, iuxta Constitutiones aut habitationis commodæ qualitatem expletus sit, nec de pluribus excipiendis, vel amplificando Monasterio fortè iam satis dilatato cogitetur. An verò ad ingluuiem nunquam exsatiandam referenda sit ista petacitas. Quid enim dicemus de quibusdam Monasteriis Regia munificentia ante multa secula opulentissimè fundatis, nec modico censu potentibus, in quæ tamen hodieque, nulla admittitur puella, quin dotem afferat propè sufficientem ad eius collocationem in matrimonio natalibus congruente? An Deus maledicit bonis per cupiditatem nulla vquam mole explendam comparatis; Ita vt quod Aggæus de frugibus contempto numine comportatis denunciabat comedentes non essent ex eis satiandi? Non videtur dubium, quin si decreta Ecclesiastica de manibus hac in parte seruandis planè puris, executioni mandarentur, benignè faceret Deus in bona voluntate sua Cœnobiis, prouideretque Antistitas, & alias census Cœnobiij administras adedò industrias, vt absque his fœdis negotiationibus

bus fieret pax in virtute Domini, & abundantia in turribus eius. Considerent, quorum interest.

143. Patere denique ex dictis potest, quid pronuntiandum sit de annuis pensionibus vitalitiis, quas Monialibus ex pacto pendi, plerisque locis inualuit consuetudo. Nam si tales pensiones necessariae sint ad puellae sustentationem, quia vel alia dos illi non est constituta, vel tam tenuis, ut egeat hoc supplemento; Tunc nihil vetabit pensionem monachio ex pacto deberi ac pendi. Salua item subordinatione ad indemnitatem paupertatis necessaria, potest pensionis illius dispensatio permitti Moniali. Itabenè inulti quos profert ac sequitur Diana Tract. De Paupertate Religiosa, resolut. 32. ac etiam Suares Tomo 4. De Religio. Tract. 9. lib. 1. cap. 12. num. 2. Rodericus tit. 3. quaest. 29. art. 12. Basilius Poncius quaest. 9. Scholast. ca. 4. Et Sanches lib. 7. In Decalo. cap. 21. & alij quos profert nu. 11. Et ratio est, quia supposito quod desint Monasterio redditus sufficientes ad providendum necessaria victui & vestitui, ac sanationi puellae si aegra fiat; supposito item quod per dotem non sit sufficienter prouisum puellae; pensio annua pertinet ad sustentationem necessariam, aequè ac dos de qua superius. Ac proinde non potest ea pensio improbari; iis tamen semper saluis quae Conc. Trident. sess. 25. cap. 2. De Regul. seruanda hac in parte mandauit. Si verò puellae sufficienter sit prouisum, per dotem quae ad eius commodam sustentationem sit satis; non apparet quomodo pactio de pensione annua praeterea danda, purgari possit labe simoniae. Deest enim titulus sustentationis. Et cum interueniat pactio, abest titulus donationis liberalis. Itaque

titulus pensionis illius, est admissio in Religionem, quæ est lepra simoniaca. Meritoque talis receptio verbo Goffridi Vindocinensis l. 2. Epist. XI. dici queat *naucularia*, quia fit pro naulo: (sicut in simili D. Augustinus serm. 1. de communi vita Clericor. negat se voluisse sintere, vt Dei Ecclesia esset naucularia) vel *institoria*, vt loquitur Hildebertus Epist. 1. quia continet mercimonium quod in tali materia improbat:ur.

144. Abscedamus, relictis foris fatuis Virginibus. Huiusmodi namque esse Montales, quæ Virginitatis professæ decus contaminant stercore auaritiæ, autor est S. Chrysostomus homil. 9. de Pœnit. Vbi erubescit quod tales aliquæ sint Deo sacræ Virgines: [Pudet me (inquit) & rubore confundor, & lachrymis, Virginem stultam audiens. Erubesco cum audio nomen, post tale virtutis luctum, & virginitatis studium. Vbi in cælum euolarant, vbi ad ipsas superiores virtutes certamen habuerant, laboresque superauerant, vbi ipsam voluptates conculcauerant; Tunc insipientes, & iure insipientes, quod maius cum vicissent, à minore victæ sunt;] nempe ab auaritia. Et inferius post expositam elegantissimè eminentiam Virginitatis professæ, conuerso ad Virginem sermone; [ Multo (inquit) rubore digna es. Voluptatem debellans, pecuniæ succubuisti. Virgo quæ vitæ renunciâs, mundo crucifixa, pecuniam amas. Vtinam virum desiderasses, idque minùs criminandum fuerat: Nam eiusdem substantiæ rem, ac materiam desiderasses.]

§. 10. *Conclusio.*

*De pia & prorsus irreprehensa Regularium negotiatione.*

**H**ACTENVS pro viribus affuso rationis & auctoritatis lumine, conati sumus collustrare, atque adeò dispellere negotium perambulans in tenebris. Sic enim S. Bernardus serm. 6. in Psal. 90. turpes quæstus, quantumvis boni specie obductos, nominat. Nunc in hac meta pro laboriosa & fructus vacua negotiatione, attingendam suscipio eam quam Naz. Orat. De S. Cypriano, vocat omnium optimam & quæstuosissimam, cui meritò omnes quantumvis Religiosi dent operam, repellendi à viro nobili, si feriantur, nec illud eius iussum expleuerint Luc. 19. *Negotiamini dum venio.*

149 Et deficit quidem Religiosos ea negotiatio quæ fit per eleemosynam & erogationem materialium facultatum in egenos. Quam esse negotiationem quæstuosissimam, ait S. Chrysost. hom. 33. ad pop. Nundinas vocat hom. 5. De Pœnit. Scitè D. Augustinus serm. 43. De diuers. cap. 10. ait, id esse *facere traiectionem*. Consonatque S. Paulinus Epist. 43. qui eleemosynam splendidissimè collaudans, ait [hanc esse mensam cœlestis Trapezitæ, thesaurum vitæ struentem, & ad margaritam negotiandam Dei fœnus exercentem.] Nullus Religiosus priuatus huic negotiationi idoneus est; quia argentum & aurum non est illi: Tamen eatenus concurrere ad hanc negotiationem potest, quatenus est terminus argitatis secularium, quorum stipe sustentatur cœlobium. Quæ negotiandi opportunitas pro insigni

Dei beneficio habenda est, quippè prouisa à Deo, vt diues hac negotiatione ditescat. [ Vicissitudine quadam ( ait S. Paulinus Epist. 12. ) copix vel inopiæ humanum genus temperatur, quod in illo inferno diuite, & supremo paupere Euāgelicus sermo patescit : vt intelligamus consilium communis Auctoris, quo diuitem pauperi, & pauperem diuiti præparauit, vt abundans egenti substantia alimonix sit, & opulento inops materia Iustitiæ ; vt fiat ( sicut Apostolus dixit ) æqualitas, & in illo seculo repensanda illis egestate præsentis opibus æternis, redundet illorum abundantia ad inopiam nostram, si nostra isthic abundantia ad illorum indigentiam commodauerit. Seminemus ergo illis carnalia, vt metamus ab illis spiritalia. Laboret nunc de terrenis manus, vt tunc de cœlestibus anima reficiatur. Spes præsens ædificet rem futuram. faciamus isthic tecta, quæ nos illic tegant : pascatur isthic pauper, vbi me diuite eget, vt me illic pascat, vbi me egente saturabitur. Videte commercium spiritale, & si potestis negate nos auaros, qui terram vendimus & tributum, vt immunitatem regni cum æternitate coëmamus. ] Verè spiritale commercium quæstuosissimum, quo pro terra cœlum rependitur, & pro rebus nihili, merces æterna. [ Quid enim ? ( aiebat S. Bernardus Epist. 24. Guillelmo Londoniensi, qui in pauperes omnia diffuderat. ) Dispersisti, dedisti pauperibus, sed pecuniam. Quid verò pecunia est, ad illam quam pro ea commutasti iustitiam ? *Iustitia*, ( inquit ) *eius, manet in seculum seculi*. Num ita & pecunia ? Quæstuosum sanè honestumque commercium : illam quæ præterit pro illa dare quæ permanet. Sic  
semper

semper tibi negotiari detur, bone & omni laude prosequende Magister.] Sed de hac negotiatione, secularium maximè propria, in Religione autem ad solos Præfectos attinente, non plura hoc loco.

146. Hærendum verò est in spiritali illa negotiatione, quæ est omnium Religiosorum, etiam priuatorum, communis. Hanc negotiationem, pro duplici Religiosorum statu, duplicem distingui posse video. Nam eorum aliqui vi proprii instituti, non sibi solùm sed etiam proximis laborant; alij sibi tantùm negotiantur. Aliqui inquam propriæ duntaxat salutis & perfectioni, dant operam: Alij à Deo vocati sunt, ut præter propriam salutem & perfectionem, cuius prima semper omnibus esse cura debet, in salutem quoque & perfectionem proximorum incumbant, sermone præsertim & prædicatione. [Collatio enim sermonis, ut pecuniæ, magno est usus, atque ea maximus in commune emolumentum negotiationis profectus paratur.] Verba sunt S. Ambrosij lucubratiuncula in Exodum, ubi *collatio*, pro Synallagmate, siue commercio sumitur, estque non mercatoria.

147. Negotiatio eorum, quos proprium institutum ad curandam aliorum quoque salutem adstringit, æstimanda est non ex ipsorum duntaxat damno si oscitanter obeatur, sed etiam ex dispendio Ecclesiæ, & animarum quas Deo lucrari oportuerat. Hoc verò dispendium, cui auertendo Christus Dominus pretiosissimum sanguinem fudit, tanti est, ut merito scrupulum omnibus per quos accidit mouere debeat: qualiangebatur S. Gregorius hom. 17. in Euang. *sub finem*, cum diceret. [Pensemus ergo qui vnquam per linguam

nostram conuersi, qui de peruerso suo opere nostra increpatione correpti pœnitentiam egerunt, quis luxuriam ex nostra eruditione deseruit, quis auaritiam, quis superbiam declinauit? Pensemus quod lucrum Deo fecimus nos, qui accepto talento ab eo ad negotium missi sumus. Etenim dicit, *Negotiamini dum venio*: Ecce iam venit. Ecce de nostro negotio lucrum quærit. Quale ei animarum lucrum de nostra negotiatione monstrabimus? Quot eius conspectui animarum manipulos de prædicationis nostræ segete illaturi sumus? Ponamus ante oculos nostros illū tantæ districtiōis diem, quo Iudex veniet & rationem cum seruis suis quibus talenta credidit, ponet. Ecce in maiestate terribili inter Angelorum atque Archangelorum choros videbitur. In illo tantum examine electorum omnium & reproborum multitudo deducetur; & vnusquisq; quid sit operatus, ostenderetur. Ibi Petrus cum Iudæa conuersa quā post se traxit, apparebit. Ibi Paulus (vt ita dicam,) mundum ducens. Ibi Andreas post se Achaiam. Ibi Ioannes Asiam, Thomas Indiam in conspectum sui Iudicis conuersam ducet. Ibi omnes Dominici gregis arietes cum animarum lucris apparebunt, qui sanctis suis prædicationibus Deo post se subditam gregem trahunt. Cū igitur tot pastores cum gregibus suis ante æterni Pastoris oculos venerint, nos miseri quid dicturi sumus, qui ad dominum nostrum post negotium vacui redimus? ] Est quod quilibet huiusmodi negotiator, ad tam præstantem, tamque Deo animas amanti gratam negotiationem vrgeat & stimulet sese, exemplo Apostolorum, quos S. Augustinus serm. 29. De Sanctis vocat *Splendissimos negotiatores*. Strenuissimè enim sunt negotiati



tiati; & ratione eorum, Mulier fortis S. Ecclesiā gustauit & vidit quod bona esset negotiatio. Sed potentissimum præ omnibus est exemplum Christi, qui tantoperè laborauit ea negotiatione quam ad nos lucrandos cum Patre iniuit. Quis enim Dominum in quæstu animarum aded negotiosum agnoscens, torpere sustineat? Videtis quæ §. 2. ratione 9. dicta sunt, De Christi, ac ipsius etiam Dei negotiatione, vt simus lucrum Dei, quod est summum & vnicum bonum nostrum.

148. Iisdem exemplis maximè præterea vrgemur ad negotiandum salutem nostram, quæ cuius nostrum præ cæterorum omnium salute, debet maximè chara esse. Expendebat in hanc rem Christi labores S. Bernardus serm. de quinque Negotiationibus. [ Verbum Patris ( inquit ) Vnigenitus Dei filius, Sol Iustitiæ, summus ille negotiator, de vltimis cælorum finibus nostræ redemptionis pretium apportauit. Fidelis ista negotiatio & omni acceptione dignissima, in qua Rex filius Regis efficitur negotiatio, aurum pro plumbo tribuitur, pro peccatore donatus est iustus. O quàm indebita miseratio, quàm gratuita & sic probata dilectio, quàm inopinata dignatio, quàm stupenda dulcedo, quàm inuieta mansuetudo, quàm vilis negotiatio, vbi filius Dei pro seruo traditur, pro creatura creator occiditur, pro mancipio Dominus condemnatur. Tua sunt hæc Christe opera, qui de lumine cæli ad tenebras inferni, à dextra maiestatis ad miseriam humanitatis, à gloria Patris ad mortem crucis descendisti, infernum illustrando, hominem redimendo, superando mortem & mortis auctorem. Vnus es,

& secundum non habes ; quem ad nos redimendum propria benignitas inuitauit , misericordia traxit , veritas quâ te venturum promiseras compulit , puritas vteri virginalis suscepit salua virginitatis integritate , potentia eduxit , obedientia in omnibus deduxit , patientia armavit , charitas verbis & miraculis manifestauit. Absint procul negotiatores terræ Theman , recedant filij Agar , qui exquisierunt prudentiam. Elongentur à me Gigantes à seculo nominati , qui ab initio fuerunt staturâ magnâ , cientes bellum. Non hos elegit Dominus , neque viam disciplinæ inuenerunt , propterea perierunt , sed dedit eam Iacob puero suo , & Israel dilecto suo. Abscondisti enim hæc Domine à sapientibus , & prudentibus , Gigantibus & nominatis , qui magni facti sunt videlicet in oculis suis , & reuelasti ea paruulis & humilibus tuis. Libenter amplector negotiationem tuam , quia negotium meum est. Hæc mercimonia cum summa suauitate ruminat anima mea. Non solum autem ruminat , sed & reuocat ruminationem tuam , quia & intelligit quæ diligit , & commendat memoriæ quæ elegit. In his negotiationibus præcipis esse animam meam , vt fiat nauis institoris de longè portans panem suum : negotiatur donec venias , venienti latus occurram , & vtinam audiam , *Enge serue bone*, Tui sunt cœli , & tua est terra , in regionibus tuis negotiabor igitur securus , te solum habens in itinere ducem , in periculis protectorem , consortem in tribulatione. ] Percurrit quinque regiones in quibus celebrantur nundinæ , estque fructuosæ negotiationis vbertas. Leguntur ista iisdem ex parte verbis , & eadem prorsus sententia , apud Petrum

Damiani

Damiani serm. De S. Nicolao, qui est numero 59. Concluditur verò apud S. Bernardum in hunc modum. [Cum ergo mente perceperis tam pretiosas nundinas, mercimonia tam præclara, construe sarcinam tuam, amorem Dei. Vidisti regiones, animaduertisti nundinas, sarcinam construxisti, & beatus es. Negotiare ergo dum veniat Dominus Deus tuus, ut ei dicere possis; *Domine quinque talenta tradidisti mihi, ecce alia quinque superlucratus sum*, & audire mercaris, *Intra in gaudium Domini tui.*]

149. Hæc negotiatio omnibus secularibus, & vtriusque sexus Religiosis est consentanea, sed maxime Religiosis & sacris Virginibus. Tantum enim abest, ut ab hac negotiatione arceantur interdicto vlllo Ecclesiastico, ut potius non aliam ob causam vetentur implicari negotiationi bus secularibus, quam ut isti diuinæ & supernaturali denoperam, pertentantes omne genus industriæ, ut verum ac summum lucrum consequantur. [Sicut enim (ait ad Monachos suos S. Macarius hom. 33. *ferè initio*) Mercator non vnicum duntaxat lucrandi genus excogitat, sed qua ratione vndecunque augeat & cumulet: & ab hac in aliam traducitur industriam; & inde aliud iter arripit, ac transfiliens semper ab eo quod nihil confert, currit ad id quod est quæstuosius: Haud secus etiam nos, animam nostram variè necnon artificiosè præparabimus, quoad verum ac magnum lucrum consequamur, nempe Deum.]

150. Præ hoc tanto lucro, nihili esse facienda dispendia omnia, contestabatur Christianos Tertullianus lib. ad Marty. cap. 2. [Etsi aliqua (inquit,) ami-

sistis vitæ gaudia , negotiatio est aliquid amittere ,  
vt maiora lucreris. ] At quod lucrum cum eo con-  
ferri possit , quo Deus ipse sit nobis quæstus ac lu-  
crum ?

Hortatur in hunc finem S. Paulinus Epist. 4. vt  
[ simus naues qui illam æmulemur , quæ Salomoni  
quondam electum aurum , & opes Tyrias afferebat.  
Tantò autem studiosius & quæstuosius nostra nego-  
tiatio debet agitari , quantò Rex noster æternus  
Iesus illo temporali Salomone præstantior est. Ecce  
enim ( inquit ) major Salomone hîc , qui non con-  
teret nos Spiritu vehementi inter naues Tharsis , si  
illi , bono actu vitæ nostræ lucrum ( quod est pre-  
tiosissimum Deo mercimonium ) conuehamus : vt  
suum ipse pretium accipiat à nobis ; quia ipse est  
margarita , quam tota spiritualis istius mercatu-  
ræ conuersatio sibi nititur comparare. ] Vocantur  
planè ad hanc negotiationem Religiosi sexus vtrius-  
que. Eoque ex capite Petrus Damiani Opusc. 50.  
*in fine* celebrabat Blancam ex Comitissa Monialem,  
dicens de ea ; [ Enimverò tanquam perita negotia-  
trix nundinis intenta vœnalibus , proiecisti mun-  
dum vt acquireret cœlum ; Præuenisti mortem vt  
sententiam mortis euaderes , elegisti pauperiem , vt  
diuitiarum non pereuntium copiam possideres. ]  
Idem Opusc. II. cap. 19. pangens encomium vitæ  
Religiøsæ ; [ O cella negotiorum cœlestium apo-  
theca , in qua videlicet , illarum mercium summa  
reconditur , quibus terræ viuientium possessio com-  
paratur. Felix commercium , vbi pro terrenis cœ-  
lestia , vbi transitorijs commutantur æterna. Felices  
inquam nundinæ , vbi venalis æterna vita proponi-  
tur , ad quam emendam etiam minimum quid solum  
sufficit ,

sufficit, quod habetur. Vbi brevis afflictio carnis; erit cœleste conuiuium, & exiguae lachrymæ risum pariunt sempiternum; possessio terrena distrahitur, & ad æternæ hæreditatis patrimonium peruenitur.] Negotiatio ista, initur à nobis cum Deo; rectéque Guericus serm. 4. de Natiu. Dom. censuit pudendum esse, quod Religiosorum plerique, quasi in negotio essent circumuenti à Deo, minimúmque illud quod ab eis exigitur, magnum aliquid foret, resiliant toties à conuentis, eosque penè pœniteat complaciti, tabulas quoque emptionis iam conscriptas, propè rescissas velint.

151. Quanto æstu par est nos concitari ad hanc spirituales in nobis ipsis solam verè quæstuosam negotiationem, cum filij huius seculi, qui volunt in generatione sua prudentes videri, quorum plures sunt negotiationes quàm stellæ cœli, (vt dicitur Nahum. 3. benéque ibi expendit Ribera num. 34.) tanta auiditate tantóque ardore erga suas vanas & friuolas negotiationes ferantur, nihil inuenturi in manibus suis, cum dormierint somnum suum, ac ferè etiam priusquàm dormiant? Depingit perpulchrè vanos & callos horum Negotiatorum labores S. Bernardus sermone illo de 5. Negotiationibus, his præter cætera. [Aspicio genus humanum ab ortu Solis vsque ad occasum, huius mundi nundinas perambulare: alios diuitias quærere, alios honoribus inhiare, alios fauoralis auræ suauitate rap-  
tari. Sed quid de Diuitijs? Nónne cum labore acquiruntur, cum timore possidentur, cum dolore amittuntur? Thesaurizas, & ignoras cui congregabis eas. Vide quantum laborem pro perituris diuitijs assumpisti. Transis maria, & alium tibi aperis or-

bem nauigando , secundum sapientiam tribus di-  
 gitis distans à morte : patriam fugis , relinquis  
 parentes, diuelleris ab vxore, filios nescis, & omniũ  
 necessitudinum oblitus, quæris vt acquiras, acquiris  
 vt perdas , perdis vt doleas. *Filij hominum vsquequò  
 graui corde? ut quid diligitis vanitatem , & quaritis  
 mendacium?* Quæ est ista dementia filij Adam, cir-  
 cuire maria , perambulare terras , rapi extra mun-  
 dum , in laboribus plurimis , in vigilijs multis , in  
 ieiunijs crebris, in mortibus frequenter. Ecce quales  
 diuitiæ. Sed quid de honoribus? in sublimi loco posi-  
 tus es, ducem te constituerunt. Vide si non à Deo iu-  
 dicandus es, ab hominibus spectandus, ab omnibus  
 lacerandus. Si miles es, excubas ante limina Princi-  
 pis, vt principatum acquiras, & ferrato vestiris ami-  
 ctu, propiores vulneri , quàm honori, morti quàm  
 vitæ , periculo quàm præmio. Si de sorte Domini;  
 Nonne Episcopus Romanum Pontificem , Archi-  
 diaconus vel Diaconus Episcopum pertimescit?  
 Vide etiam vtrum excusseris manus tuas ab omni  
 munere , ne cum Simone audias ; *Non est tibi pars  
 neque fors in sermone isto , quia voluisti domum Spiri-  
 tus Sancti pecunia possidere.* Nihil ad nos de Recto-  
 ribus Ecclesiæ iudicare , videant ipsi amici sponsi  
 cum de sponsa cœperit exigere rationem , qui iudi-  
 cat orbem terræ in æquitate. Nunquid in honore  
 sine dolore , in prælatione sine tribulatione , & in  
 sublimitate sine vanitate esse quis potest? Ecce qua-  
 les honores ? Quid autem de gloria? Gloria tibi  
 vnde, fœtide puluis , limus terræ, vas in contume-  
 liam? Non tibi non tibi sed nomini Domini da glo-  
 riam : Illi permitte gloriam suam, qui gloriosus  
 est in sanctis suis ; Illum lauda , quem laudant  
 Angeli

Angeli in cœlis. Nunquid & ipsa inanis gloria, quæ nihil est aliud quàm aurium inflatio vana, quæ vix haberi potest sine inuidia? Respice quos antecedis, & cogita quia omnibus inuidiæ semina præbuiſti. Omnes ergo aduersum te toruis luminibus inflammantur, tua fœlicitate torquentur, tua vruntur gloria. Ecce vnde gloriosus, inde odiosus; vnde sublimis, inde humilis: Vnde sollicitus, inde securus. Vides ergo quàm vanè conturbatur omnis homo. Hæc sunt mercimonia quæ inueniuntur in regione dissimilitudinis.] Inſeit ex caſſo hoc tam multiplicium ſeculi negotiatorum labore S. Bernardus; [ Prudens ergo negotiator, qui videt in delicijs laborem, in honoribus pœnam, inuidiam in gloria, facit ſarcinam ſuum, mundi contemptum, & fugit.] Quid fugit? Vtique tam caſſos labores, & eorum materias, quântũuis ex eis ſperetur quæſtus, reuera tormentum animi continuum, & iugis vexatio.

152. Depretiabat eo nomine negotiationes omnes Eucherius, aurea ad Valerianum Epiſtola, quodd vitam ſemper irrequietam, & vix vitam reddant. Itaque cognatum, quem ad ſeceſſum Religioſum, & portum tranquillitatis à ſeculi fluctibus abſtrahere ſatagebat, his præter cætera verbis alloquitur. [ Ego tamen deſiderauerim vt hanc (vitam ſeculi negotioſam) pro experimentis ſui habeas vt moleſtiſſimam, atque incertis fatigationibus inquietam, ſicuti eſt, iudices; eâmq; cum occupationibus ſpernas ac reſpuas. Abrumpatur illa interminabilis ſecularium negotiorum catena, & ille de neceſſitatibus multis, vnus per totam vitam labor. Dirumpamus inanium curarum vincula, quorum

succedentibus sibi nexibus implicaris , in quibus semper occupatio nostra quasi incipit. Remoueatur illæ tam vacuæ , quàm cohærentes sibi causæ , in quibus quoad viuitur , studium mortalium , dum subinde negotijs inchoatur , nunquam finitur : quarum infatigabilis intentio , iam breuem & arctam per se vitam hanc , etiam arctissimam reddit : per quæ etiam nunc vana gaudia , nunc acerbi mærores , nunc anxia vota , nunc suspecti metus veniunt. Abjiciantur postremò illa omnia , quæ præsentem hanc vitam faciunt breuem occupationi , longam dolori.

153. Vch eis , qui cùm seculi negotiationes aspernati secesserint in Religionis portum , vt securi à turbine , procul à fluctibus tranquillam & Deo soli negotiolam vitam exegerint , obliiti propositi , ex ipso portu reuoluuntur in fluctus. Qui seculares negotiationes ritè abiectis malè resumentes , contra diuinum mandatum Domum Dei faciunt domum negotiationis. [ Fit Religio domus negotiationis ( ait De Folieto lib. 1. De Claustro Animæ cap. 8. ) quando pro ijs quæ agimus , humani fauoris forum frequentamus , & ibidem ementes ac vendentes , laudem pro opere , quasi stulti mercatores recipimus. ] Fit Religio domus negotiationis , cùm per priuata munera tentatur aditus ad publica. Fit Religio domus negotiationis , cùm dimisso sancto otio , quo vacandum erat Deo , turpes quæstus captantur , per dedecentia & à religioso statu abhorentia mercimonia atque negotia. [ Quapropter ( aiebat iustus Abbas sermone ad suos Cistercienses , cùm per alia , tum nominatim per negotiationes secularium proprias , aut laban-

tes,



res, aut collapſos, ) moneo & rogo Fratres chariſſimi, vt mundum quem reliquimus, ſub prætextu quarumlibet vtilitatum non reſumamus. Non poſſumus diſſimulare, quia nihil opertum quod non reueletur, & iuxta vulgare prouerbium; *Si eſt qui faciat, eſt & qui dicat. Aures ſaltus habet, planities oculos.* Itaque arctum & glorioſum iter, quod ſingulari præ cæteris voto & habitu ingreſſi ſumus, ſingulari præ cæteris ſtudio teneamus, non redeuntes retrò; nec declinantes ad dexteram vel ad ſiniſtram. Retrò redit, qui vitam Monachi cum habitu deſerit; Ad dextram declinat, qui habitu retento aperte malum facit. A quo tripartito errore vos cuſtodiat Chriſtus Dominus, qui eſt via, veritas, & vita; Viuens & regnans cum Patre & Spiritu Sancto, per omnia ſæcula ſæculorum. Amen.]

Hæc clauſula quia pia & religioſa eſt, mea item eſto. An verò eadem me in hac meta ſors manet, quæ Iuſtum in ſermonis ad ſuos negotiatores concluſione? Nam ſubiecta ibi Notatio, ſic habet: [Pauci reſponderunt, A M E N. Erant enim oculi eorum indignatione grauati, & ignorabant quid reſponderent ei. Tunc I V S T V S ait: *Meliora ſunt vulnera diligentis, quàm fraudulentæ oſcula blandientis.*]

C R A S A L T E R A N I T T A M.

## LECTORI.

**C***VM* hac opella ab Authore conscripta est, nondum ad eum peruenerat Decretum Sacræ Congregationis Visitationis Apostolicæ, quod conditum esse haud falso rumore inaudiuerat, ut meminit S. initio. Nunc quando hoc decretum ad manus nostras deuenit, cuius Iustitiam & honestatem, vniuersa hæc lucubratio demonstrat, visum est è re Lectoris, illud hic representare, ut sensus Authoris, cum sensu Excubitorum sacrorum, planè consentire deprehendatur : sic habet.

## DECRETVM

Sacræ Congregationis Visitationis Apostolicæ S. D. N. Urbani diuina prouidentia Pæpæ V III. constitutæ, contra Religiosos, & Ecclesiasticos quoscunque quæstuosas artes exercentes pro secularibus.

**C***VM* non deceat eos, qui diuino ministerio adscripti sūt, in secularibus negotiis nimium esse implicatos quæstuosas artes exercendo

xercendo Sacra Congregatio Apostolicæ Visitationis ad tollendos varios abusus, qui in diuersis Vrbis, eiusque districtus Monasteriis irrepsérunt, dum iidem Religiosi per se, vel à Communitatibus, aut alijs secularibus requisiti diuersas mechanicas, seu venales artes exercere student, quod omninò ab Ecclesiastica disciplina alienum esse debet, cùm præsertim in graue hoc artium, & pauperum Artificum, earumquè familiarum in Vrbe, eiusquè districtu existentium præiudiciū cedat.

Statuit, decreuit, atque inhibendo mandauit omnibus tam superioribus quorumcumque Ordinum, vel Congregationum, Monasteriorum, Conuentuum, Collegiorum, Domorum, ac locorum Regularium in Vrbe, eiusque districtu existentium; quàm particularibus Religiosis, & Ecclesiasticis quibuscumque, ne impostèrum, siue Religionis nomine, siue particulari audeat, & præsumat per se, vel alios exercere in suis Conuentibus, aut alibi in quocumquè loco vllam venalem artem, siue Aromatariam, Pistoriam, Lanificium textrinum, aut aliam quamlibet præterquam pro suis Religiosorum, aut Alumnorum vsibus, nec vllò modo secularibus, aut alijs Religiosis, & Ecclesiasticis, phar-

maca, panem, carnes, aut alia quælibet opificia quomodocumque elaborata, & ornata vendere etiam prætextu amicitia, & familiaritatis, absque speciali licentia in scriptis obtinenda, etiam ab ijs Religiosis, quibus ex particulari suæ Religionis instituto id aliàs liceret.

Si quis verò ipsorum aliquid contra hoc decretum quoquomodo facere, vel moliri præsumpserit, ipso facto poenam suspensionis à diuinis, priuationis omnium officiorum, quæ tunc obtinebit ac perpetuæ inhabilitatis ad alia de cætero obtinenda, vocisque actiux, ac passiuæ absque alia declaratione incurrat.

Et nihilominus contra eos Generalis Thesaurarius procedat tanquàm contra illicitos negociatores, confiscando omnia lucra, & capitale, ad dictas artes, & opificia spectantia.

Non obstantibus, quoad superscripta omnia, & singula in præsentì decreto contenta, Cõstitutionibus, & ordinationibus Apostolicis in fauorem quarumcumquè personarum, atque Ordinum, siue Congregationis Casinensis, fratrum Prædicatorum, Societatis Iesu, Minimorum, aut aliorum quorumcumquè, tam Mendicantium, quàm non Mendicantium,

dicantium, Congregationum, Societatum, ac cuiuslibet alterius instituti, etiam necessariò, ac in indiuiduo exprimendi Ecclesiarum, Monasteriorum, Conuentuum, Collegiorum, & aliorum quorumcumquè Regularium locorum, necnon illorum etiam iuramento, confirmatione Apostolica, vel quauis firmitate alia roboratis statutis, & consuetudinibus, etiam immemorabilibus, priuilegiis quoque, indultis, & litteris Apostolicis, quibus quoad ea, quæ præsentibus aduersantur, illis aliàs in suo robore permansuris; Sacra Congregatio Sanctitatis Sux auctoritate specialiter, & expresse derogat, cæterisque contrarijs quibuscumque.

Et ne præmissorum ignorantia à quâ quam prætendi possit, voluit eadem Sacra Congregatio, vt præsentibus ordinationes in Valuis Basilicarum Sancti Iohannis Lateranensis, & Principis Apostolorum de Vrbe, & in acie Campi Floræ, vt notis est affixæ, omnes ad quos pertinet ita arctent, & afficiant, ac si vnique personaliter intimatæ fuissent. Vtquè earundem præsentium transumptis etiam impressis, manu alicuius Notarij publici subscriptis, & sigillo Personæ in Dignitate Ecclesiastica constitutæ munitis, eadem prorsus fides adhibeatur,

quæ præsentibus adhiberetur, si forent exhibitæ, vel ostensæ. Datum Romæ die 29. Augusti 1637.

*I. B. Episc. Cam. Vicesg. & Secret.*

*Odoardus Tibaldescius eiusdem  
Visitationis Apostolica Not.*

Die, & Anno supradictis affixum, & publicatum fuit supradictum decretum ad Valuas Cam. Apost. & in Acie Campi Floræ, & alijs locis solitis, & consuetis, ut mos est, per me Petrum Paulum Desiderium Apost. Cursorem.

Pro D. Magistro Curforū Andreas Scalmanus Curs.



786719

